


# গুজরাত ফাইলস

এক ভয়ংকর ষড়যন্ত্রের ময়নাতদন্ত



রাণা আইয়ুব

ভাষান্তর : অসীম চট্টোপাধ্যায়



# গুজরাত ফাইলস

এক ভয়ংকর ষড়যন্ত্রের ময়নাতদন্ত





# গুজৰাত ফাইলস

এক ভয়ংকৰ ষড়যন্ত্ৰৰ ময়নাতদন্ত

ৰানা আইয়ুব  
ভূমিকা: বিচাৰপতি বি.এন. শ্ৰীকৃষ্ণ

ভাষান্তৰ  
অসীম চট্টোপাধ্যায়



সেতু প্রকাশনী

**Gujarat Files**  
**Ek Bhayankar Sharojantrer Moinatadanta**  
**Rana Ayyub**  
**Translated by**  
**Asim Chattopadhyay**  
**ISBN: 978-93-80677-99-6**

প্রচ্ছদ : দিলীপ ঘোষ

প্রথম সংস্করণ : জানুয়ারি ২০১৭

প্রথম পুনর্মুদ্রণ : ডিসেম্বর ২০১৭

© মূল গ্রন্থ *Gujarat Files: Anatomy of a Cover up*-এর স্বত্ব লেখক

© বাংলা অনুবাদের গ্রন্থস্বত্ব সেতু প্রকাশনী

প্রকাশক :

অর্চনা দাস ও সুব্রত দাস

সেতু প্রকাশনী-র পক্ষে

১২/এ, শংকর ঘোষ লেন, কলকাতা - ৭০০ ০০৬

ফোন : +৯১ ৩৩ ২২১৯ ০৭০৪, +৯১ ৯৪৩৩০ ৭৪৫৪৮

বিক্রয়কেন্দ্র :

‘বুকমার্ক’, ৬ বঙ্কিম চ্যাটার্জি স্ট্রিট, কলকাতা - ৭০০ ০৭৩

২, শ্যামাচরণ দে স্ট্রিট, কলকাতা - ৭০০ ০৭৩

e-mail : [setuprakashani@gmail.com](mailto:setuprakashani@gmail.com)

Website : [www.setuprakashani.com](http://www.setuprakashani.com)

দাম : দুশো টাকা

অঙ্করবিন্যাস :

‘সাহিনোস্যুর’, ২৬, যোধপুর গার্ডেন, কলকাতা - ৭০০ ০৪৫

মুদ্রক :

ইমপ্রিন্টা, ১৪৩/২বি, এ.পি.সি. রোড, কলকাতা - ৭০০ ০০৬

## বিষয়সূচি

ভূমিকা	১
মুখবন্ধ	৩
প্রথম পরিচ্ছেদ	৫
দ্বিতীয় পরিচ্ছেদ	১২
তৃতীয় পরিচ্ছেদ	জি.এল. সিংঘল ২৭
চতুর্থ পরিচ্ছেদ	রাজন প্রিয়দর্শী ৪২
পঞ্চম পরিচ্ছেদ	মাকের সময়ের কথা ৫৬
ষষ্ঠ পরিচ্ছেদ	অশোক নারায়ণ ৬২
সপ্তম পরিচ্ছেদ	জি.সি. রাইগার ৮৫
অষ্টম পরিচ্ছেদ	পি.সি. পাস্তে ৯৮
নবম পরিচ্ছেদ	চক্রবর্তী ১১৬
দশম পরিচ্ছেদ	মায়া কোদনানি এবং অন্যান্যরা ১২৮
একাদশ পরিচ্ছেদ	উন্মোচন ১৫৫
	পাদটীকা ১৫৮





## ভূমিকা

হিরণ্ময়েন পাত্রেণ সত্যসাপিহিতং মুখ্যং ।

তত্ত্বং পৃথগ্গপাব্ধু সত্যধর্মায় দৃষ্টয়ে ॥

সত্যের মুখ আবৃত আছে সোনার পাত্রে;

হে পৃথগ্গ, সত্যময় ধর্মের দর্শনের জন্য তা অনাবৃত করো ।

—ঈশভাষ্যোপনিষদ

মার্ক টোয়েন বিদ্রূপ করে বলেছিলেন, ‘গল্পকাহিনির চেয়ে সত্য বিচিত্রতর, কিন্তু তার কারণ হল গল্পকাহিনিকে কিছু সম্ভাব্যতার মধ্যে আটকে থাকতে হয়, সত্যের সে বালাই নেই।’ তবে সত্যের প্রকৃতি কী সে-প্রশ্ন বহু যুগ ধরে ভাবিত করেছে সারা পৃথিবীর দার্শনিকদের। খ্রিস্টের শেষ ভোজের সময় যে-খালায় খ্রিস্টের রক্ত ধরা হয়েছিল, তার মতোই সত্যকেও বিভিন্ন সময়ে ও বিভিন্ন অঞ্চলে বিভিন্ন জন ভিন্ন ভিন্ন ভাবে দেখেছেন। একাগ্রচিন্তে সত্যকে খুঁজতে চাইলে দুঃখ-কষ্ট-যন্ত্রণাময় নিঃসঙ্গ পথ ধরেই চলতে হবে, কারও কাছে সাহায্য পাওয়া যাবে না, পথ দেখানোর জন্য থাকবে শুধু নিজের বিবেক।

গুজরাতে ২০০২ সালের মর্মান্তিক ঘটনা এবং ভূয়ো সংঘর্ষের কল্পকাহিনি সম্পর্কে এই বইতে বর্ণিত সত্য পড়ে চমৎকৃত হতে হয়। লেখিকার মতে, এক দীর্ঘ স্টিং অপারেশনের সময় বহুল-ব্যবহৃত একটি গোপন ক্যামেরা ও একটি গোপন মাইক্রোফোনের সূত্রে প্রাপ্ত বিষয়গুলি উপস্থাপনকারী এই বই থেকে এ-বিষয়ে বহু কিছু জানতে পারবেন পাঠক। এই বইতে উপস্থাপিত বিষয়গুলি সত্য নাকি নিছকই ঘটনার আপাত রূপমাত্র, তা বিচারের ভার পাঠকের।

ঘটনার বিবরণের মধ্যে প্রথিত কথোপকথনগুলি পড়তে চমৎকার লাগে। এখানে বর্ণিত তথ্যগুলির বিশ্বাসযোগ্যতা বিচার করা এবং আইনের শাসনের প্রতি দেশের নাগরিকদের আস্থা পুনরুদ্ধারের উদ্দেশ্যে প্রয়োজনীয় ব্যবস্থা গ্রহণের জন্য

নিজের গ্রহরী হিসেবে আইনের শাসন এবং সাংবিধানিক কাঠামোকে ব্যবহার করাটা রাষ্ট্রের কর্তব্য।

১৯৯২ সালের ডিসেম্বর থেকে শুরু করে ১৯৯৩ সালের জানুয়ারি মাস পর্যন্ত মুম্বইয়ে যে-সাম্প্রদায়িক দাঙ্গা ও হিংসাত্মক ঘটনাগুলি ঘটেছিল, সে-সংক্রান্ত তদন্ত কমিশনের সূত্রে অর্জিত যন্ত্রণাদায়ক অভিজ্ঞতা এবং এই ধরনের দাঙ্গার শিকারদের প্রতি স্পষ্টত প্রতীয়মান উদাসীনতা দেখে মনে হয়, রাষ্ট্র ও সাংবিধানিক কার্যকর্তাদের এখনই এইসব দাঙ্গার কারণ অনুসন্ধানে আরও গুরুত্ব দিতে হবে এবং পুনরাবৃত্তি বন্ধ করার জন্য উপযুক্ত ব্যবস্থা গ্রহণ করতে হবে।

এই বইতে বর্ণিত সমস্ত তথ্য যথার্থ কিনা তার মূল্যায়ন করা সবার পক্ষে সম্ভব না-ও হতে পারে। কিন্তু লেখিকা যা সত্য বলে মনে করেছেন তার মুখোশ উন্মোচনের জন্য তাঁর সাহস ও তন্নিষ্ঠতার প্রশংসা করতে প্রত্যেকেই বাধ্য হবেন। তাঁকে এবং অন্তর্ভুক্তমূলক সাংবাদিকতার ক্ষেত্রে তাঁর সাহসী প্রচেষ্টাকে আমি সম্মান জানাই। ক্রমবর্ধমান অসততা, প্রতারণা ও রাজনীতিকীকরণের এই যুগে এ-ধরনের সাংবাদিকতার প্রয়োজনীয়তাও ক্রমশই বেড়ে উঠেছে।

মুম্বই

১১ এপ্রিল, ২০১৬

বি.এন. শ্রীকৃষ্ণ

## মুখবন্ধ

ক্ষমতার বিরুদ্ধে মানুষের সংগ্রাম হচ্ছে  
বিস্মৃতির বিরুদ্ধে স্মৃতির সংগ্রাম।

—মিলান কুন্দেরা

২০০৭ সালের কোনো-এক সময়ে একটি নিউজ চ্যানেলের জন্য রিপোর্টিং করাটা আমার জীবনের সঙ্গে অঙ্গাঙ্গিভাবে জড়িয়ে গিয়ে দগদগে স্মৃতি হয়ে রয়ে গেছে। তিন বছরের একটি বাচ্চা মেয়েকে ধর্ষণ করা নিয়ে রিপোর্টিং করতে হয়েছিল আমাকে। মিউনিসিপ্যাল হাসপিটালে ভর্তি ছিল মেয়েটি। একটা ট্রাফিক সিগন্যালে চোরাই বইপত্র বিক্রি করতেন তার বাবা-মা। সম্ভবত ড্রাগের নেশায় আচ্ছন্ন থাকার দরুন নিজেদের পাঁচ মেয়ের একজনের যত্নশীল ও দুর্দশা বুঝে ওঠার অবস্থায় ছিলেন না তাঁরা। মেয়েটির মুখে আর শরীরে প্রহারজনিত কালশিটের দাগ। ছোট্ট, নিষ্পাপ শরীরের সর্বত্র বর্বরতার চিহ্ন আঁকা। রিপোর্টের টেপটা দিম্মির স্টুডিয়োয় পাঠিয়ে দিয়ে রাত দুটোয় বাড়ি ফিরলাম। মনে হল দুষ্কৃতিটি ধরা পড়েছে কিনা তার খোঁজ নেওয়ার জন্য ওই মাঝরাতেই তদন্তকারী অফিসারকে মেসেজ পাঠানো দরকার। মেয়েটি সুস্থ হল কিনা জানার জন্য পরেরদিন হাসপাতালে গেলাম। নানারকম সংক্রমণ ঘটেছে তার শরীরে, ক্ষতস্থানে মাছি বসছে, ছোট্ট কবজিতে হুঁচ ফোটানো রয়েছে। তার মা-বাবাকে চোখে পড়ছে না। অফিসে পৌঁছে আমার উর্ধ্বতনকে বললাম বিষয়টায় যথেষ্ট গুরুত্ব দেওয়া দরকার, যাতে অপরাধী ধরা পড়ে এবং তার বিচার হয়। একটু হেসে নিজের ল্যাপটপের দিকে তাকিয়ে রইলেন তিনি। মুশলখারে বৃষ্টি পড়ছে। আমার বস বললেন, এর বদলে আমি যেন মিলান সাবওয়ে আর বৃষ্টির দিকে মন দিই এবং বন্যার কিছু ভালো ছবি জোগাড় করি।

‘এ-সব করা আমার পক্ষে সম্ভব নয়’, মিলান সাবওয়ের দিকে যাওয়ার পথে মাকে ফোন করে চেষ্টা করে বললাম আমি। মুম্বইয়ের বিখ্যাত বর্ষার মরশুমে এই জায়গাটা আলোকচিত্রীদের খুব প্রিয় হয়ে ওঠে। বুকের মধ্যে যেন টেকির পাড়

পড়ছে। সারাদিন কিছু খেতে পারলাম না। ঘটনার তিন দিন পর পারিবারিক চিকিৎসক আমাকে ঘুমের ওষুধ দিলেন। সম্পাদককে ফোন করে বললাম, আমার এক সপ্তাহ ছুটি চাই। ছোট্ট মেয়েটির ঘটনার আগে স্টুডেন্টস ইসলামিক মুভমেন্ট অফ ইন্ডিয়া (সিমি) সম্বন্ধে একটা অন্তর্ভুক্তমূলক কাজ করছিলাম আমি। কাজটা করার সময় সাংবাদিকতার ক্ষেত্রে নীতিবোধ নিয়ে সম্পাদকের সঙ্গে জোরদার তর্ক হয়েছিল আমার। আমার কথাগুলো মন দিয়ে শুনে তিনি এমন কিছু বলেছিলেন, যা আমি আজও ভুলতে পারিনি।

যে-বিষয় নিয়ে কাজ করা হচ্ছে তা থেকে নিজেকে বিচ্ছিন্ন করে নেওয়ার কৌশল আয়ত্ত্ব করা দরকার একজন ভালো সাংবাদিকের এবং তাকে বাস্তববাদী হতে হবে। এই কৌশল আয়ত্ত্ব করে উঠতে না-পারার জন্য আজও দুঃখ হয় আমার। সেটা আরও এই কারণে যে এই কৌশল প্রায়শই ব্যবহৃত হয় বাণিজ্যিক ও রাজনৈতিক শক্তিগুলির নির্দেশে কোনো ঘটনাকে ধামাচাপা দেওয়ার অজুহাত হিসেবে।



## প্রথম পরিচ্ছেদ

২০১০-এর গ্রীষ্মকালটা সাংবাদিকতার নতুন সংজ্ঞা ঠিক করে দিল আমার জন্য। নিজেকে একজন পরিশ্রমী, মধ্যমেখার সাংবাদিকই মনে করতাম আমি, যে তার পুরোনো ঘরানার সাংবাদিক পিতার কাছ থেকে কিছু আদর্শ পেয়েছে। কিন্তু ওই সময়ে নিজেকে এমন এক সংকটের মুখোমুখি দেখতে পেলাম, তেমন সংকটে যেন কোনো সাংবাদিককে পড়তে না হয়।

অসুস্থতাজনিত দীর্ঘ ছুটির পর ২০১০ সালের কোনো এক সময়ে আবার তেহেলকা-র কাজে যোগ দিয়েছি। সারা দেশের চিকিৎসকরা সঠিকভাবে আমার রোগনির্ণয় করতে পারেননি। কিছুদিন আগেই গড়চিরোলির নকশালপন্থী কার্যকলাপের কেন্দ্রভূমিতে একটা রিপোর্টিংয়ের কাজ সেরে ফিরেছি। তার ঠিক পরেই ঘটল আমার জীবনের সবথেকে মর্মান্তিক একটা ঘটনা। খুন হয়ে গেল আমার অত্যন্ত প্রিয় বন্ধু শাহিদ আজমি। ফৌজদারি আইনে দেশের সবথেকে বিচক্ষণদের একজন আজমি-র খুব গুরুত্বপূর্ণ ভূমিকা ছিল আমার জীবনে। যেদিন সন্ধ্যায় ও খুন হয়, সেদিনই ওর সঙ্গে আমার দেখা করার কথা ছিল সেইসব আদিবাসী ও বুদ্ধিজীবীদের মামলা নিয়ে আলোচনা করার জন্য, যাদের নকশাল নামে চিহ্নিত করেছে সরকার এবং মিথ্যে মামলায় যারা জেলে পচছে।

কিন্তু ভবিতব্য অন্য কিছু ভেবে রেখেছিল। ভাইঝির আবদারে বাড়িতেই থেকে যেতে হল আমাকে। সেদিন ওর সতেরোতম জন্মদিন। এদিকে আমার ফোনে কয়েক ডজন মিসড কল এসেছে, মেসেজ পাঠিয়ে অনেকে জানতে চেয়েছে ‘শাহিদের ব্যাপারে শেষ কোনো খবর’ আমি জানি কি না। এগুলো আমি পরে দেখেছিলাম। বাকিটুকু জানলাম বন্ধুদের লাগাতার ফোনে এবং নিউজ চ্যানেলগুলোর ব্রেকিং নিউজ থেকে। ‘জাতীয়তাবিরোধী’ ব্যক্তিদের মামলা হাতে নেওয়ার জন্য শাহিদকে তার অফিসেই গুলি করে মেরেছে অজ্ঞাতপরিচয় আততায়ীরা। কিছুদিন আগেই শাহিদের সওয়ালের জোরে ৭/১১-র মুম্বই ট্রেন বিস্ফোরণের নিরপরাধ অভিযুক্তরা মুক্তি পেয়েছিল। ওর মৃত্যুর পর ২৬/১১-র

মুন্সই হামলার দু'জন অভিযুক্তকে মুক্তি দেয় মুন্সই কোর্ট। শাহিদের হত্যার পিছনে মূল ষড়যন্ত্রী কে তা আজও রহস্য রয়ে গেছে, অন্তত সাধারণ মানুষের কাছে।

কোনো ক্ষতি মোকাবিলার নানান উপায় আছে। কেউ একটানা বিলাপ করে চলতে পারে। কেউ-বা মুখ ফিরিয়ে কাজের মধ্যে ডুবে গিয়ে সান্ত্বনা খোঁজে। আমি দ্বিতীয় পন্থাটাই বেছে নিয়েছিলাম। শাহিদের মৃত্যুর তিনদিন পর নাগপুর যাচ্ছিলাম। যে জন্য যাচ্ছিলাম সেটা আমার সাংবাদিক জীবনের একটা সবথেকে গুরুত্বপূর্ণ কাজ হতে চলেছিল। কাজটা ছিল নকশালপন্থী হিসেবে অভিযুক্ত ছাত্রদের প্রেপ্তারি সংক্রান্ত, যাদের মধ্যে অধিকাংশই ছিল অনুন্নত শ্রেণির। তাদের বিরুদ্ধে প্রমাণগুলো ছিল নিতান্তই হাস্যকর: তাদের কাছে ভগৎ সিং এবং চন্দ্রশেখর আজাদের লেখাপত্র পাওয়া গেছে। কাজটা যেন আমার জন্যই নির্দিষ্ট ছিল, কেননা এই ধরনের মামলা লড়তে গিয়েই জীবন দিয়েছে আমার বন্ধু শাহিদ। এটা যেন অনেকটা তার স্মৃতির প্রতি আমার শ্রদ্ধা নিবেদন। কিন্তু ভবিষ্যৎ অন্য কিছু ভেবে রেখেছিল। এক দুর্বোধ্য অসুস্থতা নিয়ে বাড়ি ফিরতে হল আমাকে, পরে যা ডিপ্রেসন হিসেবে নির্ণীত হয়।

আমার ব্যাকুল বাবা-মা আমার সব ধরনের পরীক্ষা করানোর পর রোগটা চিহ্নিত হয়: ব্রঙ্কোস্কেপি থেকে এমআরআই পর্যন্ত কিছুই বাদ যায়নি। অন্য একজন চিকিৎসক বলেন আমার যক্ষ্মা হয়েছে, আমার বাবা-মার উচিত আমাকে ধ্যানের অভ্যাস করানো। কিন্তু ভাগ্যক্রমে সাউথ বম্বে হসপিটালে মুন্সইয়ের একজন প্রথিতযশা চিকিৎসক আমাকে পরীক্ষা করেন। আমার রিপোর্টগুলো দেখে ডা. চিটনিস কিছু প্রশ্ন করেন আমাকে। তারপর বড়ো করে শ্বাস নিয়ে তিনি জিঞ্জেস করলেন, 'কোন বিষয়টা সারাক্ষণ ভাবিয়ে চলেছে আপনাকে?' প্রশ্নটা শুনে যেন অচেতন্য অবস্থা থেকে জেগে উঠলাম। 'কিছুই না ডাক্তারবাবু। আসলে আমি বড্ড ক্লান্ত, খুব দুর্বল লাগছে, কী যে হচ্ছে ঠিক বুঝে উঠতে পারছি না।'

হালকা হেসে ডাক্তারবাবু বললেন, 'নিজেকে এই দুঃখী-দুঃখী বানিয়ে রাখাটা ছাড়তে হবে। এইসব রক্ত পরীক্ষা-টরিস্কা করিয়ে নিজের দুঃখের ঢাকঢোল বাজানোটা বন্ধ করতে হবে। আপনি একদম সুস্থ আছেন। কাজে যোগ দিন, সেটাই আপনার ওষুধ। সবটাই আপনার মনের ব্যাপার।'

আমি বললাম, 'হাইপোকনড্রিয়া?' নিজের অবস্থা নিয়েই যাচাই করার চেষ্টা করতে গিয়ে কয়েকদিন আগেই শিখেছিলাম শব্দটা। ডা. চিটনিস শান্ত সুরে বললেন, 'না। আপনি স্বেচ্ছা অলস হয়ে পড়েছেন আর নিজের দায়দায়িত্ব থেকে পালাতে চাইছেন।'

পরের দু'দিন ডা. চিটনিসের কথাগুলো নিয়ে ভেবে চললাম। এইরকম একটা অলস দিনেই অনুঘটকের কাজ করতে এগিয়ে এলেন আমার মা। মাকে আমি আশ্রয় বলে ডাকি। আশ্রয় আমার সবথেকে বিশ্বস্ত একজন বন্ধু। কোনোদিন আধুনিক শিক্ষাব্যবস্থায় শিক্ষিতা হননি। আব্বাই ছিলেন তাঁর শিক্ষক। আশ্রয় বলতেন, নিজের স্বপ্নগুলো আমাকে দিয়ে পূরণ করতে চান তিনি। আমি বৈকে বসতাম, আশ্রয় হাল ছাড়তেন না, প্রশ্ন দিতেন, শেষমেশ বাড়ির সবাই এসে জুটত। সেদিন আমাকে কফি দিয়ে আশ্রয় জিজ্ঞেস করলেন, 'চাকরিটা তাহলে ছেড়েই দিচ্ছিস?'

একটু কাঁধ ঝাঁকিয়ে শুধু কফির কাপটার দিকেই মন দিলাম। তখন বরাবরের মতোই বিছানায় আমার পাশে বসে 'ইনকিলাব' (বিশিষ্ট উর্দু সংবাদপত্র) পড়তে শুরু করলেন তিনি। মিনিট দশেক কাগজ পড়ার পর সবে আমাকে কিছু বলতে যাবেন, মাঝপথেই তাঁকে থামিয়ে দিয়ে বললাম, 'আশ্রয়, কাগজে যদি উপদেশ দেওয়ার মতো কিছু থাকে তাহলে বলতে হবে না। কাগজ না-পড়ে বেশ আছি আমি।'

আশ্রয় বললেন, 'আরে না। তুই কি সোরাবুদ্দিনের ঘটনাটা পড়েছিস?' নামটা আমাকে কৌতূহলী করে তুলল। হ্যাঁ, সোরাবুদ্দিনের কথা আমি অবশ্যই জানি। তার সূত্রেই আমাদের সময়ের সময়ের সবথেকে বিতর্কিত ব্যক্তিদের অন্যতম নরেন্দ্র মোদির সঙ্গে প্রথম দেখা হয় আমার।

২০০৭ সালে নিজেদেরই একজন ঘনিষ্ঠ সহকর্মী রজনীশ রাইয়ের হাতে বন্দি হয়ে খবরের শিরোনামে উঠে এসেছিলেন গুজরাতের তিনজন উচ্চস্তরের পুলিশকর্তা। ভূয়ো সংঘর্ষে পাতি জুয়াচোর সোরাবুদ্দিনকে হত্যা করেছিলেন তাঁরা।

জেলে যেতে হয়েছিল ডি.জি. বানজারা আর রাজকুমার পাণ্ডিয়ানকে। মোদি সরকারের সবথেকে বিশ্বস্ত অফিসার ছিলেন তাঁরা। জেলে যাওয়ার আগে পর্যন্ত অত্যন্ত প্রতাপশালী ছিলেন। প্রতিদিন তাঁদের সাংবাদিক সম্মেলনের ছবি বেরোত কাগজে। ২০০৪ সালে জিহাদিরা যখন 'হিন্দু হৃদয় সঘাট' নরেন্দ্র মোদিকে হত্যা করতে যাচ্ছিল, তখন এই অফিসাররাই তাদের খুঁজে বার করে হত্যা করেছিলেন। তাঁরা প্রেপ্তার হওয়ার ফলে স্বাভাবিকভাবেই সারা দেশের নজর আকৃষ্ট হয়েছিল এই খবরের দিকে।

২০০৭ সালে একটা টেলিভিশন নিউজ চ্যানেলে রাজনৈতিক সাংবাদিকের চাকরি পাই আমি। আমার প্রথম কাজটা ছিল ২০০৭ সালের গুজরাতের নির্বাচন সংক্রান্ত রিপোর্টিং করা। অধিকাংশ বিশ্লেষকই বলেছিলেন, গুজরাতের মুখ্যমন্ত্রী নরেন্দ্র মোদি আবার নিরঙ্কুশভাবে জিততে চলেছেন। ২০০২ সালের গুজরাতের দাঙ্গা সমাজকে স্পষ্টতই বিভক্ত করে দিয়েছিল এবং সংখ্যাগরিষ্ঠ হিন্দুদের কাছে

তাঁকে নায়কে পরিণত করেছিল। ২০০৭ সালের নির্বাচনে নিরঙ্কুশ জয়লাভ করা তাঁর পক্ষে খুব কঠিন বলে মনে হচ্ছিল না।

একজন আলোকচিত্রীর সঙ্গে তাঁর প্রথম নির্বাচনী সমাবেশে গেলাম। ঠিক মনে নেই, তবে সম্ভবত গুজরাত চেন্নার অফ কমার্স-ই ছিল এই সমাবেশের উদ্যোক্তা। মধ্যে বসে ছিলেন নরেন্দ্র মোদি, পাশে তাঁর ডান হাত অমিত শাহ। অন্য কিছু মন্ত্রীও ছিলেন।

এর আগে অন্যান্য রাজনৈতিক সমাবেশও কভার করেছি আমি। প্রথমটায় এই সমাবেশকেও সেগুলোর থেকে আলাদা মনে হচ্ছিল না। তবে আমার দিল্লির প্রযোজকরা আগেই বলে দিয়েছিলেন, প্ররোচনামূলক বক্তৃতা দেওয়ার একটা ক্ষমতা আছে মোদির। সেদিনও তিনি হতাশ করলেন না। ‘সোরাবুদ্দিন, ওরা জিজ্ঞেস করছে সোরাবুদ্দিনের মতো একজন সম্ভ্রাসবাদীর ব্যাপারে কী করেছি আমি।’ জনতা উল্লাসধ্বনি করে উঠল। সামনের সারির মহিলারা হাততালি দিলেন। সামনের সারিটা সর্বদাই মহিলাদের জন্য সংরক্ষিত থাকত, কেননা মনে করা হত গুজরাতের মহিলাদের মধ্যে মোদি অত্যন্ত জনপ্রিয়। কলাম-লেখক আকর প্যাটেল তো একটা কলামে এমনও লিখেছিলেন যে, গুজরাতি মহিলাদের কাছে মোদি হচ্ছেন সেক্স সিম্বল।

জনতার মধ্যে থেকে প্রত্যাশিতভাবেই আওয়াজ উঠছিল, ‘মারো, মারো, মেরে ফ্যালো ওটাকে।’ মনে হচ্ছিল যেন কোনো রোমান অ্যাম্ফিথিয়েটারে বসে আছি। ‘মিঁয়া মুশারফ’ আর ‘দিল্লি কা সালতানাত’-এর মতো নানান কুৎসিত মন্তব্য সহযোগে ভাষণ চলতে লাগল। ভাষণ শেষ করে মোদি মঞ্চ থেকে নামতে তাঁকে মালা পরালেন গুজরাতের চেন্নার অফ কমার্সের সদস্যরা। তাঁর চারপাশে মানুষের ভিড়, নিরাপত্তারক্ষীদের বেড়া টপকে ঠেলেঠেলে এগোতে এগোতে আমার আলোকচিত্রীর জন্য উৎকণ্ঠিতভাবে চিৎকার করছিলাম। আমার পিছনে আসার জন্য রীতিমতো ধস্তাধস্তি করতে হচ্ছিল তাকে।

‘মোদিজি, মোদিজি, একটা প্রশ্ন ছিল।’ ভাগ্যই বলতে হবে, অনুরাগী ও সঙ্গীসাধীতে পরিবৃত্ত মানুষটি ফিরে তাকালেন আমার দিকে, সম্ভবত কোনো রাজনৈতিক প্রশ্নই প্রত্যাশা করেছিলেন। ‘মোদিজি, গুজরাতে তিনজন অফিসারকে গ্রেপ্তার করা হয়েছে, ভূয়ো সংঘর্ষে সোরাবুদ্দিনকে হত্যা করার অভিযোগ আনা হয়েছে তাঁদের নামে। এর পরেও কি আপনি বলবেন, বক্তৃতায় আপনি যা-কিছু বললেন সবই সঠিক?’ উত্তর পাওয়ার জন্য মাইকটা তাঁর দিকে এগিয়ে দিলাম। পুরো ১০ সেকেন্ড আমার দিকে স্থির দৃষ্টিতে তাকিয়ে থেকে ফিরে চলে গেলেন নরেন্দ্র মোদি। ঘৃণার চোখে আমার দিকে তাকালেন তাঁর মন্ত্রী। দেশের সবথেকে



লোভনীয় পদ অর্থাৎ প্রধানমন্ত্রীর আসনে বর্তমানে অধিষ্ঠিত মানুষটির সঙ্গে এটাই ছিল আমার প্রথম দেখা।

সোরাবুদ্দিনের ঘটনা অবশ্যই প্রকাশ্যে আসা উচিত। মায়ের 'ইনকিলাব' পড়ার সূত্রে সুযোগটা এসে গেল আমার কাছে। কী এক তাড়নায় চলে গেলাম স্থানীয় সাইবার শপে।

সোরাবুদ্দিন সংক্রান্ত যাবতীয় লিংক থেকে জানা গেল, সিবিআই এ-ব্যাপারে তদন্ত করেছে এবং গুজরাতের একজন শীর্ষস্থানীয় আইপিএস অফিসার অভয় চুদাসামা গ্রেপ্তার হয়েছেন। চুদাসামাকে আমি চিনতাম। মাত্র একবছর আগেই গুজরাতে বিস্ফোরণ মামলায় তাঁর এক প্রধান সাক্ষীর স্বীকারোক্তি আমি প্রকাশ করার পর টেলিফোনে আমাকে হুমকি দিয়েছিলেন তিনি। গুজরাতে বিস্ফোরণের তদন্তের মূল দায়িত্বে ছিলেন চুদাসামা, যে-বিস্ফোরণের সঙ্গে 'ইন্ডিয়ান মুজাহিদিন' নামক গ্রুপটি যুক্ত ছিল। রাজ্যের সবথেকে স্পষ্টবাদী ও মিডিয়াঘনিষ্ঠ অফিসারদের অন্যতম একজন ছিলেন চুদাসামা। শোনা যেত, তিনি নাকি গুজরাতের গৃহমন্ত্রী অমিত শাহের খুবই ঘনিষ্ঠ ছিলেন। তবে খ্যাতিমান হয়ে ওঠা অন্যদের থেকে আলাদা ছিলেন চুদাসামা। আমরা পরে দেখব, চোর-জোচ্চোর ও হাওলা সংক্রান্ত বিষয়ে কাজ করতেই বেশি স্বচ্ছন্দ বোধ করতেন তিনি। এবং সোরাবুদ্দিন তাঁর সহায়ক হয়ে উঠেছিল।

যাবতীয় প্রিন্টআউট আর নোট তৈরি করে, এই ঘটনা এবং এটি নিয়ে লেখালেখির প্রয়োজনীয়তা সম্বন্ধে দিম্বিতে আমার দুই সম্পাদক সোমা চৌধুরি ও তরুণ তেজপালের কাছে একটা চিঠি পাঠালাম। মনে মনে জানতাম, আমার স্ব-আরোপিত বিচ্ছিন্নতা ও অবসাদ থেকে বেরিয়ে আসার এটাই একমাত্র উপায়। দুই সম্পাদকই প্রচুর উৎসাহ দিলেন। আবার আমেদাবাদ রওনা দিলাম আমি। এই আমেদাবাদ-যাত্রা আমার জীবন পালটে দিয়েছিল।

ওখানে যাওয়ার একমাসের মধ্যেই দুটো গুরুত্বপূর্ণ ঘটনার কথা প্রকাশ্যে আনি আমি। কয়েকজন অফিসারের সাহায্যে কলরেকর্ড আর বিভিন্ন অভ্যন্তরীণ নোট ঘেঁটেই কাজটা করতে পেরেছিলাম। এই অফিসারদের নাম আমি উল্লেখ করব না। খুব সতর্কভাবে তাঁদের সাহায্য চাই, জানতাম তাঁরাই আমার একমাত্র আশা। কিন্তু গুজরাতের মতো একটা রাজ্যে বিশ্বাস অর্জন করা আদৌ সহজ নয়, যেখানে কর্তব্যনিষ্ঠ অফিসারদের সরকারের রোষের শিকার হতে হয়। তাছাড়া এঁদের মধ্যে বেশিরভাগ সেই প্রথম দেখলেন আমাকে। বিষয়টা আরও জটিল ছিল এই কারণে যে, আমি হচ্ছি তেহেলকার সাংবাদিক, অর্থাৎ ধরেই নেওয়া যায় যে-কোনো সময় আমার কাছে একটা স্টিং ক্যামেরা থাকতেই পারে।

গুজরাতে আমি যে-বিষয়টার মুখোমুখি হয়েছিলাম, তা অবশ্য শুধু গুজরাতকেন্দ্রিক বিষয় ছিল না। সং পুলিশ অফিসারদের নামে মামলা রুজু করে হেনস্থা করাটা উত্তরপ্রদেশ আর মণিপুরেও একেবারে জলভাত হয়ে উঠেছে—এই দুটি রাজ্য সম্বন্ধে বিস্তৃত রিপোর্টিং করেছি আমি। এ-ও বুঝেছিলাম যে এই হেনস্থা করার ব্যাপারটাই আমার রক্ষাকর্তা হয়ে উঠবে। সবথেকে গুরুত্বপূর্ণ কিছু তথ্য যে-অফিসার জানিয়েছেন, দেখা গেল তিনি আসলে এমন কোনো অফিসারের সহপাঠী ছিলেন, যাঁর সম্বন্ধে কিছু রিপোর্ট করেছি আমি। এভাবেই বরফ গললো। মানবাধিকার কর্মী ও তথ্য-জোগানো অফিসারদের সহায়তায় বছরের সবথেকে চাঞ্চল্যকর একটা ঘটনা ফাঁস করতে সক্ষম হলাম আমি। এটা ছিল সংঘর্ষ চলাকালীন তৎকালীন গৃহমন্ত্রী অমিত শাহের সঙ্গে উচ্চপদস্থ অফিসারদের ফোনে কথাবার্তার কলরেকর্ড। কলরেকর্ডের সঙ্গে ছিল অভ্যন্তরীণ ‘অফিসিয়াল সিক্রেটস অ্যান্ড’ সংক্রান্ত একটা অত্যন্ত নিন্দাজনক নোট। মন্ত্রীর কার্যকলাপের দিকে নজর রেখেছিল সিআইডি এবং ওই নোটে বলা হয়েছিল, সংঘর্ষ হচ্ছে নিরপরাধ মানুষদের হত্যা করার ও তাদের সম্ভ্রাসবাদী হিসেবে চিহ্নিত করার এক কুৎসিত চক্রান্ত।

এই রিপোর্ট রাজনৈতিক মহলে আলোড়ন তুলল। সিবিআই থেকে তেহেলকার দপ্তরে বারবার ফোন করে বলা হতে লাগল কলরেকর্ডগুলো তাদের হাতে তুলে দেওয়া হোক—পরে সুপ্রিম কোর্টের সামনে রেকর্ডগুলো পেশ করা হয়েছিল। আমেদাবাদের হোটেল অ্যান্ড্রাসাডরেই তখনও থাকছিলাম আমি। হোটেলটা ততদিনে আমার দ্বিতীয় বাড়ি হয়ে উঠেছিল। মূলত মুসলিম-অধ্যুষিত এলাকা খানপুরে অবস্থিত এই হোটেলটা আমার পক্ষে যথেষ্ট সুবিধাজনক ছিল। পরে জেনেছিলাম ওখান থেকে মাত্র কয়েকটা ব্লক পরেই ছিল রাজ্য বিজেপি-র দপ্তর। হঠাৎই সবার নজর এসে পড়ল আমার ওপর। বিজেপি নেতারা বলতে লাগলেন, আইয়ুব নামে একজন অল্পবয়সী ছোকরাই এইসব তথ্য ফাঁস করেছে। যে-কোনো কারণেই হোক তাঁদের মাথায় আসেনি যে, অন্তর্ভুক্তমূলক সাংবাদিকটি কোনো মেয়েও হতে পারে। আমার তাতে কোনো অসুবিধে ছিল না, বরং এর ফলে নির্বিঘ্নে কাজ করে যেতে পারছিলাম। তবে এই সুবিধেটা বেশিদিন রইল না। রিপোর্ট প্রকাশিত হওয়ার কয়েকদিন পরে অজানা নম্বর থেকে একটা মেসেজ এল আমার ফোনে, ‘আমরা জানি তুমি কোথায় আছ।’

জীবন সত্যিই পালটে গেল। সেইদিন থেকে শুরু করে তিনদিন অন্তর বাসস্থান পালটাতে লাগলাম; আমেদাবাদের আইআইএম ক্যাম্পাস থেকে শুরু করে বিভিন্ন গেস্টহাউস, হস্টেল আর জিমখানায়। পলাতকের মতো জীবন। এইসময় মোবাইল ফোনের বদলে ল্যান্ডলাইন ব্যবহার করতে শুরু করি। অবশেষে

সিবিআই-কে যা-কিছু তথ্যপ্রমাণ জোগানো সম্ভব সবটুকু দিয়ে এবং আমার ফলো-আপ রিপোর্ট লেখা শেষ করে মুম্বইতে এসে পৌঁছোলাম। ঠিক করলাম জীবনযাপনকে একটা রুটিনের মধ্যে আনতে হবে।

কিন্তু ভবিষ্যৎ আমার জন্য অন্য কিছু ভেবে রেখেছিল। রিপোর্ট প্রকাশিত হওয়ার কয়েক সপ্তাহের মধ্যে অমিত শাহকে গ্রেপ্তার করল সিবিআই—স্বাধীন ভারতে এই প্রথম কোনো কার্যরত গৃহমন্ত্রী গ্রেপ্তার হলেন। চারদিকে আলোড়ন পড়ে গেল। অধিকাংশ জাতীয় সংবাদমাধ্যমের প্রতিনিধিরা গান্ধীনগরে সিবিআই সদরদপ্তরের সামনে দাঁড়িয়ে থাকতে শুরু করলেন। এই চাঞ্চল্যকর গ্রেপ্তারির পরবর্তী ঘটনাস্রোতের রিপোর্ট করার জন্য গুজরাতে ফিরতে হল আমাকে।

শাহের আমলে যে-সব পুলিশ অফিসার বৈষম্যমূলক আচরণের শিকার হয়েছিলেন, শাহের গ্রেপ্তারি তাঁদের যেন নতুন জীবন দিল। এইসময় বিভিন্ন অফিসার আমাকে কৌশলে জানাতেন যে তাঁরা আমার সঙ্গে কথা বলতে চান। আগে যাঁরা সাংবাদিকদের এড়িয়ে চলতেন, এখন যেন তাঁরা কথা বলার শক্তি অর্জন করেছেন। অধিকাংশ কথোপকথনই ছিল ব্যক্তিগত, অফ দ্য রেকর্ড, কিন্তু সেটুকু থেকেই বোঝা যাচ্ছিল সংঘর্ষের ঘটনাগুলো হিমশৈলের চূড়ামাত্র। গুজরাতের বিভিন্ন ঘটনার ফাইলে আরও ভয়াবহ কিছু লুকিয়ে আছে। আমরা কেউই সত্যের কাছাকাছি পৌঁছাতে পারিনি। বোঝা যাচ্ছিল বিগত এক দশকে বিচারব্যবস্থাকে প্রায় ধ্বংস করে ফেলা হয়েছে। মানুষের জীবনের নিরাপত্তার ভার যাঁদের হাতে, তাঁরা বিক্রি হয়ে গেছেন। সাম্প্রদায়িক দাঙ্গা, ভূয়ো সংঘর্ষ থেকে শুরু করে রাজনৈতিক হত্যা পর্যন্ত বহু বিষয়ে বহু বেয়াড়া সত্য সামনে আসার জন্য অপেক্ষা করছিল। কিন্তু এগুলোর মধ্যে কোনোটাকে প্রমাণ করা যাবে কীভাবে?

সাংবাদিকতার প্রথম কথাই হল প্রমাণ এবং আমার হাতে কোনো প্রমাণই ছিল না। ছিল শুধু কথোপকথন আর কিছু ঘটনার বিবরণ, অফ দ্য রেকর্ড স্বীকারোক্তি। এ-সব প্রমাণ করব কী করে? তখনই আমি এমন একটা সিদ্ধান্ত নিই, যা আমার জীবনকে পেশাগত ও ব্যক্তিগতভাবে পালটে দেয়। রানা আইয়ুবের বদলে দেখা দেবে মৈথিলী ত্যাগী, কানপুরের এক কায়স্থ মেয়ে, ‘আমেরিকান ফিল্ম ইনস্টিটিউট কনজারভেটরি’র ছাত্রী, গুজরাতের উন্নয়ন এবং সারা পৃথিবীর অনাবাসী ভারতীয়দের মধ্যে নরেন্দ্র মোদির ক্রমবর্ধমান জনপ্রিয়তা সম্বন্ধে একটা চলচ্চিত্র বানানোর জন্য যে দেশে ফিরে এসেছে।

## দ্বিতীয় পরিচ্ছেদ

সিনিয়রদের কাছে একটা বিস্তারিত মেল পাঠালাম। আরও গভীরে যাওয়ার উৎসাহ দিয়ে উত্তর দিলেন তাঁরা। ভাবনাচিন্তা শুরু করার পক্ষে এটুকুই যথেষ্ট ছিল। গুজরাতে প্রায় মাস তিনেক কেটে গেছে। তথ্য দিয়ে সাহায্য করতে যাঁরা ইচ্ছুক তাঁদের সঙ্গে যে-পরিস্থিতিতে দেখা হয়েছে, তা থেকে বুঝেছি সামনের পথ রীতিমতো কঠিন। ক্ষমতায় অধিষ্ঠিত যে-সব ব্যক্তি সত্য গোপন করে রাখতে চান, তাঁদের কাছ থেকে সত্যটা আদায় করা সহজ হবে না। আমার সহকর্মী আশিস খেতান একটা রোমহর্ষক কাহিনি উদ্ঘাটন করেছিলেন। বাবু বজ্রবঙ্গী এবং স্থানীয় অন্যান্য বিজেপি ও ভিএইচপি নেতাদের ওপর স্টিং অপারেশন চালিয়েছিলেন তিনি। সেখানে এইসব নেতারা ২০০২ সালের দাঙ্গার হাড়-হিম-করা বিবরণ শুনিয়েছিলেন। কিন্তু আমি সেইসব দাঙ্গাবাজদের নিয়ে কাজ করছি না যাদের একটু উস্কে দিলেই গড়গড় করে নিজেদের বীরত্বের ব্যাখ্যান করতে শুরু করবে। আমার কাজ পোড়াখাওয়া আইপিএস অফিসারদের নিয়ে, যাঁদের মধ্যে অনেকে ‘র’ (RAW) এবং ‘আই অ্যান্ড বি’ (I&B)-তেও সাফল্যের সঙ্গে কাজ করেছেন।

এঁরা একেবারে চাঁচাছোলা কুটনীতিবিদ। এঁদের দিয়ে কথা বলানোর জন্য ক্ষমতা ও কর্তৃত্বসম্পন্ন একজন দক্ষ ও সুকৌশলী তদন্তকারীর দরকার। এগুলোর মধ্যে কোনো গুণটাই আমার নেই। পরিকল্পনাও আমাকে করতে হবে, কাজটাও আমাকে একাই করতে হবে। জানতাম অফিস থেকে কোনো জুনিয়রকে নিতে পারব না, কেননা সেটা বাড়তি ঝুঁকি হয়ে যাবে। আমাকে পরিষ্কারভাবে বুঝিয়ে দেওয়া হয়েছিল—সম্পাদকরা আমার কাজের ওপর নজর রাখবেন, কিন্তু বাকি সবকিছুর দায়িত্ব আমার একার। কোনো লেখা পাঠালেই সোমা আর তরুণ উৎসাহব্যঞ্জক উত্তর দিত, যেমন, ‘দারুণ, চালিয়ে যাও’ বা ‘তাক-লাগানো উদ্ঘাটন’। এগুলো আমাকে আরও এগিয়ে যেতে উৎসাহ জোগাত ঠিকই, কিন্তু বাস্তব সত্যটা ছিল—রণক্ষেত্রে আমি একা। নিজের খেয়ালও রাখতে হবে, আবার



এই অনুসন্ধান থেকে যাতে সৎ, সত্যভিত্তিক ফলাফল বেরিয়ে আসে সেটাও নিশ্চিত করতে হবে।

এমন অনেকেই সত্যটা জানতেন যারা স্থির করেছিলেন কখনো সেটা প্রকাশ করবেন না, এমনভাবে জীবন কাটিয়ে যাবেন যেন এই ঘটনাটা, ২০০২ সালের এই ঠান্ডা-মাথায়-ঘটানো রাজনৈতিক রক্তস্রাবের ব্যাপারটা, কখনোই তাঁদের জীবনের অঙ্গ ছিল না। তেহেলকা-র মতো একটা অন্তর্দৃষ্টিমূলক প্রতিষ্ঠানের সাংবাদিক হিসেবে আমি জানতাম, সাহায্য পাওয়ার প্রতিটা দরজাই আমার জন্য বন্ধ। আমার সামনে একটাই পথ খোলা ছিল, যে-পথটা সত্যসন্ধানী যে-কোনো সাংবাদিকের শেষ অবলম্বন: ছদ্মপরিচয়ে কাজ করা। আমার বয়স ২৬ বছর, আমি একজন মেয়ে, তা-ও আবার মুসলিম মেয়ে। এর আগে কখনো নিজের পরিচয় নিয়ে মাথা ঘামাইনি, কিন্তু ধর্মীয় ভিত্তিতে মেরুকরণ করা একটা রাজ্যে কাজ করতে গেলে এগুলো নিয়ে ঠান্ডা মাথায় ভাবতেই হবে। আমার বাড়ির লোকেদের ব্যাপারটা জানাতে হবে, জানাতে হবে আমি কে বা কী হতে চলেছি। কারও সাহায্য ছাড়া কি কাজটা নিখুঁতভাবে করতে পারব?

একসময় একটা সুপরিচিত মাস কমিউনিকেশন কোর্সের ছাত্রী ছিলাম। সেটা এখন কাজে লাগল। আমার সহপাঠীদের মধ্যে এমন অনেক উচ্চাকাঙ্ক্ষী অভিনেতা ছিল যারা চলচ্চিত্র জগতে নিজেদের একটা জায়গা তৈরি করে নিতে পেরেছিল। অভিনেত্রী রিচা চাড্ডা আমার সহপাঠী ছিল, এখন সে প্রতিষ্ঠিত নায়িকা। সম্প্রতি একটা সাক্ষাৎকারে রিচা বলেছিল একটা ছবির জন্য আমার সাংবাদিকতার জীবন ও অভিজ্ঞতা জানতে চায় সে, যে-ছবিতে রিপোর্টারের ভূমিকায় অভিনয় করতে হবে তাকে। যে অভিনেতা-বন্ধুটিকে সবথেকে ঘনিষ্ঠ মনে করতাম তাকে 'আরে, অনেকদিন দেখা-টেকা নেই' জাতীয় একটা ফোন করলাম। এই বন্ধুটির সাহায্যে রিচার মেক-আপ ম্যানের সঙ্গে একটা অ্যাপয়েন্টমেন্ট করা গেল। পরের দিন মুম্বই শহরতলির একটা স্টুডিওয় বসে চা খেতে-খেতে লাগসই পরচুলা পরার কলাকৌশল শিখছিলাম। প্রবীণ মেক-আপ আর্টিস্টটি তাঁর সংগ্রহের কয়েকটা পরচুলা দিয়ে সাহায্য করেন আমাকে। পরচুলা পরলে আমাকে অন্যরকম দেখাচ্ছিল ঠিকই, কিন্তু কিছুটা যেন কৃত্রিম আর বেমানান লাগছিল। পরচুলার ব্যাপারটা খুব সুবিধের হল না।

তখন মনে হল নিজের পরিচিতিটাও পালটে ফেললে ভালো হয়। আমার প্রাক্তন সহপাঠীদের একটা গ্রুপের সদস্য ছিলাম আমি। হয়তো ভাগ্যক্রমেই সেই গ্রুপের আইডি-তে একজন সহকর্মীর একটা ই-মেল পেলাম যে লস অ্যাঞ্জেলেসের বিখ্যাত আমেরিকান ফিল্ম ইনস্টিটিউট কনজারভেটরিতে যোগ

দিয়েছিল। সে যেন এক ‘সব পেয়েছি’র মুহূর্ত। হ্যাঁ, এটাই হবে আমার পরিচয়। চলচ্চিত্র বানানোর জন্য আমেরিকা থেকে গুজরাতে আসা একজন চলচ্চিত্রকার। খুবই উচ্চাকাঙ্ক্ষী ভাবনা, তবে সেটা কাজে লাগার সম্ভাবনা যথেষ্টই ছিল।

পরের কয়েকটা দিন ওই কনজারভেটরির কাজকর্ম, সেখানকার প্রাক্তন ছাত্রছাত্রীদের বিবরণ, সংস্থার পক্ষ থেকে কী কী চলচ্চিত্র বানানো হয়েছে, সে সম্বন্ধে পড়াশোনা করলাম। সেইসঙ্গে গুজরাত নিয়ে কী ধরনের চলচ্চিত্র তৈরি হয়েছে, সেগুলোর বিষয়বস্তু কী ছিল, তা-ও জেনে নিলাম। শেষে ঠিক করলাম, চলচ্চিত্রের বিষয়বস্তুর দূয়ার উন্মুক্তই থাক, চিত্রনাট্যহীন এই কাহিনিতে যে-সব চরিত্র আসবে, তাদের কাছ থেকে কেমন আচরণ পাই তার ওপরেই নির্ভর করবে বিষয়বস্তু। আমাকে একটা নাম নিতে হবে। সুন্দর, রক্ষণশীল অথচ ব্যঞ্জনাময় একটা নাম।

সিনেমার পোকা হওয়াটা এ-ব্যাপারে আমাকে প্রচুর সাহায্য করেছিল। হিন্দি সিনেমা দেখতে খুব ভালোবাসতাম। এইসময় রাজকুমার সন্তোষীর ‘লজ্জা’ সিনেমাটার কথা মনে পড়ল। দিল্লি থেকে মুম্বই যাওয়ার সময় বিমানে ছবিটা দেখেছিলাম। বলিষ্ঠ নারী চরিত্রগুলোই ছিল ছবিটার প্রধান আকর্ষণ, সেইসঙ্গে মাধুরী দীক্ষিত ও মণীষা কৈরالا-সহ মুখ্য চরিত্রগুলির প্রাণবন্ত অভিনয়। ছবিতে মণীষা কৈরالا অভিনীত চরিত্রটির নাম ছিল ‘মৈথিলী’, যে ভারতীয় নারীদের জীবন এবং জাতপাত ও লিঙ্গভিত্তিক অত্যাচারের স্বরূপ আবিষ্কার করেছে। তাছাড়া রামচন্দ্রের স্ত্রী সীতারও অন্য নাম ছিল মৈথিলী। নামটার ব্যঞ্জন্য আমাকে আকৃষ্ট করেছিল। নিজের জন্য যখন অন্য একটা নাম খুঁজছিলাম, খুব সাধারণ অথচ কোনো বিশেষ পদবীর উল্লেখ্যহীন একটা নাম, এমন নাম যা ব্রাহ্মণও নয়, দলিতও নয়, তখন ‘মৈথিলী ত্যাগী’ জন্ম নিল। ভিজিটিং কার্ডে লেখা রইল: মৈথিলী ত্যাগী, ইনডিপেন্ডেন্ট ফিল্মমেকার, আমেরিকান ফিল্ম ইনস্টিটিউট কনজারভেটরি।

কিন্তু আবার গুজরাত যাওয়ার আগে আমার একজন যোগ্য সহকারী দরকার ছিল। দ্রুতই তার দেখাও পেলাম, যে আমার জীবনে এক গভীর ছাপ রেখে যাবে। মাইক (নাম পরিবর্তিত) ছিল ফ্রান্সে বিজ্ঞানের ছাত্র। একটা ছাত্র-বিনিময় কর্মসূচির অংশ হিসেবে ভারতে এসেছিল সে। ভারতীয় সাংবাদিকদের সঙ্গে ভারতে কাজ করতে চাইছিল মাইক। ঠিক কী বিষয়ে অন্তর্ভুক্ত করতে চাইছি তার খুঁটিনাটি না-জানিয়ে একটা মেল করলাম ওকে। তবে সব না-জানাতেও যতটা সম্ভব সং-ধাকার চেষ্টা করেছিলাম।

ওকে জানালাম আমি একজন অ-ভারতীয় সহযোগী চাইছি, যে একটা ফিল্মে আমার সঙ্গে কাজ করার ভান করবে। আরও জানালাম, এটা একটা আরও বড়ো,

আরও চাক্ষু্যকর অন্তর্দৃষ্টির অংশ। খুঁটিনাটি সবকিছু যে ওকে জানানো যাবে না, সেটাও বলে দিলাম। আমার পরিচিতিতে বেশি প্রামাণ্য করে তোলার জন্য একজন ‘ফিরিসি, গোরা’ মুখ হিসেব কাজ করবে সে।

ভিজিটিং কার্ড, পাঁশুটে-ধূসর চশমা, হেয়ার স্টেটনার, গলায় বাঁধার কয়েকটা রংচঙে বান্দনা আর রেকর্ডিং করার কিছু যন্ত্রপাতি নিয়ে আমেদাবাদে পৌঁছলাম। মাইক আসবে দু’দিন পরে। মৈথিলী ত্যাগীর নামে চটপট একটা সিম কার্ড জোগাড় করে নিলাম। আমেদাবাদে আমার তথাকথিত ‘অভিভাবক পরিবার’-এর দেওয়া নথিপত্রের সাহায্যে এত সহজে সিম কার্ডটা পেয়ে গেলাম দেখে বেশ অবাকই লাগল। অন্তর্দৃষ্টি দীর্ঘ সময় ধরে চলবে। কোনো দামি হোটেলে থাকার বিলাসিতা করা আমার বা আমার সংস্থার পক্ষে সম্ভব নয়। তাছাড়া আমি এমন একজন উঠতি চলচ্চিত্রকারের ভূমিকায় অভিনয় করছি যার আর্থিক সামর্থ্য সীমিত। এ-রকম একজন মানুষের থাকার বন্দোবস্ত একমাত্র স্থানীয় কেউই করতে পারে। এবার সাহায্য পেলাম এক শিল্পী-বন্ধুর কাছ থেকে, আমেদাবাদের সাহিত্য ও সংস্কৃতি মহলে যার ভালো যোগাযোগ আছে। বেশি প্রশ্ন করে আমাকে অস্বস্তিতে ফেলেনি সে। আমি একজন সাংবাদিক, যার অন্তর্দৃষ্টির জেরে গুজরাতের গৃহমন্ত্রীকে জেলে যেতে হয়েছিল—এটুকুই তার কাছে যথেষ্ট ছিল। নিজের প্রভাব খাটিয়ে ‘নেহরু ফাউন্ডেশন’ নামক একটি শিক্ষাপ্রতিষ্ঠানে আমার থাকার ব্যবস্থা করে দিল সে।

ফাউন্ডেশনের হস্টেলের ওয়ার্ডেনের কাছে একজন চলচ্চিত্রকার হিসেবে আমার পরিচয় দিল বন্ধুটি। ওয়ার্ডেন আমার দিকে প্রায় তাকালেনই না, হাত-পা নেড়ে বন্ধুটির সঙ্গেই কথা বলতে লাগলেন। লাগোয়া বাথরুম-সহ ২৫০ বর্গফুটের একটা ঘর জুটল, ভাড়া দিনপিছু ২৫০ টাকা। পরে হস্টেলের অন্য বাসিন্দারা আমার অন্তর্দৃষ্টির কাজে অনেক সাহায্য করেছিল। এরা ছিল ইউরোপের বিভিন্ন দেশের ছাত্র—জার্মানি, গ্রিনল্যান্ড আর লন্ডনের।

প্রথম পরিচয় হল হস্টেলের ডিন বা ম্যানেজার মানিকভাই (নাম পরিবর্তিত)-এর সঙ্গে। আমার বন্ধুটি তাঁর সঙ্গে পরিচয় করিয়ে দিয়ে বললেন, ‘গুজরাত নিয়ে একটা সিনেমা বানানোর জন্য ম্যাডাম এখানে এসেছেন।’ মানিকভাই বললেন, ‘বাঃ, দারুণ। আমার শহর আর আমাদের মুখ্যমন্ত্রীর সম্বন্ধে ভালো ভালো কথা বলুন। এই আমেদাবাদ একটা চমৎকার শহর।’ সেইসঙ্গেই জানালেন শহরটা আমাকে ঘুরিয়ে দেখাবেন। আমার ঘরে একটা একশয্যার খাট, একটা লেখার টেবিল আর একটা বুক স্ট্যান্ড রাখার বেশি জায়গা ছিল না। কিন্তু হস্টেলের অবস্থানটা জায়গার অভাব পূরণ করে দিল। গুজরাতের সবথেকে

অভিজাত এবং মধ্যবর্তী এলাকায় অবস্থিত এই হস্টেলটা পরবর্তী ছ'মাসে আমার বাড়ির-বাইরে-বাড়ি হয়ে উঠেছিল।

পরেরদিন সকালে মাইক এসে পৌছল। মাত্র ১৯ বছর বয়সী উজ্জ্বল, লম্বা ফরাসি তরুণ, একমাথা এলোমেলো চুল। আমার বন্ধুর বাড়িতে তার সঙ্গে দেখা করলাম। আমার সঙ্গে হস্টেলে যাওয়ার আগে অল্পকথায় বুঝিয়ে দিলাম, তাকে ঠিক কী করতে হবে।

আমার ঘরের লাগোয়া একটা ঘর পরবর্তী এক মাসের জন্য মাইককে ছেড়ে দিলেন মানিকভাই। এর পিছনে মাইকের তাঁকে 'কেমোছো' বলার অবশ্যই একটা ভূমিকা ছিল। মাইকের শেখার ইচ্ছে ছিল, বিভিন্ন সংস্কৃতিকে জানতে-বুঝতে চাইত, তবে তার সবথেকে প্রিয় জিনিস ছিল খাবার। সেদিন রাতে আমাদের প্রথম যৌথ নৈশভোজনে ছিল আমেদাবাদের 'পাকওয়ান' নামে পরিচিত জনপ্রিয় থালি। এখন আমি আর মাইক স্মৃতিচারণ করতে গেলে মনে পড়ে—সে-রাতে অন্তত দু'ডজন পুরি আর ছ'বাটি হালুয়া উড়িয়ে দিয়েছিল ও, যা দেখে হাঁ হয়ে গিয়েছিলাম আমি।

খাওয়া সেরে হস্টেলের সিঁড়ি দিয়ে উঠতে উঠতে মাইক জিজ্ঞেস করল, 'যখন শুধু আমরা দু'জনই থাকব, তখন কি আমি তোমাকে রানা বলে ডাকতে পারি?'

'না। তুমি এদেশ ছেড়ে চলে যাওয়ার আগে পর্যন্ত তোমার কাছে আমি মৈথিলী হয়েই থাকব।' মাইক কথা রেখেছিল। প্যারিস রওনা হওয়ার আগে আমাকে পাঠানো বিদায়ী কার্ডে হিন্দিতে সে লিখেছিল, 'প্যারি মৈথিলী, আপনা খেয়াল রাখনা—মাইক'।

নেহরু ফাউন্ডেশনে প্রথম কয়েকটা দিন নিজেদের নতুন জীবনে খাতস্থ হতেই কেটে গেল। নিজের ঘরে ফরাসি-হিন্দি অভিধান হাতে নিয়ে বসে আমাকে নানান প্রশ্ন করত মাইক, সেইসঙ্গেই মার্ক টুলি-র লেখা একটা বই পড়ে চলত। বয়সের অনুপাতে যথেষ্ট পড়াশোনা ছিল মাইকের, নিজস্ব মতামত ছিল, আর ছিল তীক্ষ্ণ বিশ্লেষণাত্মক মন। যে-কোনো বিষয় চট করে ধরে নিতে পারত। ফাউন্ডেশনে একটা ক্যান্টিন ছিল, সেখানে ২৫ টাকায় দুপুরের খাবার পাওয়া যেত। ক্যান্টিনের সামনে একটা ঘোরানো সিঁড়ি আর সংস্থার চত্বর, তার ওপারে একটা মনোরম বনভূমি। রোজ বিকেলে মাইক আর আমি ল্যাপটপ নিয়ে চত্বরে বসে খেতে খেতে কাজ করতাম। মাইক বলত, 'তাহলে মৈথিলী, পরিকল্পনাটা কী? কার সঙ্গে দেখা করব আমরা?' প্রতিবার একই উত্তর দিতাম, 'সময় হলেই জানতে পারবে।'

সন্দের সময় মাইক আর আমি ক্যামেরা নিয়ে পুরোনো শহরে ছবি তুলতে যেতাম। দু'জনেরই ফোটোগ্রাফিতে আগ্রহ ছিল এবং দু'জনেরই এসএলআর ক্যামেরা ছিল। অবশ্য এর সঙ্গে আমাদের ফোটোগ্রাফি ভালোবাসার কোনো

সম্পর্ক ছিল না। আসলে এটা ছিল আমাদের নিজেদের কাছে এবং যদি কেউ আমাদের ওপর নজর রেখে থাকে তার কাছে নিজেদের কাজের প্রামাণ্যতা প্রতিষ্ঠা করার একটা চেষ্টা। আমরা যদি উচ্চপদস্থ কর্মকর্তাদের কাছে যেতে চাই, তাহলে নিশ্চয়ই আমাদের কার্যকলাপ ব্যাচাই করা হবে, বিশেষত যেখানে আমরা থাকছি সেই জায়গায়। আমেনদাবাদে আমাদের একটা সামাজিক পরিমণ্ডল দরকার ছিল, যা আমাদের বানানো পরিচিতির সাক্ষ্য দেবে।

প্রকৃত শিল্পী এম.এফ. হুসেন প্রতিষ্ঠিত ‘আমেনদাবাদ নি গুফা’ নামক শিল্প প্রদর্শনশালাটি আমাদের প্রভূত সাহায্য করেছিল। প্রদর্শনশালার পাশে একটা ফিশাল পার্ক আর একটা ক্যাফে। সেখানে সারাক্ষণ তরুণদের, বিশেষত শিল্পী আর ফেটেপ্রাক্ষরদের ভিড় লেগেই আছে। কেউ গিটার বাজাচ্ছে, কেউ-বা নিজেদের কাজ সম্বন্ধে প্রচার করছে। এছাড়া হবু চিত্রপরিচালক, আলোকচিত্রী আর থিয়েটারের অভিনেতারও থাকত। এখানে সন্ধ্যা কাটানোর সময় মৈথিলী হিসেবে নিজের জীবনটাকে চুটিয়ে উপভোগ করতাম আমি, মাইক-ও খুব উপভোগ করত।

ওস্তা গুজরাতের লাল দরওয়াজা জায়গাটা খুব পছন্দ করত মাইক। প্রতি বৃহস্পতিবার সেখানে একটা খোলা বাজার বসত। আর ছিল ঘুড়িনির্মাতা ও কুমাররা। দারুণ কিছু ছবি তুলে সন্ধ্যার সময় ফিরে এসে নিজের একান্ত প্রিয় প্রগল্ভা করত মাইক, ‘আজ রাতে কোথায় খাব আমরা?’ খেতে খুব ভালোবাসত ও, আর তার জন্য গুজরাত হচ্ছে একেবারে আদর্শ জায়গা।

এরই মধ্যে জনৈক অ্যাকটিভিস্ট বন্ধুর পাঠানো ই-মেল মারফত সাহায্য এসে পৌঁছেল। অফিসারদের সঙ্গে যোগাযোগ করা খুবই দরকার ছিল আমার। তালিকার প্রথম নাম ছিল জি.এল. সিংঘল-এর, যিনি তখন গুজরাতের এটিএস-এ ছিলেন, কার্যত তার প্রধানই ছিলেন। ‘ভূয়ো’ সংঘর্ষে ইশরাত জাহানের মৃত্যুর ঘটনার তাঁর ভূমিকা নিয়ে তদন্ত চলছিল। আমার অফিসার বন্ধুবান্ধব ও অন্য সাংবাদিকদের থেকে জেনেছিলাম, তিনি নিজেকে বিচ্ছিন্ন করে নিয়েছেন, মাত্র কতকজন বন্ধু আছে এবং সংবাদমাধ্যমের সঙ্গে কোনোরকম সম্পর্ক রাখতে চান না। শুনেছিলাম প্রায় সবাইকেই তিনি সন্দেহ করেন। তাহলে কীভাবে পৌঁছোনো যাবে তাঁর কাছে?

বন্ধুর ই-মেলে গুজরাত ফিল্ম ইন্ডাস্ট্রির দু’জন জনপ্রিয় অভিনেতা নরেশ ও হিতু কানোরিয়া সম্পর্কে যাবতীয় তথ্য দেওয়া ছিল। বস্তুত নরেশ কানোরিয়া ছিলেন গুজরাতি সিনেমার অমিতাভ বচ্চন। হিতু তাঁর পুত্র, দক্ষিণ মুম্বইতে পড়াশোনা করেছেন এবং ঠিক করেছেন হিন্দি সিনেমায় শিকে ছেঁড়ার অপেক্ষায় বসে না থেকে বাবার জুতোয় পা গলানোই বুদ্ধিমানের কাজ।

ই-মেলে জানানো হয়েছিল কানোরিয়ারা দলিত শ্রেণির মানুষ, অনেক বড়ো বড়ো অফিসারের সঙ্গে তাঁদের ভালো যোগাযোগ আছে। সিংঘলের সঙ্গেও যোগাযোগ আছে তাঁদের এবং সিংঘল নিজেও একজন দলিত। উত্তেজিত হয়ে নরেশ কানোরিয়াকে ফোন করলাম। তিনি আমাকে পরেরদিন সকালে আমেদাবাদের জিমখানায় তাঁর সঙ্গে দেখা করতে বললেন। দেখা হওয়ার পর তাঁর মধ্যে কোনো তাপ-উত্তাপ দেখলাম না। ভালোভাবে মকশো করা বিশেষ উচ্চারণভঙ্গির ইংরেজিতে তাঁর সঙ্গে কথা বলার সময় সম্পূর্ণ নির্বিকার রইলেন তিনি। আয়নার দিকে তাকালেন, চিরুনি দিয়ে চুলটা একটু ঠিক করে নিয়ে উদাসীন ভঙ্গিতে বললেন, ‘বেন, হিন্দি মেরে বোলো না, আউর থোড়া আহিস্তা বোলো, বহুত ফাস্ট হো তুম।’

বুঝলাম আমার প্রস্তুতিতে গলদ আছে। পরের এক ঘণ্টা ধরে তাঁকে আমার ফিল্মের বিষয়বস্তু বোঝালাম। বললাম, গুজরাতের যে-সব বিষয় তেমন পরিচিত নয়, সেগুলোই ফিল্মে দেখাতে চাই আমি। যেমন, গুজরাতের চলচ্চিত্রশিল্প, দলিত শ্রেণির মানুষরা কীভাবে গুজরাতে উন্নতি করেছে। এবার তাঁর চোখে কৌতূহলের ঝলক দেখা গেল। নিজেকে ‘তারকা’ ভাবা একজন মানুষ, কিন্তু হিন্দি সিনেমার দাপটে নিজের রাজ্যেই যাঁর সাফল্য ম্লান হয়ে গেছে, একজন ‘বিলায়েতি’ চলচ্চিত্রকারের কাছে তিনি নিজের কাজের স্বীকৃতি পাচ্ছেন—এতেই যেন অবশেষে প্রত্যাশিত ফল পাওয়া গেল।

পরেরদিন আমাকে গাড়িতে করে ১০০ কিলোমিটার দূরে একটা গ্রামে যেতে হবে। কানোরিয়া চান সেখানেই আমি তাঁর সাক্ষাৎকার নিই এবং একটা ফিল্মের সেটে তাঁর স্টান্ট দেখি। তাঁর সঙ্গে কথা বলে ঘরে ফিরে বিছানায় বসে মনে হল, পুরো বেকার একটা কাজ করতে হবে। কাজটায় বিস্তর ঝুঁকি আছে, কিন্তু এটাই একমাত্র পথ। পরের দিন সকালে এসএলআর ক্যামেরা আর বিভিন্ন তথ্য লেখা কাগজপত্র নিয়ে ঘর থেকে বেরোলাম। মাইক বলল, ‘তোমার চোখে চশমা কই?’ আসলে নিজের নতুন মূর্তিতে তখনও ঠিক অভ্যস্ত হয়ে উঠতে পারিনি।

শহরের উপকণ্ঠে একটা গ্রামে ফিল্মের সেট বানানো হয়েছে। হাজার হাজার লোক জড়ো হয়েছে শুটিং দেখার জন্য। কানোরিয়ার ছেলে হিতু যথেষ্ট সপ্রতিভ, দক্ষিণ মুম্বই থেকে স্নাতক হয়েছে। বন্দির পোশাক পরে আছে সে, তার বাবা অভিনয় করছেন পুলিশ অফিসারের ভূমিকায়।

বসে শুটিং দেখার জন্য একটা চেয়ার দেওয়া হল আমাকে। মন দিয়ে নোট নিতে আর শুটিংয়ের ছবি তুলতে লাগলাম। লক্ষ করলাম আমি একা নই, অন্য একজন যুবকও ট্রাইপড আর লেন্স-টেল নিয়ে স্ট্যান্টের ছবি তুলছে। যুবকটির বয়স



তিরিশের কোঠার গোড়ার দিকে। কানোরিয়া যখন তার সঙ্গে আমার আর মাইকের পরিচয় করিয়ে দিয়ে বললেন আমরা হচ্ছে ডকুমেন্টারি ফোটোগ্রাফার, তখন সে আমাদের দিকে একবার নির্লিপ্তভাবে তাকিয়ে নিজের কাজ করে চলল। ফোটোগ্রাফারটির নাম অজয় পাণ্ডোয়ানি (নাম পরিবর্তিত)। পরবর্তী কয়েক মাসে তার সঙ্গে এক বিচিত্র অন্তরঙ্গতা গড়ে উঠেছিল আমার। আমার আসল পরিচয়ে এই বন্ধুত্ব কখনোই গড়ে উঠতে পারত না। প্রতারণার ভিত্তিতে গড়ে ওঠা বন্ধুত্ব, কিন্তু মৈথিলীর সেটা একান্তই দরকার ছিল।

পরের কটা দিন কানোরিয়াদের সেটে যাওয়া, কথাবার্তা বলা, সিনেমাটার এটা-সেটা নিয়ে আলোচনা করা এবং ‘ইউনিট কা চায়’ পান করেই কেটে গেল।

গুজরাতি চলচ্চিত্র নিয়ে তথ্যচিত্র নির্মাণের জন্য নিয়মিত সেটে আসত অজয়। অবশেষে সে নম্র হয় এবং প্রয়োজনে সাহায্য করতেও রাজি হয়। এইভাবেই একবার ফিল্মের সেটে গিয়ে আমি জানাই গুজরাতের কয়েকজন সুপরিচিত পুলিশ অফিসারের সঙ্গে দেখা করতে চাই আমি, বিশেষত দলিত সম্প্রদায় থেকে আসা অফিসারদের সঙ্গে। কানোরিয়াকে বললাম এইসব অফিসাররা যদি গুরুত্বপূর্ণ পদে থাকেন, যে-সব পদে প্রচুর সাহসিকতা দরকার হয় এবং গুজরাতের নিরাপত্তা অর্থাৎ সম্ভ্রাসবাদ-বিরোধী কাজকর্মের সঙ্গে যদি তাঁরা যুক্ত থাকেন, তাহলে খুবই ভালো হয়।

শেষ কথাটায় প্রয়োজনীয় উত্তরটা পাওয়া গেল। ‘আপনি মি. সিংঘলের সঙ্গে দেখা করতে পারেন। আমাদের একজন সেরা অফিসার, অনেক সম্ভ্রাসবাদীকে নিকেশ করেছেন।’ নিজের উদ্বেজনা চেপে রেখে তাঁর নামটা লিখে নিতে লাগলাম, যেন এই প্রথম শুনছি নামটা।

‘অফিসার সিংঘল কী করেন, স্যর? কোথায় কাজ করেন?’ অস্বস্তার ভান করে জানতে চাইলাম। সিনেমাজগতের বন্ধুদের থেকে এটুকুই আমার দরকার ছিল: একটা প্রবেশপথ, এমন একজনের সুপারিশ যাতে অফিসারদের কোনো সন্দেহ হবে না। সর্বোচ্চ মাপের একজন আঞ্চলিক চলচ্চিত্রকারের সুপারিশে আসা একজন চলচ্চিত্রনির্মাতাকে সন্দেহ করার কথা সিংঘল ভাবতেই পারবেন না।

আমেদাবাদেও একজনকে জানিয়ে রেখেছিলাম আমার ঠিক কেমন সাহায্য চাই। এইসময় সে আমাকে আর একটা ই-মেল পাঠাল। তাতে শহরের সবথেকে বিখ্যাত একজন গায়নোকলজিস্টের সঙ্গে কীভাবে যোগাযোগ করতে হবে তার নিখুঁত বিবরণ দেওয়া ছিল। এই গায়নোকলজিস্টের নামটা উহাই থাক।

আমার ইউনিটর (মোবাইল) নেটওয়ার্ক ঘরের ভেতর থেকে সবসময় ঠিকমতো কাজ করত না। ফলে প্রায়ই আমাকে চত্বরে যেতে হত। সেখানে

হস্টেলের বাসিন্দারা দাঁড়িয়ে চা খেত বা সিগারেট টানত। এদের মধ্যে মাইক-ও থাকত। সেদিনই চত্বরে দাঁড়িয়ে সেই গায়নোকলজিস্টকে ফোন করে বললাম, আমি একজন চলচ্চিত্রকার, গুজরাত নিয়ে একটা ছবি বানাতে চাই, তাতে রাজ্যের স্বাস্থ্য সংক্রান্ত বিষয়টাও রাখতে চাই। ডাক্তার ভদ্রলোক বেশ অমায়িক। সম্ভব হলে সেদিনই সন্ধ্যায় তাঁর হাসপাতালে যেতে বললেন আমাকে। আমি তো হাতে চাঁদ পেলাম। বেরোতে যাব, এমন সময় মাইক ছুটে এসে বলল, ‘মৈথিলী, আমি কি কিছু জিজ্ঞেস করতে পারি?’ তারপর বলল, ‘শোনো মৈথিলী, আমি এভাবে কাজ করতে পারব না। যার সঙ্গেই দেখা হচ্ছে তাকেই বলছ তুমি একটা ফিল্ম বানাচ্ছ, কিন্তু আমি তোমার সঙ্গে কাজ করছি, আমাকে সত্যি বলা তোমার উচিত।’ মাইকের কৌতূহল এড়ানোর চেষ্টা করলাম, কিন্তু ও একেবারে নাছোড়, এমনকী আহতও হল। ‘আমি বাচ্চা ছেলে নই। বিস্তর পড়াশোনা করি। জীবনে কিছু অর্জন করেছি বলেই এই বিনিময় প্রোগ্রামে সুযোগ পেয়েছি। আমাকে তোমার সব বলা উচিত। আমাকে কি তুমি বিশ্বাস করো? নাকি তোমার কাছে আমি স্রেফ একটা উপকরণ, লোকজনকে দেখানোর জন্য একটা বিদেশি মুখ মাত্র?’ মনে হল আগে থেকে ভালোভাবে মকশো করেই কথাগুলো বলছে মাইক। তবু ওর এই আবেগময় বিস্ফোরণটার মধ্যে এমন কিছু ছিল যা থেকে মনে হল আমার প্রকৃত অনুসন্ধানের বিষয়টা ওকে জানানো উচিত। বেরোনোর আগে আমার আগেকার কিছু রিপোর্টের কয়েকটা লিঙ্ক ওকে দিয়ে সেগুলো পড়তে বললাম, যাতে আমি ফিরে আসার আগেই আমার বর্তমান অনুসন্ধানের পুরো পশ্চাদপটটা জেনে নিতে পারে।

ডাক্তারের সঙ্গে দেখা করাটা অত্যন্ত ফলপ্রসূ হল। সাহায্য করতে তিনি খুবই আগ্রহী। ভদ্রলোককে বললাম আমি একজন মহিলা চিকিৎসকের সঙ্গে দেখা করতে চাই, এমন কোনো চিকিৎসক, যিনি গুজরাতে খুবই জনপ্রিয়, আমার ফিল্মে যাঁর ছবি তুলতে পারব। উত্তরটা কী হতে পারে তার একটা আন্দাজ আমার ছিল। গায়নোকলজিস্টদের সঙ্গে দেখা করার পিছনে বিশেষ একটা উদ্দেশ্য ছিল আমার। ২০০২ সালের গুজরাত দাঙ্গা দেশের ধর্মনিরপেক্ষতার বুনোটে একটা কালো দাগ হয়ে রয়েছে। এর পিছনে উস্কানিদাতার অভাব ছিল না। আমেদাবাদের জনৈক বিধায়ক মায়্যা কোদনানি এদেরই একজন। নিজের বিধানসভা এলাকায় দাঙ্গার অন্যতম প্রধান উস্কানিদাতা হিসেবে অনেক প্রত্যক্ষদর্শীই তাঁর নাম বলেছিলেন। কোদনানির কাছে পৌছনো আমার খুবই দরকার, কারণ আমার বিশ্বাস তাঁকে ধরে ঘটনার আরও গভীরে যেতে পারব আমি।

সেদিন সন্ধ্যায় ওই ডাক্তারটি আমার সামনেই কোদনানিকে ফোন করে বললেন, আমেরিকা থেকে আসা জনৈক কৃত্তী চলচ্চিত্রকার তাঁর সাক্ষাৎকার নিতে



চায় এবং আমার বিশ্বাসযোগ্যতা সম্বন্ধে তিনি নিজে গ্যারান্টি দিচ্ছেন। কাজ চালিয়ে যাওয়া এবং সন্দেহ এড়ানোর জন্য এর পরও সপ্তাহে একবার করে ওই ডাক্তারের সঙ্গে দেখা করতাম, যেন এটা আমার গবেষণার অঙ্গ।

সেদিন সন্ধ্যায় হস্টেলে ফিরে দেখলাম একটা কাগজে আমার জন্য বেশ কিছু প্রশ্ন-লিখে রেখেছে মাইক। তার মধ্যে এমন কয়েকটা নামও আছে, যাদের সে ‘ক্রিমিনাল’ মনে করছে। মাইক ঠিকই বলেছিল, বিনিময় কর্মসূচিতে ওকে এমনি-এমনি নির্বাচন করা হয়নি। আমার কথা মন দিয়ে শুনল ও, বেশ কিছু সঠিক প্রশ্ন করল, সূক্ষ্ম বিষয়গুলো ধরতে পারল। আমার পরিকল্পনার কথা ওকে বললাম। সবকিছু ঠিকঠাক না-চললে যে তাৎক্ষণিকভাবে পরিকল্পনা বদলাতে হতে পারে, সেটাও জানালাম। ও জানতে চাইল কীভাবে এগোব আমরা। বললাম, ‘আগামীকাল আমাদের প্রথম পরীক্ষায় বসতে হবে।’

পরের দিন মায়া কোদনানির সঙ্গে দেখা করার কথা। অন্তর্ভুক্তমূলক সাংবাদিক হিসেবে আমার জানা ছিল শুরুতেই খবর হ-হ করে আসে না, যদিও আসে তাতে বেশি কৌতূহল দেখানো উচিত নয়। সেভাবেই বুঝিয়ে দিলাম মাইককে। ‘আজ আমাদের ফিল্মমেকার হয়েই থাকতে হবে, শ্রেফ ফিল্মমেকার।’ মায়াবেনের ক্লিনিক নারোডার বড়ো রাস্তার ওপর। নারোডা পাটিয়া গণহত্যার ঘটনা এই তিনবারের বিধায়কের ক্লিনিক থেকে টিলছোঁড়া দূরত্বে ঘটেছিল, যে-গণহত্যায় শতাধিক মানুষকে হত্যা করা হয়েছিল নির্মমভাবে। শোনা যায় তাঁর উস্কানিতেই একদল লোক উদ্বেজক স্লোগান দিতে দিতে মুসলিমদের আক্রমণ করেছিল।

মাইক আর আমি কোদনানির ক্লিনিকে ঢুকলাম। তাঁর কেবিনের বাইরে সরু টেবিলে স্থানীয় মহিলারা বসে আছেন। দরজার সামনে দু’জন লম্বাচওড়া, সুগঠিত চেহারার লোক দাঁড়িয়ে আছে, তাদের একজনের হাতে একটা বন্দুক। মাইক আর আমাকে দেখে থামাল সে, ফোনে বসের সঙ্গে কথা বলে ভেতরে যেতে দিল আমাদের। লোকটি কোদনানির বডিগার্ড। কোদনানি সিট-এর তদন্তের মুখে পড়ার পর থেকেই তাঁর ক্লিনিক পাহারা দিত সে। দোতলা বাড়ি। অন্য অনেক ডাক্তারেরও ক্লিনিক আছে সেখানে। ক্লিনিকের পাশেই একটা অপারেশন থিয়েটার।

প্রতি বৃহস্পতিবার ক্লিনিকে রোগীর সংখ্যা দ্বিগুণ হয়ে যেত, যাদের অধিকাংশই নিম্নবিত্ত পরিবারের সদস্য। সামনে একটা প্লেটে লেখা আছে, ‘প্রতি বৃহস্পতিবার ভিজিট মাত্র ৫০ টাকা।’ আমাদের দিকে সন্দেহান দৃষ্টিতে তাকিয়ে কম্পাউন্ডারটি জানাল এখানে শুধুমাত্র স্থানীয় মানুষদেরই চিকিৎসা করা হয়। মহিলাকে জানালাম, আমি একজন চলচ্চিত্রনির্মাতা, ম্যাডামের সঙ্গে দেখা করতে এসেছি।

নোটবুকে কিছু লেখার চেষ্টা করছিলাম, একটা টিভি-তে সংস্কার চ্যানেল দেখছিল মাইক। একজন বয়স্ক মহিলা তাঁর পুত্রবধূকে নিয়ে অপেক্ষা করছিলেন। 'বাবাকে সম্মান জানানোর জন্য টিভির সামনে উপুড় হয়ে শুয়ে পড়লেন মহিলা। বিস্মিত দৃষ্টিতে আমার দিকে তাকাল মাইক। একটু হেসে নোটবুকে মন দিলাম।

এইসময় কোদনানির কেবিন থেকে বাইরে এসে তাঁর সহকারিণী বললেন, 'মৈথিলী কৌন চে।' আমাকে আর মাইককে ভেতরে যেতে ইঙ্গিত করলেন তিনি। কায়দা-করা উচ্চারণে আমার আর মাইকের পরিচয় দিলাম। তারপর উষ্ণ করমর্দন।

'আপনার নামটা খুব সুন্দর। এটা সীতাজি-র নাম', বললেন দৃশ্যতই খুশি কোদনানি। 'হ্যাঁ ম্যাম, আমার বাবা সংস্কৃতির শিক্ষক, তাই আমাদের বাড়িতে সকলেরই সুন্দর-সুন্দর নাম।' কথাটা শুনে আরও খুশি হলেন কোদনানি, কিন্তু মাইকের দিকে আর ফিরেও তাকালেন না। মাইক খুবই বিরক্ত হয়েছিল। কোদনানির ডেস্কে মেডিসিন ও গায়নোকলজির বইপত্র, বিজেপির কিছু প্যামফ্লেট এবং গুজরাতে সিদ্ধি সম্প্রদায়ের মানুষদের সম্বন্ধে কিছু প্যামফ্লেট রাখা ছিল। পাশেই তাঁর পুত্র ও পুত্রবধূর একটা ছবি, তারা আমেরিকায় থাকে। প্রায় এক ঘণ্টা ধরে তাঁর কর্মজীবন নিয়ে আলোচনা করলাম আমরা। নিজের পরিবারের কথা বললেন তিনি। ঠান্ডা পানীয় এল।

শিশুকল্যাণ ও স্বাস্থ্য বিষয়ক মন্ত্রী মায়াবেন। সেই সূত্রে গুজরাতে নারীদের কল্যাণের জন্য তাঁর দায়বদ্ধতার প্রশংসা করলাম আমি। 'আমার কাছে কী চান আপনি?' অবশেষে প্রশ্ন করলেন তিনি। 'আমি শুধু আপনার কথা আরও বেশি করে জানতে চাই ম্যাম, গুজরাতে কৃতী মানুষ হিসেবে ছবিতে ফুটিয়ে তুলতে চাই আপনাকে।' প্রত্যেকে, বিশেষত রাজনীতির সঙ্গে যুক্ত প্রত্যেকে, তোষামুদে কথা শুনে এবং যা তাদের গৌরবান্বিত করবে, তার অংশীদার হতে চায়। তৎক্ষণাৎ ঘাড় নাড়লেন তিনি এবং পরের রবিবার তাঁর অ্যাপার্টমেন্টে লাঞ্চ করার আমন্ত্রণ জানানলেন। নিজের উদ্ভাস আড়াল করার চেষ্টা করতে করতে বললাম, তাহলে তো দারুণ হয়।

কোদনানির কেবিন থেকে বেরোনোর আগে তাঁর শাড়ি আর অন্যান্য সাজসজ্জার প্রশংসা করলাম আমি। বাইরে বেরোনোর সময় মনে হল নিরাপত্তা রক্ষীটি তেমন খুশি নয়। একটা অটো ধরে সোজা পাকওয়ানের দিকে চললাম। দৃশ্যতই অখুশি মাইক বলল, 'তুমি নিশ্চয়ই দেখেছ আমার সঙ্গে কথা বলার আদৌ ইচ্ছে ছিল না ওঁর।' আমি কোনো উত্তর দেওয়ার আগেই হালুয়া আর রাবড়ি এসে গেল। গুজরাতে থালি পরিবেশনের সময় প্রথমে মিষ্টি দেওয়া হয়। মাইকের মনোযোগ অন্যদিকে ঘুরে

গেল, কোদনানির কথা তখন আর মাথায় নেই, ওদিকে মহারাজ তাকে প্রতিটা পদের নাম সঠিকভাবে শেখানোর চেষ্টা করছে। যাক, বাঁচা গেল।

রাত দশটা নাগাদ হস্টেলে ফিরলাম। নিজের ঘরে পা দিতেই কেমন যেন একটা অস্বস্তিকর অনুভূতি হল, কিছু যেন ঘটেছে। বেরোনোর আগে বিছানাটা ঠিকভাবে পেতে রেখে গিয়েছিলাম, এখন বিছানার চাদরটা দোমড়ানো এবং ল্যাপটপটা সুইচ অন করা। সুটকেস আর ড্রয়ারে কেউ হাত দেয়নি, কিন্তু বুঝতে পারছি ঘরে কেউ ঢুকেছিল। না, অবাক হইনি। এ-রকম কিছু যে ঘটতে পারে, সেটা আগেই আন্দাজ করেছিলাম বলে গুজরাতে ঢোকায় আগে আমার ল্যাপটপটা রি-ফর্ম্যাট করে রেখেছিলাম এবং অ্যাডমিনের নাম ছিল মৈথিলী ত্যাগী। ডেস্কটপে ছিল চলচ্চিত্রনির্মাণ সংক্রান্ত এবং গুজরাত মিউজিয়াম, ফিল্ম ইন্ডাস্ট্রি ও অরণ্য সম্বন্ধে গবেষণার ফাইলপত্র। স্ক্রিনে ছিল শ্রীকৃষ্ণের একটা ওয়ালপেপার। বিছানার পাশের তাকে রাখা ছিল চলচ্চিত্রনির্মাণ ও ফোটোগ্রাফি সংক্রান্ত বইপত্র। স্পষ্ট বোঝা যাচ্ছে কেউ আমার ঘরে তল্লাশি করতে ঢুকেছিল এবং প্রয়োজনীয় কিছুই পায়নি। খেলার তো সবে শুরু।

পরেরদিন সকালে জি.এল. সিংঘলের সঙ্গে টেলিফোনে কথা বলতে হবে। ফোটোগ্রাফার-বন্ধু অজয় আমার ফোনে একটা মেসেজ পাঠিয়ে জানতে চাইল, ‘আমদাবাদ নি গুফা’য় একটা আলোকচিত্র প্রদর্শনীতে যেতে আমি আগ্রহী কি না। কোনটা একপাশে সরিয়ে রাখলাম। দরজায় কড়া নাড়ল মাইক। ফাউন্ডেশনের চারপাশে হাঁটতে যাচ্ছে সে, জানতে এসেছে আমিও যেতে চাই কি না। গুজরাতে ডিসেম্বর মাসের সঙ্গে খুব সুন্দর আর কনকনে ঠান্ডা হয়। ২০১০ সালের শীতকালটা অবশ্য খুব কষ্টকর ছিল। উপরন্তু হস্টেলটা ছিল একটা খোলা, অনুন্নত জঙ্গলময় এলাকায়।

হস্টেলে গায়ে দেওয়ার জন্য মাত্র একটা করে কম্বল পাওয়া যেত। রাতের বেলায় আমাদের মধ্যে বেশির ভাগ জন সুটকেস হাঁটকে সবকিছু বার করে গায়ে চাপানোর চেষ্টা করতাম—টি-শার্ট, শার্ট, সোয়েটার, জিনস, যা-কিছু থেকে একটু উষ্ণতা পাওয়া যায়, তেমন সবকিছুই।

সেদিন সন্ধ্যায় মাইক আর আমি একজোড়া বাড়তি জ্যাকেট গায়ে চাপিয়ে ফাউন্ডেশন বিন্ডিংয়ের অরণ্যের পাশ দিয়ে হাঁটতে যাব ঠিক করলাম। মাইক যথারীতি চিন্তায় ডুবে আছে। ওর দিকে তাকাতে ও বলল, ‘আমি কি ঠিকঠাক কাজ করছি, মৈথিলী?’ আশ্বাস দিয়ে বললাম, ‘তুমি খুব আত্মবিশ্বাস নিয়ে কাজ করছ। মিসেস কোদনানিকে নিয়ে মাথা ঘামিয়ে না। উনি কথাবার্তায় বড্ড ব্যস্ত ছিলেন আর শুধু প্রশংসার কথাই শুনতে চাইছিলেন।’

সেই রাতে শুতে যাওয়ার আগে অজয়কে একটা মেসেজ পাঠালাম, 'এক্সিভিশনে তোমার সঙ্গে দেখা হবে।'

পরের দিন সকালে ক্যান্টিনে উপমা খেতে খেতে শেষ পর্যন্ত জি.এল. সিংঘলকে ফোন করলাম। সেইসময় সবার নজর রয়েছে তাঁর দিকে। হাইকোর্ট নিযুক্ত স্পেশ্যাল ইনভেস্টিগেশন টিম (SIT) ইশরাত জাহান হত্যার তদন্ত শুরু করেছে এবং সিংঘলের কথা সবার মুখে মুখে ফিরছে। 'সংঘর্ষের' পরের দিন গুজরাতের উচ্চপদস্থ পুলিশকর্তা এবং এটিএস-প্রধান ডি.জি. বানজারা একটা সাংবাদিক সম্মেলন ডাকেন। সে এক চাঞ্চল্যকর দৃশ্য। আরও তিনজনের সঙ্গে ইশরাতের রক্তাক্ত দেহ শোয়ানো আছে রাস্তায়। বলা হয়েছিল সে একজন নারী ফিদারো, ভারতে এই প্রথম নারী ফিদারো দেখা গেল, সে লশকর-ই-তইবা-র কর্মী, গুজরাতের মুখ্যমন্ত্রী নরেন্দ্র মোদিকে হত্যার চেষ্টা করেছিল।

সর্বত্র আলোচনার বিষয় হয়ে উঠেছিল ইশরাত। জিহাদি মৌলবাদ এবং জঙ্গি মুসলিম সংগঠনগুলি কীভাবে ২০০২ সালের সাম্প্রদায়িক দাঙ্গার বদলা নিতে চাইছে, তা নিয়ে কাগজে নানান কথা লেখা হচ্ছিল। ডি.জি. বানজারাকে মহান বীর বলে মনে করছিল সবাই, রাতারাতি বিখ্যাত হয়ে উঠেছিলেন তিনি। তাঁর গৌরবের অংশীদার ছিলেন আরও কয়েকজন অফিসার: এন.কে. আমিন, তরুণ বারোত এবং গিরিশ সিংঘল, যাঁর সম্বন্ধে আমার বিশেষ কৌতূহল ছিল।

ইতিমধ্যে ইশরাতের পরিবার তাদের মেয়ের 'হত্যা'র তদন্ত চেয়ে সুপ্রিম কোর্টে আবেদন জানিয়েছিল। গুজরাত হাইকোর্ট একটা বিচার বিভাগীয় কমিটি নিয়োগ করে, ২০০৮ সালে রায় দেয় সেই কমিটি। জাস্টিস তামাং কমিটি, যার প্রধান ছিলেন গুজরাত হাইকোর্টের জনৈক প্রাক্তন বিচারপতি, যে-রায় দেয় তাতে সারা দেশ চমকে ওঠে: 'ভূয়ো সংঘর্ষে হত্যা করা হয়েছে ইশরাত জাহানকে—এ ব্যাপারে আরও অনুসন্ধান করা দরকার।'

এই রায়ের পর নিরপরাধ ব্যক্তিদের হত্যার জন্য কর্মকর্তাদের ক্ষমতার অপব্যবহার বিরুদ্ধে প্রতিবাদে পথে নামেন মানবাধিকার কর্মী ও আইনজীবীরা। মামলাটা আর এগোচ্ছিল না। এরপর আরও অনুসন্ধানের জন্য গুজরাত হাইকোর্টে আবেদন করে ইশরাতের পরিবার। তখন সংঘর্ষের তদন্তের জন্য তিন সদস্যবিশিষ্ট একটা বেঞ্চ গঠন করা হয়। পরে, ২০১৩ সালে, গুজরাত হাইকোর্ট কর্তৃক নিযুক্ত সিবিআই-এর তদন্তকারী দল একে ভূয়ো সংঘর্ষ বলে জানায় এবং অভিযুক্ত হিসেবে গুজরাতের উচ্চপদস্থ কিছু পুলিশকর্তার নাম উঠে আসে।

২০১০ সালে সুপ্রিম কোর্টের নির্দেশে সিটি যখন মামলাটার তদন্ত করছে, তখনই আমি প্রথম সিংঘলের অ্যাপয়েন্টমেন্ট চাই। ফোন বাজল। কায়দাদুরন্ত

ইংরেজি উচ্চারণে নিজের পরিচয় দিলাম। তখনই কোনো উত্তর মিলল না। পরে কোন করতে বললেন সিংঘল। এই লোকটাই আমার একমাত্র আশা। একে দিয়েই আমার অন্তর্ভুক্ত শুরু করতে হবে। মনে মনে ভাবলাম, কীভাবে এগোনো যায়। সেদিনের কাগজে খবর ছিল, সিংঘলকে অবিলম্বে প্রেপ্তার করবে সিট। এ-সকল অবস্থায় একজন বিদেশযাত্রী চলচ্চিত্রকারের সঙ্গে কথা বলার থেকে আইনি পথ বোজার কাজে ব্যস্ত থাকারটাই সিংঘলের পক্ষে স্বাভাবিক। মাইককে জানালাম আজ আর তাকে দরকার নেই। হস্টেলের অন্য বাসিন্দাদের সঙ্গে ভাবসাব হয়ে গিয়েছিল মাইকের। এদের মধ্যে একজন ছিল পারনানগুয়াক লিন্জে নামক প্রিন্সিপালের একটি মিষ্টি মেয়ে, যাকে আমরা পানি বলে ডাকতাম। আমার মনে হচ্ছিল মেয়েটির প্রতি আসক্ত হয়ে পড়েছে মাইক। আজ তার কোনো কাজ নেই শুনে পানিকে নিয়ে ছবি তোলার জন্য বেরোতে চাইল মাইক এবং পানি এককথায় রাজিও হয়ে গেল।

মনে পড়ল, সঙ্কল্পের সময় আমাকেও ছবির প্রদর্শনীতে যেতে হবে। আপাতত তেমন কিছু করার নেই দেখে ঘরে ফিরে গত কয়েকদিনের ঘটনাগুলো লিখে রাখতে লাগলাম।

সঙ্কল্পের সময় ছবির প্রদর্শনীতে গিয়ে দেখি অজয় তার বন্ধুর প্রদর্শনীতে সবাইকে আপ্যায়ন করতে ব্যস্ত। সবার সঙ্গে আমার পরিচয় করিয়ে দেওয়া হল আমেরিকা থেকে আসা একজন চলচ্চিত্রনির্মাতা হিসেবে। নানান টেকনিক্যাল প্রশ্ন ধেয়ে আসার পক্ষে এটুকুই যথেষ্ট ছিল। ‘আপনার ক্যামেরার কাজটা কে দেখছে? কী ক্যামেরা ব্যবহার করছেন? শুটিং শুরু হবে কবে?’ এই ধরনের প্রশ্ন আসতে পারে অনুমান করে উত্তরগুলো আগে থেকেই ভেবে রেখেছিলাম। ঠান্ডা মাথায় প্রশ্নগুলোর উত্তর দিলাম। অজয় দৃশ্যতই আশ্বস্ত। ‘আমদাবাদ নি গুফাটা আমাকে ঘুরিয়ে দেখাল সে। আমরা কফির কাপ আর সামোসা নিয়ে বসার আগে জায়গাটার ইতিহাসও অল্পকথায় জানিয়ে দিল আমাকে।

আমাদের পাশেই একদল কলেজপড়ুয়া বসে ছিল, তাদের মধ্যে একজন গিটার বাজাচ্ছে। দূরের কোণে একজন তার বান্ধবীকে নিয়ে বসে আছে। এক মুহূর্তের জন্য মনে হল সবকিছু ভুলে গেলে বেশ হয়—পুলিশকর্তা, আমার ছদ্মপরিচয়, আসন্ন কাজের ব্যাপারে নার্ভাস হয়ে থাকা, সবকিছু। আমি যেন ওদের মতোই একজন ছাত্রী। বাড়ির কথা মনে পড়ল, কতদিন মা-বাবার সঙ্গে কথা বলিনি, আমার আচরণের এই আকস্মিক পরিবর্তনে উদ্ভিগ্ন হয়ে আছেন তাঁরা। আমার সেলফোন সুইচ অফ করে রেখেছি। স্থানীয় সাইবার ক্যাফে থেকে মেল করি মা-বাবাকে, তবে খুব ঘনঘন নয়। অমিত শাহ সংক্রান্ত রিপোর্টটা প্রকাশ করার পর থেকেই আমার নিরাপত্তা সম্বন্ধে সবসময় দৃষ্টিভ্রায় থাকেন তাঁরা।

এইসব ভেবে অজয়কে বললাম আমার হস্টেলের কাছে একটা বাজারে সে আমাকে নামিয়ে দিতে পারে কি না। বললাম, আমার কিছু টুকটাক কাজ আছে। স্যাটেলাইট রোডের বাজার এলাকায় নামিয়ে দিল অজয়। টুকটাক কাজের বাহানাটা যে বানানো নয় তা বোঝানোর জন্য একটা সুপার মার্কেটে ঢুকে টয়লেটের কিছু জিনিসপত্র কিনে দোকানের পাশের পাবলিক বুথে ঢুকলাম। এটাই হচ্ছে যোগাযোগের সবথেকে নিরাপদ উপায়। বাড়ির ল্যান্ডলাইন নম্বরটা ডায়াল করলাম। আমার শক্তির উৎস এবং নিজেকে সারাক্ষণ শক্ত মানুষ হিসেবে দেখানোর চেষ্টা করে চলা আমার মা ফোন ধরলেন। মা চাইছিলেন আমি ফিরে যাই। বাড়ির সঙ্গে কোনো যোগাযোগ রাখা যাবে না, এ আবার কেমন সাংবাদিকতা। মাকে যতটা সম্ভব আশ্বস্ত করে ফোন রেখে দিলাম। বুকের ভেতরটা যেন ফাঁকা লাগছে।

পরেরদিন সকালে আবার ফোন করলাম সিংঘলকে। এবার আমার সঙ্গে দেখা করতে রাজি হলেন তিনি। আমার অন্তর্ভুক্তির যন্ত্রণাময় দীর্ঘযাত্রা অবশেষে শুরু হতে চলেছে।

## তৃতীয় পরিচ্ছেদ জি.এল. সিংঘল

গিরিশ সিংঘলের বড়ো ছেলে হার্দিক ২০১২ সালে আত্মহত্যা করে। ঘনিষ্ঠজনেরা বলেন এই ঘটনায় তার বাবা একেবারে ভেঙে পড়েছিলেন।

২০১০ সালের সেই সকালে টেলিফোনে কথা বলার পর সিংঘলের সঙ্গে দেখা করি আমি। সঙ্গে ছিল মাইক। যাওয়ার আগে ওকে বুঝিয়ে বলেছিলাম পরিস্থিতি কতটা স্পর্শকাতর হয়ে আছে। সিংঘল কোনো হেঁজিপেঁজি লোক নন, গুজরাত এটিএস-এর প্রধান কর্তা তিনি।

সেইসময় সিট-এর তদন্ত চলছিল বলে সিংঘলের চলাফেরার ওপর সতর্ক নজর রাখা হচ্ছিল, কাদের সঙ্গে দেখা করেছেন সে ব্যাপারে তিনি নিজেও সতর্ক থাকতেন। তাঁর প্রেপ্তার হওয়া অনিবার্য ছিল। সিট দ্রুত তদন্ত করছিল। দু'জন জুনিয়র অফিসার ততদিনে প্রেপ্তার হয়েছেন। এরপরই হয়তো সিংঘলকে প্রেপ্তার করা হবে। অন্যান্য অভিযোগের সঙ্গে তাঁর ও অন্য অফিসারদের বিরুদ্ধে অভিযোগ ছিল সম্ভ্রাসের নামে একটি নিরপরাধ মেয়ের বিরুদ্ধে চক্রান্ত করে তাকে হত্যা করার।

এ ঘটনা গুজরাতে নতুন কিছু নয়। সাম্প্রদায়িক দাঙ্গার পর বৈরিতার একটা বাতাবরণ সেখানে ছিলই। স্পষ্ট বোঝা যাচ্ছিল, দুই সম্প্রদায়ের মধ্যকার ভতটা-বন্ধুত্বপূর্ণ-নয় সম্পর্ক আরও খারাপের দিকে এগোচ্ছে। নরেন্দ্র মোদিকে সেই হিন্দু নেতা হিসেবে দেখা হচ্ছিল যিনি 'গুজরাত অশ্মিতা'কে হানাদারির হাত থেকে রক্ষা করেছেন। গোধরায় ট্রেনে আগুন লাগানো এবং তার পরবর্তী হত্যাকাণ্ডে উভয় সম্প্রদায়ই ক্ষতিগ্রস্ত হয়েছিল। অভিযোগের বর্ষামুখ ছিল বিভিন্ন আমলা ও অফিসারদের দিকে, কিন্তু তাঁদের বিরুদ্ধে কিছুই প্রমাণ করা সম্ভব ছিল না। সেইসময় কর্তৃপক্ষের কার্যকলাপ অথবা নিষ্ক্রিয়তাকে কঠোরতম ভাষায় সমালোচনা করে গেছে তদন্ত কমিশন, তা সত্ত্বেও হাতে-গোনা করেকজন কর্মী ছাড়া বাকিরা ক্ষমতার রয়েছেই গেছে। সম্ভবত এই দৃষ্টান্তে উদ্দীপ্ত হয়েই গুজরাতে

বেশ কিছু সংঘর্ষে মৃত্যুর ঘটনা ঘটে, পরবর্তীকালে যেগুলোকে ভারতের সুপ্রিম কোর্ট স্বয়ং ভূয়ো সংঘর্ষ হিসেবে অভিহিত করেন। ‘গুজরাত অস্মিতা’র পক্ষে বিপদকে প্রতিভাত করার একটা অংশ ছিল এইসব ভূয়ো সংঘর্ষ।

গুজরাতের ভূয়ো সংঘর্ষের ঘটনাবলি একটা নোংরা নকশা অনুযায়ী এগিয়েছে। সমির খান পাঠান, সাদিক জামাল, ইশরাত জাহান, জাভেদ ওরফে প্রাণেশ পিল্লাই, সোরাবুদ্দিন, তুলসীরাম প্রজাপতি। এগুলো গুজরাতের কয়েকটা মাত্র ভূয়ো সংঘর্ষের ঘটনা, দেশের সর্বোচ্চ বিচারক সংস্থা যেগুলোর তদন্ত করছে। ঘটনাগুলোর দিকে এক নজর তাকালেই ঠান্ডা মাথায় পরিকল্পিত ও সংঘটিত হত্যাবোতের স্বরূপ বোঝা যায়। ২০১১ সালের ডিসেম্বর মাসে তেহেলকায় আমার সবথেকে পূর্ণাঙ্গ রিপোর্টগুলোর একটায় আমি লিখেছিলাম:

তবে গুজরাতের ভূয়ো সংঘর্ষগুলিকে কেন্দ্র করে যে নিন্দাজনক ও মিথ্যা প্রচারের ষোত বইছে, সেটাই বিষয়টিকে আরও উদ্বেগজনক করে তুলেছে। ভূয়ো সংঘর্ষে নিহত প্রত্যেককে খোলাখুলিভাবে লশকর-ই-তইবার সন্ত্রাসবাদী হিসেবে অভিহিত করা হয়েছে এবং বলা হয়েছে এদের উদ্দেশ্য ছিল মুখ্যমন্ত্রী মোদি, তৎকালীন উপ-প্রধানমন্ত্রী এল.কে. আদবানি এবং উগ্র-হিন্দুত্ববাদী প্রবীণ ভোগাড়িয়া ও জয়দীপ প্যাটেলের মতো নেতাদের হত্যা করা। ২০০২ সালের পরবর্তী সময়ে ধর্মের ভিত্তিতে দুই মেরুতে বিভক্ত গুজরাতে এই ধরনের প্রচার শুকনো কাঠে আগুন ছোঁয়ানোর মতো কাজ করত। কেউই লক্ষ করল না যে কোনো মুসলিম ছেলেই দেশের মধ্যে কোনো সন্ত্রাসবাদী বোমা বিস্ফোরণের সঙ্গে জড়িত ছিল না। কিছু বানানো বিপদের কথা বলে এবং ছোটোখাটো অপরাধীদের ‘সন্ত্রাসবাদী’ হিসেবে চিহ্নিত করে সমগ্র মুসলিম সম্প্রদায়কেই জাতীয়তাবিরোধী হিসেবে ছাপ মেরে দেওয়া হল। এর ফলে মোদিকে ‘হিন্দু হৃদয়সঘাট’ রূপে প্রতিষ্ঠিত করতে সুবিধে হল—যে-মানুষটি ‘হিন্দুর শত্রুদের’ উচিত শিক্ষা দিতে দক্ষ তো বটেই, সেইসঙ্গে জিহাদি গ্রুপগুলোর থেকে যে-কোনো সময় তাঁর প্রাণনাশের আশঙ্কাও আছে।’

এর আগে তেহেলকার একটা রিপোর্টে বলা হয়েছিল, ছিঁচকে অপরাধী ও তোলাবাজ সোরাবুদ্দিন নিহত হওয়ার আগে অমিত শাহ তাকে ভালোভাবেই চিনতেন। কেন সোরাবুদ্দিনকে ঝেড়ে ফেলে সন্ত্রাসবাদী তকমা দেওয়া হল, সেই অস্বস্তিকর প্রশ্নটিও তোলা হয়েছিল ওই রিপোর্টে। মনে রাখা দরকার, অমিত শাহ তখন কেবলমাত্র গৃহমন্ত্রী এবং রাজ্য পুলিশের কার্যকলাপের জন্য প্রত্যক্ষভাবে



দায়িত্বশীলই ছিলেন না, সেইসঙ্গে মোদির সঙ্গে অতি-ঘনিষ্ঠতার ফলে এক ডজনেরও বেশি মন্ত্রকের ভারও ছিল তাঁর হাতে। আবার কলঙ্কিত পুলিশ অফিসার বানজারা ছিলেন অমিত শাহের অত্যন্ত ঘনিষ্ঠ।

তবে ১৯ বছরের তরুণী ইশরাত জাহানের ঠান্ডা মাথায় হত্যাকাণ্ডই সিংঘলকে ভোপের মুখে ফেলেছিল। অন্যান্য ডুয়ো সংঘর্ষে তাঁর ভূমিকার ব্যাপারটা সংশ্লিষ্ট সংস্থা কর্তৃক তদন্ত চলার সময় তাঁর ভবিষ্যতকে আরও অন্ধকারাচ্ছন্ন করে তুলতে সাহায্য করেছিল মাত্র।

সেদিন সকালে আমেদাবাদের শাহিবাগ এলাকায় তাঁর প্রভূত নিরাপত্তাবিশিষ্ট অফিসে মাইককে নিয়ে পৌছোনের পর গিরিশ সিংঘলকে প্রথমবার দেখলাম আমি। তাঁর অতীতের সম্মানজনক কাজের অন্যতম একটি ছিল অক্ষরধাম আক্রমণের সফলভাবে মোকাবিলা করা, যে-কাজের জন্য সাহসিকতার পুরস্কার পান তিনি। যে-ধরনের স্বীকৃতি তিনি অর্জন করেছিলেন, তা তাঁর বয়সী কোনো অফিসারের পক্ষে অর্জন করা খুব স্বাভাবিক নয়, কিন্তু তাঁর বিভাগের বেশিরভাগ কর্মীই এই কথার পক্ষে সাক্ষ্য দেন। এটিএস অফিসের নিরাপত্তারক্ষীটি একটু বিভ্রান্ত হয়ে পড়েছিল। স্টার্ট আর গলায় রঙিন বান্দনা বাঁধা এক মহিলা এবং একজন বিদেশি লোক এটিএস কর্তার সঙ্গে দেখা করতে চান? সিংঘলের কাছে খবর পাঠানো হল।

কয়েক মিনিটের মধ্যেই একজন কনস্টেবল এসে রক্ষীটিকে গুজরাতিতে ফিসফিস করে জানাল, আমরা হচ্ছি বিদেশি চলচ্চিত্রকার, সাহেবের সঙ্গে দেখা করতে এসেছি। মাইক আর আমাকে যখন ভেতরে নিয়ে যাওয়া হচ্ছে, রক্ষীটি বিস্ময়ে হাঁ করে তাকিয়ে ছিল। মাইক যথারীতি আকর্ষণীয় ব্যক্তিত্ব হিসেবে চলাফেরা করছে। অন্য কোনো ১৯ বছর বয়সী ছেলে হলে এই অবস্থায় ভয়ে কাঁপত, কিন্তু মাইক সে বান্দাই নয়। তবে ওকে নিয়ে আমার কিছুটা দৃষ্টিস্তা ছিল। পরিস্থিতির গুরুত্ব এবং তার সঙ্গে ঝুঁকির ব্যাপারটা কি ও পুরোপুরি বুঝেছে? ওয়েটিং রুমে ঢোকান পর মন থেকে যাবতীয় সংশয় মুছে গেল। কয়েকজন কনস্টেবল এবং সাদা পোশাকের উচ্চপদস্থ পুলিশকর্তাদের সঙ্গে বসে অপেক্ষা করছিলাম আমরা—পায়ের সাদা, মজবুত স্পোর্টস শ্যু দেখেই সাধারণ লোকেদের সঙ্গে তাঁদের পার্থক্য বোঝা যাচ্ছিল। টিভিতে একটা বলিউডি সিনেমা চলছিল, মাইক তাতে আকৃষ্ট হয়ে পড়ল। গোবিন্দার ছবি। কয়েকজন পুলিশকর্তা মন দিয়ে ছবিটা দেখছেন, অন্যরা নিজেদের কাজ করে চলেছেন। বেশি কৌতূহলী একজন পুলিশকর্তা মাইকের পাশে এসে বসে খুব ভদ্র সুরে তাকে ‘নমস্ते’ জানালেন। ভাঙা-ভাঙা ইংরেজিতে কথাবার্তা চলতে লাগল। মাইকের এদেশি খাদ্যাভ্যাস থেকে শুরু করে

তার নিজের দেশের নানান কথা—বহু বিষয় নিয়েই কথা হচ্ছিল। মাইক সম্পূর্ণ সুস্থ, কোনো মানসিক চাপে ভুগছে না, আবার অতি-উৎসাহীও হয়ে পড়ছে না।

আদালি বলল, ‘মৈথিলী ত্যাগী, আপকো সাহিব বুলাতে হয়।’ নাটকের প্রথম অঙ্ক শুরু হল।

গিরিশ সিংঘলের বয়স চল্লিশের কোঠার গোড়ার দিকে, ভদ্র, সুবেশ, কেতাদুরস্ত। একটা আধ-খাওয়া সিগারেট দু’আঙুলের ফাঁকে ধরে আমাদের ভেতরে ডাকলেন। ল্যাপটপে একটা ভিডিও দেখছিলেন। টেবিলে ওশো সংক্রান্ত গোটা দুয়েক বই। ‘আপনি কি ওশোর অনুগামী?’ বসতে বসতে প্রশ্ন করলাম। ডায়েরিটা খুব সন্তর্পণে ডেস্কে রাখলাম—ডায়েরিতেই লাগানো ছিল আমার ভিডিও রেকর্ডার। প্রথমে ভেবেছিলাম গোপনে কথাবার্তা রেকর্ড করার আগে আমার উদ্দিষ্ট ব্যক্তিদের সঙ্গে পরিচয়পর্বটা সেরে নেব। কিন্তু সবাই জানে সিংঘলের মেজাজমর্জি ঘন ঘন পালটায়। তিনি যদি হঠাৎ গুরুত্বপূর্ণ কিছু বলে বসেন আর আমার সঙ্গে তখন যদি রেকর্ডার না থাকে, তাহলে কী হবে? কিংবা এরপর তিনি যদি আমাকে আর অ্যাপয়েন্টমেন্ট না দেন, তাহলে?

সিংঘলের সঙ্গে মাইকের পরিচয় করিয়ে দিলাম। সিংঘল ঘাড় নাড়লেন। এবার কৃত্রিম উচ্চারণে আমাদের আসার কারণ জানালাম। খুব মন দিয়ে শুনলেন সিংঘল, প্রতিটা শব্দই গুরুত্ব দিয়ে অনুধাবন করলেন, মাঝেমাঝে ঘাড় নাড়তে লাগলেন। তাঁর মনোযোগ আকর্ষণ করতে পেরেছি বুঝে আলগাভাবে কয়েকটা পরিচিত নাম ভাসিয়ে দিলাম। ‘আসলে মায়াবেন তো আপনার প্রশংসায় পঞ্চমুখ, তাঁর ধারণা আপনি এই রাজ্যের একজন সেরা অফিসার। আমাদের ফিল্মে মায়াবেনের কথাও থাকছে।’ প্রত্যাশিত ফলই পাওয়া গেল। সিংঘলের মুখের গুরুগম্ভীর ভাবটা কেটে গিয়ে হাসি ফুটে উঠল। বললেন, ‘ভদ্রমহিলা খুবই ভালো, খুব আধ্যাত্মিক মনোভাবাপন্ন।’

তাঁকে ঘিরে যে-সব বিতর্ক দানা বেঁধে উঠেছে সে বিষয়ের দিকে না-যাওয়াই ভালো মনে হল। বরফ গলানোর জন্য অজ্ঞতার ডান আর সত্ৰম দেখানোই বোধহয় সহজ পথ হবে। নিজের ছোটোবেলার কথা, উঁচু শ্রেণির বিরুদ্ধে লড়াইয়ের ইচ্ছের কথা, তাঁদের দলিত পরিবারকে প্রতিবেশী ব্রাহ্মণরা কী চোখে দেখত সেই কথা এবং পরিবারের একমাত্র উপার্জনকারী হয়ে ওঠার কথা বললেন তিনি। পুলিশে যোগ দেওয়াটা কি সম্মান পুনরুদ্ধারের একটা উপায় হিসেবে কাজ করেছে? তিনি উত্তর দিলেন, ‘অসাম্য সর্বত্রই আছে, এমনকী এই যে ব্যবস্থার মধ্যে আমি আছি, সেখানেও অসাম্যের অভাব নেই।’

১৫ মিনিটের জন্য নির্ধারিত সাক্ষাৎকার এক ঘণ্টায় গড়াল। আমি যখনই কিছু লিখে নিতে বললাম, খুব মন দিয়ে লিখে নিল মাইক। ওদিকে কীভাবে তিনি আজকের এই ব্যক্তিত্ব হয়ে উঠেছেন, সেই কাহিনি বলে চললেন গিরিশ সিংঘল।

একটা দোকানের কোনো জিনিসে হাত দেওয়ার জন্য দোকানদার কীভাবে তাঁকে লাঠি দিয়ে মেরেছিল (তাঁর নীচু জাতের জন্য) থেকে শুরু করে নিজের সাহসিকতার কাহিনি—অক্ষরধাম মন্দিরের ভিতরে ঢুকে পড়া সন্ত্রাসবাদীদের বিরুদ্ধে লড়াই—বলে গেলেন সিংঘল। বলার সময় মুখে গর্ব ফুটে উঠছিল। তাঁর সাফল্যের জন্য তাঁকে অভিনন্দন জানালাম, লজ্জায় রাঙিয়ে উঠলেন সিংঘল। যখন চারপাশের সবকিছুই তাঁকে চাপে ফেলে দিচ্ছে, যখন তাঁর কেরিয়ার বিপন্ন, তখন একজন বহিরাগতের এই স্বীকৃতি হয়তো তাঁকে কিছুটা স্বস্তি দিয়েছিল। আদা-চা খেতে খেতে তাঁর কথা শুনে চললাম।

এই মিটিংটা আমাদের সামনে দুয়ার খুলে দিল। পরের সপ্তাহে আর-একটা অ্যাপয়েন্টমেন্ট পেলাম। তবে কথাবার্তার সূত্রে এমন একটা বিষয় উঠে এল যার সূত্রে আরও কিছু জানার সুযোগ পাব মনে হল। জাতপাত নিয়ে, বিশেষত দলিত শ্রেণির মানুষ হওয়া সত্ত্বেও যাঁরা উঁচু পদে উঠতে পেরেছেন তাঁদের নিয়ে, কথা বলতে গিয়ে নিজের উপদেষ্টা হিসেবে একজনের নাম করলেন সিংঘল। তাঁর নাম রাজন প্রিয়দর্শী, গুজরাত এটিএস-এর প্রাক্তন প্রধান। তাঁকে গভীর শ্রদ্ধা করেন সিংঘল। তিনি বললেন, প্রিয়দর্শীও ওবিসি শ্রেণির মানুষ, আমাদের তথ্যচিত্র নির্মাণের কাজে অনেক সাহায্য করতে পারেন তিনি। একবছর আগে রিটারায়ার করে এখন সপরিবারে আমেদাবাদে থাকেন। সম্ভবত আমাদের উদ্দেশ্য সম্বন্ধে সিংঘলের আর কোনো সংশয় ছিল না, তাই আমাদের সুবিধের জন্য নিজেই ‘স্যর’কে আমাদের কথা জানাবেন বললেন।

সিংঘলের সঙ্গে এক ঘণ্টা কথা বলার পর নিরাপত্তায়-মোড়া এটিএস সদরদপ্তর থেকে বেরিয়ে এলাম মাইক আর আমি। দু’জনেই চুপচাপ। নিরাপত্তারক্ষীর দিকে তাকিয়ে ঘাড় নাড়লাম আমরা। এখন সে আমাদের দিকে তাকিয়ে হাসল এবং একটা অটোও ডেকে দিল। অটোয় করে এক কিলোমিটার যাওয়ার পর পরস্পরের দিকে তাকিয়ে হাসলাম আমরা। মাইক বলল, ‘ব্যাপারটা ঠিকঠাকই এগোচ্ছে, কী বলো?’ আমি মাথা নাড়লাম।

পরের কয়েকটা দিন সিংঘলকে একটু রেহাই দেব ঠিক করলাম। বারবার ফোন করলে মনে হবে আমরা বোধহয় খুব মরিয়া হয়ে উঠেছি এবং সন্দেহ দেখা দেবে। এর মধ্যে কয়েকটা মেসেজ পাঠিয়ে তাঁকে জানালাম তাঁর সম্বন্ধে কতটা গবেষণা

করেছি এবং রাষ্ট্রের প্রতি তাঁর দায়বদ্ধতায় কতটা মুগ্ধ আমরা। আমাদের পরবর্তী সাক্ষাতের দিনটা এসে পড়ল।

ঠিক করলাম এবার মাইককে নিয়ে যাব না। রাজনৈতিক নেতাদের সাক্ষাৎকার নেওয়া কিংবা বিভিন্ন কর্মকর্তাদের সঙ্গে অফ-দ্য-রেকর্ড কথা বলার সময় এই শিকটা পেয়েছিলাম। কম লোক থাকলে এবং কেউ-একজন হাতে লিখে নোট নিলেই তাঁরা বেশি স্বস্তি পান। কথাবার্তা রেকর্ড করার ব্যাপারে আগের দিনের থেকে বেশি তৈরি হয়ে গিয়েছিলাম। আগের দিন আমাদের সম্বন্ধে সিংঘলের মনোভাব দেখে মনে হয়েছিল পরবর্তী সাক্ষাতে গুরুত্বপূর্ণ কিছু তথ্য পাওয়া যেতে পারে। না, আমাকে হতাশ হতে হয়নি।

সেদিন বিকেলে আমার বিশেষভাবে প্রস্তুত সবুজ রঙের কুর্তটা চার্জ দেওয়ার পরেন্ট থেকে সাবধানে খুলে নিলাম। কুর্তটার ওপরদিকে গাঢ় রঙে কাম্বীরি এমব্রয়ডারি কাজ, সেখানে একটা ছোট্ট ফুটো, ভেতরে ক্যামেরা লাগানো। একটা সরু তার আরও নীচে নেমে গেছে, তার সঙ্গে লাগানো আছে ছোট্ট একটা বোতাম। কোনো কিছু রেকর্ড করার সময় এই বোতামটা টিপে অন-অফ করতে হয়। রীতিমতো কৌশলী ব্যাপার। বোতাম টিপে ক্যামেরা চালু করলেই একটা লাল আলো জ্বলে ওঠে। ব্যাপারটা আয়ত্ত করার জন্য বিস্তর মকশো করেছিলাম, তবু সারাক্ষণই মনে হত আলো বোধহয় জ্বলেনি। নিশ্চিত হওয়ার জন্য আমার পেনটা কায়দা করে ডেস্ক থেকে ফেলে দিলাম। ঝুঁকে পড়ে সেটা তোলার সময় চট করে কুর্তার ভেতরে তাকিয়ে দেখে নিতাম লাল আলোটা জ্বলছে কিনা।

সেদিন সদরদপ্তরে পৌছতেই পরিচিতের ভঙ্গিতে ঘাড় নাড়ল নিরাপত্তা-রক্ষীটি। সে ধরে নিয়েছিল আমি একজন অনাবাসী ভারতীয় চলচ্চিত্রকার— অধিকাংশ অফিসারের কাছে আমার এই পরিচয়ই দিয়েছিল আর্দালিটি। তারপর রক্ষীটি বলল, ‘ম্যাডাম, শুটিং নেহি করোগে ক্যা?’ ঘাড় নেড়ে বোঝালাম শিগগিরই কাজ শুরু করব।

সিংঘলের কেবিনে ঢোকার সময় আশা করেছিলাম খুশি মনে স্বাগত জানাবেন তিনি। কিন্তু তাঁর মুখ দেখে বুঝলাম কিছু-একটা গণ্ডগোল হয়েছে। কিছু ফুটেজ দেখছিলেন তিনি, তাঁর বসবাসের এলাকার কিছু দুর্ভৃতীর স্টিং ফুটেজ। এটিএস প্রধানের মতো উচ্চপদস্থ অফিসারের কাছে এটা কোনো ব্যাপারই নয়। কিন্তু না, ব্যাপারটা ঠিক তা নয়। পুলিশের কিছু কর্মকর্তা তাঁকে কামেলায় ফেলার চেষ্টা করছেন।

তবে খুব দ্রুতই মূল প্রসঙ্গে চলে এলেন তিনি, হাসিখুশি হয়ে উঠলেন। তাঁর বিষয়ে আমি কী গবেষণা করেছি তা জানতে খুব আগ্রহ দেখালেন। জানতে

চাইলেন অন্যদের কাছে তাঁর সম্বন্ধে খোঁজখবর নিয়েছি কিনা এবং তাঁর ব্যাপারে ইতিবাচক মতামত পেয়েছি কিনা। এখন আমাকে লস অ্যাঞ্জেলেস থেকে আসা সরল মেয়েটির অভিনয় শুরু করতে হবে, দেশের খবরাখবর সম্বন্ধে যার কোনো ধারণাই নেই, সামনে বসে থাকা মানুষটির প্রতি সম্বন্ধে যে অভিজ্ঞত, দেশের এক সবধেকে মারাত্মক সম্ভ্রাসবাদী আক্রমণের পাণ্ডাদের গুলি করে খতম করেছেন তিনি। বললাম, 'আপনি দারুণ সাহসী। গুগল সার্চ করে অক্ষরধাম আক্রমণের ব্যাপারটা পড়লাম। ওহ, গায়ে যেন কাঁটা দিয়ে উঠছিল।' একটা সিগারেট ধরিয়ে আমাকে প্রশ্ন করে যেতে বললেন সিংঘল। কথাবার্তার সূত্রে তাঁর সমস্যাময় জীবন সম্বন্ধে কিছুটা আঁচ পেলাম। বেশিরভাগ উত্তরই একটু রেখে-ঢেকে দিচ্ছিলেন, কিন্তু কথার মাঝে দীর্ঘ নীরবতা, চিন্তাশ্রিত দৃষ্টিতে তাকিয়ে থাকা, চিন্তিত ভঙ্গিতে ডেখে আঙুল ঠোকা—এ-সব থেকে অনেক কিছুই বোঝা যাচ্ছিল। আমি ভেবেছিলাম খুব সতর্ক হয়ে উত্তর দেবেন সিংঘল, কিন্তু সম্ভবত একজন নিরীহ সাক্ষাৎকারিণীকে পেয়ে মন খুলে অনেক কথাই বলেছিলেন তিনি।

তাঁর বাড়িতে গিয়ে তাঁর সঙ্গে দেখা করতে চাইলাম, যেখানে তাঁর পরিবার, সন্তানরা, স্ত্রী থাকবেন। 'না, না, ওটা করবেন না। ওরা এমনিতেই বেশ বিরক্ত হয়ে আছে।' আমি যে-কাজ করি, তা ওদের পছন্দ নয়। আমার কাজটাকে ঘৃণা করতে শুরু করেছে ওরা। বাড়িতে পুলিশ ভ্যান এলে একটু দূরে দাঁড় করাতে বলে দিই, দরজার সামনে যেন না আসে।' তিনি এনকাউন্টারের কথা উল্লেখ করার পর এই বিষয়ে তাঁকে প্রশ্ন করা সহজ হয়ে গেল আমার পক্ষে। তাঁর প্রেপ্তারির পর যখন এই বই লিখছি আমি, তখন সিবিআই-এর কাছে নিজের ভূমিকার কথা স্বীকার করেছেন সিংঘল। শুধু তাই নয়, নিজের বিবৃতিতে এবং একটি টেপ করা কথোপকথনে' ডুয়ো সংঘর্ষে ইশরাত জাহানকে হত্যা করার ব্যাপারে রাজ্য সরকারের অনেক কার্যকর্তার জড়িত থাকারও প্রমাণ দিয়েছেন তিনি। গুজরাত হাইকোর্ট কর্তৃক নিযুক্ত সিবিআই তদন্তের চার্জশিটে বলা হয়েছে, ইশরাত আদৌ লশকর-ই-তাইবার সদস্য ছিল না এবং ডুয়ো সংঘর্ষের নামে হত্যা করা হয়েছে তাকে।

আদালতে উপস্থাপিত চার্জশিটে' সিবিআই-এর কাছে সিংঘলের দেওয়া যাবতীয় তথ্যপ্রমাণ পেশ করা হয়েছে। লক্ষণীয় বিষয় হল, বড়ো ছেলে হার্দিকের অকালমৃত্যুর ঠিক পরেই সিংঘল স্বীকারোক্তি দেন এবং তাঁকে প্রেপ্তার করা হয়—আমার সঙ্গে প্রথমবার দেখা হওয়ার সময় এই ছেলের সম্বন্ধে গভীর স্নেহের সূরে কথা বলেছিলেন তিনি। সংবাদমাধ্যমে বাবার সম্বন্ধে অবিরাম খারাপ খারাপ কথা শোনার প্রতিক্রিয়ায় ২০১৩ সালে আত্মহত্যা করে হার্দিক। সিংঘলের ঘনিষ্ঠজনেরা

বলেন, এর পরেই তাঁর মনের পরিবর্তন ঘটে। সর্বশেষ খবর হল, পুলিশ বিভাগ থেকে তিনি পদত্যাগ করেছেন এবং সরকারের তরফ থেকে অনুরোধ আসা সত্ত্বেও পদত্যাগপত্র ফিরিয়ে নিতে রাজি হননি।

এটাও উল্লেখযোগ্য যে সিবিআইকে সিংঘল জানিয়েছিলেন, তিনি রাজসাক্ষী হবেন না, কিংবা ক্ষমা চেয়ে আবেদনও করবেন না, বরং অধিকাংশ অভিযুক্তের মতো তাঁরও বিচার করা হোক। অন্যের মনের কথা বোঝা কঠিন, তার সম্বন্ধে যেটুকু জানা আছে, তার ভিত্তিতে শুধুমাত্র অনুমানই করা চলে, কিন্তু সিবিআই-এর কাছে সিংঘলের বিচিত্র অনুরোধের কথা শুনে আমার মন ফিরে গিয়েছিল ২০১০ সালের ডিসেম্বর মাসে আমাদের দু'জনের সেই কথোপকথনে।

জি.এল. সিংঘলের সঙ্গে রেকর্ড-করা কথোপকথনের কিছু অংশ এখানে তুলে দিচ্ছি:

প্র: গুজরাতে তো আপনাদের, মানে পুলিশের লোকেদের অনেক ঝামেলায় পড়তে হচ্ছে, বিশেষত নানান বিতর্কিত বিষয়ে, তাই না?

উ: এ এক অদ্ভুত অবস্থা। কেউ যদি আমাদের কাছে কোনও অভিযোগ দায়ের করতে আসে আর আমরা যদি সে ব্যাপারে উপযুক্ত ব্যবস্থা নিই, তাহলে সরকার চটে যায়, আবার সরকারকে সন্তুষ্ট করলে অভিযোগকারী চটে যায়। ফলে আমাদের কিছুই করার থাকে না, সব দায় পুলিশের ওপরেই এসে পড়ে।

প্র: এনকাউন্টারের সঙ্গে জড়িত অধিকাংশ অফিসারই দলিত জাতের মানুষ। তাঁদের বেশিরভাগকেই কি ব্যবহার করার পর ছুঁড়ে ফেলে দিয়েছে রাজনৈতিক ব্যবস্থা?

উ: হ্যাঁ, সবাইকেই, পুলিশ ডিপার্টমেন্টে। এটা একটা শক্তিশালী ডিপার্টমেন্ট।

প্র: সাম্প্রদায়িক দাঙ্গায় রাজ্য কীভাবে ক্ষতিগ্রস্ত হয়েছে? আর পুলিশ?

উ: দেখুন, গুজরাতে বিভিন্ন দাঙ্গার সময় আমি কাজ করেছি। ১৯৯১ সাল থেকে এখানে আছি আমি, ফলে অনেক দাঙ্গা দেখেছি। ৮২, ৮৩, ৮৫, ৮৭ আর ৯২ সালে অযোধ্যা-পরবর্তী দাঙ্গা দেখেছি আমরা।

মুসলিমরাই বেশি আগ্রাসী। ২০০২ সালে বহু মুসলিম খুন হয়েছিল।

মুসলিমদের ক্ষেত্রে ব্যাপারটা এইরকম। বিশেষত ২০০২-তে ব্যাপারটা এ-রকমই ছিল। মুসলিমরা বহু বছর ধরে হিন্দুদের খুন করছিল, ফলে ২০০২-এর ব্যাপারটা ছিল মুসলিমদের হাতে এতদিন ধরে মার খাওয়ার

প্রতিশোধ। অমনি সারা দুনিয়ায় হইচই বেধে গেল। যে-পরিস্থিতিতে হিন্দুদের খুন হতে হচ্ছিল, সেটা কেউ দেখল না।

প্র: রাজন প্রিয়দর্শীর সঙ্গে দেখা করেছি আমি—দলিত হিসেবে খাঁর সঙ্গে আমাকে দেখা করতে বলেছিলেন আপনি।

উ: আমি অনেক পদে কাজ করেছি, এ-রাজ্যের প্রায় সব অফিসারকেই চিনি। গোটা একটা ব্যবস্থার কেন্দ্রবিন্দুতে আছি, ফলে সম্ভবত সবার সঙ্গেই কাজ করেছি, কিন্তু ওঁর মতো মানুষ আর দেখিনি। অত্যন্ত নীতিনিষ্ঠ অফিসার। পুলিশের কাজটা গুলে খেয়েছেন।

প্র: উনি বলছিলেন সরকার ওঁকে অনৈতিক কিছু কাজ করতে বলেছিল, কিন্তু উনি রাজি হননি।

উ: একদম ঠিক। ও-সব কখনো করেননি উনি। ওঁকে আমি জানি।

প্র: কোনো সমঝোতা না-করেও এই ব্যবস্থার অংশীদার থাকাটা কি সত্যিই খুব কঠিন?

উ: একবার সমঝোতা করলে সবকিছুর সঙ্গেই সমঝোতা করতে হবে—নিজের সঙ্গে, নিজের চিন্তাভাবনার সঙ্গে, বিবেকের সঙ্গে।

প্র: গুজরাতে একজন অফিসারের পক্ষে নিজের বিবেকবোধ নিয়ে টিকে থাকাটা কি খুব কঠিন?

উ: খুব, খুব।

আর আইন-জানা কোনো সিনিয়র অফিসার সমঝোতা করতে শুরু করলে ব্যাপারটা খুব কঠিন হয়ে পড়ে।

প্র: আপনার ক্ষেত্রে কি সেটাই ঘটেছে? কতটা লড়াই করতে হয়েছে আপনাকে?

উ: কেউ কেউ লড়ার চেষ্টা করে। কেউ কেউ আমৃত্যু লড়াই করে যায়। প্রিয়দর্শী এ-রকমই একজন লোক।

প্র: আপনার ব্যাপারটা বলুন।

উ: আমাকেও লড়তে হয়েছে।

প্র: কিন্তু এই ব্যবস্থা কি আপনাকে সাহায্য করেছে?

উ: না, এতটুকুও নয়। আমি দলিত হলেও যে-কোনো ব্রাহ্মণের মতো সব কাজই করতে পারি। আমার ধর্মকে আমি ওদের থেকে বেশি করে জানি, কিন্তু লোকে সেটা বুঝতে চায় না। আমি যে দলিত পরিবারে জন্মেছি, সেটা কি আমার দোষ?

প্র: আচ্ছা, কখনো কি এমন হয়েছে যে আপনি ভালো কাজ করা সত্ত্বেও প্রমোশনের সময় আপনি দলিত বলে আপনাকে প্রমোশন দেওয়া হয়নি?

উ: বহুবার হয়েছে।

অনেক রাজ্যেই এটা আকছার হয়ে থাকে, গুজরাতেও আকছার হয়ে থাকে। ওইসব ব্রাহ্মণ বা ক্ষত্রিয়রা কোনো দলিত কিংবা ওবিসিকে জুনিয়র হিসেবে চায় না।

প্র: আপনার সিনিয়রও কি একজন দলিত?

উ: না, তবে আমি চালিয়ে যাচ্ছি, আমাকে ছাড়া ওদের চলবে না। ওদের হয়ে বহু সম্মানবাদী ঘটনার মোকাবিলা করেছি আমি। তবে হ্যাঁ, ওরাও একেবারে ছেড়ে দেয় না, অনেক সময় এমন অনেক কাজে আমাকে পাঠায় যেটা কনস্টেবলরাই করতে পারে।

প্র: উষা (রাডা; পঞ্চম পরিচ্ছেদে এর সম্বন্ধে বিস্তৃতভাবে জানা যাবে) আমাকে বলছিলেন আপনি নাকি কিছু বিতর্কিত ব্যাপারেও জড়িয়ে পড়েছিলেন?

উ: ২০০৪ সালে চারজনকে এনকাউন্টারে মারি আমরা। দু'জন ছিল পাকিস্তানি, দু'জন মুম্বইয়ের। এদের মধ্যে একজন ছিল মেয়ে, নাম ইশরাত। ঘটনাটা খুব চাঞ্চল্য সৃষ্টি করেছিল। হাইকোর্ট তদন্ত করে দেখতে বলেছিল কী ধরনের এনকাউন্টার ছিল ওটা—সাজানো না আসল।

প্র: তার মানে ওটা কি সাজানো এনকাউন্টার ছিল? তাহলে এর মধ্যে আপনার নাম জড়াল কেন?

উ: কারণ আমি ওখানে ছিলাম, ওই এনকাউন্টারে।

প্র: কিন্তু আপনার নামটা জড়াচ্ছে কেন?

উ: দেখুন, ওইসব মানবাধিকার কমিশন, ওদের কাজই হল এই।

কিছু ঘটনার মোকাবিলা করা কঠিন হয়, অন্যভাবে মোকাবিলা করতে হয় সেগুলোর। ৯/১১-র পরে আমেরিকা কী করেছে ভাবুন। গুয়ানতানামো বলে একটা জায়গা ছিল। সেখানে ওদের আটকে রেখে টর্চার করত। মগর ঠিক হয় না। সবার ওপর অবশ্য টর্চার করা হয়নি। ১০ শতাংশ লোকের ওপর টর্চার করা হয়েছে, এমনকী তারা যদি না-ও করে থাকে, ১ শতাংশ হয়তো ভুল করেছে। জাতিকে বাঁচানোর জন্য, দেশকে বাঁচানোর জন্য এমনটাই করতে হয়।

প্র: ওরা কারা ছিল? লশকর জঙ্গি?

উ: হ্যাঁ।



প্র: মেয়েটাও? মানে ইশরাতও?

উ: ও তা ছিল না, কিন্তু ওই ঘটনাতেই ও মারা যায়। মানে ও জঙ্গি হতেও পারে, না-ও হতে পারে। কিংবা ওকে হয়তো একটা কভার হিসেবে ব্যবহার করা হয়েছিল।

প্র: আপনারা সবাই, বানজারা, পাভিয়ান, আমিন, পারমার আর অন্য প্রায় সবাই দলিত জাতির মানুষ। রাজ্যের নির্দেশেই আপনারা সবকিছু করেছেন। তার মানে এটা কি ব্যবহার করার পর ছুঁড়ে ফেলে দেওয়ার ব্যাপার?

উ: ঠিক, আমাদের সবার সঙ্গে এটাই ঘটেছে। সরকার অবশ্য তা ভাবে না। ওরা ভাবে আমরা ওদের কথা শুনতে বাধ্য এবং ওদের প্রয়োজন মেটাতে প্রস্তুত। প্রতিটি সরকারি কর্মচারী, যে-কাজই সে করুক না কেন, সরকারের জন্যেই কাজ করে। তারপর সমাজ বা সরকার কেউই তাকে চিনতে পারে না। বানজারা যা করেছে, (কিন্তু) কেউ তার পাশে দাঁড়ায়নি।

প্র: কিন্তু স্যর, আপনারা যা করেছেন তা সবই তো সরকারের নির্দেশে, রাজনৈতিক শক্তিগুলোর নির্দেশে, তাহলে তারা কেন...?

উ: সিস্টেম কে সাথ রেহনা হয় তো লোগোঁ কো কম্প্রোমাইজ করনা পড়তা হয়।

প্র: কিন্তু প্রিয়দর্শী (ওঁর সিনিয়র) কি সরকারের কাছেই মানুষ ছিলেন না?

উ: উনি সরকারের কাছেই মানুষ ছিলেন, কিন্তু ওঁকে অন্যায় কিছু করতে বললে উনি কখনোই রাজি হতেন না।

প্র: হ্যাঁ, উনি আমাকে বলছিলেন ওঁকে একটা এনকাউন্টার করতে বলা হয়েছিল, যাঁদের মধ্যে মি. পাভিয়ান-ও ছিলেন। কিন্তু উনি (প্রিয়দর্শী) তাতে রাজি হননি।

উ: পাভিয়ান-ও এখন জেলে আছে, তবে ওঁর সম্বন্ধে আমি তেমন কিছু জানি না।

প্র: উনি গৃহমন্ত্রীর এত কাছের লোক হলেন কীভাবে?

উ: হ্যাঁ, এটিএস-এ আসার আগে ইন্টেলিজেন্স ডিপার্টমেন্টে ছিলেন উনি।

প্র: দেখুন, আমি জানি মুখ্যমন্ত্রী আর গৃহমন্ত্রী দু'জনেই চেষ্টা করছেন। তাহলে এখন কি আপনাদের কিছুটা সুবিধে হয়েছে?

উ: কিছু কিছু জিনিস আমাদের হাতে নেই। আমরা এই ব্যবস্থার জন্যে কাজ করছি।

প্র: আপনি কি ওদের নজরে আছেন, নাকি আপনার কেস মিটে গেছে?

উ: কেস এখনও চলছে। জোরেসোরেই চলছে।

প্র: রাজ্য কি আপনাকে সাহায্য করেছে?

উ: দেখুন, কংগ্রেসই হোক কি বিজেপি-ই হোক, রাজনৈতিক দল মানে রাজনৈতিক দলই। ওরা প্রথমে নিজেদের লাভটা দেখে, কীভাবে কিছু আদায় করে নেওয়া যায়, সেটাই ভাবে। আমাদের কেসে ওরা আমাদের সাহায্য করেছে ঠিকই, কিন্তু সেইসঙ্গেই বুঝতে চেষ্টা করেছে এ থেকে কী পাবে না-পাবে, ফলাফল উলটে গেলে এ থেকে কী কী ফায়দা তুলতে পারবে।

আমাদের এনকাউন্টারের তদন্ত করছে যারা তাদের কথা একবার ভাবুন। কানেইল সিং, যিনি দিল্লি পুলিশের জয়েন্ট কমিশনার ছিলেন, তাঁকে স্পেশ্যাল সেলের দায়িত্ব দিয়ে মিজোরামে বদলি করে দেওয়া হয়েছিল। ওঁর আমলে ৪৪টা এনকাউন্টার হয়েছিল। আর এখন উনি আমাদের সিট-এর চেয়ারম্যান। তারপর সতীশ ভার্মা বলে একজন অফিসার আছেন, তিনি আবার মানবাধিকারের অনুগামী বলে জাঁক করেন, (কিন্তু তিনি) প্রায় ১০টা এনকাউন্টার করেছেন। এমন ভাব দেখান যেন উনি একেবারে ধোয়া তুলসীপাতা।

প্র: ফলাফল কী হবে?

উ: দেখা যাক। কিছুই বেরোবে না।

প্র: কিন্তু আপনি আর অন্য বেশ কিছু অফিসার তো সোরাবুদ্দিনের ঘটনাতেও যুক্ত ছিলেন, তাই না?

উ: হ্যাঁ।

প্র: আমি গীতা জোহরি-র সঙ্গে দেখা করেছি।

উ: হ্যাঁ, উনি একটা চমৎকার অনুসন্ধান করেছিলেন, পরে রজনীশ রাই-ও করেছেন। খুব ভালো কাজ করেছেন ওঁরা। ওঁরা নিজেরাই প্রায় ১৩ জন লোককে প্রেপ্তার করেছিলেন।

প্র: কিন্তু এই অমিত শাহের ব্যাপারটা কী? আপনার অফিসারদের সম্বন্ধেও শুনেছি . . . মানে, অফিসার আর রাজনৈতিক নেতাদের মধ্যে একটা যোগসাজশ আছে, বিশেষত এনকাউন্টারের ব্যাপারে। অন্য বেশ কিছু মন্ত্রীও সঙ্গে কথা বলার সময় এমনটাই মনে হয়েছে আমার।

উ: দেখুন, এমনকী মুখ্যমন্ত্রীও এর মধ্যে আছেন। সমস্ত সরকারি আধিকারিকরা আর মন্ত্রীরাও আছেন। এরা হচ্ছে স্বেচ্ছা রাবার স্ট্যাম্প। সব সিদ্ধান্ত মুখ্যমন্ত্রীই নেন। অন্য সব মন্ত্রীরা যে-সিদ্ধান্তই নিন না কেন, ওঁর অনুমতি নিতেই হবে।

প্র: তাহলে ওঁর গায়ে কোনো আঁচড় লাগল না কেন? আপনাদের কেসের ক্ষেত্রেও তো তাই। এই একই কেসে ওঁকেও অভিযুক্ত করা হল না কেন?

উ: আসলে উনি তো সরাসরি আসরে নামেন না, আমলাদের নির্দেশ দেন।

প্র: আপনাদের কেসে অমিত শাহ যদি গ্রেপ্তার হতে পারেন, তাহলে সেই বিচারে মুখ্যমন্ত্রীকেও তো গ্রেপ্তার করা উচিত ছিল।

উ: হ্যাঁ।

২০০৭ সালে, সোরাবুদ্দিনের এনকাউন্টারের সঙ্গে জড়িত অফিসাররা গ্রেপ্তার হওয়ার ঠিক পরেই, সোনিয়া গান্ধী এখানে আসেন এবং ওই অফিসারদের ‘মওত কে সওদাগর’ নামে অভিহিত করেন তিনি। তারপর থেকে প্রতিটা মিটিংয়ে মোদি চিৎকার করে বলতেন, ‘মওত কে সওদাগর? সোরাবুদ্দিন কৌন ধা, উসকো মারা তো আচ্ছা হুয়া কি নেহি হুয়া?’ তারপর তো উনি বিপুল সংখ্যাগরিষ্ঠতা অর্জন করলেন। মানে উনি যা চাইছিলেন তা-ই পেয়ে গেলেন।

প্র: আর যে-সব অফিসারদের দিয়ে কাজটা তিনি করিয়েছিলেন, এখন কি তাঁদের তিনি সাহায্য করছেন?

উ: না, তারা এখন জেলে আছে।

প্র: উনি কি আপনাকে কখনও আপনার এনকাউন্টারগুলো নিয়ে কোনো প্রশ্ন করেছেন?

উ: না, কখনো না। দেখো ইনকো সবকা বেনিফিট লেনা হোতা হুয়া, রায়টস হয়ে মুসলিমস কো মারা, বেনিফিট লিয়া, ইসপার ভি কিয়া।

প্র: আপনাদের শাহ সাহেব কি এখন আবার গৃহমন্ত্রকে ফিরে আসবেন?

উ: না, সেটা পারবেন না, কারণ সিএম কো উসসে ডর লাগতা হুয়া, কিউকি উয়ো হোম ডিপার্টমেন্ট মে বহুত পপুলার হো গয়া ধা। সরকারের দুর্বলতাগুলো উনি জানেন। মুখ্যমন্ত্রী কখনোই চাইবেন না যে গৃহমন্ত্রী সবকিছু জেনে ফেলার পরও মন্ত্রিত্বে থেকে যান।

প্র: তার মানে মুখ্যমন্ত্রী আর গৃহমন্ত্রীর মধ্যে এখন আর কোনো সম্পর্কই নেই?

উ: না। এই মুখ্যমন্ত্রী, মোদি, জৈসে আভি আপ বোল রহে থে, উয়ো অপারচুনিষ্ট হুয়া। আপনা কাম নিকাল লিয়া, নিজের কাজটা করিয়ে নিয়েছেন।

প্র: নিজের নোংরা কাজটা?

উ: হ্যাঁ।

প্র: আচ্ছা, এই এনকাউন্টারটা বাদে আর ক’টা এনকাউন্টার করেছেন আপনি?

উ: উ...প্রায় ১০টা...

প্র: সবগুলোই কি দারুণ ঘটনা? আমি কি জানতে পারি?

উ: নানা।

সমস্ত দৈনিক সংবাদপত্রের গুজরাত সংস্করণে ভূয়ো সংঘর্ষের তদন্তের ব্যাপারটা হেডলাইন হয়ে যাওয়ার ফলেই সিংঘলের মনে কোনো সন্দেহ না-জাগিয়ে থাকা করা সহজ হয়েছিল আমার পক্ষে। বারবার সিংঘলের সঙ্গে দেখা করতে করতে আমার মনে একটা অপরাধবোধ দেখা দিল, ওঁর প্রতি একটা সহানুভূতি অনুভব করতে শুরু করলাম। আমাকে তিনি যেমনটা বিশ্বাস করাতে চাইছেন, সত্যিই কি তিনি তা-ই? অর্থাৎ তিনি কি সত্যিই নিরপরাধ, যাকে এই ব্যবস্থা ভুলভাবে কাজে লাগিয়ে নিয়েছে? নিজের অবস্থা বোঝানোর জন্য নানান উদাহরণ দিতেন তিনি, সিনেমার বিভিন্ন চরিত্রের কথা বলতেন। কথোপকথন চলতে চলতে ভগবদগীতার শ্লোক থেকে শুরু করে তাঁর ধর্মনির্ভরতার প্রসঙ্গও এসে পড়ত। ওশোকে নিয়ে, এমনকী আমার সিগারেট খাওয়া নিয়েও আলোচনা হত। তিনি বলতেন, ‘পারলে ওটা ছেড়ে দিন। অভ্যেসটা মোটেই ভালো নয়।’ আমার সঙ্গে একটা বন্ধুত্বের সম্পর্ক তৈরি হচ্ছিল। আমি একজন বহিরাগত, বাইরের লোক। ভিতরের লোকের দৃষ্টিকোণ থেকে তাঁকে বিচার করতে তো যাইনি আমি।

বুঝে উঠতে পারছিলাম না মানুষটা ঠিক কেমন। একদিন ওঁর কাছ থেকে হস্টেলে ফিরে সোজা পাবলিক বুথে গেলাম। ভীষণ বিভ্রান্ত লাগছিল। ঠিক করলাম আমার সঙ্গে এ নিয়ে কথা বলব। সিংঘলের প্রতি সহানুভূতি অনুভব করছি আমি। এটা আমি করতে পারি না। আগে যে-সব অফিসারদের দেখেছি, তাদের মতো নির্লজ্জ নন সিংঘল—ঠান্ডা মাথায় খুন করা আর এনকাউন্টারের কথা বড়াই করে বলেন ওইসব অফিসাররা। কিন্তু কেউ যদি ঠান্ডা মাথায় খুনের অংশীদার হয়ে থাকেন, অথবা যদি সত্যটা এড়িয়ে যেতে চান, তাহলে তো আর তাঁর কাজের ন্যায্যতা প্রতিপন্ন হয় না। মা সেদিন বলেছিলেন লোকে তাদের আচরণের, তাদের কাজকর্মের বহু কারণ দেখাতে পারে। তোমাকে খুঁজে দেখতে হবে তারা ঠিক কী করেছিল, তাহলেই বুঝতে পারবে এইসব কাজের জন্য তারা যে-যুক্তি দেখাচ্ছে তার আদৌ কোনো মূল্য আছে কি না।

স্পষ্ট বুঝতে পারছিলাম এত বছর ধরে এ-ব্যাপারে মুখ না-খোলার দরুন এই অপরাধে সিংঘলও অন্যদের মতোই অপরাধী। সেইসঙ্গেই বোঝা যায়, এই ধরনের পুলিশকর্তাদের কতটা নির্লজ্জভাবে ব্যবহার করেছে রাজ্য প্রশাসন। আমার গোপন ক্যামেরায় সিংঘলের বলা ‘ব্যবহার করো এবং ছুঁড়ে ফ্যালো’ নীতির কথা কয়েক

বছর পর আর-একজন উচ্চপদস্থ অফিসার ডি.জি. বানজারার বক্তব্যেও ফুটে উঠেছিল। মোদির জমানার একজন উচ্চপদস্থ অফিসার বানজারাকে চারটি ভূয়ো সংঘর্ষে তাঁর ভূমিকার কারণে জেলে যেতে হয়েছে। এইসব ঘটনা সম্পর্কে সিংঘল যা বলেছিলেন, হুহু সেই একই কথা বলে গুজরাত রাজ্য সরকারের কাছে একটা চিঠি লিখেছিলেন বানজারা। তিনি বলেছিলেন, অমিত শাহের মতো মন্ত্রীদের উচ্চাকাঙ্ক্ষা পূরণের জন্য তাঁদের মতো অফিসারদের ব্যবহার করা হয়েছে এবং যে-মানুষটিকে তিনি ঈশ্বর বলে মনে করতেন, সেই মুখ্যমন্ত্রী নরেন্দ্র মোদি তাঁর সঙ্গে বিশ্বাসঘাতকতা করেছেন। বানজারার (যিনি ততদিনে রাজ্য আইপিএস থেকে পদত্যাগ করেছিলেন) বিবৃতির পিছনে কোনো রাজনৈতিক উদ্দেশ্য ছিল কিনা, তা ধোঁয়াটেই রয়ে গেছে। তবে মূল সত্যটা হল, যে-রাজ্যকে এখন সন্ত্রাসমুক্ত রাজ্য হিসেবে দাবি করা হচ্ছে, তার বেদিমূলে তাঁর ও সিংঘলের মতো বহু অফিসারকে ব্যবহার করা হয়েছে।

সিংঘল কোনো ব্যতিক্রম নন, বরং নিয়মেরই অঙ্গ। পরবর্তী সময়ে এই সত্যটা আমি জানতে পারি তাঁর সিনিয়র রাজন প্রিয়দর্শীর থেকে, রাজ্যের একজন ভূতপূর্ব পুলিশ কমিশনার এবং অন্যান্য আমলাদের কাছ থেকে। সত্যের সন্ধান সবেমাত্র শুরু হয়েছে।

## চতুর্থ পরিচ্ছেদ রাজন প্রিয়দর্শী

কর্পোরেট পরিভাষায় 'টেকঅ্যাওয়ে' বলে একটা শব্দ আছে, যার অর্থ হল কোনো কনফারেন্স, মিটিং বা কথাবার্তার পর লাভজনক কিছু নিয়ে আসা। রাজন প্রিয়দর্শী আমার কাছে হঠাৎ-পাওয়া একজন 'টেকঅ্যাওয়ে'ই ছিলেন। এই অবসরথাপ্ত পুলিশকর্তাটির কাছ থেকে আমার অন্তর্ভুক্তির ব্যাপারে যে-বিপুল সাহায্য পেয়েছিলাম তাকে দৈবী অবদানও বলা যেতে পারে। তাঁর জুনিয়র গিরিশ সিংঘলের সঙ্গে কথা বলার সময় তিনি রাজন প্রিয়দর্শীর নাম না-করা পর্যন্ত এই নামের কোনো পুলিশকর্তার কথা যে আমি জানতাম না, তা অস্বীকার করার উপায় নেই। গুজরাত থেকে প্রচুর রিপোর্ট পাঠিয়েছি আমি, সেখানকার অধিকাংশ পুলিশ অফিসারকেই জানতাম, অথবা জানি বলে ভাবতাম। না, খুব বেশি পুলিশ অফিসারের সঙ্গে আমার দেখা হয়নি, কিন্তু বিভিন্ন খবরের রিপোর্ট আর পুলিশমহলের অনেকের সাক্ষাৎকার নেওয়ার ফলে মনে হত সংশ্লিষ্ট সকলের সম্বন্ধেই যথেষ্ট তথ্য আমার জানা আছে।

সেইজন্যই সিংঘল যখন আমার সম্পূর্ণ অজানা এই নামটা উচ্চারণ করেছিলেন, তখন বিস্মিত না হয়ে পারিনি। সিংঘলের সঙ্গে দেখা করতে যাওয়ার আগে তাঁর সম্বন্ধে কোনো গবেষণাই করিনি আমি। সিংঘলের মনে যাতে কোনো সন্দেহ দেখা না দেয়, তার জন্যই এমনটা করেছিলাম, তাঁর উপদেশ অনুসারেই চলব এমনটা দেখিয়ে তাঁকে হাতে রাখতে চেয়েছিলাম। সিংঘল শুনে স্বস্তি পেয়েছিলেন যে, অন্য পুলিশকর্তাদের সঙ্গেও দেখা করছি আমি, বিশেষত যারা বিতর্কিত নন, খবরের কাগজে যাদের নাম ওঠেনি, তাঁদের সঙ্গেও। রাজন প্রিয়দর্শীর ব্যাপারে আর-একটা তথ্যও খুব উল্লেখযোগ্য। ২০০৪ সালের জুন মাসে টাইমস অফ ইন্ডিয়াকে দেওয়া একটি সাক্ষাৎকারে ১৯৮০-র ব্যাচের আইপিএস অফিসার প্রিয়দর্শী বলেছিলেন, রাজ্যের এত উচ্চপদস্থ একজন অফিসার হওয়া

সঙ্গেও নিজের গ্রামে আজও তাঁকে অচ্ছত হিসেবেই গণ্য করা হয়। টাইমস অফ ইন্ডিয়া'র রিপোর্টে লেখা হয়েছিল:

বিভিন্ন ক্ষেত্রের বহু মানুষ হামেশাই নানান সমস্যা নিয়ে করজোড়ে হাজির হয় তাঁর কাছে। কিন্তু এই প্রিয়দর্শীই যখন দেহগাম তালুকে তাঁর নিজের গ্রাম কাদাত্রা-য় যান, সমীকরণটা তখন আমূল পালটে যায়। গ্রামের উচ্চ বর্ণের লোকেরা যে-এলাকায় থাকে, সেখানে আজও এই সিনিয়র পুলিশকর্তা কোনো বাড়ি কিনতে পারেন না। আজও তাঁর বাড়ি কাদাত্রা-র 'দলিত বাস'-এ। প্রিয়দর্শী নিজে এ বিষয়ে কিছু বলতে না-চাইলেও, বিভিন্ন সূত্র থেকে জানা যায় যে, গত বছর অবধি গ্রামের নাগিতও কোনো দলিত খরিদারের চুল-দাড়ি কাটতে রাজি হত না।

চলচ্চিত্র নির্মাণের দৃষ্টিকোণ থেকে এই বিষয়টা আমার কাজকে অনেক সহজ করে দিয়েছিল। তাছাড়া অনুসন্ধানের শেষে এমন বিস্তর তথ্য পাওয়া গিয়েছিল, যা থেকে বোঝা যায় যে-সব অফিসারদের প্রশাসন কাজে লাগিয়েছে এবং পরে দুর্ব্যবহার করেছে, তাঁরা সকলেই দলিত শ্রেণির মানুষ। ওহো, একটা অত্যন্ত গুরুত্বপূর্ণ তথ্য বলা হয়নি। ২০০৭ সালে গুজরাতের সিআইডি যখন ভুয়ো সংঘর্ষগুলির তদন্তের ভার নেয়, রাজন প্রিয়দর্শী তখন গুজরাত এটিএস-এর ডিরেক্টর-জেনারেল ছিলেন। শুধু তাই নয়, ২০০২ সালে সাম্প্রদায়িক দাঙ্গার সময় রাজকোটের আইজি ছিলেন তিনি, যেটি একটি অত্যন্ত গুরুত্বপূর্ণ পদ।

রাজন প্রিয়দর্শীর সঙ্গে দেখা করলাম আমি আর মাইক। এই ষাটোর্ধ্ব ব্যক্তিটির সঙ্গে প্রথম দেখা হওয়ার দিনটা আমরা দু'জনেই বোধহয় কোনোদিনই ভুলতে পারব না। আমেদাবাদ-নারোডা পটিয়ার মধ্যবিস্তৃত এলাকায় একটা দোতলা বাংলো ছিল তাঁর। ওই বিধানসভা ক্ষেত্রেরই বিধায়ক ছিলেন আমাদের আর-একজন উদ্দিষ্ট ব্যক্তি মায়া কোদনানি। আবার ওই এলাকাতেই সবথেকে ভয়াবহ সাম্প্রদায়িক দাঙ্গা ঘটেছিল এবং সবথেকে বেশি ক্ষয়ক্ষতি হয়েছিল।

প্রিয়দর্শীর বাড়ি খুঁজে বার করতে বেশ বেগ পেতে হল। এটিএস-এর প্রাক্তন প্রধান, ৩০ বছরেরও বেশি সময় ধরে গুজরাতের নানান জায়গায় বিভিন্ন পদে থেকেছেন যিনি, তিনি যে এমন একটা জায়গায় বাস করবেন, সেটা যেন ভাবাই যায় না। ওই এলাকায় একটা সরকারি স্কুল আছে, তাঁর বাড়িতে পৌছানোর জন্য বেশ কয়েকটা চাওল আর নালা পেরোতে হয়। এলাকার অনেকেই তাঁকে চেনে না। তবে তাঁর প্রতিবেশীরা বলল, হ্যাঁ, উনিই সেই পুলিশওয়াল্লা, বাড়ির দরজার সামনে নিজের একটা বাঁথানো ছবি টাঙিয়ে রেখেছেন যিনি।

আমাদের জন্য উৎকর্ষিতভাবে অপেক্ষা করছিলেন প্রিয়দর্শী। তাঁর বাড়ির গলিতে আমাদের ট্যাক্সি ঢুকতেই হাত নাড়লেন। বাড়ির দোতলা থেকে বসে উঠলেন, ‘আসুন, আসুন।’ দু’জনে ভেতরে ঢুকলাম, চারপাশে তাকালাম। দরজার সামনেই একটা ফলকে লেখা আছে সারা জীবনে কোন কোন পদে কাজ করেছেন প্রিয়দর্শী। আমরা ঢোকার পর গ্রাম্য পালোয়ানের মতো গোঁফ আর ধূসর দাড়িওয়ালা একজন বিশালদেহী ভদ্রলোক আমাদের সঙ্গে করমর্দন করলেন। দু’টি সুতির শাল, পেন আর নোটবুক দেওয়া হল আমাদের।

পরবর্তী কয়েক মিনিটে যা ঘটল তা প্রায় অশ্রাব্য। দেখামাত্রই মাইকে ভাসে লেগে গেল প্রিয়দর্শীর। নিম্বুপানি এল। এত সৌজন্যের থাকা সামলে ওঠার আগেই ১০ বছর বয়সী একটি ছেলেকে নিয়ে ঘরে ঢুকলেন তিরিশ বছর বয়সী একজন ভদ্রলোক। এঁরা হচ্ছেন প্রিয়দর্শীর ছেলে আর নাতি, নাতিটির হাতে একটা ডিজিটাল ক্যামেরা। ‘রোজ রোজ তো আর বিদেশি ফিল্মমেকাররা আমাদের বাড়িতে আসেন না। এটা আমাদের বিরাট সম্মানের ব্যাপার। প্রিজ, একটা ছবি’— ওঁরা বললেন।

ছদ্ম পরিচয়ে থাকার সময় সবার নজরে পড়া অথবা নিজের ছদ্ম পরিচয়ের কোনো চিহ্ন রেখে যাওয়া একেবারেই উচিত নয়। কিন্তু এই পরিস্থিতিতে ছবি তুলতে বারণ করাও ঠিক হবে না। তাছাড়া ফলকে প্রিয়দর্শীর কেরিয়ারের সালতামামি দেখে মনে হল ভদ্রলোক আমাদের কাজে লাগবেন। ওঁর নাতির ইচ্ছেয় সম্মতি জানালাম মাইক আর আমি, বসার ঘরে যাওয়ার আগে দু’টা ছবি তোলা হল আমাদের। বসার ঘরে রাজ্যের ও কেন্দ্রীয় মন্ত্রীদের সঙ্গে এবং ভূতপূর্ব প্রধানমন্ত্রী রাজীব গান্ধীর সঙ্গে প্রিয়দর্শীর একটা ফোটো রাখা আছে।

মজা করে বললাম, ‘তাহলে আমাদের ছবিও বাঁধিয়ে রাখবেন নাকি, স্যর?’ আসলে জানতে চাইছিলাম ঠিক কী উদ্দেশ্যে আমাদের ছবি তোলা হল। উত্তরে জানা গেল উনি একটা স্থানীয় মাসিক সংবাদপত্রিকা বার করে চেনাশোনা লোকেদের মধ্যে বিনামূল্যে বিতরণ করেন। শুনে স্বস্তি পাওয়া গেল। আমরা বললাম, আমাদের গুজরাত সংক্রান্ত চলচ্চিত্রে সবার ছবি তোলা হয়ে যাওয়ার পর যেন আমাদের ছবি কাগজে ছাপানো হয়। বললাম, ‘আসলে স্যর, আমরা চাই না অপ্রয়োজনে আমাদের দিকে লোকের নজর পড়ুক। নিজেদের একটু আড়ালেই রাখতে চাই আমরা।’ খুশিমনেই কথাটা মেনে নিলেন উনি।

কথোপকথন যা হল সেটা আসলে তিনি একাই বলে গেলেন।

ঘণ্টাখানেকের মধ্যেই বুঝতে পারলাম, তাঁর জীবনী লেখার পক্ষে যথেষ্ট তথ্য জুগিয়ে দিয়েছেন প্রিয়দর্শী। সর্বোপরি তিনি এক বিশিষ্ট চরিত্র, যে-ধরনের চরিত্র



সিনেমায় বা উপন্যাসে দেখা যায়। তবে গুজরাতে রাষ্ট্রযন্ত্র কীভাবে কাজ করে সে-বিষয়েও খুব প্রাসঙ্গিক তথ্য জানা গেল। গুজরাতের সীমান্তবর্তী অঞ্চলের আইজি হওয়া সত্ত্বেও গ্রামের নাপিত তাঁর চুল কাটতে অস্বীকার করায় দলিত এলাকায় বাড়ি করতে হয়েছিল তাঁকে—শুনে রীতিমতো চমকে উঠলাম। নিজের দলিত পরিচিতিটা সারাক্ষণই তাড়া করে বেরিয়েছে তাঁকে। গুজরাত পুলিশে চাকরি করার সময় হামেশাই তাঁর সিনিয়রদের নোংরা কাজগুলো করানো হত তাঁকে দিয়ে। কিন্তু তিনি হকুম মানতে অস্বীকার করেন। ‘বড়ো অদ্ভুত ব্যাপার, বুঝলেন। আপনি যদি দলিত হন, তাহলে অফিসে যে-কেউ আপনাকে যা-খুশি বলতে পারে। কোথাও এতটুকু সম্মান নেই। মানে, কোনো দলিত অফিসারকে ঠান্ডা মাথায় খুন করতে বলাই যায়, কেননা (আপাতভাবে) তার কোনো আত্মসম্মানবোধ নেই, কোনো আদর্শ নেই। গুজরাত পুলিশে উঁচু জাতের লোকেরাই (সবার) নেকনজরে থাকে।’

আমাদের দেখাসাক্ষাৎ যতই এগোতে লাগল, ততই যেন প্রিয়দর্শী উদ্ভিগ্ন হয়ে উঠতে লাগলেন, কিন্তু ততদিনে তিনি অনেককিছু বলে ফেলেছেন। আমাদের তৃতীয় সাক্ষাতের দিন তাঁর কাছে আমি একাই গেলাম। আসলে মাইককে সেদিনটা রেহাই দিয়েছিলাম যাতে সে মায়া কোদনানির অফিসে গিয়ে আমাদের গুটিংয়ের আগে একটু দেখেশুনে আসতে পারে। প্রস্তাবটা মাইক নিজেই দিয়েছিল। ‘আমরা যে সত্যিই ফিল্মমেকার সেটা ওদের বিশ্বাস করানোর জন্য কিছু করলে ভালো হয় না?’ কোদনানির অফিসের কর্মচারীরা সাগ্রহে ওকে চারপাশ ঘুরিয়ে দেখিয়েছিল। সন্দের সময় কোদনানির কাছ থেকে একটা মেসেজ পেলাম: বাড়ির কোনো বিশেষ জায়গায় আমি গুটিং করতে চাই কি না এবং একটা রবিবার দুপুরে আমরা তাঁর সঙ্গে লাঞ্চ করতে আগ্রহী কি না। তৎক্ষণাৎ ‘হ্যাঁ’ লিখে উত্তর পাঠিয়ে দিলাম।

সেদিন প্রিয়দর্শীর বাড়িতে পৌঁছে দেখলাম তিনি তাঁর নিজের সংবাদপত্রের বিভিন্ন সংখ্যা উলটেপালটে দেখছেন। ‘আপনার দরকারমতো যে-কোনো কাগজ এখান থেকে নিতে পারেন। আমার ব্যাপারে সব কথা তো এতদিনে জেনেই গেছেন। গুটিং শুরু করবেন কবে থেকে?’ তাঁর হাবভাব থেকেই বোঝা যাচ্ছিল বেশ উৎকণ্ঠিত হয়ে আছেন। একটু বেশিই বলে ফেলেছেন তিনি। রাজ্য এটিএসের প্রধানের পদে থাকার সময়কার নানান খুঁটিনাটি বিষয়, তৎকালীন গৃহমন্ত্রী অমিত শাহের বাংলায় তাঁর সঙ্গে গভীর রাতে গোপন মিটিং, এই অমিত শাহ-ই একবার তাঁকে পুলিশি হেফাজতে থাকা একজন আসামিকে হত্যা করতে বলেছিলেন—অনেক কথা বলে ফেলেছেন তিনি। রাজন প্রিয়দর্শীর সঙ্গে প্রতিবার দেখা হওয়ার পর আরও বেশি তথ্য নিয়ে ফিরতাম।

- প্র: আপনাদের মুখ্যমন্ত্রী নরেন্দ্র মোদি তো গুজরাতে খুব জনপ্রিয়, তাই না?
- উ: হ্যাঁ, উনি সবাইকে বোকা বানান আর লোকেও বোকা বনে।
- প্র: তা-ই যদি হয়, তাহলে ওঁর অধীনে অ্যাডিশনাল ডিজি হিসেবে কাজ করতে গিয়ে আপনাকে নিশ্চয়ই অনেক ঝামেলায় পড়তে হয়েছে?
- উ: আমাকে দিয়ে বেআইনি কোনো কাজ করানোর হিম্মত ওদের ছিল না।
- প্র: এখানে একেবারে অরাজক অবস্থা চলছে, না? ন্যায়পরায়ণ অফিসার কি একেবারেই নেই?
- উ: খুব কমই আছে। এই নরেন্দ্র মোদিই সারাটা (রাজ্য) জুড়ে মুসলিমদের হত্যার জন্য দায়ী।
- প্র: আচ্ছা, আমি শুনেছি পুলিশরাও নাকি সরকারের ধামাধরা?
- উ: প্রত্যেকে। যেমন ওই পি.সি. পান্ডে। সবকিছু তো ওদের চোখের সামনেই ঘটেছে।
- প্র: অধিকাংশ অফিসারই বলছেন তাঁদের নাকি ভুলভাবে ব্যবহার করা হয়েছে?
- উ: কীসের ভুলভাবে। ওরা ওইসব কাজ করেছে বলেই তো আজ জেলখানায় পচছে। এনকাউন্টারের নামে একটি অগ্নিবয়সী মেয়েকে খুন করেছিল ওরা।
- প্র: তাই নাকি?
- উ: হ্যাঁ। ওরা বলেছিল মেয়েটি নাকি লশকর জঙ্গি। মুম্বইয়ের মেয়ে ছিল। বলা হয়েছিল সে নাকি সন্ত্রাসবাদী, মোদিকে হত্যা করার জন্য গুজরাতে এসেছিল।
- প্র: কথাটা মিথ্যে?
- উ: হ্যাঁ, মিথ্যে।
- প্র: এখানে আসার পর থেকেই শুনছি সবাই সোরাবুদ্দিনের এনকাউন্টার নিয়ে নানান কথা বলছে।
- উ: সারা দেশেই ওই এনকাউন্টারটা দিয়ে তর্কাতর্কি চলছে। মন্ত্রীর নির্দেশেই সোরাবুদ্দিন আর তুলসী প্রজাপতিকে হত্যা করেছিল ওরা।
- ওই মন্ত্রী অমিত শাহ, মানবাধিকারের ব্যাপারটা বিশ্বাসই করেন না উনি। উনি আমাদের বলতেন এইসব মানবাধিকার কমিশন-টমিশনে কোনো বিশ্বাস নেই আমার। আর এখন দেখুন, কোর্ট ওঁকেও জামিন দিয়ে দিয়েছে।
- প্র: আপনি কখনো ওঁর অধীনে কাজ করেননি?
- উ: এটিএস প্রধান থাকার সময় করেছি। বানজারাকে বদলি করে দিয়ে আমাকে নিয়ে আসেন উনি। আর আমি মানবাধিকারে বিশ্বাস করি। তাই ওই শাহ আমাকে ওঁর বাংলোয় ডেকে পাঠান। আমি কখনো কারো বাংলোয় কিংবা

বাড়িতে বা অফিসে যাই না। তাই ওঁকে বললাম—স্যর, আপনার বাংলা আমি চিনি না। একটু থতিয়ে গিয়ে উনি বললেন, কেন আমার বাংলা চেনেন না? তারপর বললেন, ঠিক আছে, আমার নিজের গাড়ি পাঠিয়ে দিচ্ছি, গাড়িতে চলে আসুন। আমি বললাম, বেশ, গাড়িটা পাঠিয়ে দিন। আমি ওখানে পৌছোনের পর উনি বললেন, ‘আচ্ছা আপনে এক বান্দে কো অ্যারেস্ট কিয়া হয় না, জো আভি আয়া হয় এটিএস মে, উসকো মার ডালনে কা হয়।’

আমি কোনো উত্তর দিলাম না। তখন উনি বললেন, ‘দেখো, মার ডালো, অ্যায়সে আদমি কো জিনে কা কোই হক নেহি হয়।’

তৎক্ষণাৎ নিজের অফিসে ফিরে আমার জুনিয়রদের নিয়ে একটা মিটিং ডাকলাম। আমার মনে হয়েছিল অমিত শাহ নিজেই ওদের নির্দেশ দিয়ে মানুষটাকে খুন করাবেন। তাই ওদের বললাম, দ্যাখো, ওকে মেরে দেওয়ার নির্দেশ দেওয়া হয়েছে আমাকে, কিন্তু কেউ ওর গায়ে হাত তুলবে না, শুধু জেরা করো। আমাকে নির্দেশ দেওয়া হয়েছে, আমি কাজটা করব না, তাই তোমাদেরও করা উচিত নয়।

প্র: কী সাহস আপনার।

উ: আমি যেদিন রিটায়ার করি, ওই নরেন্দ্র মোদি সেদিন আমাকে ডেকে পাঠিয়ে বলেন, ‘এবার আপনি কী করতে চান’, এই জাতীয় নানা প্রশ্ন। ওঁকে জানালাম, কীভাবে আমার উপর চাপ সৃষ্টি করা হয়েছিল। তারপর উনি বললেন, ‘আচ্ছা ইয়ে বাতাও, সরকার কে খিলাফ কৌন কৌন লোগ হয়, মতলব কিতনে অফসর সরকার কে খিলাফ হয়।’

আমি মোদিকে বললাম, ‘আপনাকে কিছু জিজ্ঞেস করতে পারি?’ উনি বললেন, ‘বলো’।

আমি বললাম, ‘গত কুড়ি বছরে বিভিন্ন পদে কাজ করেছি আমি, কখনো আমার বিরুদ্ধে কিছু শুনেছেন আপনি?’ উনি বললেন, আমি চমৎকার কাজ করেছি। তখন আমি বললাম, ‘স্যর, তাহলে বলি, গত চার বছরে আমার সিনিয়ররা আর হোম সেক্রেটারিরা আমার এসিআর-দের ‘এক্সপেন্স’ আর ‘আউটস্ট্যান্ডিং’ হিসেবে চিহ্নিত করেছেন, তাহলে কেন তাদের নীচু পদে নামিয়ে দিলেন আপনি? আমার কাজকর্মকে কেন হেয় করে দিলেন?’ ওঁকে বললাম, সব খবর আরটিআই-এর মাধ্যমে পেয়েছি আমি। উনি স্তম্ভিত হয়ে গেলেন। বললেন, ‘আমার অফিসারদের আর হোম সেক্রেটারিকে ডেকে পাঠাইনি আমি?’ আমি বললাম, ‘স্যর, হোম

সেক্রেটারিকে ডেকে পাঠানোর কোনো দরকার আপনার ছিল না, ফাইলটা আপনার কাছে এসেছিল, আপনি সবই জানতেন।’

বুললেন, আমি ডিজি হতে পারতাম, কিন্তু উনি আমাকে হতে দেননি।

প্র: আচ্ছা, আপনাদের রাজ্যে কোনো ডিজি নেই কেন?

উ: কারণ কুলদীপ শর্মা নামে একজন অফিসারের বিরুদ্ধে প্রতিশোধ নিতে চেয়েছিলেন মোদি।

প্র: আমি শুনেছি ওঁর নাকি নিজস্ব অফিসারদের টিম আছে।

উ: আমি যখন রাজকোটের আইজিপি ছিলাম, তখন জুনাগড়ের কাছে সাম্প্রদায়িক দাঙ্গা হয়েছিল। কয়েকজনের নামে এফআইআর লিখি আমি। হোম মিনিস্টার আমাকে ফোন করে বললেন, ‘রাজনজি, আপনি কোথায় আছেন?’ বললাম, ‘স্যর, আমি জুনাগড়ে আছি।’ তখন তিনি বললেন, ‘আচ্ছা, তিনজনের নাম লিখে নিন, তিনজনকেই অ্যারেস্ট করবেন।’ আমি বললাম, ‘স্যর, ওই তিনজন আমার সামনেই বসে আছেন। আর শুনুন স্যর, এঁরা সকলেই মুসলিম আর এঁদের জন্যেই স্বাভাবিক অবস্থা ফিরে এসেছে। এঁরাই চেষ্টাচরিত্র করে হিন্দু-মুসলিমদের একত্রিত করেছেন এবং দাঙ্গার অবসান ঘটিয়েছেন।’ তখন তিনি বললেন, ‘দেখো, সিএম সাহিব নে কথা হয়’, তখন এই নরেন্দ্র মোদিই সিএম ছিলেন। (তারপর তিনি বললেন) এটা মুখ্যমন্ত্রীর নির্দেশ। আমি বললাম, ‘স্যর, সিএম-এর নির্দেশ হলেও এ-কাজ আমি করতে পারব না, কারণ তিনজনই নিরপরাধ।’

প্র: ফোনে আপনার সঙ্গে কে কথা বলেছিলেন?

উ: হোম মিনিস্টার গোরধন জাদাফিয়া।

প্র: এটা কোন সময়ের কথা?

উ: ২০০২ সালের জুলাই মাস নাগাদ। তখন জাদাফিয়া বললেন, তিনি নিজেই আসবেন।

প্র: ওই লোকগুলো কারা ছিল?

উ: আরে ওরা ভালো লোক, মুসলিম, দাঙ্গা থামানোর কাজে সাহায্য করছিল। আমার জায়গায় অন্য যে-কেউ থাকলে ওদের অ্যারেস্ট করত।

প্র: আচ্ছা, এই সিংঘলের ব্যাপারটা কী? উনিই আমাকে আপনার সঙ্গে দেখা করতে বলেছিলেন।

উ: আমি ওর বস ছিলাম। এখন ও এটিএস-এ আছে। ও আমার প্রোবেশ ছিল, ডেপুটি সুপারিনটেনডেন্ট।

প্র: ওর অধীনে কারা কাজ করতেন?

উ: যারা জেলে গেছে, যেমন বানজারা ওর অধীনে কাজ করত। আমি তখন বর্ডার রেঞ্জের আইজি, ওরা আমাকে বদলি করে দিল যাতে বানজারাকে নিয়ে আসা যায়। ওকে আনার জন্যে আমাকে নীচু পদে পাঠিয়ে দিল ওরা।

প্র: আচ্ছা, এখানকার পুলিশ কি মুসলিমবিরোধী?

উ: না, আসলে এই পলিটিশিয়ানগুলোই মুসলিমবিরোধী। কোনো অফিসার ওদের কথা না শুনলে তাকে সাইড পোস্টিং দেওয়া হয়, এরপর আর তারা কী করতে পারে।

প্র: অমিত শাহ যে-লোকটিকে হত্যা করতে বলেছিলেন আপনাকে, সে কি মুসলিম ছিল?

উ: না, আসলে ব্যবসায়ী মহলের চাপ ছিল বলেই লোকটাকে সরাতে চাইছিলেন তিনি।

প্র: আমি শুনেছি ইশরাত জাহানকে এনকাউন্টারের নামে হত্যা করার জন্য কয়েকজন অফিসারকে বাধ্য করা হয়েছিল।

উ: দেখুন, শুধু আপনাকেই বলছি, একসময় এই বানজারা আর তার দলবল পাঁচজন সর্দারকে অ্যারেস্ট করেছিল, তাদের মধ্যে একজন ছিল কনস্টেবল। বানজারা বলেছিল এদের এনকাউন্টারের নামে মেরে দেওয়া হোক, কারণ এরা হচ্ছে সন্ত্রাসবাদী। ভাগ্যক্রমে তখন এসপি ছিলেন পাণ্ডিয়ান, তিনি বেঁকে বসেন, ফলে পাঁচজন (নিরপরাধ) বেঁচে যায়।

প্র: কিন্তু অফিসাররা তো সত্যিই মুসলিমবিরোধী নন?

উ: না, তারা তা নয়, রাজনৈতিক নেতারা। তাদের এমন কাজ করতে বাধ্য করে। আপনি নীতিপরায়ণ হলে ওরা কখনোই আপনাকে উপযুক্ত পোস্টিং দেবে না। রজনীশ রাই আর রাহুল শর্মার সঙ্গে ওরা কী করেছে একবার ভেবে দেখুন।

এই সরকার সাম্প্রদায়িক মনোভাবাপন্ন আর দুর্নীতিগ্রস্ত। যেমন ওই অমিত শাহ আমার কাছে বড়াই করে বলেছিলেন, ১৯৮৫ সালে সাম্প্রদায়িক দাঙ্গা বাধানোর জন্য কীভাবে উস্কানি দিয়েছিলেন তিনি। সবাইকে নিজের বাড়িতে ডেকে পাঠান উনি। যেমন একটা মিটিংয়ে হোম সেক্রেটারি, চিফ সেক্রেটারি আর একজন সাংসদকে ডেকে পাঠিয়েছিলেন, আমাকেও ডাকা হয়েছিল। আমি (তখন) আইজি পদে আছি। তো সেই সাংসদটি অমিত শাহকে বলেছিলেন যে, একজন কনস্টেবলকেও বদলি করতে

পারেননি আপনি। অমিত শাহ তখন আমার দিকে তাকিয়ে বললেন, 'এটা করা হয়নি কেন?' আমি উত্তর দিলাম কনস্টেবলটি কোনো অন্যায় করেনি, সে শুধু বিজেপি সাংসদের ছেলেকে থামিয়েছিল।

প্র: কিন্তু উনি আপনাকে বলেছিলেন শুনে বেশ অবাক লাগছে।

উ: উনি আমাকে বিশ্বাস করে অনেক কথাই বলতেন। ইশরাতের ঘটনাটার কথা উনিই বলেছিলেন আমাকে। বলেছিলেন ইশরাতকে ওরা খুন করার আগে উনি তাকে হেফাজতে রেখেছিলেন, পাঁচজনকেই খুন করা হয়েছে এবং আসৌ কোনো এনকাউন্টার হয়নি। উনি আমাকে বলেছিলেন ইশরাত সম্মানবাদী ছিল না।

প্র: এটিএস-এর মতন একটা গুরুত্বপূর্ণ পদে উনি আপনাকে থাকতে দিয়েছিলেন ভেবেও খুব অবাক লাগছে।

উ: হ্যাঁ, আসলে ওরা ভাবত আমি ওদেরই লোক, যা বলবে তা-ই করব। শাহ আমাকে বললেন, 'দেখুন, দুটো গুরুত্বপূর্ণ পদ ফাঁকা আছে—এটিএস আর পুলিশ কমিশনারের পদ। দুটো পদেই নিজেদের লোককে রাখতে চাই আমরা। তাই আমরা আশিস ভাটিয়াকে পুলিশ কমিশনার আর আপনাকে এটিএস প্রধান করছি।' উনি আরও বললেন, 'দেখুন, আপনার ওপর আমাদের এই আস্থা আছে যে আপনাকে রাজ্য সরকার যা বলবে আপনি তা-ই করবেন।' তখন আমি বললাম, সত্যিই যদি আপনাদের এত বিশ্বাস থাকে, তাহলে আমাকে পুলিশ কমিশনার করলেন না কেন?

পি.সি. পান্ডের কথা ভাবুন। দাঙ্গাবাজদের বিরুদ্ধে কোনো ব্যবস্থাই নেননি উনি। ওঁর শাস্তি হওয়া উচিত ছিল। মুখ্যমন্ত্রীর নেকনজরে আছেন উনি, মুখ্যমন্ত্রীর পেয়ারের পাত্র। মুসলিমদের হত্যার জন্য উনিই দায়ী। অথচ দেখুন, রিটারারের পরেও ওঁকে একটা পদ দেওয়া হয়েছে। ওঁর সঙ্গে আমার খুব ভালো একটা বোঝাপড়া ছিল ঠিকই, কিন্তু উনি যা করেছিলেন সেটা অন্যায়।

২০১৩ সালের মে মাসে সাজানো সংঘর্ষে ইশরাত জাহানকে হত্যা করা সংক্রান্ত আমার অন্তর্ভুক্ত গুজরাত প্রশাসনের ওপর বোমার মতো ফেটে পড়েছিল। ইশরাত জাহান এবং সাদিক জামালকে সাজানো সংঘর্ষে হত্যা মামলা সংক্রান্ত একটা অত্যন্ত গুরুত্বপূর্ণ নথি ফাঁস করে দিয়েছিলাম আমি। প্রায় প্রতিটা নিউজ চ্যানেলে বসে অন্তর্ভুক্তের খুঁটিনাটি ব্যাখ্যা করতে হয় আমাকে। সাজানো সংঘর্ষের ঘটনায় সম্ভবত এই প্রথম ইনটেলিজেন্স বিভাগের কর্তাদের সরাসরি

জড়িত থাকার কথা প্রমাণিত হল। এক্ষেত্রে মূল হোতা ছিলেন গুজরাতে নিযুক্ত কেন্দ্রীয় আইবি কর্মকর্তা রাজিন্দর কুমার।

এই রিপোর্ট সম্বলিত হেডলাইনগুলো এমএইচএ-কে বেকায়দায় ফেলে দেয়। আইবি অফিসারদের, বিশেষত স্পেশ্যাল আইবি ডিরেক্টর রাজিন্দর কুমারকে জেরা করতে বাধ্য হয় সিবিআই—সাজানো সংঘর্ষে ইশরাত জাহানকে হত্যা করার কাজে যাঁর জড়িত থাকার কথা প্রমাণ হয়ে গিয়েছিল।' ভূতপূর্ব হোম সেক্রেটারি জি.কে. পিল্লাই স্বপদে থাকার সময় বলেছিলেন, উপযুক্ত প্রমাণের অভাবে ইশরাতকে মুক্তি দেওয়া উচিত ছিল। ২০১৬ সালের গোড়ার দিকে সংবাদমাধ্যমকে তিনি জানান, ক্ষমতাসীন কংগ্রেস সরকারের নির্দেশে তিনি এফিডেভিট পালটে দিয়েছিলেন। এর প্রতিক্রিয়ায় রাজিন্দর কুমারকে বেশ কিছু টিভি সাক্ষাৎকারে বলতে হয় যে, এ-কাজ করতে বাধ্য করা হয়েছিল তাঁকে। পিল্লাইয়ের কর্তব্যচ্যুতি এবং তাঁর তথাকথিত 'সত্য' উন্মোচনের সময়-নির্বাচন নিয়ে প্রশ্ন ওঠে, কেননা এখন তিনি আদানি গ্রুপের বোর্ড অফ ডিরেকটর্স-এর সদস্য। আরও খারাপ ব্যাপার হল, একজন ব্যক্তির পরিচিতি যা-ই হোক, তাকে সাজানো সংঘর্ষে হত্যা করাটা যে সংবিধানবিরোধী, সে ব্যাপারে এঁদের কারও কোনো অনুশোচনাই নেই। সিংঘলের তোলা একটা গোপন টেপে গুজরাতের প্রায় সমগ্র গৃহমন্ত্রক কেন ইশরাত জাহান তদন্ত সম্বন্ধে ধোঁয়াটে কথা বলেছেন, সে সম্বন্ধে এঁরা কেউই কোনো উচ্চবাচ্য করেননি।

আমার অন্তর্ভুক্তির মূল বিষয়টা প্রবন্ধের প্রথম অনুচ্ছেদেই স্পষ্টভাবে লিখেছিলাম। লেখাটা এ-রকম ছিল:

ন'বছর আগে চারজন তথাকথিত সন্ত্রাসবাদীকে বেআইনিভাবে হত্যা করেছিল গুজরাত পুলিশ, সেই হত্যার ব্যাপারে একটা বোমা ফাটাতে চলেছে সেন্ট্রাল ব্যুরো অফ ইনভেস্টিগেশন (সিবিআই)। তেহেলকার কাছে খবর আছে যে আমেদাবাদের একজন বিচারপতির কাছে সাক্ষ্যপ্রমাণ দিয়ে সিবিআই জানাতে চলেছে, অভিযুক্ত একজন অফিসার তাঁর সাক্ষ্য ইন্টেলিজেন্স ব্যুরোর (আইবি) বর্তমান স্পেশ্যাল ডিরেক্টর রাজেন্দ্রকুমারকে ২০০৪ সালের ১৫ জুন একজন মহিলা ও তিনজন পুরুষকে, যাঁরা সকলেই মুসলিম, সাজানো সংঘর্ষে হত্যা করার পিছনে মূল ষড়যন্ত্রী হিসেবে চিহ্নিত করেছেন। অত্যন্ত উল্লেখযোগ্য বিষয় হল, অন্য একজন অফিসার জানিয়েছেন, ১৯ বছর বয়সী ইশরাত জাহানকে হত্যা করার আগে তাঁর সঙ্গে দেখা করেন কুমার—ইশরাতকে তখন বেআইনিভাবে পুলিশ হেফাজতে আটক



রাখা হয়েছিল। অন্য আর-একজন পুলিশকর্তা তাঁর সাক্ষ্যে জানিয়েছেন যে, একটি একে-৪৭ অ্যাসল্ট রাইফেল, যেটি নিহতদের কাছে ছিল বলে পুলিশ দাবি করেছিল, সেটি আসলে পাঠানো হয়েছিল আইবি-র গুজরাত ইউনিট থেকে, কুমার তখন সেখানেই কর্মরত ছিলেন এবং রাইফেলটি রেখে দেওয়া হয়েছিল চারজনের মৃতদেহের সঙ্গে। সিবিআই-এর হাতে একটি গোপন অডিও রেকর্ড-ও এসেছে, যেটি রেকর্ড করেছিলেন অন্যতম প্রধান অভিযুক্ত জি.এল. সিংঘল, সেই দুর্ভাগ্যময় রাতে ওই চারজনকে যে-সব অফিসার গুলি করে মেরেছিলেন তাঁদের অন্যতম সদস্য ছিলেন যিনি। এই রেকর্ডিং করা হয়েছিল ২০১১ সালের নভেম্বর মাসে। এই রেকর্ডিংয়ে যাঁদের মধ্যে কথোপকথন ধরা আছে তাঁরা হলেন: প্রফুল্ল প্যাটেল, যিনি এক বছর আগে শাহের পদের উত্তরসূরি হয়েছিলেন; অ্যাডিশনাল প্রিন্সিপাল সেক্রেটারি গিরিশচন্দ্র মুর্মু, এই আইএএস অফিসারটি ২০০৮ সাল থেকে মোদির অফিসে কাজ করেছেন এবং তাঁকে মোদির একজন ঘনিষ্ঠতম উপদেষ্টা বলে মনে করা হয়; রাজ্য সরকারের সবথেকে সিনিয়র ল্য অফিসার অ্যাডভোকেট জেনারেল কমল ত্রিবেদী; তাঁর সহকারী, অ্যাডিশনাল অ্যাডভোকেট জেনারেল তুবার মেহতা; জনৈক নাম-না-জানা আইনজীবী এবং সিংঘল। (এই প্যাটেল এবং একই নামের কেন্দ্রীয় মন্ত্রী আলাদা ব্যক্তি; এই প্যাটেল ডিসেম্বরে বিধানসভা নির্বাচনে পরাজিত হন এবং মোদির নতুন মন্ত্রীসভায় তাঁর ঠাই হয়নি।)

মনে হচ্ছিল ধাঁধার হারানো টুকরোগুলো ভেসে উঠতে শুরু করেছে এবং সেগুলো ঠিকঠাক জায়গায় বসে যাচ্ছে। প্রিয়দর্শী ছিলেন রাজ্যের এটিএস প্রধান, অমিত শাহ তাঁকে জানিয়েছিলেন, ঠান্ডা মাথায় হত্যা করার আগে পুলিশি হেফাজতে আটকে রাখা হয়েছিল ইশরাত জাহানকে। কিন্তু অন্য সব অন্তর্ভুক্তের মতোই এক্ষেত্রেও আমাকে কিছু মূল্য দিতে হয়েছিল। আমার সাংবাদিকতার সঙ্গে আমার ধর্মবিশ্বাসকে জুড়ে নানান গল্প ছড়ানো হয়। কয়েকদিনের মধ্যেই বিভিন্ন চ্যানেলের সম্পাদকরা ও আইনজীবীরা আমাকে ফোন করে জানাতে থাকেন যে, সিবিআই কর্তাদের হাতে আমার কামলালসা সংক্রান্ত একটা সিডি আছে বলে আমার দুর্নাম ছড়াচ্ছেন এমএইচএ কর্তারা।

কথাটা শুনে স্তম্ভিত হয়ে গিয়েছিলাম। জানতাম এটা আমাকে চুপ করানোর চেষ্টা, অর্থাৎ চারিত্রিক দুর্নামের ভয়ে আতঙ্কিত হয়ে থেমে যাব। বাবার কাছে গেলাম—সৌভাগ্যবশত বাবা তখনও পর্যন্ত এ-সব সম্বন্ধে কিছুই জানতেন না। আমার ভাই আরিফ, যে আমার সব কাজে সমর্থন জুগিয়ে এসেছে, আর আমার মা,



যিনি আমার কৃতসংকল্পতার মেরুদণ্ড—আমার ডাকে তাঁরাও এসে দাঁড়ালেন। বাবা বুঝলেন আমি খুব নার্সাস হয়ে আছি। প্রশ্ণার্ত দৃষ্টিতে মায়ের দিকে তাকালেন তিনি। মা-ও একইরকম বিভ্রান্ত আর নার্সাস হয়ে পড়েছেন।

ফোনের কথা আর বাজারে যে-গুজবটা ছড়াচ্ছে সে সম্বন্ধে জানালাম ওঁদের। বাবার কথাগুলো স্পষ্ট মনে আছে, ‘দেখো বেটা, ইয়ে সব ড্রামা হায়, উনকো কহো সিডি দিখায়ো, হাম সব দেখেঙ্গে।’ হেসে উঠলেন বাবা। মা একটু সহজ হয়ে আমার চুলে হাত বুলিয়ে দিতে দিতে বললেন, ‘বেটা, হাম সব জব তুমকো ট্রাস্ট করতে হায়, জব তুমহারি ফ্যামিলি নে এক সওয়াল নেহি পুছা, তো তুমহে কিসি আউর কে ক্যা ফিকর।’

একইরকম সমর্থনের সুরে এবং পেশাদার সাংবাদিকের ভঙ্গিতে আমার ভাই বলল, ‘ওঁদের কাছে একটা চিঠি লেখো, ওই জঘন্য লোকগুলোকে আক্রমণ করো—এ ছাড়া কি আর অন্য কিছু খুঁজে পেল না ওরা?’

তবে আমাকে বিশেষ কিছু করতে হয়নি। সাংবাদিক মহলে আমার সহকর্মীরা দৃঢ়ভাবে আমার পাশে দাঁড়িয়েছিল। আমার বিরুদ্ধে কুৎসামূলক প্রচারের উত্তরে তৎকালীন ম্যানেজিং এডিটর সোমা চৌধুরী সেই সপ্তাহের সম্পাদকীয় নিবন্ধে লিখেছিলেন:

সিনিয়র এডিটর রানা আইয়ুবকে সম্প্রতি এর স্বাদ পেতে হয়েছে। তেহেলকার অন্যতম একজন খাঁটি ও নিভীক সাংবাদিক রানা গত তিন বছর ধরে গুজরাতের সাজানো সংঘর্ষগুলো নিয়ে অক্লান্তভাবে কাজ করে চলেছেন। ন্যায়বিচার ও সাংবিধানিক মূল্যবোধই তাঁর সাংবাদিকতার চালিকাশক্তি। তবুও, ইশরাত জাহান মামলা সম্বন্ধে তাঁর খবরগুলো সারা দেশের বিভিন্ন পত্রপত্রিকায় শিরোনাম হতে শুরু করা মাত্রই, এক অপমানজনক অভিজ্ঞতার সম্মুখীন হতে হচ্ছে তাঁকে, পেশাদার সাংবাদিক হিসেবে না দেখে তাঁকে চিহ্নিত করা হচ্ছে ‘মুসলিম সাংবাদিক’ হিসেবে। পাশাপাশি এক জঘন্য কুৎসামূলক প্রচারও চলছে তাঁর বিরুদ্ধে। তাঁর ও সিবিআই অফিসারদের মধ্যকার একটা সিডি নিয়ে গুঞ্জন চলছে, বাস্তবে যার কোনো সত্যতাই নেই।

ভারতবর্ষ এক ত্রুটিপূর্ণ পরীক্ষাগার। কিন্তু এর অন্তর্নিহিত কাব্যিক ধারণাটি পরিত্যাগ করলে এই-ই জুটবে আমাদের বরাতে: ‘হিন্দু জাতীয়তাবাদী’, ‘মুসলিম সাংবাদিক’ এবং ‘পেশাদার মহিলা’, অশালীন মিথ্যার সাহায্যে যাদের দুর্নাম করে বেড়াই আমরা।

সিডি-সংক্রান্ত বানানো গল্পটার নিঃশব্দে মৃত্যু হল। অন্যদিকে, রাজ্যের পুলিশকর্তাদের ব্যাপারে অমিত শাহের প্রশ্নের নানান খবর রোজই প্রকাশিত হচ্ছিল। নিরীহ নাগরিকদের ওপর নজরদারি চালানোর কাজে তাঁদের প্রশ্রয় দিতেন অমিত শাহ। এ-রকমই একজন সাধারণ নাগরিক ছিলেন মানসি সোনি নামক জনৈক স্থপতি। এ-সবের কেন্দ্রে মূল লোকেদের একজন ছিলেন জি.এল. সিংঘল, একসময় অমিত শাহের বিশ্বস্ত লোক ছিলেন যিনি। কথোপকথনটি রেকর্ড করা হয়েছিল খুব তাৎপর্যপূর্ণ সময়ে—ইশরাত জাহানের ঘটনার তদন্ত করার জন্য নিযুক্ত সিটি তখন সবেমাত্র প্রাথমিক তদন্ত শুরু করেছে। সংশ্লিষ্ট অফিসার অর্থাৎ সিংঘল তখন বুঝতে শুরু করেছেন, দলিত অফিসারদের কীভাবে ব্যবহার করা হয়েছে। এটা বুঝেই নিজেকে বাঁচানোর চেষ্টা শুরু করেন তিনি। এ-ব্যাপারে গুজরাতে বহুল প্রচলিত সেই পদ্ধতির আশ্রয় নেওয়ার থেকে ভালো উপায় আর কী-ই বা হতে পারে, যে-পদ্ধতিটি হল বেআইনিভাবে অন্যের ফোনে আড়ি পাতা।

আমেদাবাদে আরটিআই-এর মাধ্যমে অ্যাকটিভিস্টরা যে-সব তথ্য সংগ্রহ করেছেন, তা থেকে দেখা যাচ্ছে, সারা রাজ্যে ৬৫ হাজারেরও বেশি লোকের ফোনে বেআইনিভাবে আড়ি পাতা হত। এঁদের মধ্যে ছিলেন বিরোধী পার্টির সদস্যরা, নিজেদের পার্টির মধ্যে যাঁরা সরকারের বিরুদ্ধে বিদ্রোহ করতে চাইছিলেন তাঁরা, সাংবাদিকরা ও পুলিশকর্তারা।

গোটা বিষয়টা কীভাবে চলে সিংঘলের তা অজানা ছিল না, অনেক নোংরা কৌশলের কথা তিনি আমাদের বলেও ছিলেন। মন্ত্রী ফোন ও তাঁর কথাবার্তা ট্যাপ করাও শুরু হয়। এইভাবে ট্যাপ করে রেকর্ড করা কথাবার্তাগুলোর মধ্যে খুবই গুরুত্বপূর্ণ ছিল মানসি নামে গুজরাতের একজন তরুণ স্থপতির কাজকর্মের দিকে নজর রাখার জন্য সিংঘলকে দেওয়া শাহের নির্দেশ—ভুজের ভয়াবহ ভূমিকম্পের পর পুনর্বাসনের সময় এই মানসির সঙ্গে তাঁর পরিচয় করিয়ে দিয়েছিলেন প্রদীপ শর্মা নামক জনৈক আইএএস অফিসার।

পরে আমি জানতে পারি মানসি তখন বাঙ্গালোরে থাকেন। তাঁর ওপর নজরদারি চালানোর টেপ-করা যাবতীয় তথ্য আমার হাতে ছিল। তবে আমি জানতাম টেপগুলো ফাঁস করে দিলে বাঙ্গালোরে মানসির শান্তিপূর্ণ জীবনযাপন শেষ হয়ে যাবে।

সময় ফুরিয়ে আসছিল। আমাদের সম্পাদক সোমাকে একটা পাবলিক বুথের নম্বর দিয়ে রেখেছিলাম। সোমা তাঁর ব্যক্তিগত সহকারীর সেল ফোন থেকে সেই বুথে ফোন করে জিজ্ঞেস করতেন, ‘কী কী পাওয়া গেল? ওখানকার খবর কী?’

আমি নানান তথ্যের প্রতিলিপি নেওয়ার খবর জানালে উদ্বেজনায় তিনি চৈচিয়ে উঠতেন, 'দারুণ, রানা, দারুণ।'

কিন্তু আমি বুঝতে পারছিলাম, এখনও অনেক ফাঁক আছে, প্রথমে সেগুলো পূরণ করতে হবে। কিছু আমলার সঙ্গে যোগাযোগ করা দরকার, যেমন হোম সেক্রেটারি, মুখ্য উপদেষ্টা, অর্থাৎ কারও সম্বন্ধে অভিযোগমূলক নথিতে সই করতেন যাঁরা, এবং যাঁরা সরাসরি মোদি ও শাহের কাছ থেকে নির্দেশ পেতেন। এঁদের মধ্যে অধিকাংশ জনকেই নানাবতী কমিশন জিজ্ঞাসাবাদ করে, সেখানে হঠাৎই তাঁদের স্মৃতিভ্রংশতা দেখা দেয়। অনেকে সরাসরি জড়িত ছিলেন না, কিন্তু কোনো অন্যায়ের কথা জেনেও নীরব থাকার কারণে গুজরাতের সাম্প্রদায়িক দাঙ্গার শিকারদের ন্যায়বিচার দেওয়ার প্রক্রিয়ায় তাঁরা দোষী সাব্যস্ত হন। আমার সহকর্মী আশিসের পক্ষে স্থানীয় গুন্ডাদের দিয়ে কথা বলানো সহজ ছিল। গুন্ডারা বলত গুজরাত দাঙ্গার সময় কীভাবে মুসলিম মহিলাদের খুন করেছে তারা। কিন্তু আমি খুঁজে বেড়াছিলাম মূল লোকগুলিকে—দাঙ্গার সময় গুজরাতের হোম সেক্রেটারি ছিলেন যিনি, পুলিশের ডিজি ছিলেন যিনি, কমিশনার ছিলেন যিনি এবং আইবি প্রধান ছিলেন যিনি। প্রতিদিনই মাথায় পাক খেত ভাবনাটা।

এই মানসিক চাপ তো ছিলই, উপরন্তু বোম্বার ওপর শাকের আঁটির মতন মানিকভাই আমাদের ঘর খালি করে দিতে বললেন। কী-একটা সম্মেলনের জন্য প্রতিনিধিরা এসে ফাউন্ডেশনের সব ঘর দখল করে বসবেন। আবার নিরাশ্রয় হলাম আমি।

## পঞ্চম পরিচ্ছেদ

### মাঝের সময়ের কথা

এ কাহিনির অন্যান্য চরিত্রের প্রসঙ্গে যাওয়ার আগে গুজরাতের বিখ্যাত পুলিশকর্তা উষা রাডা-র কথা একটু বলে নেওয়া দরকার। তাঁর ওপর স্টিং অপারেশন চালানোর ইচ্ছে আমার ছিল না, কিন্তু তাঁর ব্যাপারে সন্দিহান হওয়ার কিছু কারণ ছিল। দলিত শ্রেণি থেকে আসা রাডা-র সঙ্গে দেখা হওয়ার পর বুঝেছিলাম, তাঁর কথাবার্তা গোপনে রেকর্ড করে রাখলে কোনো ক্ষতি হবে না, বরং আমার প্রতিবেদনের পক্ষে তা সহায়কই হবে। রাডা ছিলেন অভয় চুদাসামার জুনিয়র এবং অত্যন্ত বিশ্বস্ত জুনিয়র। আমি গুজরাত ছেড়ে চলে আসার কিছুদিন পরেই স্পেশ্যাল টাস্ক ফোর্স থেকে পদত্যাগ করেন রাডা—২০০৩ থেকে ২০০৬-এর মধ্যে গুজরাতে ১৬টি পুলিশ এনকাউন্টারের তদন্ত করার জন্য সুপ্রিম কোর্ট এই স্পেশ্যাল টাস্ক ফোর্স গঠন করেছিলেন।

সোরাবুদ্দিন শেখকে সাজানো এনকাউন্টারে হত্যা করার মামলায় সিবিআই-এর হাতে গ্রেপ্তার হওয়া চুদাসামা ২০০৭ থেকে ২০১০ সাল পর্যন্ত রাডার বস ছিলেন—তাঁরা দু'জনেই তখন ক্রাইম ব্রাঞ্চে ছিলেন। সকলে বলাবলি করত তদন্তের মোড় চুদাসামার পক্ষে ঘোরানোর জন্য প্রভাব খাটাতেন রাডা।

গুজরাত পুলিশের কন্ট্রোল রুমটা ততদিনে আমার একটা প্রিয় জায়গা হয়ে উঠেছে। কোনো পুলিশকর্তার সঙ্গে যোগাযোগ করার দরকার হলেই কৃত্রিম উচ্চারণে ফোন করে বলতাম, আমি একজন আমেরিকান চিত্রপরিচালক, ক্ষমতাশালী গুজরাতি মহিলাদের সম্বন্ধে একটা তথ্যচিত্র তুলছি। যে-পুলিশকর্তা ফোন ধরতেন তিনি আমাকে শুধু যে প্রার্থিত পুলিশকর্তাটির ল্যান্ডলাইন নম্বর দিতেন তা-ই নয়, তাঁর সেল ফোনের নম্বরও দিয়ে দিতেন। যখন আমি উষা রাডাকে ফোন করি, তখন তিনি কাউকে জিজ্ঞাসাবাদ করছিলেন। আমি তাঁকে একটা মেসেজ পাঠিয়ে দিই। ঘণ্টা দুয়েক পরে ফোন করে তিনি আমাকে আমেদাবাদের সার্কিট হাউসে তাঁর সঙ্গে দেখা করতে বলেন। ডেনিম স্কাট, কালো

টি-শার্ট আর প্রচুর গয়না পরে তাঁর সঙ্গে দেখা করতে গেলাম। মাথায় একটা রঙিন বাঁদনা বাঁধা ছিল, সঙ্গে ছিল ক্যামেরা আর একটা পিঠে-বাঁধা ব্যাগ। রিসেপশনিস্ট আমাকে বসার জায়গায় নিয়ে গেলেন।

কয়েক মিনিটের মধ্যেই রাডা এলেন। বয়েস তিরিশের কোঠার গোড়ার দিকে, বয়স্ক চুল, লম্বা, রোগাটে চেহারা। পরনে কলারওয়ালা টি-শার্ট, জিনস আর স্পোর্টস শ্যু, যা তাঁর ব্যক্তিত্বে একটা আলাদা মাত্রা যোগ করেছে। আমাকে উষ্ণভাবে আলিঙ্গন করলেন তিনি। ‘বলুন মৈথিলী, কেমন আছেন?’ কথাগুলো বলতে বলতে আন্তরিকভাবে আমার করমর্দন করলেন, মুখে ফুটে উঠল ঔদার্যের হাসি।

বসার পর তাঁর ব্যক্তিত্বের বিপুল প্রশংসা করলাম, তার সবটা যে মিথ্যে তা-ও নয়। উষার সত্যিই একটা প্রসন্ন ব্যক্তিত্ব ছিল, আর তাঁর হাসি দেখে আমার সব ভয় দূর হয়ে গেল। ঘণ্টাখানেক কথাবার্তা বলার পরই তিনি কথা দিলেন আমাকে সিনেমা দেখাতে নিয়ে যাবেন, শপিংয়ে নিয়ে যাবেন এবং গুজরাতের একটা বিখ্যাত থালি খাওয়াবেন।

‘আমাকে বন্ধু বলে ভাববেন আর যা সাহায্য দরকার স্বচ্ছন্দে জানাবেন’—নিজের সরকারি জিপে করে আমাকে নেহরু ফাউন্ডেশনের সামনে নামিয়ে দেওয়ার আগে আলিঙ্গন করে বললেন উষা।

পরের দিন সন্দের সময় উষার কাছ থেকে একটা মেসেজ এল আমার ফোনে: ‘মৈথিলী, রাত সাড়ে নটার সময় এসজি হাইওয়েতে আমার সঙ্গে দেখা করুন।’ তৎক্ষণাৎ জানিয়ে দিলাম, আমি যাচ্ছি। কিন্তু ফোনটা রাখার পরই উৎকণ্ঠার স্রোত বয়ে গেল শরীর জুড়ে। রাত সাড়ে নটার সময় এসজি হাইওয়েতে আমার সঙ্গে কেন দেখা করতে চাইছেন উনি?

খুব নার্ভাস লাগছিল, ভয়ও পাচ্ছিলাম। তবু একটা অটো ধরে চলে গেলাম এসজি হাইওয়েতে। নির্দিষ্ট জায়গায় পৌঁছে উষাকে ফোন করতে তিনি বললেন ফোনটা অটোচালককে দিতে, যাতে ঠিক কোথায় আমাকে নিয়ে যেতে হবে সেটা তাকে বুঝিয়ে দিতে পারেন। মুখ গোঁজ করে ফোনটা আমাকে ফেরত দিয়ে অটোচালক বললেন, এত দূর যে যেতে হবে সেটা আমার তাঁকে আগেই জানানো উচিত ছিল। তখন রাত প্রায় দশটা বাজে। উষার কথামতো কাজ করা ছাড়া উপায় নেই আমার। ভয় পেলেও সেটা বুঝতে দেওয়া চলবে না। আরও কয়েক কিলোমিটার যাওয়ার পর রাস্তার ওপর উষার পুলিশ ভ্যানটা চোখে পড়ল। ভ্যানের পাশে আর মাত্র তিনজন পুলিশ দাঁড়িয়ে আছে। অটোচালককে বলতে যাচ্ছিলাম আমাকে ফিরিয়ে আনার জন্য, কিন্তু ততক্ষণে অনেক দেরি হয়ে গেছে। ‘হ্যালো’, আমার দিকে এগিয়ে আসতে আসতে উষা বললেন। আমাকে জিপে

বসতে বলার পর বললেন, ‘আপনাকে এমন একটা জায়গায় নিয়ে যাব যেটা আপনার ভালো লাগবে।’

আমার চিংকার করে কাঁদতে ইচ্ছে করছিল। গুজরাতে আসার পর এই প্রথম হাতদুটো বরফের মতো ঠান্ডা লাগছে। উষা নানান কথা বলে চলেছেন, এদিকে আমি একেবারে চুপ, যা আমার চরিত্রবিরোধী। বাড়িতে ফোন করতে ইচ্ছে করছিল, জানাতে ইচ্ছে করছিল কার সঙ্গে শেষ দেখা হয়েছে আমার—দুর্ঘটনার নামে আমাকে মেরে দেওয়া হলে খবরটা কাজে লাগবে ওদের।

কিন্তু উষাকে চিনতে ভুল করেছিলাম আমি। আমেদাবাদের একটা সেরা রেস্টোরাঁর সামনে গিয়ে দাঁড়িলাম আমরা। উজ্জ্বল চোখে আমার দিকে তাকিয়ে উষা বোঝাতে চাইলেন—দেখুন, আমি আপনাকে দেখাতে চেয়েছিলাম আপনাদের আমেরিকার থেকে আমাদের আমেদাবাদ মোটেই পিছিয়ে নেই। হাসলাম আমি। স্বস্তির হাসি, যে-হাসির অর্থ কোনোদিনই বুঝবেন না উষা। ওঁর কাছে মার্জনা চেয়ে ওয়াশরুমে গেলাম। ওই টয়লেটের কিউবিক্লে সেদিন যত কেঁদেছিলাম, জীবনে কখনো বোধহয় তত কাঁদিনি। কাঁদতে কাঁদতে কাশছিলাম, চোখ-নাক থেকে ছ-ছ করে জল ঝরছে, প্রায় বমিই করে ফেলছিলাম।

ওখানে বসে কথাবার্তা বলার পর উষা বুঝতে পারলেন তাঁকে কতটা শ্রদ্ধা করি আমি। রেস্টোরাঁ থেকে বেরোনোর আগে ঠিক হল পরের দিন উষার বাড়িতে দেখা হবে আমাদের। রেস্টোরাঁয় বসে অনেক কিছু নিয়েই আলোচনা হয়েছিল—গুজরাতে সন্ত্রাস-সৃষ্টিকারী মুসলিমদের থেকে শুরু করে তাঁর সিনিয়র অভয় চুদাসামার প্রসঙ্গ পর্যন্ত, যাঁকে একজন বীর বলে মনে করেন তিনি।

পরের দিন সন্ধ্যার সময় উষার বাড়িতে যেতে হবে। চার্জার থেকে বিশেষ কুর্তটা খুলে নিলাম, ক্যামেরাটা পরীক্ষা করলাম, তারপর কুর্তটা গায়ে চাপিয়ে বেরিয়ে পড়লাম নেহরু ফাউন্ডেশন থেকে। বেরোনোর সময় ফাউন্ডেশনের এক নতুন বাসিন্দার সঙ্গে পরিচয় হল: মুম্বই থেকে আসা একটি মেয়ে, নাম রাজ্জি, আমার পাশের ঘরেই থাকবে। পানি আর তার বন্ধুরা সবে হস্টেলে ফিরেছে। আর-একটি জার্মান মেয়ে হস্টেলে থাকার জন্য এসেছে। স্কাইপে নিজের পরিবারের লোকেদের সঙ্গে কথা বলছিল সে। তার ঘরের পাশ দিয়ে যাওয়ার সময় তার মায়ের সঙ্গে একটু কথা বলে যেতে বলল আমাকে।

শাহিবাগের কাছে পুলিশ কোয়ার্টার্সে পৌঁছে দেখলাম ঘরোয়া পোশাক পরে বসে আছেন উষা, ডিনারের জন্য থালি সাজানো আছে। তাঁর মেয়েটি ল্যাপটপে কী-সব করছে। মেয়ের সঙ্গে আমার পরিচয় করিয়ে দিয়ে মেয়েকে উষা বললেন স্কুলের পড়া শেষ করে আমেরিকার কোন কলেজে ভর্তি হওয়া যায় সে ব্যাপারে আমার কাছে

জেনে নিতে। উষা একজন সিঙ্গল মাদার, স্বামীর সঙ্গে বিচ্ছেদ হয়ে যাওয়ার পর মা-বাবা আর সন্তানদের নিয়ে থাকেন। উষাকে বললাম, 'আজ তুমি তুমহারি পুলিশ ফোর্স কে বারে মের্ নোটস লেনি হয়।' 'আজ নেহি, আজ ফিল্ম দেখনে জাতে হয়।' মনে মনে বেশ হতাশ হলেও হাবভাবে সেটা প্রকাশ করলাম না।

কয়েক মিনিটের মধ্যেই আমেদাবাদের একটা জনপ্রিয় সিনেমা হলে পৌঁছে গেলাম আমরা। কিন্তু ভেতরে পা দিতে গিয়েই বুকটা কেঁপে উঠল। একটা মোটাল ডিটেক্টর পার হয়ে যেতে হবে। আমার কুর্তায় একটা ক্যামেরা লাগানো আছে। মনে হল, আজই সব শেষ। ভয়ে মুখের ভেতরটা শুকিয়ে গেছে। লাইনে দাঁড়িয়ে আছি আমরা। উষা বকবক করে চলেছেন, আমার সবটুকু নজর ওই ডিটেক্টরের দিকে। আর কয়েক মিনিটের মধ্যেই আমার ক্যামেরাটার হদিশ দেবে ওই ডিটেক্টর, তৎক্ষণাৎ ধরা পড়ে যাব। কিন্তু, অঘটন আজও ঘটে। তল্লাশির জায়গার কাছেই দাঁড়িয়ে থাকা একজন কনস্টেবল উষা আর আমাকে লাইনে দেখে আমাদের সরিয়ে নিলেন এবং অন্য দরজা দিয়ে ভেতরে ঢুকিয়ে দিলেন। ডিসেম্বর মাস, কনকনে ঠান্ডা রাত, অথচ আমার পিঠ থেকে টপটপ করে ঘাম ঝরছিল। বুঝতে পারছিলাম, আবারও বেঁচে গেলাম আমি। পপকর্ন আর কোক হাতে নিয়ে 'নো ওয়ান কিল্ড জেসিকা' ছবিটা দেখতে ঢুকলাম আমরা। মজার কথা হল, জেসিকা লাল হত্যা মামলা নিয়ে *তেহেলকার*র অন্তর্ভুক্তের ভিত্তিতেই বানানো হয়েছিল ছবিটা।

পর্দায় নানান নাম দেখানো হচ্ছে, *তেহেলকার*র কাছেও কৃতজ্ঞতা স্বীকার করা হয়েছে নামপত্রে। উষা ফিসফিস করে বললেন, 'তেহেলকার নাম শুনেছেন? বস্তুসব রাস্কল। ফোনের সঙ্গে লাগানো ক্যামেরা নিয়ে ঘুরে বেড়ায় আর গোপনে লোকেদের ছবি তোলে। গুজরাতেও গোপনে আমাদের লোকেদের ছবি তুলেছিল ওরা।' কিছুটা বাড়তি অজ্ঞতার ভান করে বললাম, 'তাই নাকি? এই তেহেলকাটা কী? কোনো টিভি চ্যানেল?' সিনেমা দেখতে দেখতেই উষা উত্তর দিলেন, 'না না, ওটা একটা ওয়েবসাইট। কক্ষনো দেখবেন না। ভারত সম্বন্ধে যতসব খারাপ খারাপ জিনিস দেখায়।'

সেই রাতে ঘরে ফিরে মনে মনে হাসলাম। ভালো একটা সার্কাসের অংশীদার হয়ে পড়েছি। পরিস্থিতির কথা ভেবে এবং একসময় যে ভেবেছিলাম আমার সিনিয়রদের প্রত্যাশা পূরণ করতে পারব কি না, তা ভেবেও হাসি পেল। আমি কি সত্য আবিষ্কার করতে পারব না? থাকার অন্য জায়গা খোঁজার জন্য তখনও দু'দিন সময় হাতে ছিল। পানি আমাকে ওর ঘরে থাকতে বলেছিল, কিন্তু সে ঝুঁকি নেওয়া আমার পক্ষে সম্ভব ছিল না। রোজ রাতে আমার কুর্তা, ডায়েরি আর ঘড়িতে চার্জ দিতে হত—তিনটে জিনিসেই ক্যামেরা লাগানো ছিল। এতটুকুও ভুল করে

নিজেকে বিপন্ন করার উপায় ছিল না আমার। পানির কাছে ওর ল্যাপটপটা চাইলাম। আমার ব্যক্তিগত ই-মেলটা ব্যবহার করতে চাইছিলাম, কিন্তু নিজের ল্যাপটপ থেকে করব না।

সেদিন রানা আইয়ুব নামে লগ-ইন করে দেখি অন্তত হাজারখানেক মেল জমে আছে। আমার অন্তর্ধান সম্পর্কে জানতে চেয়েছে আমার অনেক বন্ধু। আমার ফেসবুক অ্যাকাউন্ট ডিলিট করে দিয়েছিলাম, ফলে ইন্টারনেটে আমার কোনো ছবি ছিল না। আমেরিকার বাসিন্দা এক বান্ধবীকে মেল করলাম, তার বাড়ির লোকেরা আমেদাবাদে থাকে। তাকে জানালাম হোটেলে থাকতে থাকতে হাঁপিয়ে উঠেছি, এ শহরে তার কোনো বন্ধুর বাড়িতে থাকা যায় কি না।

অপ্রত্যাশিত দ্রুততায় উত্তর দিল সে। তার বাড়ির লোকেরা আর বন্ধুরা রাজকোটে থাকে, তবে তাদের এক পারিবারিক বন্ধুর একটা বাংলো আছে এসজি হাইওয়েতে। বাড়ির মালিকরা এখন দেশে থাকেন না, একজন হাউসকিপার বাড়িটা দেখাশোনা করে, বাড়ির কম্পাউন্ডে একটা কাজচলা গোছের চালা বানিয়ে থাকে সে। কীভাবে যেতে হবে জেনে নিয়ে মালপত্র বাঁধাছাঁদা করে ফেললাম। পরের দিন সকালে মানিকভাইয়ের ঘরে গেলাম তাঁর সঙ্গে দেখা করার জন্য। এখানকার বকেয়া টাকাটা মিটিয়ে দিলাম। তিনি বললেন, দিন দশেক পরে এখানে ফিরে আসতে পারেন আপনি। ততদিনে প্রতিনিধিরা চলে যাবেন, একটা ঘরও পাওয়া যাবে।

বাংলোটা খুব সুন্দর, সঙ্গে বিশাল বাগান আর লন, কিন্তু কোনো মেয়ের পক্ষে একা থাকার উপযুক্ত নয়। বাংলোর ডাইনে-বাঁয়ে আরও কিছু বাংলো তৈরি হচ্ছে, মজুরদের থাকার জন্য অস্থায়ী বস্তি বানানো হয়েছে এবং সূর্যাস্তের পর কোথাও কোনো আলো থাকে না। যানবাহনের কোনো ব্যবস্থা নেই। সাইকেলে করে প্রায় এক কিলোমিটার দূরের বাজারে যেতে হয় কেয়ারটেকারটিকে। বাংলোর চত্বরে ছেঁড়া তার, কাঠ, ইট আর সিমেন্টের স্তুপ। কেয়ারটেকার কালুভাই আমার আসার কথা জানতেন। তিনি বাংলোর সদর দরজা খোলার আগেই দুটো নেড়ি কুকুর ঘেউঘেউ করে আমাকে স্বাগত জানাল। কালুভাইয়ের তিনটি মেয়ে। কুকুরগুলোও তাঁর পরিবারেরই সদস্য। পরে এরা আমার নিঃসঙ্গ জীবনের সঙ্গী হয়ে উঠেছিল।

এ-বাড়িতে আমার জন্য আর-একটা চমক অপেক্ষা করছিল, যেটার কথা আমাকে বলা দরকার মনে করেননি কালুভাই। একদিন সন্দের পর অটোর করে বাংলোয় ফিরলাম। গোটা বাংলোটা অন্ধকার। দরজায় কড়া নেড়ে কোনো লাভ নেই, কারণ কালুভাই তখন নিজের ছোট ঘরে দরজা বন্ধ করে রেডিও শুনছেন। তাঁকে ফোন করলাম, অটোচালককে বললাম জোরে হর্ন বাজাতে, যাতে ভেতরের



কেউ শুনতে পায়। আমার সঙ্গে একটা ছোটো টর্চ ছিল, অন্ধকার রাস্তায় পথ দেখার জন্য টর্চটা রাখতে হত।

দরজা দিয়ে আলো ফেলতেই কুকুরগুলো ঘেউঘেউ করতে শুরু করল। ভালোই হল, কুকুরের ডাক শুনে কালুভাই হয়তো এদিকে আসতে পারেন। যা ভেবেছি তাই। কালুভাই চেষ্টা করে বললেন, ‘আ রহা হঁ, মৈথিলী বেন।’ কুকুরগুলো তখনও ঘেউঘেউ করেই চলেছে।

চান-টান সেরে রাতের খাবার খাওয়ার পরও দেখি কুকুরগুলো ডেকেই চলেছে। ওদের খিদে পেয়েছে ভেবে বাইরে এসে কালুভাইকে বললাম, ওদের কিছু খেতে দিতে। তিনি উত্তর দিলেন, ‘আরে বেন, একবার উয়ো সাঁপ হোল মের্ চলা জায়েগা না সব শান্ত হো জায়েঙ্গে।’ সাঁপ? আতঁনাদ করে উঠলাম, ‘কোথায়?’

পরের পনেরো মিনিট ধরে কালুভাই আর তাঁর মেয়েরা খুব আনন্দের সঙ্গে আমাকে জানালেন যে, গত এক বছর ধরে একটা কেউটে সাঁপ এই বাংলোয় বাসা বেঁধেছে। দেখানোর জন্য আমাকে নিয়ে গেলেন ওঁরা। দেখলাম দেয়ালে শুয়ে আছে সাপটা।

সেদিন থেকে রাতে আর ভালো করে ঘুমোতে পারতাম না। কুকুরগুলো ডাকতে শুরু করলেই বুঝতে পারতাম সাপটা বাসা থেকে বেরিয়েছে। কেউ দেয়াল টপকে ঢুকছে ভেবে ধড়মড় করে উঠে বসতাম মাঝেমাঝে। আমার সঙ্গে এমন কিছু ঘটছিল, যার কোনো ব্যাখ্যা নেই। নাড়ির গতি হঠাৎ বেড়ে যেত, প্রতি রাতে ঠান্ডা ঘাম দেখা দিত শরীরে। গলা শুকিয়ে কাঠ হয়ে যেত, কিছু খাওয়া কঠিন হয়ে উঠত। কোনো পুলিশকর্তা আমার আসল পরিচয় জেনে ফেললে কী হবে? এই বাংলোয় আমার ক্ষতি করা অনেক সহজ হবে ওদের পক্ষে।

বিকালে যখন কোনো কাজ থাকত না, কালুভাইয়ের মেয়েরা স্কুলের বইপত্র নিয়ে আমার কাছে আসত। আমি চা বানাতাম, পার্লে জি বিস্কুট দিয়ে চা খেতাম সকলে। কুকুরগুলো আমার খুব ন্যাওটা হয়ে পড়েছিল। একটা সময় কুকুরগুলোর সঙ্গে সাপটার খেলা দেখতেও দিব্যি লাগত। কালুভাইয়ের মেয়েরা আর আমি মিলে সাপটার নাম দিয়েছিলাম মুখিয়া। মেয়েগুলো মুখিয়ার দিকে টিল ছুঁড়ত, দূরে বসে ফোনের ক্যামেরায় ছবি তুলতাম আমি।

## ষষ্ঠ পরিচ্ছেদ

### অশোক নারায়ণ

মাইক তখনও দিম্বি থেকে ফেরেনি। বাড়ির লোকেরা ওর সঙ্গে দেখা করার জন্য ভারতে এসেছিল। ওকে বলে দিয়েছিলাম গুজরাতে ওর কাজ সম্বন্ধে যেন সতর্ক থাকে। এইসময় গুজরাতেই আইপিএস অফিসার সঞ্জীব ভাটের বিবৃতি প্রকাশ করে তেহেলকা। বিবৃতিটি প্রকাশ করেছিল আমার সহকর্মী আশিস খেতান, যে তখন অন্তর্দত্ত বিষয়ক সম্পাদক ছিল। সঞ্জীব ভাট বলেছিলেন—মোদি, সংশ্লিষ্ট পুলিশ অফিসার ও আমলাদের একটি মিটিংয়ে তিনি উপস্থিত ছিলেন, যে-মিটিংয়ে ২০০২ সালের দাঙ্গায় মুসলিমদের যথেষ্ট হত্যা করার জন্য পুলিশ অফিসারদের অধিকার দিয়েছিলেন মোদি। গুজরাত দাঙ্গা নিয়ে কর্মরত অধিকাংশ সাংবাদিক, অ্যাকটিভিস্ট ও আইনজীবীরা রীতিমতো বিভ্রান্ত হয়ে পড়েছিলেন। আমার পরিচিত অনেকেই এই বক্তব্য বিশ্বাস করতে পারেননি, বলেছিলেন—কয়েক ডজন উচ্চপদস্থ আমলা আর অফিসারদের সামনে এই ধরনের নির্দেশ দিয়ে কোনো মুখ্যমন্ত্রীই নিজের রাজনৈতিক জীবনকে বিপন্ন করতে পারেন না। প্রশ্ন ছিল অনেক। এতদিন পর সঞ্জীব ভাট এই বিবৃতি দিলেন কেন? অনেক বছর ধরে গুজরাত নিয়ে রিপোর্টিং করার সময় সঞ্জীব ভাটের সঙ্গে কখনো দেখা হয়নি আমার।

সোমা ফোন করে বলল সঞ্জীব ভাট সম্বন্ধে জানার জন্য ওইসব অফিসারদের ধরা যায় কি না। এ-ব্যাপারে প্রশ্ন করা খুব অস্বস্তিকর। এত সুনির্দিষ্ট একটা বিষয় নিয়ে প্রশ্ন করলে সন্দেহ জাগবেই। মনে আছে সোমাকে বলেছিলাম, নানান কারণে সঞ্জীব ভাটের বক্তব্য আমার বিশ্বাস হচ্ছে না। তবে ওকে বললাম, তাঁর বক্তব্যে কোনো সত্যতা থেকে থাকলে সেটা আমি খুঁজে বার করবই।

গুজরাত দাঙ্গার সময় যারা সবথেকে গুরুত্বপূর্ণ সিদ্ধান্তপ্রণেতা ছিলেন, তাঁদের সঙ্গে দেখা করতে চাইছিলাম আমি। গুজরাত দাঙ্গার সময় প্রধান ভূমিকা ছিল চারজন ব্যক্তির: হোম সেক্রেটারি অশোক নারায়ণ, পুলিশের ডিজি চক্রবর্তী, পুলিশ কমিশনার পি.সি. পান্ডে এবং স্বর্ণকান্ত ভার্মা, ২০০২ সালের দাঙ্গার সময়

মুখ্যমন্ত্রীর প্রধান উপদেষ্টা ছিলেন যিনি। ইতিমধ্যেই অশোক নারায়ণের সঙ্গে দেখা করতে শুরু করেছিলাম।

তেহেলকার যে-রিপোর্টে ভাটের বিবৃতি উদ্ধৃত হয়েছিল, সেই রিপোর্টেই আমি যে-সব অফিসারদের নাম উল্লেখ করলাম, তাঁদের সম্বন্ধে বলা হয়েছিল যে নানাবতী কমিশনের জিজ্ঞাসাবাদের সময় এঁদের সকলেরই স্মৃতিভ্রংশতা দেখা দিয়েছিল।

১৯৮৮-র ব্যাচের গুজরাটের আইপিএস অফিসার সঞ্জীব ভাটের বক্তব্য ছিল যে তিনি ‘গুজরাতের তৎকালীন মুখ্যমন্ত্রী মি. মোদির মিটিংয়ে উপস্থিত ছিলেন, সেখানে মি. মোদি উচ্চপদস্থ পুলিশকর্তাদের বলেছিলেন সংখ্যালঘু সম্প্রদায়ের বিরুদ্ধে হিন্দুদের ক্রোধ প্রকাশ করতে যেন বাধা দেওয়া না হয়।’

২০১৪ সালের অক্টোবর মাসে সঞ্জীব ভাটের আবেদন নাকচ করে দিয়ে সুপ্রিম কোর্ট জানায় যে, এটা রাজনীতি ও অন্যান্য কার্যকলাপের সাহায্যে আদালতকে প্রভাবিত করার চেষ্টা ছাড়া আর কিছুই নয়। সুপ্রিম কোর্ট বলেন:

‘নব্বইর পর এই চাঞ্চল্যকর বক্তব্য প্রকাশ করছেন তিনি। কেন তিনি এতদিন ই-মেলগুলি প্রকাশ না-করে নীরব ছিলেন তা বুঝে ওঠা দুষ্কর। জাস্টিস নানাবতী কমিশনের সামনেও ই-মেলগুলি সম্বন্ধে কিছু বলেননি তিনি। বিরোধী রাজনৈতিক দল তাঁর ক্ষমতাকে পুরোপুরি কাজে লাগায়নি, এই মর্মে তিনি ই-মেল পাঠিয়েছিলেন বলেছেন, অথচ এই ই-মেলের কথা ওই কমিশনের কাছে কেন জানাননি তারও কোনো ব্যাখ্যা নেই। আবেদনকারীর সামগ্রিক আচরণ আদৌ বিশ্বাসযোগ্য নয়।

২০১৫ সালের আগস্ট মাসে মোদি সরকারের স্বরাষ্ট্রমন্ত্রক সঞ্জীব ভাটকে চাকরি থেকে অব্যাহতি দেয়। তাঁর সহকর্মীরা বলেন, সঞ্জীব ভাট বরাবরই একজন বিতর্কিত চরিত্র, তাঁর দাবিতে প্রচুর স্ববিরোধিতা আছে। তখন ২০০২ সালের অন্যান্য অসমাপিত প্রশ্নের সঙ্গে এই প্রশ্নটাও অশোক নারায়ণকে জিজ্ঞেস করা সবথেকে প্রাসঙ্গিক হয়ে ওঠে। আমার সঙ্গে যখন তাঁর দেখা হয় তখন তিনি সস্ত্রীক গান্ধীনগরের একটা সুন্দর বাংলোয় থাকতেন। গুজরাত পুলিশের সুদক্ষ কন্ট্রোল রুমের সৌজন্যে তাঁর কাছে পৌছতে বিশেষ অসুবিধে হয়নি। ২০১০ সালের ডিসেম্বর মাসের শেষদিকে তাঁর সঙ্গে দেখা করি আমি। ল্যান্ডলাইনে ফোন করে আমার তথ্যচিত্রের কথা জানাই তাঁকে, যে-তথ্যচিত্রে গুজরাতের সবথেকে গুরুত্বপূর্ণ ব্যক্তিদের জীবন ফুটিয়ে তোলা হবে। তাঁকে বললাম, তাঁর কাজকর্ম রীতিমতো তারিফযোগ্য, আমার সহকারীকে নিয়ে তার সঙ্গে দেখা করতে চাই আমি।

অশোক নারায়ণের বাড়িতে যাওয়ার আগের রাতে দেখলাম আমার লেন্সের সলিউশন ফুরিয়ে গেছে। রাত তখন আটটা, ঠান্ডায় সাধারণ জিনিসপত্র হাতে ধরাও কষ্টকর, এই সময় বাইরে গিয়ে সলিউশন কিনতে ইচ্ছে হল না। অনলাইনে বিকল্প সলিউশন খুঁজতে লাগলাম। একটা সাইটে বলা হয়েছে লেন্সটা নুনজলে ডোবাতে হবে। পরের দিন সকালে পার্লে জি দিয়ে চা খাওয়ার পর নুনজলের পাত্র থেকে লেন্সগুলো তুলে নিয়ে চোখে লাগলাম। চোখ জ্বালা করতে লাগল। বুঝলাম খারাপ পারিস্থিতিকে আরও খারাপ করে ফেলেছি আমি। কালুভাইয়ের কাছে বরফের টুকরো চাইলাম। চোখ জ্বালা করছে, লাল হয়ে গেছে। একটা ট্যান্ডি থেকে ট্যান্ডিচালককে নারায়ণের ঠিকানা বললাম। রাস্তায় অজয়ের কাছ থেকে একটা মেসেজ এল। ও গান্ধীনগরেই আছে, আমি কাছাকাছি আছি কি না জানতে চাইছে। নারায়ণের স্ত্রী আমাকে স্বাগত জানালেন। ভদ্রমহিলার স্বভাব খুব মিষ্টি। একটা নামকরা দোকান থেকে দু'-একদিন আগে কেনা নিমকিগুলো আমাকে বসে থেকে খাওয়ালেন। বললেন মি. নারায়ণ তৈরি হচ্ছেন—মি. নারায়ণের বয়স এখন সস্তর পেরিয়েছে। দু'কাপ চা খেতে খেতে আমার পারিবারিক জীবন, কানপুরে আমাদের আদি বাড়ি এবং আমি কবে বিয়ে করছি ইত্যাদি নিয়ে গল্প হল। সরল সাদাসিধে মধ্যবিত্ত একজন শিক্ষিতা মহিলা, শান্তিতে ঘরোয়া জীবন কাটাচ্ছেন, তাঁর মেয়েরা বিদেশে থাকে। দুই মেয়ের ছবি দেখালেন আমাকে, বললেন আমি পরের বার এলে তাঁদের বিয়ের ছবির অ্যালবাম দেখাবেন।

আন্তরিক সুরে 'হ্যালো' বলে ঘরে ঢুকলেন অশোক নারায়ণ। তাঁর স্ত্রী আমার সঙ্গে যথেষ্ট আতিথেয়তা করেছেন কি না খোঁজ নিলেন। অশোকজির যথেষ্ট বয়স হয়েছে, হয়তো আমার বাবার থেকেও বড়ো। আধ্যাত্মিক মনের মানুষ, 'নিজে বাঁচো, অন্যকে বাঁচতে দাও' নীতিতে বিশ্বাসী। সাহিত্য ও পুরাণে তাঁর জ্ঞান দেখে বিস্মিত হয়ে গেলাম। তিনি একজন কবিও বটে। উর্দু কবিতা ভালোবাসেন। দুটো কবিতার বইও লিখেছেন।

আমি একজন উর্দু লেখকের মেয়ে যিনি তাঁর কাজের জন্য প্রচুর সম্মান পেয়েছেন, নিজেদের বাড়িতে মেহফিল আর মুশায়েরার আসর দেখতে দেখতেই বেড়ে উঠেছি। উর্দু কবিতা আবৃত্তি করে অশোক নারায়ণের কথার উত্তর দিতে ইচ্ছে হচ্ছিল, কিন্তু নিজেকে সামলাতে হল। মৈথিলী একজন রক্ষণশীল সংস্কৃত শিক্ষকের মেয়ে, বিদেশে বড়ো হয়েছে। তাছাড়া সম্প্রদায় হিসেবে মুসলিমদের খুব-একটা পছন্দও করে না মৈথিলী।

কিন্তু গুজরাত দাঙ্গার সঙ্গে জড়িত কর্মকর্তাদের মধ্যে যে-গোঁড়ামি ছিল, নারায়ণের মধ্যে তা একেবারেই ছিল না। ধর্মের বিষয়ে অত্যন্ত উদার মনের মানুষ।

আমি ওঁকে বলেছিলাম যে আমি প্রায়ই উৎকণ্ঠায় ভুগি, তাই সেদিন রাতে মেল করে আধ্যাত্মিকতা সংক্রান্ত একটা ই-বুক আমাকে পাঠিয়ে দেন তিনি। তাঁর মধ্যে এমন একজন মানুষকে দেখেছিলাম যিনি অন্য মানুষদের, অন্য সংস্কৃতি ও ধর্মকে শ্রদ্ধা করেন। এর ফলে গুজরাত দাঙ্গা এবং সাজানো সংঘর্ষ সম্বন্ধে তাঁর কাছ থেকে তথ্য আদায় করা সম্বন্ধে আরও আশাবাদী হয়ে উঠেছিলাম আমি। এবং পরে তা করতে পেরেওছিলাম। তিনি আমাকে বলেছিলেন গুজরাতের হোম সেক্রেটারি হিসেবে তিনি স্পষ্ট জানিয়ে দিয়েছিলেন কোনো রাজনৈতিক মিছিল করার অনুমতি দেওয়া হবে না, এমনকী প্রবীণ তোগাড়িয়ার পরিকল্পিত মিছিলকেও নয়। তিনি আরও বলেছিলেন যে, গুজরাতের অন্যতম একজন শ্রেষ্ঠ অফিসার রাহুল শর্মাকে সাসপেন্ড করার বিরুদ্ধে ছিলেন তিনি—দাঙ্গার ঠিক পরেই নরেন্দ্র মোদির নেতৃত্বাধীন রাজ্য সরকার সাসপেন্ড করেছিল রাহুল শর্মাকে।

নারায়ণের সঙ্গে মোট চারদিন কথা হয়েছিল আমার। বেশিরভাগ সময় চা খেতে খেতে কথা হত, একদিন তাঁর স্ত্রীর বানানো দুপুরের খাবার খেতে খেতে কথা হয়েছিল। ওঁরা যেদিন আমাকে মধ্যাহ্নভোজ খেতে ডাকেন সেদিন কিছুটা বিপর্যস্ত হয়ে পড়েছিলাম আমি। আমাকে নিজেদের মেয়ে বলেই মনে করতে শুরু করেছিলেন ওঁরা, প্রায়ই বলতেন বাড়িতে ওঁদের মেয়েদের না-থাকার অভাবটা পূরণ করে দিয়েছি আমি। নরেন্দ্র মোদির নেতৃত্বাধীন রাজ্য প্রশাসন গুজরাত দাঙ্গায় নীরব উৎসাহ জুগিয়েছিল এবং আত্মপ্রত্যয়ের অভাবে সর্বাঙ্গিকভাবে তার বিরুদ্ধে দাঁড়াতে পারেননি অশোক নারায়ণ—কথাগুলো শুনতে শুনতে বুকের গভীরে কান্না ঝরে পড়ত। না, কথাগুলো আমার সিদ্ধান্ত নয়, অশোক নারায়ণ নিজেই নানাভাবে কথাগুলো বলেছিলেন।

যেদিন আমাকে ওঁরা মধ্যাহ্নভোজ খেতে বলেন, সেদিন ওঁদের যথেষ্ট ছবি তোলার জন্য দু'ঘণ্টা সময় চেয়ে নিই। প্রিয় নীল কুর্তটা পরলাম, ওপরে একটা শাল, হাতে ঘড়ি—ঘড়িতে লাগানো ক্যামেরাটা চালু হলেই একটা হালকা ফ্লুরোসেন্ট আলো জ্বলে ওঠে। ডায়েরিটাও সঙ্গে নিলাম, তাতেও একটা ক্যামেরা লাগানো আছে। এইসব মিটিংয়ের ক্ষেত্রে কোনও ঝুঁকি নেওয়া যায় না বলে একাধিক ক্যামেরা রাখতে হয়।

পৌছে দেখলাম খাবার তৈরি। সেইদিনই তাঁর সবচেয়ে গুরুত্বপূর্ণ দায়িত্ব অর্থাৎ গুজরাতের হোম সেক্রেটারি হিসেবে তাঁর কাজকর্ম নিয়ে কথা বলতে শুরু করি। পরিবেশটা একেবারে উপযুক্ত ছিল। খেতে খেতে অন্য নানান হালকা আলোচনার মতো করেই তুললাম প্রসঙ্গটা। নিঃসঙ্কোচে কথা বলে চললেন নারায়ণ।

মধ্যাহ্নভোজের পর যখন চা এল, ততক্ষণে আমরা দাঙ্গার সময় কীভাবে কাজ করেছিলেন নরেন্দ্র মোদি, সেই প্রসঙ্গে এসে পৌঁছেছি। আমি বললাম, ‘দেখুন মি. নারায়ণ, গত এক সপ্তাহ ধরে আমি আপনার ব্যাপারে গুগল সার্চ করেছি। তাতে দেখেছি গুজরাত দাঙ্গা, নরেন্দ্র মোদি, বিভিন্ন কমিশন ইত্যাদি সংক্রান্ত নানান লিংকে আপনার নামটা চলে আসছে। ব্যাপারটা খুব বিভ্রান্তিকর লাগছে আমার। গুজরাত দাঙ্গার সময় এত বিতর্কিত যে-মানুষটা প্রায় অন্যায়ের পক্ষেই ছিলেন, তাঁর সঙ্গে কাজ করাটা আপনার পক্ষেও নিশ্চয়ই খুব কঠিন ছিল। আপনার মতন এত আদর্শবাদী, এত মানবিক একজন মানুষকে কত কঠিন পরিস্থিতির মধ্যে দিয়ে যেতে হয়েছে, আমি তো ভাবতেও পারি না।’

অতঃপর শুরু হল কথোপকথন:

প্র: (দাঙ্গা নিয়ন্ত্রণ করার সময়) মুখ্যমন্ত্রী যখন আপনাদের ধীরে চলার নির্দেশ দেন, তখন নিশ্চয়ই আপনার খুব খারাপ লেগেছিল?

উ: উনি নিজে বলতেন না। লিখিতভাবেও কোনো নির্দেশ দিতেন না। ওঁর লোকজনেরা ছিল, তাদের কাছ থেকে নির্দেশ আসত বিশ্ব হিন্দু পরিষদের কাছে, তারপর তাদের কাছ থেকে নানান সূত্রে নির্দেশ চলে যেত নীচুতলার পুলিশ ইনস্পেক্টরদের কাছে।

প্র: তখন আপনারা অসহায় হয়ে পড়লেন?

উ: একেবারেই তাই। আমরা বলতাম, ‘আহ, কেন এমনটা ঘটল’, কিন্তু ততক্ষণে যা হওয়ার হয়ে যেত।

প্র: তাহলে তদন্ত কমিশন কোনো প্রমাণই পাবে না?

উ: অনেক সময় মন্ত্রীরা রাস্তায় দাঁড়িয়ে মানুষকে খ্যাপাতেন। আমি ওঁর (মুখ্যমন্ত্রীর) ঘরে বসে থাকার সময় একবার এরকম একটা ঘটনা ঘটেছিল। একটা ফোন এল। আমি ওঁকে বললাম, একজন মন্ত্রী এ-রকম কাজ করছেন। তখন উনি (তাঁকে) ডেকে পাঠালেন। অন্তত সেইবার তিনি (মোদি) ডেকে পাঠিয়েছিলেন (একজনকে)।

প্র: তিনি কি বিজেপির মন্ত্রী ছিলেন?

উ: হ্যাঁ হ্যাঁ, ওঁর নিজেরই দলের মন্ত্রী।

প্র: আচ্ছা, মায়া কোদনানি নামেও তো একজন ছিলেন। শুনেছি তিনি প্রচণ্ড সরকারবিরোধী হয়ে উঠেছিলেন?

উ: হ্যাঁ, ঠিক।

প্র: গোটা ব্যাপারটা কি ক্ষিপ্ততার রূপ নিয়েছিল?

উ: তাহলে তোমাকে নিজের অভিজ্ঞতা থেকে কিছু বলি। একজন মুসলিম সিভিল সার্ভিস অফিসারের সঙ্গে পরিচয় ছিল আমার, একজন অ্যাডমিনিস্ট্রেটিভ অফিসার। তিনি আমাকে ফোন করে বললেন—স্যর, আমাকে বাঁচান, আমার বাড়ি ঘিরে ফেলেছে ওরা। আমি পুলিশ কমিশনারকে ফোন করলাম... তিনি কিছু করেছিলেন কিনা জানি না, তবু ওই মানুষটা বেঁচে গিয়েছিলেন। পরের দিন অফিসারটি আমাকে ফোন করে বলেন—স্যর, গতকাল আমি কোনোমতে বেঁচে গেছি, তবে আজ আর বাঁচব বলে মনে হচ্ছে না।

তখন আবার কমিশনারকে ফোন করে ওঁকে রক্ষা করতে বললাম। পনেরো দিন পর অফিসারটি আমার কেবিনে এসে বললেন—স্যর, আবারও সেই একই ব্যাপার। মহল্লায় হিন্দুরা সংখ্যাগুরু, প্রচুর মুসলিমকে খুন করা হয়েছে। তিনি আমাকে বললেন, ‘আপনি ফোন করার পর পুলিশ আসে। বাইরে একজন মন্ত্রী নেতৃত্বে একদল লোক দাঁড়িয়ে ছিল। পুলিশ অফিসার মন্ত্রীকে স্যালুট করলেন। মন্ত্রী পুলিশ অফিসারকে দেখে বললেন, সব ঠিক আছে। পরে একজন পুলিশ অফিসার আমাকে চিনতে পারেন এবং বাঁচিয়ে দেন।’

প্র: ওই মন্ত্রীটি কি এখন জেলে আছেন?

উ: ওরা সবাই বাইরে আছে। কিন্তু কাউকে-না-কাউকে তো কাজটা করতে হত। কেউ কোনো সাক্ষ্যপ্রমাণ না দিলে তো কাউকে গ্রেপ্তার করা যায় না।

প্র: প্রমাণ দেওয়ার সাহস কারুর ছিল না?

উ: প্রমাণ দেওয়ার সাহস কারুর ছিল না।

প্র: মন্ত্রীদের বিরুদ্ধে কে ব্যবস্থা নেবে?

উ: দ্যাখো, হোম সেক্রেটারি হিসেবে আমার মেয়াদ শেষ হওয়ার পর ডিজিটাল কমিশনার হই আমি। তুমি তো জানো প্রত্যেক রাজ্যে লোকায়ুক্ত আছে—যারা মন্ত্রীদের কাজকর্মের ওপর নজর রাখে। তো একদিন আমি গেলাম। সত্যি বলতে কী, এসি কামরৌ মেনে মক্ষিয়া নেহি হোতা, নইলে হয়তো বলতাম যে উয়ো মক্ষিয়া মার রহে থে।

আমি বললাম—খবরটবর কী?

ওরা বলল—স্যর, আমরা কী করব? মন্ত্রীদের বিরুদ্ধে কেউ কোনো অভিযোগই করছে না। যেখানে ঘুষ নেওয়া বা দুর্নীতির মতো ব্যাপারেই

মন্ত্রীদের বিরুদ্ধে কিছু বলতে চায় না লোকেরা, সেখানে সাম্প্রদায়িক দাঙ্গায় যুক্ত মন্ত্রীদের বিরুদ্ধে তারা মুখ খুলবে কী করে? কিসকি শামাত আয়ি শ্যায়।

ওরা নিজে থেকে এগিয়ে এলে তবেই হতে পারে। ওরা খুব চালাক। ফোন করে অফিসারদের বলত, 'ওই এলাকাটার দিকে নজর রাখুন।'

সাধারণ লোকে ভাববে এর মানে হল, 'নজর রাখুন যেন ওই এলাকায় দাঙ্গা না হয়', কিন্তু আসল মানে হল, 'নজর রাখুন যেন ওই এলাকায় দাঙ্গা হয়।'

ওরা নিজেরা কিছু করে না, ওদের বহু বহু এজেন্ট আছে।

আরও দ্যাখো, এফআইআর করা হয়েছে জনতার নামে। জনতাকে প্রেপ্তার করা কি সম্ভব?

প্র: দাঙ্গার তদন্ত করার জন্য গঠিত কমিশনগুলো কিছু করে উঠতে পারেনি?

উ: নানাবতী কমিশন গঠন করা হয়েছিল, এখনও কিছু পাওয়া যায়নি, কমিশন এখনও পর্যন্ত কোনো রিপোর্ট দিতে পারেনি।

হোম সেক্রেটারি থাকার সময় আমি নির্দেশ দিয়েছিলাম, লিখিত নির্দেশ না দিলে কোনো কিছুই করা যাবে না। যখন বন্ড ডাকা হল, তখন চিফ সেক্রেটারি সুব্বারাও আমাকে ডেকে পাঠিয়ে বললেন, ভিএইচপি নেতা প্রবীণ তোগাড়িয়া একটা মিছিল করতে চান, এ ব্যাপারে আপনি কী বলেন। আমি বললাম, স্যর, এ-রকম কোনো অনুমতি দেওয়া যাবে না, কারণ তাহলে পরিস্থিতি হাতের বাইরে চলে যাবে। কথাটা মুখ্যমন্ত্রীর কানে যায়। তিনি বললেন, এ-কথা আপনি কী করে বললেন? ওদের অনুমতি দিতেই হবে। আমি বললাম, বেশ, তাহলে আমাকে লিখিত নির্দেশ দিন। উনি (মোদি) শুধু আমার দিকে তাকিয়ে রইলেন।

গুজরাতে হিন্দুত্বের উত্থানের ক্ষেত্রে নরেন্দ্র মোদি এবং প্রবীণ তোগাড়িয়ার নাম একসময় সমার্থক ছিল। নরেন্দ্র মোদি (৬৪) এবং ড. প্রবীণ তোগাড়িয়া (৫৮) একসঙ্গে রাজ্যের আরএসএসের শাখাগুলিতে যেতেন। এ ব্যাপারে বহুশ্রুত একটা ঘটনা হল—এই দু'জন একবার সন্ধ্যার মতাদর্শ প্রচারের জন্য মোটরসাইকেল বা স্কুটারে করে সারা গুজরাত ঘুরে বেড়িয়েছিলেন। তোগাড়িয়া সবসময় বাইকটা চালাতেন আর মোদি পিছনে বসতেন। তোগাড়িয়া একজন ক্যানসার সার্জেন, ১৯৮৩ সালে বিশ্ব হিন্দু পরিষদে যোগ দেন তিনি। আর পূর্ণ সময়ের প্রচারক মোদি বিজেপিতে যোগ দেন ১৯৮৪ সালে। কেশুভাই প্যাটেল যখন মুখ্যমন্ত্রী ছিলেন,



তখন ঐরা দু'জনেই কোর কমিটিতে ছিলেন এবং এই কমিটিই সরকার পরিচালনা সংক্রান্ত যাবতীয় গুরুত্বপূর্ণ সিদ্ধান্ত গ্রহণ করত। শংকরসিং বাঘেলা যখন কেশুভাইয়ের বিরুদ্ধে বিদ্রোহ করেন এবং তোগাড়িয়াকে জেলে পাঠান, তখন মোদি তাঁর পাশে দাঁড়ান।

১৯৯৫ থেকে ২০০২ সাল পর্যন্ত রাজ্য থেকে প্রায় নির্বাসিত ছিলেন মোদি, গুজরাতে সম্পূর্ণ অনাস্থাভাজন হয়ে উঠেছিলেন তিনি। তখন তিনি অধিকাংশ সময়টা কাটাতেন বিজেপি অফিসের বদলে বিশ্ব হিন্দু পরিষদের অফিসে—বিজেপি অফিসে তাঁকে আর কেউ পছন্দ করত না। একটা রিপোর্টে<sup>১০</sup> বলা হয়েছে, ২০০১ সালের অক্টোবর মাসে মুখ্যমন্ত্রী হিসেবে মোদিকে গুজরাতে নিয়ে আসার জন্য তোগাড়িয়াকে রাজি করান আদবানি। এই পরিবর্তনটা মেনে নেন তোগাড়িয়া এবং নিজের ডান হাত গোরধন জাদাফিয়াকে মোদির মন্ত্রীসভায় অভ্যন্তরীণ বিষয়ক মন্ত্রী হিসেবে নিযুক্ত করেন। গৈরিকীকৃত পুলিশ অফিসারদের কোথায় কোথায় পোস্টিং দেওয়া হবে, সে ব্যাপারে তোগাড়িয়ার মতামত অত্যন্ত গুরুত্বপূর্ণ ছিল। গোধরার ঘটনার পর ২০০২ সালের ফেব্রুয়ারি-মার্চ মাসে বিশ্ব হিন্দু পরিষদ ও বজরং দলের কর্মীরা যখন সারা রাজ্য জুড়ে সন্ত্রাস সৃষ্টি করে, তখন এইসব পুলিশ অফিসারদের মধ্যে অনেকের ভূমিকাই অত্যন্ত সন্দেহজনক ছিল।

সাম্প্রতিক অতীতে হার্দিক প্যাটেল নামক প্যাটেল সম্প্রদায়ের ২১ বছর বয়সী একজন ত্রাণকর্তা সংরক্ষণের প্রশ্নে সারা রাজ্য অচল করে দেন। খাপ থেকে তরোয়াল বার করে একজন রিপোর্টারকে হার্দিক বলেন, আজ পর্যন্ত তিনি কতজনের হাত কেটে নিয়েছেন রিপোর্টারটি তা জানেন কিনা। অনেকের ধারণা হার্দিককে সৃষ্টি করেছেন কেশুভাই প্যাটেল আর প্রবীণ তোগাড়িয়া, যাদের দু'জনকে পরে গুজরাতে প্রায় অপ্রাসঙ্গিক করে দেন মোদি। শোনা যায়<sup>১১</sup> গুজরাতে বর্তমান মুখ্যমন্ত্রী এবং মোদির ঘনিষ্ঠ সহযোগী আনন্দীবেনকে উৎখাত করার জন্যই হার্দিককে খাড়া করা হয়েছিল। আনন্দীবেন নিজেও একজন প্যাটেল। মোদি গুজরাতে প্রবেশ করার আগে কেশুভাই যে-অবস্থায় ছিলেন, আনন্দীবেন-ও এখন ঠিক সেই অবস্থায় পড়েছেন।

২০০২ সালের গুজরাত দাঙ্গা ও তার পরবর্তী সময়ে হিন্দুদের ক্রমাগত উস্কানি দিয়েছেন প্রবীণ তোগাড়িয়া, ওদিকে হত্যার জন্য উন্মত্তভাবে ছুটে বেড়িয়েছে বিশ্ব হিন্দু পরিষদের সদস্যরা। গুজরাতে প্রদত্ত এক বক্তৃতায়<sup>১২</sup> তোগাড়িয়া বলেন:

এই দেশ গান্ধীকে অনুসরণ করে বলেই গোধরায় সন্ত্রাস সৃষ্টি করা সম্ভব হয়েছিল। ২৮শে ফেব্রুয়ারি আমরা গান্ধীকে তালাবদ্ধ করে দিয়েছি। (মুসলিমরা) নিজেদের শোধরাও, নইলে আমরা গান্ধীকে চিরদিনের মতো ডুলে যাব। যতদিন আমরা গান্ধীর অহিংসার নীতি মেনে চলব, যতদিন মুসলিমদের কাছে নতজানু হয়ে থাকব, ততদিন সন্ত্রাসবাদকে দূর করা যাবে না। ভাইসব, গান্ধীকে আমাদের ত্যাগ করতে হবে। আপনারা রামায়ণের গল্প জানেন, গোধরার ঘটনার সঙ্গে তার তুলনা করা যায়। সকাল সাতটা পঁয়তাল্লিশ মিনিটে পুড়ে যাওয়া এস-৬ কোচটা হনুমানজির ল্যাঞ্জে আগুন লাগিয়ে দিয়েছিল।

শ্রোতারা হাততালি দিল, ধ্বনি তুলল ‘জয় শ্রীরাম’। তারপর সেই রাতে জড়ো হওয়া হাজার হাজার মানুষের উদ্দেশ্যে তিনি বললেন:

হনুমানের ল্যাঞ্জে আগুন দিয়েছিল কে? বাবণ। হনুমানজি একটু বেড়াতে বেরিয়েছিলেন, আমরা শুনেছি তিনি গোধরায় এসেছিলেন (জনতার হাসি ও উল্লাসধ্বনি)। হনুমানজি হালোল, কালোল, সর্দারপুরায় এসেছিলেন এবং কর্ণাবতীতে (আমেদাবাদ) রয়ে গেছেন, সেখান থেকে আর ফিরে যেতে চাননি।

অর্থটা পরিষ্কার। বাবণ বলতে মুসলিমদের বোঝানো হয়েছে। গুজরাতে মুসলিমদের হত্যা করার রণচক্রার ছিল এটা। তোগাড়িয়া যখন কঠিন কাজটা করে চলেছিলেন, মোদি তখন অধিকাংশ হিন্দুদের কাছে আরও বেশি করে ‘হিন্দু হৃদয়সম্রাট’ হয়ে উঠছিলেন এবং এইসব হিন্দুদের সারাক্ষণ মনে করিয়ে দেওয়া হচ্ছিল যে মুসলিমরা তাদের শেষ করে দিতে চায়। তবে মোদি মুখ্যমন্ত্রী হওয়ার কয়েকদিনের মধ্যেই দু’জনের এই অন্তরঙ্গতার অবসান ঘটে। দু’জনের সম্পর্কে চিড় ধরে। টাইমস অফ ইন্ডিয়ার একটি প্রতিবেদনে বিষয়টা চমৎকারভাবে ফুটে উঠেছে:

২০০২ সালের ডিসেম্বর মাসের বিধানসভা নির্বাচনে একটি হেলিকপ্টারে করে প্রায় দু’সপ্তাহ একটানা ঘুরে বেড়িয়ে বিজেপি-র সমর্থনে ১০০টিরও বেশি জমায়েতে ভাষণ দেন তোগাড়িয়া। নির্বাচনে মোদির জয়লাভের পর ছবিটা পালটে যায়। জাদাফিয়াকে নিজের মন্ত্রীসভা থেকে সরিয়ে দেন মোদি। আসলে এই পদক্ষেপের সাহায্যে তোগাড়িয়াকে বার্তা দেওয়া হয় যে সরকার পরিচালনায় তাঁর হস্তক্ষেপ আর বরদাস্ত করা হবে না। তোগাড়িয়া এবং সংঘ পরিবারের অন্যান্য সংগঠনের সঙ্গে আলোচনার প্রক্রিয়া বন্ধ করে দেওয়া হয়।

অশোক নারায়ণের সঙ্গে দেখা করে গুজরাত দাঙ্গা সম্বন্ধে তাঁর বক্তব্য টেপ করার চেষ্টা করার দিনকয়েকের মধ্যেই তাঁকে জানালাম, দাঙ্গার সময় থেকে তাঁর বন্ধু ও বিশ্বস্ত সঙ্গী মি. চক্রবর্তীর সঙ্গে দেখা করতে চাই আমি, যিনি সেইসময় গুজরাত পুলিশের ডিজি ছিলেন। নারায়ণ ও তাঁর স্ত্রী যখন বলছিলেন সেই ভয়ংকর দিনগুলোতে নারায়ণের একমাত্র বন্ধু চক্রবর্তী কীভাবে তাঁর জীবনকে কিছুটা সহনীয় করে তুলেছিলেন, তখনই তাঁর ভূমিকা সম্বন্ধে জানার কৌতূহল হয় আমার। এটা সেই সময়ের কথা যখন অধিকাংশ পুলিশকর্তাই মোদি প্রশাসনের কাছে নিজেদের ন্যায়পরায়ণতা বিকিয়ে দিয়েছিলেন। চক্রবর্তীর সঙ্গে কথোপকথনের কথা পরবর্তী পরিচ্ছেদে বলা হবে, কিন্তু অশোক নারায়ণের সঙ্গে কথাবার্তার বাকি অংশগুলো এখানেই পাঠককে জানানো দরকার। ইতিমধ্যে চক্রবর্তীর সঙ্গে মুম্বইতে দেখা করেছিলাম, তাঁর সঙ্গে প্রথম মিটিংটাও সেরে ফেলেছিলাম, ফলে নারায়ণের সঙ্গে গুজরাত দাঙ্গা এবং অন্যান্য অফিসারদের প্রসঙ্গে আলোচনা করা অনেক সহজ হয়ে উঠেছিল, সন্দেহ জাগার সম্ভাবনাও কমে গিয়েছিল।

প্র: চক্রবর্তী কি সত্যিই খুব বিতর্কিত ব্যক্তি?

উ: উনি পুলিশের বড়োকর্তা ছিলেন, ফলে যা-কিছু ঘটেছে তার দায় তো ওঁর আর হোম ডিপার্টমেন্টের ওপরেই এসে পড়বে। এমনকী হিউম্যান রাইটস ডিপার্টমেন্টও এটাকে একটা সাংবিধানিক আনুকূল্য বলেছিল, ফলে আমরা সকলেই এর আওতায় পড়ে যাই। সম্ভাব্য ভাট আইবি-তে ছিলেন। চক্রবর্তী তখন ডিজি ছিলেন।

প্র: আপনি কি ওই মিটিংটায় ছিলেন না?

উ: কোন মিটিং?

প্র: শুনেছি অত্যন্ত বিতর্কিত একটা মিটিংয়ে সব অফিসার আর আমলাদের (দাঙ্গা থামানোর ব্যাপারে) ধীরে চলার নির্দেশ দিয়েছিলেন মুখ্যমন্ত্রী।

উ: হ্যাঁ হ্যাঁ, ওই মিটিংয়ে আমি ছিলাম। তোমাকে বলেছি তো।

প্র: সিট আপনাকে ডেকে পাঠায়নি?

উ: হ্যাঁ, ডেকে পাঠিয়ে করা জেরা করেছিল।

সেইজন্মেই চক্রবর্তী বলেছিলেন যে ওই মিটিংটা সকলকে নিষ্ক্রিয় করে দিয়েছিল। চক্রবর্তীও মিটিংয়ে ছিলেন।

প্র: চক্রবর্তী বলেছেন, পি.সি. পান্ডের মতো মুখ্যমন্ত্রীর ঘনিষ্ঠ কিছু অফিসার রেহাই পেয়ে গেছেন।

উ: না, তবে পরে সিট-এর তদন্তের ফলে পি.সি. পাণ্ডে বিতর্কিত হয়ে ওঠেন।  
মানে তিনিও বিতর্কিত হয়ে ওঠেন।

প্র: কিন্তু শুনেছি তিনি নাকি মুখ্যমন্ত্রীর খুব কাছের লোক?

উ: সেটা সত্যি, তবু এমনটাই ঘটেছিল। শাসক পার্টির অনুগত হয়ে উঠে  
পারলে আর কোনো সমস্যা থাকে না।

প্র: উনি কি পুরোপুরি মুখ্যমন্ত্রীর নিজের লোক?

উ: হ্যাঁ, তা না হলে ওঁকেও চক্রবর্তীর মতো ছুঁড়ে ফেলে দেওয়া হত।

যেমন আমাকে টপকে অন্যজনকে এনে আমাকে রিটার্নার করতে  
চেয়েছিল ওরা—আমার জুনিয়রকে চিফ সেক্রেটারি করতে চেয়েছিল।

প্র: কী বিস্তী।

উ: তখন আমাকে ভিজিল্যান্স কমিশনার করে দেওয়া হয়।

(ওঁর স্ত্রী বললেন) শুধু ওঁকেই নয়, আরও তিনজন অফিসারকে টপকে  
অন্যদের উঁচু পদে তুলে দেওয়া হয়েছিল।

প্র: যে-শ্রীকুমারের কথা আপনি বলেছিলেন, তাঁর মতো?

উ: হ্যাঁ। তোমার ফিল্মের জন্য অনেক মশলা দিতে পারবেন উনি—কেনি  
ভাগটাই চমক, তবে তার সঙ্গে সত্যও থাকবে। মজার ব্যাপার হল, দাঙ্গার  
সময় একটা সাইড পোস্টিংয়ে ছিলেন শ্রীকুমার, দাঙ্গার পর আমার আর  
চক্রবর্তীর সুপারিশে ওঁকে এখানে যোগ দিতে বলা হয়। শ্রীকুমারকে  
সিবিআই-এর জেরার সামনে পড়তে হয়েছে।

কিন্তু পরে উনি এমন সব ঘটনা সম্বন্ধে কথা বলতে শুরু করেন যে-সব  
ঘটনার কথা উনি ব্যক্তিগতভাবে জানতেন না, ফলে ওঁকে টপকে  
অন্যজনকে ওঁর পদে বসিয়ে দেওয়া হয়। আসলে মুখ্যমন্ত্রী ওঁকে সাঙ্গপেট  
করতেই চেয়েছিলেন। আমরা বারণ করি। মনে হচ্ছিল উনি কেন  
সংবাদমাধ্যমের জন্যই কাজ করছেন। অনেক গোপন খবর  
সংবাদমাধ্যমকে জানিয়ে দিতেন।

প্র: কিন্তু মুখ্যমন্ত্রীর এত সমালোচনা করা হল কেন? উনি বিজেপিতে আছেন  
বলে?

উ: না, দাঙ্গার সময় উনি বিশ্ব হিন্দু পরিষদকে সমর্থন করেছিলেন বলে।  
হিন্দু ভোট পাওয়ার জন্যই এটা করেছিলেন উনি এবং তা পেয়েও  
ছিলেন। যা করতে চেয়েছিলেন তা-ই করেছিলেন উনি, আর তার ফল  
তো আমরা দেখেইছি।

প্র: কিন্তু তিনি লোকেদের ধীরে চলতে বলেছিলেন ?

উ: ওই মিটিংয়ে ও-কথাটা বলা ঠর উচিত হয়নি। কথাটা শুধু ঠর নিজের লোকেদেরই বলতে পারতেন। ডিএইচপি-কে বলতে পারতেন, তারপর ট্যান্ডনের মতো অফিসার আর অন্য অফিসারদের, এবং ডিএইচপি-কে। যে-কোনো অফিসারই সরকারি নির্দেশ মানতে বাধ্য।

প্র: চক্রবর্তী কি সরকারি নির্দেশ মানেননি ?

উ: আমরা দু'জনই শুধু মানিনি। আমরা আমাদের কাজ করেছিলাম। আমি ওদের বলেছিলাম, চাকরিতে যোগ দিয়েছিলাম মানুষের সেবা করার জন্য, শাসক দলের সেবা করার জন্য নয়।

প্র: অন্যরা এমনটা করলেন না কেন ?

উ: কারণ ওদের নানান ধান্দা ছিল, সমঝোতা করতেই হত।

চক্রবর্তীর মতো লোকেদের কথাটা একবার ভেবে দ্যাখো। ওরা প্রমোশন পায়নি, ওদের বিদেশে পাঠানো হয়নি, অথচ নিজের বিবেক যেমনটা বলেছিল তেমনভাবেই কাজ করেছিল চক্রবর্তী।

প্র: এই বিতর্কিত মিটিংটার কথা বাইরের লোকেরা কী করে জানল ?

উ: মন্ত্রী হরেন পাণ্ডিয়া-ও মিটিংয়ে ছিলেন, উনিই প্রথম সংবাদমাধ্যমের কাছে মিটিংটার কথা ফাঁস করেন।

প্র: মিটিংয়ে কারা কারা ছিলেন ?

উ: সিএম, এসিএস, হোম সেক্রেটারি, ডিজিপি, অফিসাররা।

উপরোক্ত কথোপকথন থেকে একজন সাধারণ মানুষও বুঝতে পারবেন গুজরাত দাদার রাজ্য প্রশাসন কতখানি জড়িত ছিল। অশোক নারায়ণ আমাকে যা বলেছিলেন তা আমরা অনেকেই জানি, কিন্তু সরকারি মহলের কেউ কথাগুলো এর আগে বলেননি—কথাগুলো বলেছেন এমন একজন মানুষ, গুজরাত দাদার সময় বহুজনের দৃষ্টি যার প্রতি নিবদ্ধ ছিল। গুজরাত দাদা এবং নরেন্দ্র মোদীর ক্ষেত্রে তার তাৎপর্য সম্বন্ধে এই ভূতপূর্ব হোম সেক্রেটারি যা বলেছেন তার সমাজতাত্ত্বিক ও রাজনৈতিক পরিপ্রেক্ষিতিটি আরও বেশি অর্থবহ। তথ্যের সঙ্গে গালগল্প মেশানোর চেষ্টা তিনি কখনোই করেননি, যা থেকে বোঝা যায় তিনি সত্যভিত্তিক কথাই বলেছেন। শ্রীকুমার যেভাবে সংবাদমাধ্যমের কাছে নানান ঘটনার ব্যাপারে মুখ খুলেছিলেন, সে সম্বন্ধে নিজের আশঙ্কার কথাও বলেছেন তিনি, কিন্তু কখনোই বলেননি যে মুসলিমদের বিরুদ্ধে অভিযান শুরু নির্দেশ দেন মুখ্যমন্ত্রী। বরং তিনি

এই ইঙ্গিতবহু কথাটি বলেন যে, এইসব নির্দেশ অফিসারদের ব্যক্তিগতভাবে দেওয়া হয়েছিল, যে-অফিসাররা নানারকম সুবিধা পেয়েছেন প্রশাসনের কাছ থেকে।

সামনে বসে এই সুভদ্র, আত্মগরিমাহীন মানুষটির কথা শুনছিলাম। এমন অনেক কথা তিনি আমাকে বলেছিলেন যা নানাবর্তী কমিশনের জেরার সামনেও বলেননি।

উ: বিজেপি-র নির্দেশে ডিএইচপি বন্ড ডাকল আর তা থেকেই গোটা ব্যাপারটার সূত্রপাত হল।

প্র: সেটা সামলানো নিশ্চয়ই আপনাদের পক্ষে খুব কঠিন ছিল?

উ: হ্যাঁ, বিজেপি থেকে নির্দেশ না গেলে সামলানো খুব কঠিন হয়ে যেত।

প্র: মোদির সম্বন্ধে মানুষের কী ধারণা?

উ: ওঁকে ভক্তির চোখে দেখা হয়। গোঁড়া হিন্দুরা মনে করে উনিই পতাকাটা বহন করে নিয়ে চলেছেন।

প্র: ওঁর ভূমিকাটা কি একেবারে পার্টিজান ছিল না?

উ: গোধরার ঘটনার জন্য উনি ক্ষমা চাইতে পারতেন, দাঙ্গার জন্য ক্ষমা চাইতে পারতেন।

প্র: আমি শুনেছি মোদির ভূমিকা সম্পূর্ণ পার্টিজানই ছিল, অর্থাৎ উনি প্ররোচনা দিয়েছেন, যেমন গোধরা থেকে মৃতদেহগুলো নিয়ে আসা, সিদ্ধান্ত নিতে অনর্থক সময় নষ্ট করা।

উ: আমি বিবৃতি দিয়ে বলেছিলাম যে মৃতদেহগুলো আমেদাবাদে নিয়ে আসার সিদ্ধান্তটা ওঁরই ছিল।

প্র: তাহলে তো প্রশাসন নিশ্চয়ই আপনার বিরুদ্ধে চলে গিয়েছিল?

উ: মৃতদেহগুলো আমেদাবাদে আনার ফলেই চারদিকে আগুন জ্বলে উঠেছিল, কিন্তু এ সিদ্ধান্ত উনিই নিয়েছিলেন।

আমাদের কথাবার্তা চলার সময়েই একজন অপ্রত্যাশিত আগন্তুক দেখা করতে এলেন অশোক নারায়ণের সঙ্গে—কৈলাশনাথন, সেইসময় নরেন্দ্র মোদির সবথেকে কাছের মানুষ এবং তাঁর মুখ্য উপদেষ্টা ছিলেন যিনি। মুখ্যমন্ত্রীর দপ্তরে অশোক নারায়ণ খবর পাঠিয়েছিলেন যে হিমাচল প্রদেশের আসন্ন বিধানসভা নির্বাচনে দাঁড়াতে চান তাঁর শ্যালক, সেই সূত্রেই এসেছিলেন কৈলাশনাথন। গুজরাতে আসার আগে হিমাচল প্রদেশের দায়িত্বে ছিলেন মোদি এবং তখনও হিমাচল প্রদেশে যথেষ্ট প্রভাব ছিল তাঁর।

খুব বিড়ম্বনাময় একটা অবস্থা। এইজন্যই কি অফিসাররা সর্বাঙ্গিকভাবে নরেন্দ্র মোদির বিরুদ্ধে যেতে চান না? এই সদাশয় বদান্যতার জন্য? ভাবতে খুব অস্বস্তি হচ্ছিল।

কৈলাশনাথন চলে যাওয়ার পর অশোক নারায়ণের স্ত্রী আমাকে বললেন কত গুরুত্বপূর্ণ ব্যক্তি উনি। আরও বললেন, ফিল্ম তৈরির ব্যাপারে কোনো সমস্যায় পড়লেই যেন ওঁর সাহায্য চাই।

মুখ্য উপদেষ্টা চলে যাওয়ার পর আবার অশোক নারায়ণের সঙ্গে কথাবার্তা শুরু হল।

প্র: আপনার কাজের সবথেকে চ্যালেঞ্জিং বিষয় কোনটা ছিল?

উ: দাঙ্গায় এত মানুষ খুন হয়ে গেল ভেবে সবসময়েই কষ্ট হত। যেমন, অনেক সাংবাদিক প্রশ্ন করতেন আমরা পদত্যাগ করিনি কেন? আমি তাঁদের বলতাম, নিজেকে অপরাধী মনে হলে অবশ্যই পদত্যাগ করতাম।

প্র: কিন্তু তাঁরা তো ভুল কিছু বলেননি, রাজনৈতিকভাবে পরিবর্তনশীল একটা অবস্থার ফাঁদে পড়ে গিয়েছিলেন আপনি...

উ: কোনো রাজ্য সরকারকে এ-রকম দাঙ্গার মুখোমুখি হতে হয়নি। দাঙ্গার (নিয়ন্ত্রণের) জন্য আমাদের মাত্র চার কোম্পানি ছিল। এমনকী সিআরপিএফ-ও যোগ্য নয়, কিন্তু অন্তত একটা টিমকে পেলেও আমাদের উপকার হত। আবার কেন্দ্রেও ছিল বিজেপি সরকার।

প্র: তার মানে মুখ্যমন্ত্রী অনায়াসেই আরও বাহিনী চাইতে পারতেন? কেন্দ্র আর রাজ্য সরকারের মধ্যে তালমিল রেখেই সব কাজ হয়েছে?

উ: তালমিল তো ছিলই। আমাদের মুখ্যমন্ত্রী ইচ্ছে করলে যে-কোনো সময় মি. আদবানির সঙ্গে কথা বলতে পারতেন।

প্র: শুনেছি ওঁরা দু'জন নাকি ভালো বন্ধু?

উ: খুবই ভালো বন্ধু। হ্যাঁ, এটাও একটা ব্যাপার।

প্র: কোনো বাহিনী ছিল না। এটা মুখ্যমন্ত্রীকে জানাননি আপনি?

উ: উনি সবই জানতেন। তোমার কি ধারণা উনি জানতেন না? দ্বিতীয়ত, হিন্দুরা, তাদের আচরণে ভীষণ দুঃখ পেয়েছিলাম আমি... নির্লজ্জভাবে বাড়িঘরে লুণ্ঠপাট চালাচ্ছে, গাড়ি করে এসে লুণ্ঠপাট চালাত ওরা... মানুষ কতটা নীচে নামতে পারে।

প্র: কেন এমন খেপে গেল তারা?

উ: গোধরার ঘটনার জন্য।

- প্র: নিশ্চয়ই খুব ঝামেলা গেছে... একই লোকেদের কাছে রিপোর্ট দেওয়া।
- উ: আমাকে অন্যায় কিছু করতে বলার মতো সাহস ওদের ছিল না।
- প্র: সরকার নিশ্চয়ই আপনার ওপর খেপে গিয়েছিল?
- উ: তা তো গিয়েই ছিল। আমি বলেছিলাম সব নির্দেশ লিখিতভাবে দিতে হবে। নীচের তলার অফিসারদের কথাটা ভাবো। এই ধরনের অপরাধের সঙ্গে যুক্ত রাজনীতিবিদদের গ্রেপ্তার করার অধিকার সবারই আছে, কিন্তু অধিকাংশ জনই রাজনৈতিক চাপে পড়ে সমঝোতা করতে বাধ্য হয়।
- প্র: দাঙ্গার সময় এমনটাই ঘটেছিল?
- উ: হ্যাঁ। এই মোবাইল ফোনের যুগে আর লিখিত নির্দেশ দেওয়ার দরকার হয় না, স্রেফ ফোনে বলে দিলেই হয়ে যায়।
- প্র: মুখ্যমন্ত্রী কি আপনাকে ঘৃণা করতেন?
- উ: ঘৃণা করতেন কিনা ঠিক বলতে পারব না, তবে আমার জায়গায় অন্য কেউ আসুক সেটা যে চাইতেন তাতে কোনো সন্দেহ নেই।
- প্র: সবকিছু এক জায়গায় মিলল কী করে? দাঙ্গাটা বাধল কীভাবে?
- উ: সবটাই বিশ্ব হিন্দু পরিষদের পরিকল্পনা। গোধরার ঘটনা আর এই দাঙ্গা, দুটোই জঘন্য ব্যাপার এবং কোনোটাই ন্যায্য নয়।
- প্র: ট্রেন পোড়ানোর প্রতিক্রিয়াতেই তো দাঙ্গা হয়েছিল।
- উ: ক দিয়ে খ-কে ন্যায্য প্রতিপন্ন করা যায় না।
- প্র: মুখ্যমন্ত্রীর তো পদত্যাগ করা উচিত ছিল—তিনিই যখন মুখ্যমন্ত্রী, তাঁর আমলেই যখন এত কিছু ঘটে গেল।
- উ: একটা সময় মনে হয়েছিল ওঁর পরিবর্তন ঘটেছে—এটা গোয়ার মিটিংয়ের সময়কার কথা। উনি পদত্যাগ করেছিলেন, কিন্তু আদবানির চাপ ছিল—পদত্যাগপত্র গ্রহণ না-করার জন্য বাজপেয়ীকে চাপ দেন আদবানি। তৎকালীন প্রধানমন্ত্রী বাজপেয়ীর কাছে দাঙ্গা সম্বন্ধে অনেক কথা বলেছিলাম আমি। মোদিও সেখানে ছিলেন।
- প্র: মুখ্যমন্ত্রী নিশ্চয়ই তাতে খুব খুশি হননি?
- উ: এটা খুশি-অখুশির বিষয় নয়। যা ঘটেছিল তা-ই বলতে হত আমাকে। তখন দেখেছিলাম মোদির প্রতি এবং তাঁর ভূমিকার প্রতি বাজপেয়ী মোটেই খুশি নন।
- প্র: মোদিও নিশ্চয়ই ধীরে চলেছিলেন? তিনি তো তৎপরতা দেখাতে পারতেন। তিনি রাজনীতি করছিলেন।



উ: তখন পদত্যাগ করলে রাজনীতিগতভাবে ওঁর লাভই হত। এখন উনি সেই ভাবমূর্তিটা ঝেড়ে ফেলার চেষ্টা করছেন।

প্র: উনি তো ধর্মকে কাজে লাগিয়েই ক্ষমতায় এসেছেন। ওঁর কথাবার্তা...

উ: ২০০২ সালে উনি ভোট পেয়েছিলেন দাঙ্গার জন্য... উন্নয়নের ভাবমূর্তি গড়ে তোলার ফলে ২০০৭ সালে আরও বেশি ভোট পাম।

প্র: অন্যরা কেমন ছিলেন? অফিসাররা?

উ: প্রাক্তন সেক্রেটারি হিসেবে খোলাখুলি বলতে পারি—ডিজিপি মানুষ হিসেবে ভালো ছিলেন, কিন্তু কার্যকরী পুলিশ অফিসার হিসেবে উনি খুবই নরম ধাতের। দাঙ্গার সময় রাজনৈতিক হুকুমের কাছে মাথা নোয়াননি উনি, কিন্তু নিজের লোকেদের, পুলিশ অফিসারদের বাগ মানাতে পারেননি। এমনিতে কিন্তু খুব ন্যায়পরায়ণ মানুষ ছিলেন। ধরো অফিসারদের বদলি করার জন্য সরকার চাপ দিল। উনি বলতেন, না, আগে লিখিত নির্দেশ দিন।

প্র: উনি নিশ্চয়ই সরকারের সুনজরে ছিলেন না?

উ: ঠিক। আমার পক্ষে একটা ভালো ব্যাপার ছিল যে দাঙ্গার সময় উনি আমার সঙ্গে ছিলেন, অন্তত একজন পক্ষপাতহীন মানুষ সঙ্গে ছিল। অনেক সাহায্য পেয়েছি ওঁর কাছ থেকে।

বস্তুত মন্ত্রীসভার সব মন্ত্রীরই সব ক্ষমতা থাকে, শুধু কালেক্টর আর ডিএম-দের মতো কিছু বিশেষ ক্ষমতা বাদে অন্য সব ক্ষমতাই ওঁদের থাকে। কিন্তু মন্ত্রীরা কোনো অন্যায় নির্দেশ দিলে তার উত্তরে ভারতের সংবিধান তোমাকে ‘না’ বলার অধিকার দিয়েছে।

প্র: সেই (দাঙ্গার) সময়ে ‘না’ বলার মতো সাহস কি আপনার ছিল?

উ: আমাদের যা বলার ছিল আমরা বলেছিলাম। এ-সব বলার পর এমন কোনো নির্দেশ দেওয়ার সাহস ওঁদের ছিল না, লিখিতভাবে তো নয়ই। আমি বলে দিয়েছিলাম লিখিত নির্দেশ না পেলে কিছু করব না।

প্র: আপনাকে নিশ্চয়ই রাজ্য সরকারের রোষে পড়তে হয়েছিল।

উ: তা হয়েছিল। আমাকে চিফ সেক্রেটারি করা হল না। তবে ইনস্পেক্টর আর দারোগাদের মতো অফিসারদের মুখ্যমন্ত্রী-সহ যে-কোনো মন্ত্রীকে প্রেরণার করার অধিকার আছে, কিন্তু ওরা সরকারের পক্ষেই দাঁড়াল।

প্র: তাহলে এটাই ঘটেছিল?

উ: হ্যাঁ। আর মোবাইল ফোনের এই যুগে শুধু ফোনে কী করতে হবে তা ওঁদের বলে দিলেই চলে। আর অফিসাররা প্রোমোশন নিয়েই বেশি ভাবে। যখন

সেনাবাহিনী এল তখন তাদের অনেক কিছু দরকার ছিল। সত্যি বলতে কী, দাঙ্গা থামানোর জন্য পর্যাপ্ত বাহিনী আমরা পাইনি। সমস্ত বাহিনী অযোধ্যায় ছিল। কেন্দ্রীয় সরকার (তাদেরকে) আমাদের কাছে পাঠায়নি।

প্র: দাঙ্গায় রাজনৈতিক প্রভাব কতটা ছিল?

উ: ওরা সাম্প্রদায়িক মনোভাবে ফুটছিল। ডিএইচপি-র (ডাকা) বন্ধকে সমর্থন করল শাসক দল। এটা একটা গুরুতর সমস্যা ছিল। সিনিয়র পুলিশ অফিসাররা আমাদের বলেছিলেন, বিজেপি-র কাছ থেকে কোনো রাজনৈতিক বার্তা না এলে কিছুই করা যাবে না। কারণ ওঁরা মনে করতেন আমরা মানুষের পক্ষে আছি।

প্র: কিন্তু মোদিকে (মোদির জয়) দেখে তো মনে হয় জনসংযোগের জোরেই উনি জিতেছেন?

উ: একদম ঠিক।

প্র: 'ভাইব্রান্ট গুজরাত' নিয়ে কত হইচই হল ভাবুন।

উ: (ঘাড় নেড়ে সম্মতি জানালেন উনি)।

প্র: কিন্তু ওঁকে এত সমালোচনার মুখে পড়তে হচ্ছে কেন?

উ: উনি ডিএইচপি-কে সমর্থন করেছিলেন বলেই এত সমালোচনা হচ্ছে। ওঁর যা করা দরকার ছিল ঠিক তা-ই করেছিলেন এবং যা চেয়েছিলেন তা-ই পেয়েছেন।

চক্রবর্তীর মতো লোকেরা বাহবা পাননি, পুরস্কার পাননি, (কেননা) নিজেদের বিবেক অনুযায়ী কাজ করেছিলেন তাঁরা।

প্র: সকলে কি সত্যিই চিফ সেক্রেটারি জি. সুব্বারাও-এর প্রশংসা করছে?

উ: তাই নাকি?

প্র: আমি মজা করছিলাম।

উ: দুর্ভাগ্যবশত সুব্বারাও সরকারকে তুষ্ট করতে চাইছিলেন, মুখ্যমন্ত্রীকে তুষ্ট করতে চাইছিলেন, কিন্তু সেটুকুও করে উঠতে পারেননি (হাসি)।

প্র: কেন?

উ: আমি বলতে চাইছি রিটারার করার পরও ওঁকে পুরো পাঁচ বছরের চাকরি দিয়েছিল সরকার।

প্র: আচ্ছা, আমার ফিল্মে দাঙ্গার কথা কতটা রাখব?

উ: দ্যাখো, তাহলে তোমার ফিল্মটা বিতর্কিত হয়ে যাবে, কারণ দাঙ্গার বিষয়টাই তো বিতর্কিত।

- প্র: তাহলে আপনাদের মুখ্যমন্ত্রীকে দাঙ্গা নিয়ে একটা প্রশ্নও করব না?
- উ: যদি করো, তাহলে উনি কথা ঘুরিয়ে দেবেন, তারপর আর কখনো তোমার সঙ্গে দেখা করবেন না।
- প্র: আচ্ছা, ভাটের মতো একজন মানুষ মুখ্যমন্ত্রী আর সরকারের বিরুদ্ধে চলে গেলেন কেন?
- উ: কোনো কারণ নিশ্চয়ই আছে। ওঁর ওপরওয়ালারা নিশ্চয়ই ওঁকে তেমনটাই বলেছিলেন। ওপরওয়ালার নির্দেশমতোই কাজ করেছেন উনি।
- প্র: ওঁর বিশ্বাসযোগ্যতা কতটা?
- উ: উনি একেবারেই বিশ্বাসযোগ্য নন।
- প্র: ও হ্যাঁ, মায়া কোদনানি আমাকে জয়ন্তী রবির কথা বলছিলেন।
- উ: ও, আচ্ছা...
- প্র: শুনে মনে হল উনি থচও সরকারবিরোধী?
- উ: এখন বিরোধী হয়েছেন, আগে ছিলেন না। আগে উনি মুখ্যমন্ত্রীর পক্ষে ছিলেন, সরকারের পক্ষে ছিলেন।
- প্র: ওঁকে বাঁচানোর জন্যে কেউ এগিয়ে আসেননি বলে উনি নাকি খুব হতাশ হয়ে পড়েছিলেন?
- উ: রাজনৈতিক ওপরওয়ালারা কখনো কাউকে বাঁচাতে আসে না।
- প্র: উনি তো বলেছেন যে উনি নাকি সম্পূর্ণ নির্দোষ।
- উ: দাঙ্গার সময় উনি পুরোপুরি আরএসএসের পক্ষে, মুখ্যমন্ত্রীর পক্ষে, ডিএইচপি-র পক্ষে ছিলেন।
- প্র: তার মানে দাঙ্গায় উনি সক্রিয়ভাবে অংশগ্রহণ করেছিলেন?
- উ: হ্যাঁ।
- প্র: রাহুল শর্মা মানুষটা কেমন?
- উ: উনি বিদ্রোহীদের একজন।
- প্র: মানে?
- উ: উনি কাউকে সাহায্য করেননি, শুধু দাঙ্গা থামানোর চেষ্টা করেছিলেন।
- প্র: ওঁকেও কি ছেঁটে ফেলা হয়েছে?
- উ: ওঁকে বদলি করে দেওয়া হয়। ডিজিপি-র সুপারিশ, মি. চক্রবর্তীর সুপারিশ এবং আমি সেই সুপারিশকে সমর্থন করা সত্ত্বেও ওঁকে বদলি করা হয়।
- প্র: শুধুমাত্র উনি মুখ্যমন্ত্রীর বিরুদ্ধে ছিলেন বলে?
- উ: একদম তাই।

অফিসার রাহুল শর্মার কথা এখানে একটু বলা দরকার। দু’-তিনটে সামাজিক অনুষ্ঠানে অলঙ্কণের জন্য তাঁর সঙ্গে দেখা হয়েছিল আমার। নিজের উচ্চশিক্ষিতা ও মর্যাদাসম্পন্ন স্ত্রীকে নিয়ে রাহুল যখন একজন আইনজীবী বন্ধুর সঙ্গে দেখা করতে আসেন, তখন তাঁর সঙ্গে প্রথম দেখা হয় আমার। শর্মাকে খুব স্থিতিশীল মানুষ মনে হয়েছিল আমার। সাংবাদিকদের কাছে নিজের বীরত্বের বড়াই করা তাঁর স্বভাব নয়। তাঁর কাজই তাঁর হয়ে যা বলার বলে দিত। আমি ওখানে যাওয়ার আগে পর্যন্ত নিজের আইনি মামলা নিয়ে মুখ খুলতেন না তিনি। রাজ্য সরকার তখন উঠেপড়ে লেগেছিল তাঁর বিরুদ্ধে—তাঁকে টপকে অন্যজনকে প্রমোশন দেওয়া হয়, বার্ষিক গোপন রিপোর্টে নেতিবাচক মন্তব্য করা হয় তাঁর সম্বন্ধে, দুটি বিভাগীয় চার্জশিটও দাখিল করা হয় তাঁর বিরুদ্ধে। পরবর্তী সময়ে ২০১৫ সালে তাঁর নির্দিষ্ট সময়ের আগেই অবসর নেওয়ার অনুরোধও গ্রহণ করেনি গুজরাত সরকার।

২০১৫ সালের ফেব্রুয়ারি মাসে *ইন্ডিয়ান এক্সপ্রেস*-এর একটি রিপোর্টে তাঁর সম্বন্ধে বলা হয়:

২০০২ সালে গোদরা দাঙ্গার ঘটনায় যে-সব অফিসার রাজ্য সরকারের বিরুদ্ধে দাঁড়িয়েছিলেন, শর্মা তাঁদেরই একজন। নারোডা পাটিয়া, নারোডা গ্রাম ও গুলবার্গ সোসাইটির গণহত্যার তদন্তকারী হিসেবে অনেক মূল্যবান প্রমাণও সংগ্রহ করেন তিনি এবং ২০০২ সালের দাঙ্গার তদন্তে সাহায্য করেন। তিনটি বিষয় নিয়ে সেন্ট্রাল অ্যাডমিনিস্ট্রেটিভ ট্রাইবুনালে আইনি লড়াই চালাচ্ছেন তিনি—বার্ষিক গোপন রিপোর্টে নেতিবাচক মন্তব্য এবং তাঁর বিরুদ্ধে আনীত দুটি বিভাগীয় চার্জশিট। এই অবস্থাতেই তিন মাস আগে অবসরের আবেদন করেন তিনি এবং ২০১৫-র ২৮ ফেব্রুয়ারি নিজের অবসরের দিন ধার্য করেন। তবে যে-তারিখে তিনি অবসর নিতে চেয়েছিলেন, তার মাত্র দু’দিন আগে তাঁর চিঠির উত্তর দেয় রাজ্য সরকার।”

তবে শর্মার সম্বন্ধে সরকারের রোধ বোঝার আগে, তাঁকে হয়রান করার ব্যাপারে সুপ্রিম কোর্ট কর্তৃক নিযুক্ত সিট যা বলেছিল সেটা জানাও জরুরি। ২০০২ সালের দাঙ্গা সম্বন্ধে সিট-এর রিপোর্টের একটি প্রধান বিষয় ছিল এই রিপোর্টের একটি বক্তব্য। রিপোর্টে বলা হয়েছিল, যে-সব পুলিশ অফিসার ২০০২ সালের হিংসা থামানোর চেষ্টা করেছিলেন তাঁদের নানাভাবে হয়রান করেছিল নরেন্দ্র মোদির সরকার, এমনকী দাঙ্গার পরও এই হয়রানি ও নির্যাতন চালিয়ে যাওয়া হয়েছে।

বরিষ্ঠ আইপিএস অফিসার রাজুল শর্মার কাছে একটি নোটিশ পাঠিয়ে গুজরাত সরকার জানতে চায়, কোনো অনুমতি ছাড়া তদন্ত কমিশনের কাছে দাঙ্গার সময় বরিষ্ঠ রাজনীতিবিদ ও আমলাদের ফোন রেকর্ড কীভাবে এবং কেন জমা দিয়েছেন তিনি। দাঙ্গার নব্বই বছর পরে পাঠানো নোটিশে শর্মার কাছে জানতে চাওয়া হয়, কেন তাঁর বিরুদ্ধে কোনো ব্যবস্থা নেওয়া হবে না।

এমন এক সময়ে এই নোটিশ পাঠানো হয় যখন সিট জানিয়েছিল যে দাঙ্গার সময়কার গুরুত্বপূর্ণ মিটিংগুলির কোনো রেকর্ড বা মিনিটস রাখেনি মোদি সরকার।

১৯৯২-এর ব্যাচের আইপিএস অফিসার শর্মা ২০০২-এর এপ্রিল মাসে আমেদাবাদের ডিসিপি (কন্ট্রোল রুম) ছিলেন। নারোডা পাটিয়া ও গুলবার্গ সোসাইটির হিংসাত্মক ঘটনার তদন্ত করার সময় এটি অ্যান্ড টি ও সেলফোর্স মোবাইল সার্ভিস প্রোভাইডারদের কাছ থেকে ওই সময়ে আমেদাবাদে আসা ও আমেদাবাদ থেকে করা যাবতীয় ফোনকলের তথ্য সংগ্রহ করে ক্রাইম ব্রাঞ্চের হাতে তুলে দেন তিনি। বিভিন্ন বরিষ্ঠ মন্ত্রী, পুলিশ অফিসার এবং আরএসএস ও ভিএইচপি সদস্যদের পরস্পরের মধ্যে ফোনে কথোপকথন সম্বলিত এই সিডিগুলি পরবর্তীকালে 'হারিয়ে যায়'। তবে দাঙ্গার তদন্তের জন্য ২০০২-এর মার্চ মাসে গঠিত নানাবতী কমিশনের কাছে সাক্ষ্য দেওয়ার সময় নিজের কাছে রক্ষিত একটি সিডি পেশ করেন শর্মা।”

তেহেলকায় প্রকাশিত একটি রিপোর্টে আমার সহকর্মী অনুমেহা যাদব লিখেছিলেন:

অপরাধীদের গ্রেপ্তার করার ব্যাপারে সবথেকে গুরুত্বপূর্ণ প্রমাণগুলির অন্যতম ছিল এই ফোন রেকর্ডগুলি। এগুলির সাহায্যেই ২০০৯ সালে গুজরাত ভিএইচপি-র সভাপতি জয়দীপ প্যাটেল ও মন্ত্রী মায়া কোদনানিকে গ্রেপ্তার করা এবং তাঁদের আগাম জামিন খারিজ করা হয়। এছাড়া গুলবার্গ সোসাইটিতে কংগ্রেসের ভূতপূর্ব সাংসদ এহসান জাফরি এবং আরও ৩০ জনের হত্যার তদন্তের সহায়ক হয়ে ওঠে এই রেকর্ডগুলি। নারোডা পাটিয়ায় সরকারি হিসেবে ১০৫ জন মুসলিম নিহত হন এবং সেক্ষেত্রেও এই সিডিগুলি অত্যন্ত গুরুত্বপূর্ণ প্রমাণ।

কিন্তু যে-কোনো নিরপেক্ষ তদন্তের প্রচেষ্টাতে ইক্কন জোগানোটা গুজরাতে যেন একটা নিয়মে পরিণত হয়েছে। ২০০৪ সালে ইশরাত জাহানকে এনকাউন্টারে হত্যার তদন্তের জন্য গঠিত অন্য একটি সিট-এর সদস্য আর-একজন সিনিয়র আইপিএস অফিসার সতীশ ভার্মা—শর্মা

নোটিশ পাওয়ার এক সপ্তাহ আগে—জানান যে তদন্তের নানান সূত্র অনুসন্ধানের কাজে তাঁকে বাধা দেওয়া হয়েছিল। নিজেদের রাজনৈতিক ওপরওয়ালাদের সম্মুখ করার জন্য গুজরাতের পুলিশ অফিসাররা এই এনকাউন্টারটি ঘটিয়েছিলেন বলে অভিযোগ এবং এর তদন্তের কাজে নিযুক্ত তিনজন অফিসারের একজন এই ভার্মা। কীভাবে তাঁকে বাধা দেওয়া হয়েছে সে-ব্যাপারে একটি হলফনামাও জমা দেন তিনি।

২৮ জানুয়ারি গুজরাত হাইকোর্টে দাখিল করা ৮০ পৃষ্ঠার ওই হলফনামায় ভার্মা জানান, ২০০৯ সালে গুজরাত সরকার কর্তৃক পূর্বতন একটি সিট বা বিশেষ তদন্তকারী দল কীভাবে বিভিন্ন সুস্পষ্ট ফরেনসিক প্রমাণকে উপেক্ষা করেছিল, যার অন্যতম ছিল ইশরাতের শরীরে বিদ্ধ বুলেটগুলি—সংঘর্ষে যে-সব অস্ত্র ব্যবহার করা হয়েছিল বলে পুলিশ দাবি করেছিল, তার সঙ্গে এই বুলেটগুলি খাপ খায় না। ভার্মা আরও জানান, গুজরাতের জনৈক ক্যাডার অফিসার ও পূর্বতন একটি সিট-এর সদস্য মোহন ঝা এবং দিল্লির জনৈক ক্যাডার অফিসার কানেইল সিং ইচ্ছাকৃতভাবে হাইকোর্টের কাছে একজন প্রধান সাক্ষীর বয়ান প্রত্যাহারের বিষয়টি কোনো মন্তব্য ছাড়াই পেশ করেন, যাতে কোনো সন্দেহের উদ্রেক না হয়। ভার্মা আরও জানিয়েছেন বর্তমানে জেসিপি, ডিটেকশন অফ ক্রাইম ব্রাঞ্চ (ডিসিবি) ঝা কীভাবে গত মাসে স্পেশ্যাল অপারেশন গ্রুপে ২৬ জন পুলিশ অফিসারকে সরাসরি নিজের অধীনে নিয়ে আসার চেষ্টা করেন—তিনি বলেছিলেন ‘ভাইব্র্যান্ট গুজরাত’ সম্মেলনের নিরাপত্তার জন্য এঁদেরকে দরকার। এনকাউন্টারের দিন এই ২৬ জনই ডিসিবি-র সঙ্গে ছিলেন।

‘ভার্মা জানিয়েছেন, সিট কাজ শুরু করার ১৯ দিন পর, ডিসেম্বরে সিট-এর মধ্যে কী চলছে না চলছে সে ব্যাপারে একটি সরকারি নোট রাখতে শুরু করেছিলেন তিনি। এ থেকে বোঝা যায় অনিয়মগুলো লিপিবদ্ধ করে রাখার প্রয়োজন অনুভব করেছিলেন তিনি এবং অনুমান করেছিলেন, নিরপেক্ষ তদন্তের জন্য তাঁর প্রচেষ্টায় বাধা দেওয়া হবে। এ থেকে বোঝা যায় এইসব ভূয়ো সংঘর্ষে হত্যার তদন্তের এই চেষ্টার আসল চেহারাটা ঠিক কেমন’—বলেছেন নামপ্রকাশে অনিচ্ছুক একজন সিনিয়র পুলিশ অফিসার।”

দাঙ্গার পরবর্তী সাজানো এনকাউন্টারগুলি সম্বন্ধে খোলাখুলি কথা বলেছেন অশোক নারায়ণ:

প্র: এনকাউন্টারগুলোর ব্যাপারটা কী?

ডু: এনকাউন্টারগুলো যতটা রাজনৈতিক কারণে ঘটেছে, ততটা ধর্মীয় কারণে ঘটেনি। সোরাবুদ্দিনের এনকাউন্টারের ব্যাপারটা ভেবে দ্যাখো। রাজনৈতিক নেতাদের নির্দেশেই ওকে হত্যা করা হয়। ওই ঘটনার জন্যই অমিত শাহকে জেলে যেতে হয়েছে।

এটা সর্বত্রই ঘটছে। এখানেও ঘটছে। সাজানো এনকাউন্টারের ঘটনাগুলো হয় রাজনৈতিক উদ্দেশ্যপ্রণোদিত, নয়তো পুলিশকর্তাদের অতি-উৎসাহের ফলেই ঘটে।

প্র: আপনি হোম সেক্রেটারি থাকার সময় এমন কোনো ঘটনা ঘটেনি?

ডু: সোরাবুদ্দিনের (এনকাউন্টারের) ব্যাপারটা নয়। মাত্র একটা ঘটেছিল। আমি অফিসারদের বলেছিলাম, আপনারা কী করছেন . . . নিশ্চয়ই রাজনৈতিক উদ্দেশ্যপ্রণোদিত ছিল। আমি ডিজিপিকে বলেছিলাম, ‘আপনারা কী করছেন?’

প্র: দাঙ্গার সময় যা যা ঘটেছিল তা নিয়ে একটা বই লেখা উচিত আপনার।

ডু: আমার কথা কে বিশ্বাস করবে?

প্র: আপনি হোম সেক্রেটারি ছিলেন।

ডু: কংগ্রেসের লোকেরা বলবে, আপনি তো সরকারের লোক ছিলেন, (অতএব) ‘উনি সরকারের বক্তব্যটাই লিখেছেন।’ বিজেপি-ও আমার বক্তব্য মেনে নেবে না। রাজনৈতিক দলগুলো সেটাই বিশ্বাস করে যেটা তারা বিশ্বাস করতে চায়।

এটাই ছিল অশোক নারায়ণের সঙ্গে আমার শেষ সাক্ষাৎ। কয়েক বছর ধরে বিভিন্ন কার্যকর্তার সঙ্গে অফ-দ্য-রেকর্ড কথাবার্তায় যা-কিছু আমি শুনেছিলাম, তার প্রায় প্রতিটা কথাকেই সত্য বলে উল্লেখ করেছিলেন তিনি। যেমন বলেছিলেন, যে-সব সরকারি কার্যকর্তা সরকারের পক্ষে দাঁড়িয়েছিলেন তাঁরা পুরস্কার পেয়েছিলেন, বাকিদের ক্ষেত্রে তেমনটা ঘটেনি, তাঁদের টপকে অন্যদের প্রমোশন দেওয়া হয়েছিল। তর্কের খাতিরে ধরে নেওয়া যাক, অশোক নারায়ণ বিশেষ একটা পক্ষ নিয়ে একপুঁয়ের মতো নিজের মত ধরে থেকেছিলেন। কিন্তু তা হলেও যে-সব অফিসার প্রশাসনের বিপক্ষে দাঁড়িয়েছিলেন, তাঁদের বদলি করা এবং তাঁদের প্রতি মোদি সরকারের প্রতিহিংসামূলক মনোভাবের কথাটা তো আর মিথ্যে হয়ে যায় না। রাহুল শর্মা, রজনীশ রাই, সতীশ ভার্মা, কুলদীপ শর্মা—প্রত্যেকের ক্ষেত্রেই অন্তত ২০ বছরের পুরোনো মামুলি কিছু বিষয় তুলে এনে তাঁদের বিরুদ্ধে কাজে লাগানো হয়েছে। গুজরাতে ন্যায়বিচার যখন প্রায়

তলানিতে পৌছেছিল তখন এইসব অফিসাররাই ন্যায়বিচারের পতাকাকে উর্ধ্বে তুলে ধরার চেষ্টা করে গেছেন এবং তার জন্য আজও তাঁদের হয়রান করা হচ্ছে।

পরবর্তী পরিচ্ছেদগুলিতে আমরা দেখব যে-মানুষটির গুজরাতের ডিগ্রি হওয়ার কথা ছিল, সেই কুলদীপ শর্মাকে প্রোমোশন দেওয়া হয়নি, কারণ মাধোপুরা সমবায়ের ঘটনায় তৎকালীন গৃহমন্ত্রী অমিত শাহের বিরুদ্ধে তদন্ত শুরু করেছিলেন তিনি। একটি মাদ্রাসায় দাঙ্গাবাজদের প্রতিহত করা ও পরবর্তীকালে তদন্ত কমিশনের হাতে গুজরাত দাঙ্গার সময় বিভিন্ন মন্ত্রীদের ফোনকলের রেকর্ড তুলে দেওয়ার জন্য এসপি রাহুল শর্মাকে সাসপেন্ড করা হয় এবং তাঁর নামে নানান মামলা রুজু করা হয়। ধুলোর আন্তরগণ সবেমাত্র সরতে শুরু করেছে। অশোক নারায়ণ একটি রাজ্যের পক্ষপাতিত্ব ও দুষ্কর্মে সহযোগিতা করার কথা বলেছেন, যে-রাজ্যে দীর্ঘ তিন মাস ধরে চলা এক ভয়ংকরতম সাম্প্রদায়িক দাঙ্গায় অবাধে রক্তস্রোত বয়ে যেতে দেওয়া হয়েছে।

এবার পরবর্তী চরিত্র ও পরবর্তী পরিচ্ছেদের দিকে অগ্রসর হতে হবে আমাদের।



## সপ্তম পরিচ্ছেদ

জি.সি. রাইগার

২০০২ সালের দাঙ্গার সময় গুজরাতে গায়েন্দা প্রধান ছিলেন জি.সি. রাইগার, পরে ভূয়ো সংঘর্ষে সোরাবুদ্দিনকে হত্যা করার সময় পুলিশের ডিউজি ছিলেন তিনি। তাঁর সঙ্গে যেদিন আমার দেখা হয়, সেদিন ভারত-পাকিস্তান ক্রিকেট খেলা নিয়ে সবাই উত্তেজিত হয়ে আছে। অজয় তার নিজের বাড়িতে একটা ছবি দেখানোর ব্যবস্থা করে অধিকাংশ বন্ধুদের বাড়িতে ডেকেছিল, কিন্তু অজয়ের বন্ধুদের সামনে যেতে চাইছিলাম না, কারণ এদের অনেকেরই শক্তপোক্ত রাজনৈতিক যোগাযোগ ছিল। অজয় আমাকে আগেই জানিয়েছিল, তার একজন ঘনিষ্ঠ বন্ধু আনার প্যাটেল শহরে একটা এনজিও চালান। আনার হচ্ছেন গুজরাতে মুখ্যমন্ত্রী আনন্দীবেন প্যাটেলের মেয়ে।

সেদিন বিকেলে রাইগারের সঙ্গে দেখা করতে গিয়ে দেখলাম খেলা শুরু হওয়ার জন্য উদ্বিগ্নচিত্তে অপেক্ষা করছেন তিনি। ‘আশা করি আগ্রিদি ছক্কা হাঁকানো শুরু করতে পারবে না, স্যর। আমাদের বোলিং তো তেমন সুবিধের নয়।’ যে-দুটো বিষয় জানা ছিল সেটুকুই উগরে দিলাম। রাজস্থানি চিভদা আর চা পরিবেশন করে গুজরাতে আইনি প্রধান থাকার সময়কার নানান কথা বলতে শুরু করলেন রাইগার। ভূয়ো সংঘর্ষে সোরাবুদ্দিনকে হত্যা করার মামলায় সিবিআই জিজ্ঞাসাবাদ করেছে তাঁকে। সংবাদপত্রের রিপোর্ট\* থেকে জানা যাচ্ছিল সেই সময় প্রচণ্ড চাপে ছিলেন তিনি।

এই সাক্ষাৎকার ব্যাপারে অত্যন্ত দুশ্চিন্তায় ছিলাম আমি, কেননা রাইগার যে ঠিক কোন দিকে আছেন এবং তাঁর কাছ থেকে কতটুকু সত্য আদায় করা যেতে পারে, সে-ব্যাপারে কোনো ধারণাই ছিল না আমার। মাইক ফিরে এসেছে, আমরা আবার নেহরু ফাউন্ডেশনে ফিরে গেছি। রাইগারের সঙ্গে তাঁর অফিসে দেখা করেছিলাম আমরা—অবসরের পর ভেজাল মদের বিষয়টা দেখার কাজ দেওয়া হয়েছিল তাঁকে। ২০০২-এর গুজরাত দাঙ্গার সময় এডিজিপি, ইন্টেলিজেন্স আর বি. শ্রীকুমার একটি সাক্ষাৎকারে দাঙ্গা সম্বন্ধে বলতে গিয়ে বলেছিলেন:

উপরতলার লোকেদের খুশি রাখার জন্য কিছু কিছু অফিসার কোনো কাজই করেননি। এমনকী আমার আগে যিনি এই পদে ছিলেন, সেই জি.সি. রাইগার-ও হাত গুটিয়ে নিয়েছিলেন। পরে তাঁকে প্রমোশন দিয়ে পুরস্কৃত করা হয়, যদিও তিনি আমার জুনিয়র। এমনকী ‘ভেজাল মদ আয়োগ’-এর সদস্য হিসেবে অবসরোত্তর পদও দেওয়া হয়েছে তাঁকে, যে-আয়োগটি হাইকোর্টের বিচারপতির অধীনে আছে।

সুপ্রিম কোর্টে প্রদত্ত হলফনামায় রাইগারের নাম উল্লেখ করেছিলেন ভাট। ২০০২ সালের ২৭ ফেব্রুয়ারি মুখ্যমন্ত্রীর মিটিংয়ে ভাট সত্যিই উপস্থিত ছিলেন কিনা সে ব্যাপারে ‘হ্যাঁ’ বা ‘না’ কিছুই বলতে অস্বীকার করেন রাইগার। স্থানীয় একটি সংবাদপত্রে তিনি বলেন, ‘আমি কিছুই বলতে পারব না, কেননা সেদিন আমি ছুটিতে ছিলাম।’

হলফনামায় ভাট জানিয়েছিলেন তৎকালীন ডিজিপি কে. চক্রবর্তীই তাঁকে ওই মিটিংয়ে নিয়ে গিয়েছিলেন। সংবাদমাধ্যমের কাছে ২০০২-এর দাঙ্গা সম্বন্ধে কিছু বলতে অস্বীকার করেন চক্রবর্তী, ফলে তাঁর কাছ থেকে কোনো সূত্রই পাওয়া যায়নি।

মুম্বই দাঙ্গা এবং তার পরবর্তী ভূয়ো সংঘর্ষগুলির ঘটনায় অন্যতম একজন প্রধান চরিত্র রাইগার—এই দুটি ঘটনা গুজরাতে অপরাধমূলক চক্রান্তের ক্ষেত্রে অত্যন্ত দুর্ভাগ্যজনক ও কলঙ্কময় দৃষ্টান্ত। সোরাবুদ্দিন ভূয়ো সংঘর্ষ মামলায় ভি.এল. সোলাঙ্কি নামক একজন পুলিশ অফিসার সিবিআই-এর কাছে লিখিত বিবৃতি দেন, যেটি পরে চার্জশিটের অন্তর্ভুক্ত হয়। বিবৃতিতে বলা হয়েছে:

২০০৬ সালের নভেম্বর মাসের প্রথম সপ্তাহে তিনি (মিস গীতা জোহরি, আইজি) আমাকে তাঁর চেম্বারে দেখা করতে বলেন। নির্দেশ পেয়ে আমি গান্ধীনগরে গেলাম। প্রথমে তিনি তদন্ত কীভাবে এগোচ্ছে তা নিয়ে আলোচনা করলেন আমার সঙ্গে। খানিকক্ষণ পর মিস গীতা জোহরি আমাকে বললেন, সেদিন একটা মারাত্মক ঘটনা ঘটে গেছে। তাঁকে, অ্যাডিশনাল ডিজিপি শ্রী জি.সি. রাইগারকে এবং ডিজিপি শ্রী সি.সি. পাণ্ডেকে নিজের অফিসে ডেকে পাঠিয়ে তাঁদের সঙ্গে তদন্তের অগ্রগতি সম্বন্ধে আলোচনা করেছেন গৃহমন্ত্রী শ্রী অমিত শাহ।

তিনি (মিস গীতা জোহরি) আমাকে বলেন যে, গৃহমন্ত্রীর মেজাজ অত্যন্ত খারাপ ছিল এবং আমার ব্যাপারে তাঁর কাছ থেকে জানতে চেয়েছিলেন। গৃহমন্ত্রী বলেছেন, আমার মতন একজন পুলিশ ইনসপেক্টর কীভাবে এমন রিপোর্ট লিখতে সাহস পায় যা শ্রী ডি.জি. বানজারা, রাজকুমার পাণ্ডিয়ান-এর মতো সিনিয়র অফিসারদের, যারা

সাজানো সংঘর্ষে সোরাবুদ্দিনকে হত্যার জন্য দায়ী, ফোরডের বিপক্ষে ফেলতে পারে।

এই মিটিং সম্বন্ধে বলতে গিয়ে সিবিআই-কে এসসি জানিয়েছিলেন, এই মামলার তৎকালীন প্রধান তদন্তকারী ওজরাতেস ডিজিপি নি.সি. পাণ্ডে, এডিজিপি সিআইপি জি.সি. রাইগার এবং আইজিপি সিআইডি গীতা জোহরিকে নিয়ে ২০০৬ সালের ডিসেম্বর মাসে এই মিটিং ডেকেছিলেন অমিত শাহ। মিটিংয়ে অমিত শাহ নাকি বলেছিলেন, জোহরির সহকারী সোলাঙ্কির দেওয়া অভিযোগমূলক তদন্ত রিপোর্ট সম্বন্ধে সতর্ক থাকতে হবে। সোলাঙ্কি কোনো সহযোগিতা করতে অস্বীকার করেন। উপরন্তু তিনি প্রজাপতিকে জিজ্ঞাসাবাদ করতে চান, যিনি সোরাবুদ্দিন ও কওসর বাই অপহরণের সাক্ষী ছিলেন। ২০০৬-এর নভেম্বর মাসে প্রজাপতি প্রকাশ্য আদালতে চিৎকার করে বলেন পুলিশ তাঁকে হত্যা করতে চলেছে, কারণ তিনি বড্ড বেশি জেনে ফেলেছেন। সোলাঙ্কির সঙ্গে সাক্ষাৎকারের নির্দিষ্ট দিনের কয়েক দিন আগে তিনিও 'এনকাউন্টারে' মারা যান।

১৮ মাস তদন্তের পর সিবিআই যে-চার্জশিট পেশ করে তাতে অমিত শাহ এবং অন্য ১৯ জন অভিযুক্তের নাম ছিল, যাদের মধ্যে পাণ্ডে, জোহরি, ও.পি. মাথুর, রাজকুমার পাণ্ডিয়ান, ডি. বানজারা এবং আর.কে. প্যাটেলের মতো উচ্চপদস্থ পুলিশকর্তাদের নামও ছিল। ভূয়ো সংঘর্ষে দুহৃতী সোরাবুদ্দিন শেখকে হত্যা করার সাক্ষী প্রজাপতিকে হত্যার চক্রান্তে অভিযুক্ত করা হয় এঁদের। সাক্ষী হিসেবে ন'জন ওজরাত ক্যাডার আইপিএস অফিসারের নাম ছিল: জি.সি. রাইগার (তৎকালীন এডিজিপি, সিআইডি ক্রাইম), রজনীশ রাই, আই.এম. দেশাই (তখন সিআইডি-র ক্রাইম ব্রাঞ্চে ছিলেন এবং মামলাটির তদারক করছিলেন), পি.সি. পাণ্ডে (এডিজিপি, সিআইডি ক্রাইম), ডি.ডি. রাবারি (সিআইডি-র ক্রাইম ব্রাঞ্চার ভূতপূর্ব প্রধান), এ.কে. শর্মা (ডিআইজি ক্রাইম ব্রাঞ্চ, আমেদাবাদ) এবং ময়ুর চাভদা (মুখ্যমন্ত্রীর নিরাপত্তা বাহিনীর ডেপুটি এসপি)।

সিবিআই অফিসাররা জানান, রাইগার এবং রাই হচ্ছেন প্রধান সাক্ষী।

চার্জশিটে বলা হয়, ২০০৬ সালের ডিসেম্বরের মাঝামাঝি সময়ে অমিত শাহ (তৎকালীন গৃহমন্ত্রী) তাঁর অফিসে একটি মিটিং ডাকেন সোরাবুদ্দিন শেখ মামলার তদন্তের ব্যাপারে নিজের অসন্তোষ প্রকাশ করার জন্য। এই মিটিংয়ে পাণ্ডে, জোহরি ও রাইগার উপস্থিত ছিলেন। জোহরিকে কয়েকটি নথিপত্র নষ্ট করে ফেলতে বলেন অমিত শাহ।

সিবিআই বলেন, ‘রাইগার অনুরোধ করেন তাঁকে রেহাই দেওয়ার জন্য, কিন্তু পাশ্বে ও জোহরি এই চক্রান্তমূলক নির্দেশ পালনে স্বেচ্ছায় এগিয়ে আসেন।’

রাইগার সিবিআইকে বলেন, তিনি যখন ভূয়ো সংঘর্ষে সোরাবুদ্দিনকে হত্যা করার মামলাটা দেখাশোনা করছিলেন, তখন তৎকালীন গৃহমন্ত্রী অমিত শাহ তাঁর ওপর অবিরাম চাপ সৃষ্টি করে চলেছিলেন। ‘আমার কার্যকলাপে উনি অত্যন্ত অসন্তুষ্ট ছিলেন। আমাকে দিয়ে কিছু বেআইনি কাজ করাতে চাইছিলেন উনি, যা আমাকে প্রচণ্ড চাপে ফেলে দেয়। অগত্যা আমি বদলি চাই। সেই দিনই আমাকে কারাই-তে বদলি করার নির্দেশ দেন গৃহমন্ত্রী।’ ও.পি. মাথুর নামে অন্য একজন অফিসারকে তাঁর জায়গায় দায়িত্ব দেওয়া হয়। রাইগার বলেছেন, ‘আমি শাহকে বলেছিলাম বদলির আগে কয়েকটা দিন সময় দিন আমাকে, কিন্তু উনি আমাকে সেই দিনই বদলি করে দেন।’

তিনি আরও বলেছেন যে পিআই ভি.এল. সোলাঙ্কি, যিনি ঘটনাটার তদন্ত করছিলেন, তিনি কখনও এই মামলার ব্যাপারে উদয়পুরে যাওয়ার জন্য তাঁর অনুমতি চাননি। তৎকালীন এডিজিপি ও.পি. মাথুর তাঁর বিবৃতিতে বলেছেন, ডেপুটি সুপারিন্টেন্ডেন্ট অফ পুলিশ জি.বি. পাথেরিয়া ও আইজিপি গীতা জোহরির মধ্যে একটা বিবাদ দেখা দিয়েছিল—নাথুভা জাদেজা নামক একজন সাক্ষীকে বিরূপ করে দেওয়ার জন্য পাথেরিয়া-ই দায়ী বলে জোহরি সন্দেহ প্রকাশ করার পরই এই বিবাদ দেখা দেয়। পুরো বিষয়টা প্রিন্সিপাল সেক্রেটারির (গৃহমন্ত্রক) গোচরে আনা হলে তিনি বলেন বিষয়টা নিজেদের মধ্যে মিটিয়ে নেওয়া উচিত। পরে বিষয়টা মিটিয়ে নেওয়া হয়। তবে সিবিআইকে তিনি জানান, জোহরি কখনোই তাঁকে বিশ্বাস করতেন না।

আমার স্টিং অপারেশন শেষ করে ২০১১ সালের মার্চ মাসে আমি গুজরাত ছেড়ে চলে আসার পর এইসব বিবৃতির বিস্তৃত বিবরণ প্রকাশ্যে আসে।

ডিসেম্বর মাসে মাইককে নিয়ে আমি যখন রাইগারের সঙ্গে তাঁর অফিসে প্রথম দেখা করি, তখনও জিজ্ঞাসাবাদের জন্য তাঁকে ডেকে পাঠাত সিবিআই। পরিস্থিতিটা বুঝিয়ে বললাম মাইককে, এ-ও বললাম যে তাঁর কাছ থেকে কোনো তথ্য না-ও পেতে পারি আমরা। ‘আজ ঠেকে রাজনীতি নিয়ে কোনো প্রশ্ন করব না, মাইক। আমরা বিদেশি, কোনো খোঁজখবরই রাখি না—এমন ভাব দেখাব।’

মাইককে খুব আন্তরিকভাবেই গ্রহণ করলেন রাইগার, জানতে চাইলেন গুজরাতে কেমন অভিজ্ঞতা হচ্ছে ওর। আমদাবাদ নি ওফা, পালদি আর সরখেজ রোজায় গুটিংয়ের কথা সংক্ষেপে বলল মাইক। গুজরাতির বিদেশি বা

আমেরিকান কোনো কিছু দেখলেই মোহিত হয়ে পড়ে, নাকি আমাদের দু'জনের আত্মবিশ্বাসের দরুনই এইসব অফিসাররা এত সহজে আমাদের গল্পটা বিশ্বাস করে নিয়েছিলেন, সে ব্যাপারে ঠিক নিশ্চিত নই আমি।

রাহুল ঢোলাকিয়ার সঙ্গে কথা বলার ঘটনাটা মনে আছে আমার। রাহুল একজন গুজরাতি ও বলিউডের চিত্রপরিচালক। গুজরাত দাঙ্গার ওপর বানানো তাঁর ছবি 'পারজানিয়া'-কে রাজ্যের কোনো সিনেমাহলে দেখানো নিষিদ্ধ করে দেওয়া হয়। মুম্বইয়ের জুহর 'কোস্টা কফি'-তে বসে 'পারজানিয়া'র জন্য অর্থ সংগ্রহ ও ছবি বানানোর অভিজ্ঞতা যখন মজা করে বলছিলেন রাহুল, তখন হাসতে হাসতে পেটে খিল ধরে গিয়েছিল। তাঁর প্রযোজকের মনে হয়েছিল, যে-সব দক্ষিণপন্থী হিন্দুরা ছবিটার বিরুদ্ধে প্রতিবাদ করছেন তাঁদের কোনো ধারণাই নেই যে দাঙ্গার সময় সংখ্যালঘুদের ওপরে হওয়া অন্যায়ের বিরোধিতাই ছবিটার বিষয়বস্তু। একটা আমেরিকান চ্যানেলের হয়ে কাজ করেছিলেন রাহুল। তিনি এমন ভাব দেখান যেন অনাবাসী ভারতীয়দের জন্য গুজরাতে ওপর একটা ছবি বানাতে চান। গুজরাতে আমি যতজনের সঙ্গে দেখা করেছি তাঁদের অধিকাংশের কাছে আমিও একই কথা বলতাম। প্রযোজক এবং সংশ্লিষ্ট কর্তৃপক্ষের কাছে রাহুলকে বিশ্বাস করার পক্ষে এটুকুই যথেষ্ট ছিল। একবার ছবির জন্য গুজরাত দাঙ্গার কিছু ফুটেজ দরকার হওয়ায় সংবাদপত্রের সঙ্গে যোগাযোগ করেন রাহুল, যাদের কাছে ওই টেপ ছিল। রাহুল আমেরিকা থেকে এসেছেন শুনেই দায়িত্বশীল ব্যক্তিটি গলে পড়েন। রাহুলের দাদু হিন্দু মহাসভার চেয়ারপার্সন ছিলেন জেনে আরও আগ্রহ হন তিনি। নিজের প্রয়োজনীয় সব কিছু তৎক্ষণাৎ পেয়ে যান রাহুল।

এবার রাইগারের কথা বলা যাক। আমাদের সঙ্গে প্রথম সাক্ষাতে কথা বলতে তিনি খুবই আগ্রহী ছিলেন। পিতৃসুলভ ভঙ্গিতে আমাকে বললেন আমি যেন তাড়াতাড়ি বিয়েটা সেরে ফেলি, কেননা একটা বয়সের পর মেয়েদের পক্ষে উপযুক্ত পাত্র খুঁজে পাওয়া কঠিন হয়ে ওঠে। রাজস্থানের এক সেকেলে ঘরানার বংশের মানুষ তিনি। অমিত শাহের ক্রোধের মুখে পড়তে হবে ভেবে তাঁর বিরুদ্ধে মামলায় সাক্ষী হওয়া তাঁর পক্ষে বেশ দুরূহ ছিল, কিন্তু বিভিন্ন ভূয়ো সংঘর্ষের ঘটনায় অমিত শাহের যুক্ত থাকার প্রমাণ দিন দিন বেড়েই চলেছে দেখে শেষ পর্যন্ত তিনি সাক্ষী হওয়ার সিদ্ধান্ত নেন। তবে আমাদের কথোপকথনের দ্বিতীয় দিনে রাইগার যা বলেছিলেন তা রীতিমতো চমকপ্রদ।

ভূয়ো সংঘর্ষের ঘটনায় কারা কারা জড়িত আছেন তা আমি জানতাম, কিন্তু প্রশাসন এদের কীভাবে কাজে লাগিয়েছিল ও ব্যবহার করেছিল, সেটা বুঝে ওঠা

অত সহজ ছিল না। রাইগার আমার সঙ্গে স্বচ্ছন্দেই কথা বলছিলেন, কারণ তিনি জানতেন আমি ইতিমধ্যেই পি.সি. পাণ্ডে, অশোক নারায়ণ, রাজন প্রিয়দর্শীর সঙ্গে কথা বলেছি, এবং আমি যে গুজরাত পুলিশের গৌরবময় ছবি ভুলে ধরতে চাইছি সে বিষয়ে তিনি নিশ্চিত ছিলেন।

ভুজের ভূমিকম্পের কথা তুললাম। তিনি জানালেন ভূমিকম্পের তীব্রতা কত ছিল, কতজন মারা গিয়েছিল, ঘটনার পর কী বিপুল পরিশ্রম করতে হয়েছিল গুজরাত পুলিশকে। খুবই অজ্ঞতার ভান করে জানতে চাইলাম—গুজরাতে সাম্প্রদায়িক মেরুকরণ যতটা প্রবল বলে শোনা যায়, সত্যিই কি তাই। তিনি বললেন, ‘ওহ, ২০০২ সালে এখানে কী ঘটেছিল আপনি ভাবতেও পারবেন না।’ তিনি দাঙ্গা সম্বন্ধে মুখ খোলায় আমার অজ্ঞতার ভাব প্রকাশ্য কৌতূহলে পরিণত হল। ওঁকে বললাম অন্য অফিসারদের কাছ থেকে এ ব্যাপারে কিছু তথ্য পেয়েছি আমি। গোয়েন্দা বিভাগের প্রধান ছিলেন রাইগার, অর্থাৎ গুজরাত দাঙ্গার সময় অত্যন্ত গুরুত্বপূর্ণ একটা পদে ছিলেন তিনি।

প্র: আচ্ছা, মোদির ব্যাপারটা কী? সবাই ওঁকেই দোষী বলছে কেন?

উ: এ ব্যাপারে আমি কিছু বলতে চাই না। এ ব্যাপারটায় হাত ধুয়ে ফেলেছি আমি।

প্র: ঘটনার সময় আপনি তো একেবারে তার মধ্যেই ছিলেন?

উ: হ্যাঁ।

প্র: খুবই দুঃখজনক বিষয়।

উ: হ্যাঁ, দাঙ্গার ওই তিনটে মাসের কথা আমি ভুলে যেতে চাই। এমন কিছু ঘটনা ঘটেছিল যা ঘটা উচিত ছিল না।

প্র: তাই নাকি? আপনার বিবেকেও আঘাত লেগেছিল?

উ: হ্যাঁ, খুবই আঘাত লেগেছিল।

প্র: অশোক নারায়ণও একই কথা বলছিলেন।

উ: হ্যাঁ, উনিও ঝড়ের কেন্দ্রেই ছিলেন। মানুষের মনে সে-সব স্মৃতি এখনও জীবন্ত, সব জায়গায়। আমেরিকা এখনও ওঁকে (মোদিকে) ওদেশে যাওয়ার অনুমতি দেয়নি, উনি এত জনপ্রিয় হওয়া সত্ত্বেও নয়। সম্প্রতি উইকিলিকস-এ বলা হয়েছে আমেরিকা নাকি এখন ওঁর সঙ্গে সুসম্পর্ক গড়ে তুলতে চায়। কিন্তু পরে ওই উইকিলিকসই ওঁর সম্বন্ধে অনেক খারাপ খারাপ কথা বলেছে। অর্থাৎ সংবাদমাধ্যমে ওঁর সম্বন্ধে নানা ধরনের কথা বলা হয়েছে।

- প্র: কিন্তু এটাই কি দেশের সবথেকে ভয়ংকর (দাঙ্গা)? মুন্সই দাঙ্গার থেকেও ভয়ংকর?
- উ: হ্যাঁ। মুন্সই দাঙ্গা মাত্র দুদিনের ঘটনা ছিল। এটা টানা কয়েক মাস ধরে চলেছিল।
- প্র: কিন্তু সেটা হল কীভাবে? এতদিন ধরে এটা চলতে দেওয়া হল কেন?
- উ: এটা তো নারায়ণ নিশ্চয়ই বলেছেন আপনাকে। উনি তখন হোম সেক্রেটারি ছিলেন।
- প্র: হ্যাঁ, উনি বলেছেন উনি খুবই বিপর্যস্ত হয়ে পড়েছিলেন। সরকারের কঠোর সমালোচনা করছিলেন উনি, বলছিলেন রাজ্য সরকার কিছুই করেনি।
- উ: উনি হোম সেক্রেটারি ছিলেন। সরকারের সবথেকে গুরুত্বপূর্ণ কর্মকর্তা। উনি যখন বলেছেন তখন সেটাই সত্য।
- প্র: কিন্তু আপনাদের সবারই কি মোহভঙ্গ ঘটেছিল?
- উ: আমাদের বেশিরভাগ জনেরই মোহভঙ্গ ঘটেছিল, কষ্ট পেয়েছিলাম, একমাত্র যারা সরকারের কাজ সমর্থন করেছিল তারা ছাড়া, (তারা) সরকারের পক্ষে দাঁড়িয়েছিল। শুধুমাত্র রাজনীতিবিদরাই যে খেলছিল তা নয়, পুলিশরাও দায়ী ছিল।
- প্র: তার মানে দাঙ্গার সময় রাজনীতিবিদ আর পুলিশদের মধ্যে একটা অশুভ আঁতাত গড়ে উঠেছিল?
- উ: কথাটা খানিকটা সত্যি, কারণ পরিস্থিতি একবার হাতের বাইরে চলে গেলে আর বিশেষ কিছু করার থাকে না।
- প্র: কিন্তু এই ঘটনা থেকে তো বিপুল রাজনৈতিক ফায়দা তুলেছেন উনি (মোদি)?
- উ: হ্যাঁ হ্যাঁ, তা তো বটেই। পরবর্তী নির্বাচনের সময় ওরা খুব নার্ভাস ছিল, কিন্তু দেখা গেল ফল ভালোই হয়েছে। ওরা ভেবেছিল ওঁর জন্যে এটা করেছে ওরা।

খানিক পরে কথাবার্তা ঘুরে গেল সাজানো সংঘর্ষগুলোর দিকে। যখন তদন্ত চলছিল তখন রাইগার অ্যাডিশনাল ডিজিপি ছিলেন। সাজানো এনকাউন্টারের ব্যাপারে সিবিআই তাঁকে ওই বছরের মে আর জুন মাসে প্রতিদিন ১০ ঘণ্টা ধরে জেরা করে। তবুও তিনি নিজের কথাগুলো আমাকে বলতে পেরে খুশি হলেন।

- প্র: আচ্ছা, এখানকার এনকাউন্টারগুলোর ব্যাপারটা কী? আপনি তো ওখানে ছিলেন।

উ: আমি মাত্র একটা ঘটনায় ছিলাম। একটা সাজানো এনকাউন্টারে একজন অপরাধী (সোরাবুদ্দিন) মারা যায়। বোকার মতো ওর স্ত্রীকেও মেরে দিয়েছিল ওরা।

প্র: কোনো একজন মন্ত্রীও জড়িত ছিলেন না?

উ: গৃহমন্ত্রী অমিত শাহ।

প্র: ওঁর অধীনে কাজ করা নিশ্চয়ই খুব কঠিন ছিল?

উ: আমরা ওঁর সঙ্গে একমত হতে পারিনি। ওঁর নির্দেশ মানতে অস্বীকার করি আমরা, সেইজনেই এনকাউন্টারের ঘটনায় গ্রেপ্তার হওয়ার হাত থেকে বেঁচে গেছি।

প্র: অবস্থা কি সর্বত্রই এতটা খারাপ?

উ: দশ বছর আগে গুজরাত অনেক ভালো ছিল।

প্র: রাজনৈতিক পরিবর্তনের জন্যেই কি এমনটা ঘটেছে?

উ: গণতন্ত্রে কেউ খুব বড়ো হয়ে উঠলে তার ফল ক্ষতিকর হতে পারে, যেমনটা হয়েছে এই মন্ত্রীর, মানে গৃহমন্ত্রীর (অমিত শাহ) ক্ষেত্রে। ট্রান্সফার, পোস্টিং, প্রোমোশন—সবই ওঁর হাতে। কেউ ওঁর কথামতো কাজ না করলে তাকে সাইড পোস্টিং দেওয়া হয় এবং সাইড পোস্টিং কেউই চায় না। সেই জন্যেই সোরাবুদ্দিন ঘটনার তদন্ত চলার সময় আমি বদলি নিতে চেয়েছিলাম।

প্র: আপনাকে বদলি করে দেওয়া হয়েছিল কারণ ওরা চায়নি আপনি তদন্ত করুন—তাই কি?

উ: আসলে আমি ভুল পথে তদন্ত করতে চাইনি।

প্র: এবং ওরা চেয়েছিল আপনি ভুল পথেই তদন্ত করুন?

উ: হ্যাঁ।

প্র: কেউ কীভাবে এ-সব করতে পারে? অমিত শাহ রেহাই পেলেন কী করে?

উ: উনি ঠিক উপায় খুঁজে নিয়েছিলেন। ক্ষমতায় থাকা লোকেদের খুব কাছের মানুষ ছিলেন উনি।

প্র: উনি কি মুখ্যমন্ত্রীর ঘনিষ্ঠ ছিলেন?

উ: হ্যাঁ, মুখ্যমন্ত্রীর খুবই ঘনিষ্ঠ ছিলেন উনি। মুখ্যমন্ত্রীর সবথেকে কাছের মানুষ ছিলেন।

প্র: তাহলে মুখ্যমন্ত্রী ওঁকে গ্রেপ্তার হওয়ার হাত থেকে বাঁচাতে পারলেন না কেন?

উ: সেটা উনি করতে পারতেন না (ওঁর বিরুদ্ধে সাক্ষ্যপ্রমাণ ছিল)।



প্র: ও, তাহলে উনি নিজেও এতে জড়িয়ে পড়তেন?

উ: উনি যদি হস্তক্ষেপ করতেন তাহলে ওঁকে সরে যেতে হত, সেদিক থেকে এই লোকটি (মুখ্যমন্ত্রী) অত্যন্ত চতুর। উনি সবই জানতেন, কিন্তু একটা দূরত্ব রেখে চলতেন, তাই এক্ষেত্রে ওঁকে ধরা যায়নি।

একটা আইন আছে, আপনি একের পর এক এনকাউন্টার চালিয়ে যেতে পারেন না। কোনো কারণে যদি তা করতেও হয়, তাহলেও লোকেদের হত্যা করা চলে না। আর এইসব মন্ত্রীদের পক্ষে ব্যাপারটা খুবই সহজ। কোনো দায়দায়িত্ব থাকে না এদের, কোথাও সই করে না, শুধু মুখে নির্দেশ দেয়। তবে এখন প্রযুক্তির উন্নতির ফলে ব্যাপারটা খুব সহজ হয়ে গেছে। ওরা ফোন ব্যবহার করে, সেই ফোন ট্র্যাক করা যায়।

প্র: হ্যাঁ, এক জায়গায় পড়লাম আপনার কেসে কোনো কল রেকর্ডের সূত্রেই মন্ত্রীকে ধরা গিয়েছিল।

উ: হ্যাঁ।

প্র: কিন্তু আমরা যেমনটা দেখছি তার বিপরীতে রাজ্যে কি কোনো নীতিনিষ্ঠ অফিসার নেই?

উ: আছে, অনেকে আছে, কিন্তু কোনো ক্ষতি করার জন্য তো কয়েকজন খারাপ লোকই যথেষ্ট। কয়েকজন ভালো অফিসার অবশ্য এখনও আছেন, সেইজন্যই এখন মন্ত্রীদের নামে অভিযোগ আনা সম্ভব হচ্ছে।

প্র: কেউ-একজন আমাকে রাহুল শর্মা নামে একজন অফিসারের সঙ্গে দেখা করতে বলছিলেন। তিনি নাকি খুব নীতিনিষ্ঠ, আর তাই নাকি সরকারের সুনজরে নেই?

উ: উনি মুসলিমদের জীবন বাঁচিয়েছিলেন বলে (সরকার) ওঁর ওপর নজরদারি চালাচ্ছে। একটা স্কুলে মুসলিম শিশুদের বাঁচিয়েছিলেন উনি। শুধু বাঁচানইনি, কয়েকজনকে গ্রেপ্তারও করেছিলেন। (উনি) শাসক দলের একজন সদস্যকে গ্রেপ্তার করেছিলেন বলে ওঁকে বদলি করে দেওয়া হয়। সরকারের দিক থেকে একটা সমস্যা ছিল। প্রথমটায় ওরা বুঝে উঠতে পারেনি পরিস্থিতি এতটা খারাপ হয়ে যাবে। প্রথমটায় দাঙ্গাবাজদের বিরুদ্ধে সশস্ত্র বাহিনীকে কাজে লাগাতে চায়নি ওরা। সেই জন্যেই পরিস্থিতি হাতের বাইরে চলে যায়।

প্র: আচ্ছা, (যে-সব) হিন্দুরা মুসলিমদের বিরুদ্ধে ছিল, তাদের প্রতি কি নরম ছিল ওরা?

উ: প্রথমটায় তা-ই ছিল, আসলে বুঝেই উঠতে পারেনি অবস্থা এতটা খারাপ হয়ে উঠবে। তবে আপনি যা বললেন সেটা সত্যি।

প্র: কিন্তু হিন্দুদের প্রতি, দাঙ্গাবাজদের প্রতি নরম থাকার নির্দেশ তো আপনাদের, মানে অফিসারদের, দেওয়া হয়েছিল?

উ: ঠিক আমাদের নয়, মানে সবাইকে নয়। কোনো কোনো জায়গায়, কোনো কোনো এলাকায় গুরুত্বপূর্ণ পদে থাকা অফিসারদের এ ধরনের নির্দেশ দেওয়া হয়েছিল।

প্র: মি. মোদির আগে কেশুভাই নামে একজন মুখ্যমন্ত্রী ছিলেন না? কেমন মানুষ ছিলেন তিনি?

উ: মোদির তুলনায় উনি একজন সন্ত ছিলেন। তুলনায়। মানে কেশুভাই কখনো ইচ্ছাকৃতভাবে কারও ক্ষতি করতেন না, সে যে-ধর্মেরই লোক হোক না কেন। শুধুমাত্র মুসলিম বলেই তাদের ক্ষতি করতে দিতেন না উনি।

প্র: কিন্তু স্যর, নিরপেক্ষ দৃষ্টিকোণ থেকে দেখলে মনে হয়—অনেক তথ্যের সঙ্গে বানানো গল্পও যেন মিশে গেছে।

উ: আসলে ব্যাপারটা খুব কঠিন। এইসব লোকেরা সরাসরি নির্দেশ দেয় না, এরা সব আড়াল থেকে অদৃশ্য হয়ে কাজ করে। এমনকী আইনের ক্ষেত্রেও। যেমন ধরুন চিফ সেক্রেটারি যদি বলেন আমি আপনার কথা মানব না আর মুখ্যমন্ত্রী যদি বলেন আপনাকে মানতেই হবে, তাহলে যা ঘটবে তার সম্পূর্ণ দায়িত্ব মুখ্যমন্ত্রীরই। অবশ্য পুলিশ বাহিনীর ক্ষেত্রে সেটা আমার দায়িত্ব।

প্র: মি. চক্রবর্তীও একই কথা বলেছিলেন। উনি বলেছিলেন কিছু কিছু নির্দেশ পাঠানো হত কিন্তু সেগুলো সরাসরি পাঠানো হত না। এবং এই ব্যাপারটা অবশ্যই বুঝতে হবে।

উ: হ্যাঁ, ওরা এমনভাবে বলে যেন অতীতে যাদের উপকার করেছে সেইসব লোকেদের কিছু করতে বলছে। ওরা জানে কারা ওদের সাহায্য করবে। ইন্সপেক্টর আর নীচুতলার পুলিশ অফিসারদের সঙ্গে কথা বলে ওরা, কিন্তু সব অফিসার ওদের নির্দেশ মেনে নেয় না। ওপরতলার কিছু অফিসারদের আত্মসম্মানবোধ এখনও হারিয়ে যায়নি।

প্র: তার মানে মুখ্যমন্ত্রী তাঁদের কিছু বললে সেটা বুঝেই হয়ে যাবে?

উ: হ্যাঁ। যেমনটা ঘটেছিল অশোক নারায়ণের ক্ষেত্রে, যার সঙ্গে গান্ধীনগরে দেখা হয়েছিল আপনার। উনি কোনো অন্যায় নির্দেশ মানতেন না, কখনো বলতেন না ‘জো হুজুর’।

প্র: উনি তো একজন আইএএস অফিসারও ?

উ: হ্যাঁ, ওঁরা লিখিত নির্দেশ পান। আমাদের বেলায় তা হয় না।

প্র: স্যর, আপনি কিছু ইন্টারেস্টিং কথাও বলেছেন। যেমন, আপনি বলেছিলেন এনকাউন্টারগুলোর তদন্তের সময় রাজনৈতিক চাপ ছিল আপনার ওপর। যারা চাপ সৃষ্টি করছিল তাদের কি তখন আপনি থ্রেপ্তার করতে পারতেন না? যেমন ধরুন, এই গৃহমন্ত্রীকে?

উ: কিছু প্রমাণ পাওয়া দরকার হয়। আমাদের বিরুদ্ধে এই প্রমাণটুকুই পাওয়া গেছে। ওই শাহ যখন আমাকে কিছু কাজ করতে বলেছিলেন, আমি বলে দিয়েছিলাম—করব না। অন্য অনেকে বলত, ‘হ্যাঁ স্যর, করে দেব’, কারণ তাদের অন্য স্বার্থ ছিল।

প্র: তার মানে আপনি সরাসরি গৃহমন্ত্রীর বিরুদ্ধে গেলেও রাজ্য (সরকার) আপনার কোনো ক্ষতি করতে পারত না?

উ: না, সরাসরি পারত না, তবে আড়াল থেকে আমাকে খুন করাতে পারত। তবে এখানে গণতন্ত্র আছে, তাই আমরা টিকে থাকতে পারছি।

প্র: আমি আপনাদের সম্বন্ধে কিছু পড়াশোনা করছিলাম। তখন দেখলাম আপনাদের গৃহমন্ত্রী শাহের বিরুদ্ধে অভিযোগ আছে যে তিনি নাকি সংশ্লিষ্ট অফিসারদের সাক্ষী হতে বলতেন, বিবৃতি দিতে বলতেন?

উ: কিন্তু উনি কখনোই সেটা করে উঠতে পারেননি। উনি ঘুরিয়ে জানতে চাইতেন—কারা কারা আমার বিরুদ্ধে কথা বলছে?

প্র: মিসেস জোহরির ব্যাপারটা কী? উনি বলেছেন সোরাবুদ্দিন একজন সম্মানবাদী ছিল।

উ: দেখুন, সোরাবুদ্দিনের ব্যাপারটা অতটা গুরুত্বপূর্ণ নয়, গুরুত্বপূর্ণ হল ওর স্ত্রীর ব্যাপারটা। সোরাবুদ্দিন কোনো বৈধ এনকাউন্টারে মারা গেলেও ততটা সমস্যা হত না। প্রশ্নটা ওর স্ত্রীকে নিয়ে—তাকে হত্যা করা হল কেন? তা-ও আবার তিন দিন পর।

প্র: আপনিই এর তদন্ত করছিলেন?

উ: এইসব এনকাউন্টারগুলো যে আসলে ভুয়ো, সেটা প্রকাশ্যে আসার পর পুরো ব্যাপারটার তদন্ত করি আমরা। গীতাই কাজটা করছিলেন, আমার অধীনেই কাজ করতেন উনি। আমি যতদিন ছিলাম ততদিন ভালোই কাজ করতেন উনি, তারপর তো...(হাসি)।

প্র: সেইজন্যই আপনাকে বদলি করে দেওয়া হয়?

উ: হ্যাঁ।

প্র: পি.সি. পাণ্ডের সঙ্গেও দেখা করেছি আমি।

উ: উনি তো পুলিশ কমিশনার ছিলেন।

প্র: তার মানে দাঙ্গার সময় আপনারা একসঙ্গেই কাজ করেছেন?

উ: হ্যাঁ, করতে হয়েছে। আমি তো আইনি চিফ ছিলাম।

প্র: যে-সব অফিসারদের সঙ্গে আমি দেখা করেছি তাঁরা অনেকেই বলেছেন, মুখ্যমন্ত্রী পাণ্ডেকে বিশ্বাস করে সব কিছু বলতেন এবং দাঙ্গার সময় তাঁকে দিয়েই সমস্ত কাজ করিয়ে নিতেন।

উ: দাঙ্গার ব্যাপারে তো এতদিনে সব কিছুই জেনে গেছেন আপনি (হাসি)।

রাইগার সবই বলে দিয়েছিলেন। কিছুই বলতে বাকি রাখেননি। তাঁর বলা প্রতিটি শব্দে মোদি, অমিত শাহ এবং সহযোগী পুলিশকর্তাদের দাঙ্গায় যুক্ত থাকার ছবি ফুটে উঠছিল। তীব্র একটা ক্রোধ জন্ম নিচ্ছিল আমার মধ্যে। আমার ক্রোধটা অনুভব করেছিল মাইক। রাইগারের বাড়ি থেকে বেরোনোর সময় আমার হাতটা চেপে ধরে রেখেছিল ও। পুরো নির্লজ্জ একটা ব্যাপার। গুজরাত দাঙ্গা এবং সাজানো সংঘর্ষে রাজ্যের জড়িত থাকার কথা খোলাখুলিই বলে দিয়েছিলেন রাইগার।

রাইগার কি বলেননি যে গুজরাতের একটা মাদ্রাসায় মুসলিম ছাত্রদের জীবন বাঁচানোর জন্য রাজ্যের রোষের শিকার হতে হয়েছিল আইপিএস অফিসার রাহুল শর্মাকে? এখনও কি আমরা ধরে নেব যে গুজরাতের তৎকালীন মুখ্যমন্ত্রী এবং তাঁর মন্ত্রীদের বিরুদ্ধে মিথ্যা প্রচার চালিয়েছিল সংবাদমাধ্যম? আমাদের টেপগুলোর প্রমাণ কিন্তু অন্য কথাই বলছে।

মাথায় খুব যন্ত্রণা হচ্ছিল। বাড়ির লোকেরদের কাছে, আপনজনদের উষ্ণতায় যেতে ইচ্ছে করছিল। এই দুর্ভাগা রাজ্যে ছড়িয়ে পড়া ঘৃণার ঘেরাটোপ থেকে দূরে পালাতে চাইছিলাম, যে-ঘৃণার কথা প্রতিদিন কেউ-না-কেউ জানিয়েছেন আমাকে। একটু ছুটি চাই আমার।

পানির দরজায় কড়া নাড়লাম। স্থানীয় একজন কারিগরের কাছ থেকে নকশা করা কিছু হস্তশিল্প কিনে ঘরের দেওয়ালে লাগানোর চেষ্টা করছিল পানি। দরজা খুলে আন্তরিক ভঙ্গিতে হেসে সে বলল, 'আরে, এসো, আমাকে একটু সাহায্য করো।' তারপর বলে চলল গুজরাত কত সুন্দর জায়গা। মনে মনে বললাম—হ্যাঁ, তা তো বটেই। যে-ঘৃণা আমি দেখেছি তা যদি পানি দেখতে পেত। ১৮ বছরের তরুণী পানি, গুজরাতের অসংখ্য তরুণ-তরুণীদের একজন। এদের মধ্যে এত এত

ঘৃণা ছড়ানো হচ্ছে কেন? এখন কিছুদিন কোনো কাজ করতে চাই না আমি। অজয়কে ফোন করলাম।

কোন একটা কলেজের অনুষ্ঠানের গোটাকতক পাস আছে অজয়ের কাছে। ও বলল যাওয়ার সময় আমাকে তুলে নিয়ে যাবে। কালো রঙের একটা কুর্তা পরলাম, চোখে সূর্য লাগলাম, মেক আপ করলাম, হিলতোলা জুতো পরলাম। মাইক একটা বই পড়ছিল। আমার সঙ্গে যেতে চাইল না ও। একদিনের জন্য আমাকে কলেজের ছাত্রী হয়ে যেতে বলল ও, বলল ওখানে গিয়ে যেন নাচানাচি করি, সঙ্কেটা যেন সুন্দরভাবে কাটাই। আমিও মনেপ্রাণে সেটাই চাইছিলাম। সেদিন সন্ধ্যায় মনে হল নেহরু ফাউন্ডেশনের বাইরে কেউ যেন গাড়ি নিয়ে দাঁড়িয়ে আছে। সকালেও ওখানেই দেখেছিলাম লোকটাকে।

হয়তো নিছকই অনুমান। কলেজে যাওয়ার জন্য অটো না নিয়ে অজয়কে মেসেজ করলাম আমাকে তুলে নিয়ে যাওয়ার জন্য। সেদিন সন্ধ্যায় প্রচুর ছবি তুললাম, ছাত্রছাত্রীদের সঙ্গে নাচলাম, গলা ছেড়ে গান গাইলাম। পরের দিন বাইরে দাঁড়িয়ে থাকা সেই গাড়িটা আর চোখে পড়ল না।

## অষ্টম পরিচ্ছেদ পি.সি. পাণ্ডে

বাহিনীর অনেক ঠাক্রে অষ্ট্রি পানি বসাতেন, আবার কেউ কেউ বসাতেন তিনি পূর্বলের রক্ষক, মার্জিত, চম্প, পট্টভাষী একজন অফিসার। দুকুমস্ট্রী ঠাক্রে সবথেকে বেশি বিশ্বাস করাতেন, রাজ্যের ব্যবসায় প্রানসিক বিষয়ে মেদি একে অমিত শাহ তাঁর পরামর্শ নিতেন। জীবনের সুন্দর জিনিষগুলো ভাব্যবসাতেন: বিদেশে ছুটি কাটাতে যাওয়া, নিজের সম্বন্ধে উজ্জ্বল পর্যালোচনা এবং জ্ঞান ব জিমখানায় বন্ধুদের সঙ্গে সুরাপানে সন্ধে কাটানো।

২০০২ সালের ২ মার্চের টেলিগ্রাফ কাগজে তাঁর সম্বন্ধে লেখা হয়েছিল:

আমেদাবাদের হুতপূর্ব পুলিশ কমিশনার শ্রী পি.সি. পাণ্ডে (গণহত্যার সময় পুলিশ কমিশনার ছিলেন তিনি)। পুলিশদের হুমিকা সবথেকে চমৎকারভাবে অভিব্যক্ত হয়েছে পুলিশ কমিশনার পি.সি. পাণ্ডের এই বক্তব্যে, ‘সমাজজীবন থেকে পুলিশরা তো বিচ্ছিন্ন নয় . . . (বকন) সামাজিক ধারণায় কোনো পরিবর্তন ঘটে, তখন পুলিশরাও তাঁর অংশীদার এবং (সেই পরিবর্তনের) কিছু ছাপ তাদের ওপর পড়েই।’

প্রথমে মাইককে দিয়ে পাণ্ডেকে ফোন করলাম, তারপর দেখা করার সমস্তটা নিশ্চিত করার জন্য নিজে ফোন করলাম। কথার সুর শুনেই বুঝতে পারছিলাম আমাদের সম্বন্ধে বেশ একটা সম্ভ্রম তৈরি হয়েছে তাঁর মনে। আমরা বকন আমেদাবাদে তাঁর বাংলোয় ঢুকলাম তখন তিনি হুইলচেয়ারে বসি তাঁর মাকে ঠেলে ঠেলে বাগানে ঘোরাচ্ছিলেন। তাঁকে আর তাঁর মাকে ‘নমস্তে’ জানালাম আমি। মাইককে আমার সহকারী হিসেবে পরিচয় দিলাম। বাড়ির ভিতরে নিরে যাওয়া হল আমাদের। শুনেছিলাম তাঁর স্ত্রীর ক্যানসারের চিকিৎসা চলছে। বসার ঘরে এসে নিজের পরিচয় দিলেন তিনি। কফি টেবিলের ওপর ডাঁই করে রাখা বিভিন্ন ধবরের কাগজ ও সাময়িকপত্র, এক কপি ইন্ডিয়াটুডে এবং অন্যান্য গুজরাতি সংবাদপত্র।

উনি প্রথমেই আমার ‘ত্যাগী’ পদবী নিয়ে প্রশ্ন করলেন। আমাদের বংশে আরএসএস প্রভাবের কথা, আমার সংস্কৃত শিক্ষক বাবার কথা এবং আমেরিকায় পড়াশোনা করার কথা বললাম। বললাম আমি একজন কায়স্থ, মুম্বই আর কানপুরে আমাদের আত্মীয়রা আছেন, এবং ধর্মের সঙ্গে আমার কোনো যোগ নেই। তবে সেই সঙ্গেই জানালাম যে দেশে মুসলিম তোষণের পরিবেশটা আমাকে আমার ধর্মের দিকে টেনে এনেছে।

যেমনটা ভেবেছিলাম তেমন ফলই পাওয়া গেল, তবে পাণ্ডে অত্যন্ত বুদ্ধিমান। তিনি জানতে চাইছিলেন তাঁর সঙ্গে দেখা হওয়ার আগে সংবাদমাধ্যমে তাঁর সন্দেহজনক ভাবমূর্তি সম্বন্ধে কেউ আমাদের কিছু বলেছে কিনা। নিজের তাসগুলো বেশ বুদ্ধি করেই ফেলছিলেন তিনি। সেদিন আমি কোনো যন্ত্রপাতি সঙ্গে নিয়ে যাইনি। ওঁকে জানালাম গুজরাতে আমাদের যোগসূত্র হচ্ছেন চিত্রপরিচালক নরেশ কানোরিয়া এবং তিনি আমাদের কাছে ওঁর সম্বন্ধে শুধুমাত্র ভালো কথাই বলেছেন।

উনি বললেন, ‘ও, তাই বলি। তা না হলে আপনারাও ওই *আল জাজিরা* আর এদেশের আরও অনেক ইয়েলো জার্নালিস্টদের মতো পক্ষপাতযুক্ত মন নিয়েই আমার কাছে আসতেন।’ আমি বললাম গুজরাতের যে হিরে ব্যবসায়ীদের কথা সারা দুনিয়া জানে, তাদের সঙ্গে দেখা করতে চাই। আমার প্রস্তুতিতে কোনো ভুল ছিল না। পাণ্ডের ছেলে সুরাতে হিরের ব্যবসা করেন। সাগ্রহে তাঁর ফোন নম্বর ইত্যাদি আমাকে দিয়ে দিলেন উনি। যে-‘ভাইব্র্যান্ট গুজরাত’ সম্বন্ধে আমরা এত চমৎকার সব কথা শুনেছি, তার ফিল্মস ডিভিশন বা পাবলিসিটি ডিভিশনের কারও সঙ্গে আমার যোগাযোগ করিয়ে দেওয়ারও অনুরোধ জানালাম পাণ্ডেকে। ‘স্যর, আমি কচ্ছ সম্বন্ধে জানতে চাই, সেই সাদা বালি, নতুন হাইওয়ে, শিল্পকৌশল, যা গুজরাতকে ভারতের সবথেকে উজ্জ্বল একটা রাজ্যে পরিণত করেছে। এখানকার সংস্কৃতি সম্বন্ধেও কিছু জানতে চাই।’

দাঙ্গায় তাঁর বিতর্কিত ভূমিকা সম্বন্ধে পাণ্ডে কিছু ইঙ্গিত দেওয়া সত্ত্বেও আমি এমন ভাব দেখালাম যেন এ ব্যাপারে আমার বিন্দুমাত্রও কৌতূহল নেই। উনি আমাকে থিরুপুগজা নামক জনৈক দক্ষিণ ভারতীয় আমলার ফোন নম্বর দিলেন, যিনি আমাদের গুজরাতের, বিশেষত ‘ভাইব্র্যান্ট গুজরাত’ সংক্রান্ত প্রচারাভিযানের ব্যাপারে যাবতীয় তথ্য দিতে পারবেন।

উনি বললেন, ‘আর মৈথিলী, খবরের কাগজে সুহেল শেঠ নামে অত্যন্ত শ্রদ্ধেয় একজন বুদ্ধিজীবীর লেখা এই কলামটা আপনার অবশ্যই পড়া উচিত।’ নিজেকে ভালোভাবেই তৈরি করে রেখেছিলেন উনি। যে-সব লেখায় মোদির

প্রশংসা ছিল তার প্রিন্টআউট বার করে রেখেছিলেন, আর ছিল ইন্ডিয়া টুডে-র একটা কপি যাতে দেওবন্দের মৌলানা ভাস্তানবি মোদির প্রশংসা করেছিলেন—পরে অবশ্য মৌলানা বলেছিলেন ওই লেখায় তাঁর কথাকে ভুলভাবে উদ্ধৃত করা হয়েছে। সুহেল শেঠের কলামের অন্তত ১২টা কপি করিয়ে রেখেছিলেন পাণ্ডে। তার একটা আমাকে দিয়ে বললেন, ‘ছবিটা যদি আমেরিকার গুজরাতিদের জন্য করা হয়, তাহলে আমার ধারণা মোদিজি নিশ্চয়ই আপনার সঙ্গে দেখা করবেন। আমি একটু খোঁজখবর নিয়ে দেখা করার দিন ঠিক করে দেব।’

একটু উৎসাহ দেখিয়ে বললাম পাণ্ডে যাঁর সঙ্গে দেখা করতে বলবেন তাঁর সঙ্গেই দেখা করব আমি, কারণ তিনি গুজরাতের একজন বিদগ্ধ মানুষ, ছবি তৈরির ব্যাপারে তাঁর পরামর্শ আমার একান্তই প্রয়োজন। কথাটা শুনে খুশি হলেন পাণ্ডে।

পরে ক্যান্টিনে ২০ টাকার লাঞ্চ খেতে খেতে মাইককে বললাম—আমরা কিন্তু হেঁজিপেঁজি লোকেদের সঙ্গে কাজ করিছ না। আমার পাতের পাঁপড়ভাজাটা মাইকের পাতে তুলে দিলাম। খুব তারিয়ে তারিয়ে খেল মাইক। ওকে বললাম তেহেলকায় আমার একজন সহকর্মী অতীতে গুজরাতে একটা স্টিং অপারেশন করেছিল, কিন্তু তার কাজ ছিল ঠগ-জোচ্চোর আর দাঙ্গাবাজদের নিয়ে। আমাদের কাজ পোড়খাওয়া আমলাদের নিয়ে, এখানে নিজেদের বানানো কাহিনির ব্যাপারে চূড়ান্ত আত্মবিশ্বাসী থাকতে হবে। মাইক বলল স্টিং অপারেশনের ব্যাপারটা চুকে গেলে একটা চিত্রনাট্য লিখব আমরা। দু’জনেই হেসে উঠলাম।

পি.সি. পাণ্ডের সঙ্গে যখন দেখা করছিলাম, সেই একই সময়ে রাইগার, অশোক নারায়ণ, মায়া কোদনানির সঙ্গেও কথাবার্তা চলছিল আমাদের, এবং প্রত্যেককেই জানাতাম যে অন্যদের সঙ্গেও দেখা করছি আমরা। একদিন পি.সি. পাণ্ডের বাংলোর দিকে যাওয়ার সময় এক চুলের জন্য বেঁচে গেলাম। ওঁর বাড়ির দিকে এগোছি, এমন সময় মাত্র তিনটে বাড়ির পরে একটা বাংলোর সামনে জনৈক অফিসারের একজন আর্দালিকে দেখতে পেলাম—এই আর্দালিটি রানা আইয়ুব নামেই চিনত আমাকে। আমার কৌকড়ানো চুল সাধারণত এলোমেলোভাবে এলিয়ে থাকে, কিন্তু ভাগ্যক্রমে সেদিন চুলটা ভালোভাবে বাঁধা ছিল আর বাঁদনায় মুখের প্রায় অর্ধেক ঢাকা ছিল। পাণ্ডে আমার জন্য দরজায় দাঁড়িয়ে ছিলেন। আমার চুলের পাশ থেকে ঘামের ফোঁটা গালে গড়িয়ে পড়ছে। শরীরের উত্তাপ বেড়ে গেছে। আমি যে ঘামছি, মুখের রং যে পালটে গেছে, পাণ্ডে সেটা লক্ষ করেছিলেন। আমাকে বাড়ির ভিতরে নিয়ে যাওয়ার সময় তিনি বললেন, ‘আপনি ঠিক আছেন তো, মৈথিলী?’ বললাম, ঠিকই আছি। মাত্র মিনিটখানেক আগেই আমার ছদ্ম পরিচয় যে ফাঁস হয়ে যেতে



পারত, তার ধাক্কাটা তখনও সামলে উঠতে পারিনি। আবহাওয়ার পরিবর্তনের ফলে হয়তো একটু জ্বর-টর হয়েছে বলে কাটানোর চেষ্টা করলাম।

আমাকে বসতে বলে পরিচারককে আমার জন্য এক কাপ কফি করতে বললেন উনি, তারপর প্রাথমিক চিকিৎসার সাজসরঞ্জাম আনার জন্য ভিতরে চলে গেলেন। ধার্মোমিটার নিয়ে এসে আমাকে জিভের নীচে দিতে বললেন। আমি তখন কাঁপছি। উনি আমাকে ডাক্তারের কাছে নিয়ে যেতে চাইলেন। এমনটা মাঝেমধ্যেই হয় বলে এড়াতে চাইলাম। ধার্মোমিটারে দেখা গেল উত্তাপ ৯৯ ডিগ্রি। উনি জোর করে আমাকে একটা বিস্কুট আর কফি খাওয়ালেন, তারপর একটা প্যারাসিটামল। ততক্ষণে কিছুটা সামলে উঠেছি। একটু হেসে মিসেস পান্ডের কথা জানতে চাইলাম। কয়েক মিনিট পরেই তিনি এসে হাজির হলেন।

আত্মীয়দের সঙ্গে নেপাল যাওয়ার পরিকল্পনা করছিলেন পান্ডে, অন্তত ভাইয়ের সঙ্গে তাঁর টেলিফোনে কথাবার্তা শুনে তেমনটাই মনে হচ্ছিল। তৎক্ষণাৎ মাথার মধ্যে হিসেবটা খেলে গেল—তার মানে আমার হাতে খুব বেশি সময় নেই। বছর শেষের ছুটিতে যাওয়ার পরিকল্পনা করছিলেন তিনি, বছর শুরুর আগে আমাকেও দেশের কয়েকটা জায়গায় ঘুরে আসার পরামর্শ দিলেন। ঘাড় নেড়ে সম্মতি জানালাম। গুজরাতে-হিন্দু মুসলিম মেরুকরণ নিয়ে আলোচনার সময় পান্ডে আমাকে বলেছিলেন, তাঁর এক আইনজীবী ও বন্ধু প্রায়ই তাঁর বাড়িতে আসেন এবং তিনি একজন মুসলিম। তারপর থেকে পান্ডের বাড়িতে গেলেই আমার বুক দুরদুর করত, কেননা আমেদাবাদের ওই আইনজীবীটিকে আমি চিনতাম, তাঁর হাতে থাকা বিভিন্ন ফৌজদারি মামলার ব্যাপারে অনেকবার তাঁর সঙ্গে দেখা করতে হয়েছে আমাকে। স্নায়ুর প্রবল চাপ সত্ত্বেও, পরবর্তী কয়েক মাস ধরে পি.সি. পান্ডের সঙ্গে কথোপকথন চালাতে কোনো অসুবিধে হয়নি আমার।

প্র: আরএসএসের সঙ্গে গুজরাত কতটা জড়িত?

উ: দেখুন, ওরাই হচ্ছে গুজরাতের বিজেপি সরকারের মেরুদণ্ড। ইসলামিক পার্টিগুলোকে ঠেকানোর একমাত্র সংগঠন ওরাই।

প্র: উনি আরএসএসের কতটা ঘনিষ্ঠ?

উ: হ্যাঁ, উনি আরএসএসের খুবই ঘনিষ্ঠ। ওরা ওঁর খুব কাছের। উনি তো একজন ক্যাডার ছিলেন। এখনকার আরএসএস প্রধান অমরুতভাই কাদিওয়ালা ওঁকে প্রচুর ক্ষমতা দিয়েছিলেন।

প্র: দাঙ্গা কিংবা অন্য নানান ঘটনার ক্ষেত্রে আপনাদের মন্ত্রীদেব ব্যাপারে অনেক কথা শুনেছি আমি। হরেন পান্ডিয়াকে আরএসএস খুব পছন্দ করত, না?

উ: হ্যাঁ, উনি এখানকার খুব জনপ্রিয় মন্ত্রী ছিলেন, গৃহমন্ত্রী, হরেন পাণ্ডিয়া, আরএসএসের খুবই ঘনিষ্ঠ ছিলেন। একই কারণে অমিত শাহ-ও এসেছিলেন, যিনি এখন জেল খাটছেন। উনিও আরএসএসের খুব ঘনিষ্ঠ ছিলেন। গোরধন জাদাফিয়া নামে আর একজন নেতা আছেন, তিনি বিশ্ব হিন্দু পরিষদের খুব ঘনিষ্ঠ ছিলেন।

প্র: আর এঁরা সকলেই গৃহমন্ত্রী ছিলেন। আচ্ছা, সচেতনভাবেই কি এঁদের...?

উ: হ্যাঁ, গৃহমন্ত্রকই পুলিশ অফিসারদের নিয়ন্ত্রণ করে, কাজেই সেখানে (নিজেদের) লোক থাকা ভালো। কেশুভাই মুখ্যমন্ত্রী থাকার সময় গৃহমন্ত্রী ছিলেন হরেন পাণ্ডিয়া।

প্র: গোরধন জাদাফিয়ার সঙ্গে আমার দেখা করাটা কি ঠিক হবে? আপনি কী বলেন?

উ: না, ওঁর সঙ্গে আপনার দেখা করা ঠিক হবে বলে মনে হয় না, কারণ তাহলে বিষয়টা অন্যদিকে চলে যাবে... মানে এটা তো আপনার ছবির অঙ্গ নয়।

প্র: আচ্ছা, আমি দিগ্লিতে গেলে কি অমিত শাহের সঙ্গে আমার দেখা করা উচিত?

উ: হ্যাঁ, অবশ্যই। উনি একজন তাত্ত্বিক নেতা।

প্র: কেন ওঁর সঙ্গে দেখা করতে বলছেন?

উ: ওঁর সঙ্গে দেখা করলে অন্য দিক থেকে ব্যাপারটা জানতে পারবেন। খুব মন দিয়ে কাজ করেন। আরএসএস এবং এই রাজ্য সম্পর্কে অনেক কিছু বলতে পারবেন উনি।

প্র: ওঁর কাছে কি আপনার কথা বলতে পারি? উনি কোথায় থাকেন?

উ: হ্যাঁ, ওঁকে বললেন যে আমি বলেছি। উনি গুজরাত ভবনে থাকেন।

প্র: দাদার ব্যাপারে কি মোদিজির সঙ্গে কথা বলা দরকার?

উ: না, উনি কিছুই বলবেন না।

প্র: এটা কি ওঁর দুর্বল জায়গা?

উ: হ্যাঁ। কথা বলতে যাবেন না।

প্র: আচ্ছা, দাদার সময় কি আপনি ওখানেই ছিলেন?

উ: হ্যাঁ, সেটা আমার জীবনের এক ভয়ংকর অধ্যায়। প্রায় ৩০ বছর চাকরি করছি। কিন্তু ব্যাপারটা দেখুন—১৯৮৫, ৮৭, ৮৯, ৯২ সালেও দাদা হয়েছে, বেশির ভাগ সময় হিন্দুরাই মার খেয়েছে আর মুসলিমরা ছড়ি ঘুরিয়েছে। তাই ২০০২-তে এটাই হওয়ার ছিল, হিন্দুরা প্রতিশোধ

নিয়েছিল। ১৯৯৫ সালের পর লোকেরা মনে করেছিল এখন তাদেরই সরকার আছে, কারণ তখন বিজেপির সরকার ছিল। ওরা বলে আমি নাকি মানুষের কাছে পৌছোতে পারিনি। কেউ তো আমাকে ডাকেনি। আমি তো আর অলৌকিক শক্তিদ্বার নই যে বুঝে নেব কে আমাকে ডাকছে।

প্র: তাহলে মোদি হচ্ছেন পোস্টার বয়?

উ: মল্লিকা সারাভাইয়ের নাম জ্ঞানেন তো? বিখ্যাত নৃত্যশিল্পী। উনি চরম মোদিবিরোধী। লোকে বলে মোদির জন্যই ২০০২-এ দাঙ্গা হয়েছিল। উনি বলেন—আমি তো আর গোধরায় ট্রেনে আগুন জ্বালাতে যাইনি। তা আমি যদি সেটা না করে থাকি, তাহলে তার পরের ঘটনার জন্য আমাকে দায়ী করা হবে কেন? আগের কাজটা যদি আমি করতাম, তাহলে পরের কাজটাও আমি করেছি বলা যেত। এটা আসলে ওখানে যা ঘটেছিল তারই প্রতিক্রিয়া। মানে, যুক্তিসম্মতভাবে বিচার করলে বলতে হয়—একদল মুসলিম গিয়ে ট্রেনে আগুন লাগাল, সেক্ষেত্রে আপনার প্রতিক্রিয়া কী হবে?

প্র: ওদের পালটা মার দিতে হবে?

উ: হ্যাঁ হ্যাঁ, পালটা মার দিতে হবে। এখন এই পালটা মার দেওয়াটা, আপনি নিশ্চয়ই এর মধ্যে পড়াশোনা করে দেখেছেন যে '৮৫, '৮৬, '৯২ সালে এবং আরও নানান সময়ে ওরা (হিন্দুরা) মার খেয়েছে, তাই যা হল, এই সুযোগ, পালটা মার দাও... এতে আর কী মনে করার আছে?

প্র: আর আমি নিশ্চিত যে উনি এটা থামাতে চেষ্টা করেননি।

উ: আসলে লোকে এতটা আবেগপ্রবণ হয়ে পড়লে তাদের আর ঠেকানো যায় না, ইজিপ্টে যেমনটা ঘটেছে।

আপনি বলুন, এদের ওপর কি আপনি গুলি চালাতে বলবেন?

উনি যদি তা-ই করতেন, তাহলে কী হত? আর কি কখনো রাস্তায় বেরোতে পারতেন উনি? এরকম অবস্থায় আপনি কী করে বলবেন যে মোদি এটা বন্ধ করতে পারতেন? রিমোটটা ওঁর হাতে ছিল না।

প্র: কতদিন ধরে দাঙ্গা চলেছিল?

উ: প্রথম পর্যায়টা দু'দিন মতো ছিল, তার বেশি নয়।

প্র: আচ্ছা, মিডিয়া কি দেখাচ্ছিল যে হিন্দুরা মুসলিমদের আক্রমণ করছে?

উ: হ্যাঁ, তাছাড়া আর কী দেখাবে? আবার মুসলিমরাও হিন্দুদের আক্রমণ করছিল। দুটোই একসঙ্গে ঘটছিল। হয়তো শতকরা হিসেবে অনেক কম,

কিন্তু এখানে তো আমরা সমান-অসমান নিয়ে বিচার করতে কিংবা দুটোকে সমানভাবে ব্যালেন্স করতে বসিনি। তবে গোধরায় ট্রেনে আগুন লাগানোর ক্ষেত্রে মুসলিমরাই প্রথমে আক্রমণকারীর ভূমিকা নেয়, তার প্রতিক্রিয়া তো ঘটবেই।

মুসলিমদের অনেক বেশি ক্ষয়ক্ষতি হয়েছে। কিন্তু ওরাও ছেড়ে কথা বলেনি। কোনো হিন্দু ওদের সামনে গিয়ে পড়লে সে খুন হয়ে যেত। এগুলো ওঁকে জিজ্ঞেস করবেন। উনি সব বলবেন।

প্র: ও হ্যাঁ, সিট-এর রিপোর্ট বেরোনের আগের দিন খবরের কাগজে একটা লেখা দেখছিলাম।

উ: হ্যাঁ, দাঙ্গার তদন্ত করার জন্য একটা সিট কমিটি গঠন করা হয়েছিল। সুপ্রিম কোর্টে রিপোর্ট দাখিল করা হয়। তার একটা কপি মিডিয়ার কাছে পৌঁছে যায়, ওই খবরের কাগজটার হাতে। নইলে ওটা কিন্তু গোপন রিপোর্ট ছিল। রিপোর্টে ওঁকে কোনো কিছুর জন্য দায়ী করা হয়নি।

কিন্তু এই রিপোর্টটা যে লিখেছে সে বলেছে ওঁকে দায়ী করার মতো কিছু বুঁজে পায়নি সে।

প্র: আপনাকে অভিযুক্ত করার চেষ্টা হয়নি?

উ: হয়েছে। ওরা বলেছিল, যে-সব অফিসার ওঁর হয়ে কাজ করেছে তাদের অবসরের পরেও পোস্টিং দেওয়া হয়েছে। আমি বললাম, কীসের পোস্টিং? আমার পোস্টিং থেকে আমি কোনো টাকাপয়সা পাই না।

প্র: কিন্তু আপনি রাজ্যের হয়ে কাজ করলে কেন আপনাকে পুরস্কৃত করবেন না উনি? তাহলে কি যারা ওঁর বিরুদ্ধে কাজ করেছে তাদের পুরস্কার দেওয়া হবে?

উ: তা ঠিক, যারা ওঁর বিরুদ্ধে কাজ করেছে তাদের কেন পোস্টিং দেবেন উনি?

প্র: দেওয়া একেবারেই উচিত নয়।

উ: এ ব্যাপারে কোনো প্রশ্নই ওঠে না।

প্র: উনি তো কোনো সন্তান।

উ: তা তো বটেই।

প্র: আপনি রাস্তায় যান, লোকেদের জিজ্ঞেস করুন, পরিমল গার্ডেনে যান।

উ: হ্যাঁ, মানুষ ওঁকে ভালোবাসে।

প্র: আমার মনে হয় এই ভালোবাসার একটা কারণ হল—ওরা যা চায় তা-ই ওদের দিয়েছেন উনি। উনি বুঝেছিলেন ওরা কী চায়। বেশির ভাগ লোক

বলে এখানে কোনো সংখ্যালঘু তোষণ নেই, নিজেদের গৌরব ফিরে পেয়েছে তারা।

উ: হ্যাঁ, অযাচিতভাবেই এই প্রতিদানটা পাওয়া গিয়েছিল।

প্র: আর তাই মুসলিমরা ওঁকে ঘৃণা করে?

উ: একেবারে কট্টর মুসলিমরা করে, কিন্তু তারা তো মিডিয়া যা গেলাচ্ছে তাই গিলছে। ওই দেওবন্দ প্রধান ভাস্তানবির কথাই ধরুন। ইন্ডিয়া টুডে লিখেছে যে ভাস্তানবি বলেছেন গুজরাতে সবাই সমান সুযোগসুবিধে পায়। এর বিরুদ্ধে আপত্তি উঠল, কারণ ওদের মনে হল ২০০২ সালে মোদি যা করেছিলেন তার জন্য তাঁকে সার্টিফিকেট দিচ্ছেন উনি।

আমি (মুকুল) সিনহার বাড়িতে বসেছিলাম, তখন আল জাজিরা চ্যানেলের কয়েকজন সাংবাদিককেও ওখানে বসে থাকতে দেখি।

অর্থাৎ মুসলিম চ্যানেলের লোকেরাও গোধরা কাণ্ডের রায় কভার করতে এসেছিল। ওরা তো আজীবনে বকবেই।

প্র: উনি আমাকে কোনো একটা পত্রিকা দিয়েছিলেন, তা সিট সম্পর্কে একটা রিপোর্ট ছিল।

উ: এ নির্ঘাত কমিউনালিজম কমব্যাট।

প্র: নানা, বলছি দাঁড়ান... তেহেলকা।

উ: ওহ, ওটা হচ্ছে ইয়েলো জার্নালিজমের একেবারে খাঁটি উদাহরণ। তেহেলকার লোকেরা কী করে জানেন? ক্যামেরা নিয়ে ঘুরে বেড়ায় যাতে সবার ছবি তুলতে পারে। ওরা দেখায় এ ওকে টাকা দিচ্ছে, ওটা অভিনয় করে দেখায়, তারপর লোকেদের জানায়। ওদের কথা না শুনলেই সেটা প্রকাশ্যে দেখিয়ে দেয়।

প্র: কীভাবে দেখায় ওরা?

উ: বিভিন্ন চ্যানেলের কাছে ওগুলো বিক্রি করে ওরা। আগে একবার দেখিয়েছিল একজন মন্ত্রী অস্ত্র ব্যবসায়ীদের সঙ্গে টাকা লেনদেন করছেন। খানিক খানিক ছবি দেখানো হয়, কিন্তু পুরো ফুটেজটা দেখায় না। ২০০২ সালের ঘটনা নিয়ে যারা অতিরিক্ত বকবক করে, তাদের দেখায় ওরা। এভাবেই ওরা টাকা কামায়। নিউজ চ্যানেলগুলোর কাছে ফুটেজ বিক্রি করে। যেমন ওই শর্মা, আল জাজিরা-কে সাক্ষাৎকার দেওয়ার কী দরকার ছিল ওর? ওই চ্যানেলে তো সারাক্ষণ দেখাচ্ছে কীভাবে মেয়েদের ধর্ষণ করে পুড়িয়ে মারা হয়েছে। কিন্তু কেন? আসলে এ-সব দেখালে বেশি প্রচার পাওয়া যায়।

প্র: কমিশন নিশ্চয়ই আপনাকেও জিজ্ঞাসাবাদ করেছে?

উ: হ্যাঁ, এখনও করে চলেছে।

প্র: এর আর শেষ হচ্ছে না? আপনাকেও তো নিশ্চয়ই জিজ্ঞাসাবাদ করা হয়েছে?

উ: হ্যাঁ, করা হয়েছে। এখনও করে চলেছে, কারণ এই ছড়িটা দিয়ে নরেন্দ্র মোদিকে আঘাত করা যাবে।

ওদের কাছে ২০০২ সাল একটা সর্বক্ষণের পেশা, যা থেকে টাকা আমদানি হয়।

প্র: আমি জানতে চাই, মানে আপনি তো তখন পুলিশ কমিশনার ছিলেন, তো ব্যাপারটা সামলেছিলেন কীভাবে?

উ: সে এক ভয়ংকর অভিজ্ঞতা। এরকম পরিস্থিতি যে আগে কখনো দেখিনি তা নয়, কিন্তু এটা একেবারে অন্য রকম ব্যাপার ছিল। অনেকটা ইজিপ্টের ঘটনার মতো। আমরা জানি ইজিপ্টে লোকেদের ওপর পুলিশ লেলিয়ে দেওয়ার নিয়ম নেই, তাহলে এখানে যারা প্রতিবাদ জানাচ্ছে সেই জনতার বিরুদ্ধে কী করে পুলিশ পাঠানো যায়? সেটা করলে তারপর কি আমরা আর বেঁচে থাকতাম? পুলিশ পাঠানোটা কোনো সমাধান ছিল না।

প্র: ওই গোধরার ঘটনার সূত্রেই গোটা গুজরাতের ঘটনাগুলো ঘটল?

উ: ঠিক তাই। অযোধ্যা থেকে একটা ট্রেন আসছিল, তাতে ভিএইচপি-র সমর্থকরা ছিল, মূলত ভিএইচপি-র লোকেরা, তারা অযোধ্যায় একটা মন্দির বানাতে চাইছিল। অযোধ্যা থেকে ফিরছিল তারা, মোট ৭৩ জন লোক ছিল। কিছু মুসলিম তাদের ওপর হামলা চালায়, স্থানীয় লোক তারা, পেট্রলের টিন নিয়ে কামরায় ঢুকে আগুন লাগিয়ে দেয়। তাতে ৬১ জন লোক মারা যায়।

এর প্রতিবাদে বনধ ডাকে ভিএইচপি।

২৮ তারিখে হিংসাত্মক কাজকর্ম ছড়িয়ে পড়ে, সবাই রাস্তায় নেমে আসে—বৃদ্ধরা, যুবকরা, মেয়েরা...

প্র: কিন্তু ওঁর বিরুদ্ধে অভিযোগটা কী?

উ: ওদের ধারণা উনিই সবাইকে বেরিয়ে আসার জন্য সংগঠিত করেন। ২৭ তারিখে উনি গোধরায় গিয়েছিলেন...

মানে উনি মুসলিমদের বিরুদ্ধে হিংসাত্মক কার্যকলাপ পরিচালনা করেন।

প্র: এমনও অভিযোগ আছে যে উনি গোধরায় গেলেন অথচ দাঙ্গাকারীদের সঙ্গে দেখা পর্যন্ত করলেন না।

উ: সেটা উনি কেন করবেন? কেন দেখা করবেন?

প্র: ঠিক, যখন হিন্দুরাও খুন হয়েছে।

উ: রাত দশটা-এগারেটা নাগাদ ফিরে আসেন উনি।

প্র: ওদের ধারণা উনি তাঁদের কোনো ব্যবস্থা নিতে বারণ করেছিলেন।

উ: হ্যাঁ, কমিশন আমাকে এই প্রশ্নটা করেছিল। আমি বললাম আমার কাছে এরকম কোনো নির্দেশ আসেনি। বললাম ওঁর কাছ থেকে এরকম কোনো নির্দেশ পাইনি আমি। আমি চেষ্টা করেছিলাম, তা সত্ত্বেও বহু মানুষ খুন হয়েছিল। আমি বলছি না যে সবাইকে আমি রক্ষা করতে পারতাম। আমি তো আর ভগবান নই, তবু যথাসাধ্য চেষ্টা করেছিলাম।

প্র: তার মানে এটাই কি একমাত্র ব্যাপার?

উ: না, আসলে আমার বিরুদ্ধে কেবলমাত্র এটাই বলার ছিল ওদের, কেননা একমাত্র এভাবেই নরেন্দ্র মোদির কাছে পৌঁছাতে পারত ওরা, আমার সূত্র ধরে।

প্র: আর আপনি ওঁর খুবই ঘনিষ্ঠ ছিলেন, সেটাও কি একটা কারণ ছিল?

উ: আমি ওঁর বিরুদ্ধে কিছু বললে খুশি হত ওরা।

প্র: তার মানে আপনার অনেক শত্রু সৃষ্টি হয়েছে, এমনকী পুলিশ বিভাগের মধ্যেও?

উ: জনাদুয়েক আইপিএস অফিসার শত্রু হয়ে গেছে।

প্র: যেমন আমি যে কয়েকজনের কথা শুনেছিলাম, যাঁরা এখানে ভালো কাজ করছিলেন?

উ: হ্যাঁ। রাহুল শর্মা, সতীশ ভার্মা, কুলদীপ শর্মা—এরা।

প্র: হ্যাঁ হ্যাঁ।

উ: ওই কুলদীপ শর্মা। ওঁকে শিপ অ্যান্ড উল (বিভাগ)-এ পাঠানো হয়। উনি এখন সরকারের বিষনজরে পড়েছেন। সরকারের সুনজরে আছেন মুকুল সিনহার মতো লোকেরা।

এ এক বিশাল গল্প, আপনাকে পুরোটা জানতে হবে। তখনকার গৃহমন্ত্রীর বিরুদ্ধে কুখ্যে দাঁড়িয়েছিলেন কুলদীপ শর্মা।

প্র: তখন গৃহমন্ত্রী কে ছিলেন?

উ: অমিত শাহ।

প্র: যিনি গ্রেপ্তার হয়েছিলেন?

উ: কুলদীপ শর্মা মুখ্যমন্ত্রীকে বলেছিলেন যে আপনার গৃহমন্ত্রীটি একটি স্কাউড্বেল। তখন মুখ্যমন্ত্রী নিশ্চয়ই তাঁকে (সেটা) প্রমাণ করতে বলেছিলেন।

প্র: কিন্তু উনি গৃহমন্ত্রীর বিরুদ্ধে গেলেন কী করে?

উ: শুনুন না। তারপর উনি গৃহমন্ত্রীর বিরুদ্ধে সিবিআই তদন্ত চেয়ে মুখ্যমন্ত্রীকে একটা চিঠি লেখার ধৃষ্টতাও দেখান। কিন্তু মুখ্যমন্ত্রী বলেন একজন অবসরপ্রাপ্ত চিফ সেক্রেটারিকে দিয়ে তদন্ত করাব আমি।

প্র: তার মানে (অমিত) শাহ প্রেপ্তার হতে খুব খুশি হয়েছিলেন উনি?

উ: ওঁর প্রেপ্তার হওয়ার পিছনে (শর্মারই) প্রধান ভূমিকা ছিল।

প্র: কীরকম?

উ: সিবিআই আর মিডিয়ার কাছে উনিই সব তথ্য দিয়েছিলেন। পাভিয়ান নামে একজন অফিসারের ফোনকলের রেকর্ড প্রমাণ করে দিয়েছিলেন উনি।

প্র: কীভাবে?

উ: পাভিয়ান আর কুলদীপের পরস্পরের বিরুদ্ধে অন্য কিছু ঘটনা ছিল। একটা ঘটনার কথা খবরের কাগজে ফাঁস করে দেন পাভিয়ান। তখন উনি (কুলদীপ) পাভিয়ানকে জেলে পাঠাতে চেষ্টা করেন। আর পাভিয়ান সত্যিই এনকাউন্টারের ঘটনায় যুক্ত ছিলেন।

প্র: ও, তার মানে এইভাবেই গৃহমন্ত্রীকে ফাঁসাতে পেরেছিলেন উনি?

উ: হ্যাঁ, কারণ গৃহমন্ত্রীর খুবই ঘনিষ্ঠ ছিলেন পাভিয়ান। তিনি ওঁর সঙ্গে কথা বলেন। সেই সূত্রেই উনি প্রমাণ করে দেন যে (অমিত) শাহ এনকাউন্টারে জড়িত ছিলেন।

প্র: আচ্ছা, এনকাউন্টারে কাদের মারা হয়েছিল?

উ: সবক'টাই বদমাশ আর ছুটকো ক্রিমিনাল। আইন যখন তেমন কিছু করতে পারছে না, তখন খতম করে দাও ওদের।

প্র: শুনেছি একজন মেয়েছেলেকে, মানে মহিলাকেও, নাকি সম্মানস্বামী বলে এনকাউন্টারে মেরে দেওয়া হয়েছিল?

উ: হ্যাঁ হ্যাঁ।

তো যা বলছিলাম। আমি ছিলাম ডিজি, পুলিশ বিভাগ থেকে রিটায়ার করব, এই সময় উনিও বিদেশ থেকে ফিরে এলেন। উনি পুলিশের ডিজি হতে চাইলেন। কিন্তু যে-লোকটা সারাক্ষণই সরকারের বিরুদ্ধে কিছু-না-কিছু করছে, সে-রকম একজন লোককে কী করে নিয়োগ করা যায়?



প্র: তাই তো। উনি সরকারের বিরুদ্ধে কাজ করেছেন, ওঁকে কী করে নিয়োগ করা হবে।

উ: ওরকম একজন লোককে (কুলদীপ শর্মা) ওঁরা নিয়োগ করতে পারেন না, তাই ওঁ'ক একটা সাইড পোস্টিং দেওয়া হয়।

প্র: কীরকম?

উ: ওঁকে শিপ অ্যান্ড উল বিভাগের চেয়ারম্যান করে দেওয়া হয়। (হাসি)

প্র: ওহ..., এ তো শাস্তিমূলক পোস্টিং।

উ: হ্যাঁ, শাস্তিমূলক পোস্টিংই বটে। সরকারের বিরুদ্ধে গেলে তো, মানে... মানে তা না হলে ডিজি হওয়ার পক্ষে উনিই ছিলেন সবচেয়ে উপযুক্ত ব্যক্তি।

পুলিশি ব্যবস্থা এবং সংস্কারের ওপর একটা পিএইচডি-ও করেছিলেন উনি। কিন্তু উনি প্রতিশোধ নিতে চাইছিলেন, তা থেকেই সব গড়বড় হয়ে গেল।

মুখ্যমন্ত্রী বরাবরই বলতেন উনি একেবারেই নির্ভরযোগ্য নন। আসলে গৃহমন্ত্রীর সঙ্গে ওঁর ভালো সম্পর্ক ছিল।

প্র: কিন্তু এই গৃহমন্ত্রী তো একটা জিনিস।

উ: তবু আমি ওঁর সঙ্গে দেখা করতে বলব আপনাকে। উনি জামিন পেয়েছেন, কিন্তু শর্ত হল—উনি গুজরাতে যেতে পারবেন না। তাই আমি বলছি আপনি ওঁর সঙ্গে দেখা করুন। উজ্জ্বল ব্যক্তিত্ব। অত্যন্ত বুদ্ধিমান। অনেক ইন্টারেস্টিং ব্যাপার আছে।

প্র: আদর্শবাদী মানুষ?

উ: হ্যাঁ, মনেপ্রাণে আরএসএস-পন্থী।

প্র: এই সবকিছু কেন ঘটছে?

উ: তিস্তা আর সিনহার মতো লোকেরা কিন্তু এটা পছন্দ করে।

যাই বলুন না কেন, জনতার ৮০ ভাগই তো সংখ্যাগরিষ্ঠ হিন্দুরা, কাজেই তাদের দিকটা তো দেখতেই হবে। যেমন কংগ্রেস করে। আর মুসলিমদের অবৈধ কার্যকলাপের হয়ে কেন দালালি করতে হবে বলুন তো? মুসলিমরা যতই বাজে কাজ করুন না কেন, তাদের সমর্থন করতে হবে, আর হিন্দুরা যতই ভালো কাজ করুক, তাদের বিরোধিতা করতেই হবে?

প্র: কিন্তু হিন্দুদের তো এখন নিজেদের একেবারে বেলাগাম বলে মনে করা উচিত?

উ: তাই তো। শহরে গিয়ে হিন্দু আর মুসলিম মহল্লাগুলোয় একবার চক্কর দিলেই বুঝতে পারবেন। বিস্তারিত কল রেকর্ড ঘাঁটতে হয়েছে আমাদের। তার জন্যই আইএস জঙ্গিদের ধরা সম্ভব হয়েছিল (গুজরাত বিস্ফোরণের ব্যাপারে)।

প্র: আরিক্বাস।

উ: কিন্তু সুপ্রিম কোর্ট বলল এদের বিরুদ্ধে মামলা চালানোর দরকার নেই।

প্র: কেন?

উ: সংখ্যালঘু তোষণ।

প্র: সুপ্রিম কোর্টেও এমনটা হয়?

উ: হ্যাঁ, হয়।

এইসব লোকেদের দেওয়ালের গায়ে দাঁড় করিয়ে গুলি করে মারা উচিত। প্রথমে একটা বোমা বিস্ফোরণ হল, ছ'জন মারা গেল, তারপর আর একটা বিস্ফোরণ, তৃতীয়টা ঘটল ট্রমা সেন্টারের কাছে, যেখানে রোগীরা আসে। মুখ্যমন্ত্রীকে ফোন করে আমি বললাম, আপনি যাবেন না। উনি ততক্ষণে কমিশনারের অফিসে পৌঁছে গেছেন। একটা ভ্যানের মধ্যে বোমাটা রাখা ছিল।

কত পরিকল্পনা করে এ-সব ঘটানো হয়। তারপরেও ওদের তোষণ করতে হবে। কেন? ভোটের জন্য।

আমার সবথেকে ঘনিষ্ঠ বন্ধু একজন মুসলিম, তবে সেটা আলাদা ব্যাপার, সে একজন ব্যক্তি মাত্র। ওদের সঙ্গে যেমন খুশি আচরণ করা হোক, আমার কোনো আপত্তি নেই।

প্র: দাঙ্গার সময় মুসলিমরা উচিত শিক্ষা পেয়েছে—এটা ভাবতেও ভালো লাগে আমার।

উ: হ্যাঁ, একটা সময়ে এসে মনে হয় জো ছয়া ঠিক ছয়া। তাই জন্যই ওইসব লোকগুলোকে (মুসলিম) জেলে পাঠাতে পেরে আমি খুব খুশি। দারুণ তৃপ্তি পেয়েছি।

মুকুল সিনহা আর তিস্তার মতো লোকেরা বলবে—এ-সব তো নৈরাজ্য।

হ্যাঁ, নৈরাজ্য, কিন্তু কারা এই নৈরাজ্য সৃষ্টি করেছে? ওই মুসলিমরাই।

কোনো রাজনৈতিক দলের প্রতিই আমার তেমন প্রীতি নেই, তবে কংগ্রেস যদি এইভাবেই চলে, তাহলে আমি হয়তো বিজেপি-র সঙ্গেই থাকব।

প্র: আচ্ছা, এনকাউন্টার সম্বন্ধে আপনার কী মনে হয়?

- উ: দেখুন, ব্যক্তিগতভাবে আমি এনকাউন্টারের বিরুদ্ধে, এ যেন খুন করার মতো ব্যাপার, তবে মাঝেমাঝে এটা প্রয়োজনীয় হয়ে ওঠে।
- প্র: যে-অফিসারের সঙ্গে আমি কথা বলেছিলাম, তিনিই আমাকে এনকাউন্টারের কথা বলেছিলেন।
- উ: আচ্ছা, তার মানে তখন আমার কথা নিশ্চয়ই উঠেছিল। আমি ডিজি ছিলাম ঠিকই, কিন্তু যখন এনকাউন্টার হয়েছে তখন আমি ডিজি ছিলাম না। এনকাউন্টার হয়েছিল ২০০৫ সালে। ঘটনাটার তদন্ত করতে বলা হয়েছিল আমাকে।
- প্র: ও, আচ্ছা।
- উ: কিছু একে (AK) (রাখার) অভিযোগে ধরা হয়েছিল ওই সোরাবুদ্দিনকে, সেগুলো উদ্ধার হয়, পরে (তার) জেল হয়... এই হচ্ছে ওর ব্যাপার। ওই মহিলা (কওসর বাই) তো ওর স্ত্রী-ও ছিল না।
- প্র: ওদের মধ্যে কি কোনো প্রেমের সম্পর্ক ছিল?
- উ: মহিলা ওর সঙ্গে থাকত। তা ওই ধরনের একটা লোকের সঙ্গে থাকলে তার যা ঘটবে ওরও তো তাই ঘটবে। এ তো ঝামেলা ডেকে নিয়ে আসা। আর লোকটা যে কেমন তা যে ও জানত না এমনও নয়। অবশ্য এটা কোনো মানুষকে হত্যা করার কারণ হতে পারে না।
- প্র: কিন্তু স্যার, এটা কি ওরা টাকার জন্য করত নাকি আদর্শের জন্য—মানে হিন্দুত্বের আদর্শের জন্য?
- উ: দুটোই। আদর্শও আছে, আবার টাকার ব্যাপারটাও আছে।
- প্র: আমি শুনেছি এনকাউন্টারের পিছনে একটা বড়ো কারণ ছিল দুর্নীতি—সেটা কি এই জন্যই? টাকার ব্যাপারটা ছিল বলে? সেই জন্যই গৃহমন্ত্রী এবং অফিসারদের প্রেপ্তার করা হয়েছিল?
- উ: হ্যাঁ, অধিকাংশ সময়েই ব্যাপারটার সঙ্গে টাকা জড়িয়ে থাকে।
- প্র: অনেকে বলে ওই গৃহমন্ত্রীর জন্য মুখ্যমন্ত্রীও নাকি প্রায় জড়িয়ে পড়েছিলেন?
- উ: দেখুন, যারা ঘটনাটার তদন্ত দাবি করেছিল তাদের লক্ষ্য গৃহমন্ত্রী ছিলেন না, তাদের লক্ষ্য ছিলেন মুখ্যমন্ত্রী।
- প্র: কিন্তু গৃহমন্ত্রী তো সত্যিই জড়িত ছিলেন, তাহলে...
- উ: না, শুধুমাত্র সেই কারণে মুখ্যমন্ত্রীকে জড়িয়ে দেওয়া যায় না।
- প্র: আচ্ছা, এটিএস প্রধান সিংঘলের ব্যাপারে কিছু বলে দিন আমাকে। আমি তো ওঁকে দলিত হিসেবে দেখাচ্ছি।

উ: সিংখল এমনিতে অফিসার হিসেবে ভালো। আদতে রাজস্থানের লোক, পরে গুজরাতে এসেছে। তবে সোরাবুদ্দিনের এনকাউন্টারে ও ছিল। প্রায় ফাঁসে যাচ্ছিল, কোনো মতে বেরিয়ে যায়। আবার ইশরাতেও এনকাউন্টারেও ছিল।

প্র: এতে তো সরকারের ভাবমূর্তি খারাপ হয়ে যায়।

উ: হ্যাঁ, তা যায়, ক্যাঁ কর সকতে হয়।

প্র: যে-সব অফিসাররা ২০০২-এর ঘটনার সময় ওখানে ছিলেন, তাঁদের ভাবমূর্তি কি গুজরাতিদের মধ্যেও ক্ষুণ্ণ হয়েছে?

উ: গুজরাতিরাও মনে করে কিছু অফিসার আরও ভালো কাজ করতে পারতেন। তাঁরা রুখে দাঁড়াননি, নিজেদের দায়িত্ব পালন করেননি। আমাকে অবশ্য সবাই নিরপেক্ষ বলেই মনে করে।

প্র: কিন্তু আপনাকেও তো হয়রান করা হয়েছে?

উ: না, গুজরাতিরা আমাকে হয়রান করছে না, হয়রান করছে এনজিও-গুলো। দেখুন মৃতদেহগুলো আমেদাবাদে নিয়ে এসে সিভিল হসপিটালে রাখা হয়েছিল। তারপর ওই এলাকায় কিছু উত্তেজনা দেখা দেয়। এখানে-ওখানে আরও কিছু ঘটনা ঘটেছে বলে খবর ছড়াচ্ছিল। আমার দুঃখ হল, যে দুটো জায়গায় হিংসা ছড়িয়ে পড়েছিল সেখানে আমি নিজে যেতে পারিনি, যেতে পারলে নারোডা আর মেঘানিনগরে এমন ঘটনা আমি কিছুতেই ঘটতে দিতাম না।

একটা জায়গায় একজন প্রাক্তন সাংসদ তাঁর সংস্থার ছাদে দাঁড়িয়ে ১০ হাজার লোকের মহড়া নিতে চান। ১২ বোরের বন্দুক থেকে গুলি চালান জনতার দিকে।

প্র: এই লোকটি কে?

উ: এহসান জাফরি, প্রায় ৭৫ বছর বয়সি একজন বৃদ্ধ। উনি আগে রাজ্যসভার সদস্য ছিলেন, এখন তিনিই গুলি চালিয়ে দিলেন। এই গুলি চালানোর ঘটনায় দু'জন মারা যায়—এটা পুলিশ রেকর্ডেই আছে। দ্যাখো আমি কী করতে পারি, এই (ভাবনা) থেকেই এমন আক্রমণ। আমার ১০ হাজার লোক আছে, তোমার আছে ১০০ জন—আমি হলে এমন কাজ করতাম না।

প্র: তাহলে আপনাদের ছাড় দেওয়া হবে কেন?

উ: ঠিক। আপনি বলতেই পারেন পুলিশ কিছু নেহি কিয়া। কিন্তু আমরা তো কাউকে গুলি চালাতে বলিনি। উনি কিছু না করলেই পারতেন। এটাই হচ্ছে ব্যাপার। নারোডাতেও একই ঘটনা ঘটেছিল। ওখানে অতি উৎসাহী একটি

হিন্দু ছেলে একটা মসজিদে উঠে পড়ে। মুসলিমরা তাকে কেটে কুঁচিয়ে ফেলে। হিন্দুরা উত্তেজিত হয়ে ওঠে, তা থেকেই দাঙ্গা শুরু হয়ে যায়।

প্র: আমাকে কেউ কেউ তিস্তা নামে একজন সমাজকর্মীর সঙ্গে দেখা করতে বলছিলেন।

উ: একটা পাকা স্কাউন্ড্রেল। উদয় মহরকরের ফোন নম্বর নিয়ে নিন, উনি ইন্ডিয়া টুডে-র সাংবাদিক।

প্র: সিনহা নামে একজন আইনজীবী আছেন না?

উ: আর একটা স্কাউন্ড্রেল।

উনি নানাবতী কমিশনে লড়ে যাচ্ছেন, বিদেশের লোকেদের থেকে কাঁড়ি-কাঁড়ি টাকা পান। আর ওই মহিলা, তিস্তা শেতলবাড়, উনি শেতলবাড় পরিবারের লোক। আর ওই জাভেদ আনন্দ, ও তখন সাব-এডিটর ছিল। তার আগেই বিয়ে হয়ে গিয়েছিল জাভেদের। তাই তিস্তা ওদের চিনতেন। তিস্তার বাবা এ-সব পছন্দ করতেন না। নিজের বউকে ছেড়ে তিস্তার সঙ্গে থাকতে শুরু করল জাভেদ। তারপর তিস্তার কোনো খোঁজখবর ছিল না, কিন্তু ২০০২ সালের পর গুজরাতে এসে চটজলদি গুজরাতে বাসিন্দা হয়ে লড়তে শুরু করেন উনি। আইনজীবী পরিবারের মেয়ে হওয়ার সুবাদে অবসরপ্রাপ্ত বিচারপতিদের সঙ্গে যোগাযোগ ছিল ওঁর, পরে কমিউনালিজম নামে একটা বই লেখেন ওঁরা। দাঙ্গাপীড়িতদের সমর্থন করতে শুরু করেন তিস্তা, আর মধ্যপ্রাচ্য থেকে টাকা আসতে শুরু করে। সবাই ভেবেছিল বিজেপি হেরে যাবে। গুজরাতে বিজেপি জিতলেও কেন্দ্রে হেরে যায়। তখন থেকেই কেন্দ্রের পোস্টার গার্ল হয়ে ওঠেন তিস্তা।

প্র: ওঁকে থামানোর জন্য আপনারা কিছু করতে পারতেন না?

উ: আমরা কী করে করব? আমাদের ইচ্ছে ছিল, কিন্তু তাহলে আদালতগুলো আমাদের ওপর ঝাঁপিয়ে পড়ত।

প্র: মুখ্যমন্ত্রী কি (তিস্তার ব্যাপারে) নিজের দৃষ্টিভঙ্গির কথা আপনাকে জানিয়েছিলেন?

উ: হ্যাঁ, জানিয়েছিলেন।

প্র: কিন্তু দাঙ্গার দরুনই তো মোদি, মোদি হয়ে উঠতে পেরেছেন, তাই না?

উ: তা ঠিক। দাঙ্গার আগে কে চিনত ওঁকে? কে মোদি? দিল্লি থেকে এসেছিলেন, তার আগে ছিলেন হিমাচলে। বিভিন্ন গুরুত্বহীন রাজ্যের দায়িত্ব দেওয়া হত ওঁকে, হরিয়ানা বা হিমাচলের দায়িত্ব পেতেন না।

প্র: এটাকে তুরূপের তাস বলা যায়, না?

উ: সেই রকমই... দাঙ্গা না হলে উনি আন্তর্জাতিক পরিচিতি পেতেন না। দাঙ্গা একটা ধাক্কা দিল। নেতিবাচক ধাক্কা, কিন্তু তার জোরে উনি অন্তত পরিচিতি পেয়ে গেলেন।

প্র: তাহলে, আপনি কি ওঁর লোক?

উ: তা বলা যায়, কেননা ২০০২-এর দাঙ্গার সময় আমি ওঁর সঙ্গেই ছিলাম, কাজেই আমাকে ওঁর লোক বলতেই পারেন।

দু'মাস ধরে বিভিন্ন কথোপকথনে নানান যন্ত্রপাতির সাহায্যে উপরে উদ্ধৃত এইসব কথা রেকর্ড করা হয়েছিল। নিজেকে মোদির প্রিয়জন মনে করেন পাণ্ডে এবং মোদির সঙ্গে নিজের নৈকট্যের কথা বলতে তিনি দ্বিধা করেননি। আমাকে তিনি খোলাখুলিই বলেছেন মোদি কোনো সন্ত নন বলেই নিজের মতাদর্শের বিরোধী লোকেদের উপযুক্ত পোস্টিং দেন না তিনি। কওসর বাই-এর হত্যাকে তিনি এই বলে ন্যায্য প্রতিপন্ন করার চেষ্টা করেছেন যে সে সোরাবুদ্দিনের সঙ্গে 'ধাকছিল'—সোরাবুদ্দিনকে যে ভূয়ো সংঘর্ষে হত্যা করা হয়েছিল তা ইতিমধ্যেই প্রমাণ করে দিয়েছে সিবিআই।

কথাবার্তার সময় যখনই কোনো অ্যাকটিভিস্টের প্রসঙ্গ এসেছে, তখনই তিনি নির্বিধায় তাদের গুজরাতের দুর্নাম রটনাকারী স্কাউন্ডেল বলেছেন।

শেষের দিকে যখন তিনি বলেন আমার একবার পরিমল গার্ডেনে ঘুরে দেখে আসা উচিত দাঙ্গার পর গুজরাতিরা নিজেদের কতটা ভারমুক্ত মনে করছে, তখন খুব একটা অবাক হইনি আমি।

তাঁর হীরক-ব্যবসায়ী পুত্র নেপাল থেকে ফিরলে তার সঙ্গে সুরাতে আমাকে দেখা করতে বলেছিলেন পাণ্ডে। দিল্লিতে অমিত শাহের সঙ্গে দেখা করার দিনক্ষণ ঠিক করতেও আমাকে সাহায্য করেছিলেন তিনি—ভূয়ো সংঘর্ষের মামলায় জামিন পাওয়ার পর আদালতের নির্দেশে অমিত শাহের তখন গুজরাতে ঢোকা বারণ ছিল। থিক-র সঙ্গেও তিনি কথা বলেন এবং গুজরাতের উন্নয়ন বিষয়ক সমস্ত তথ্য ও রাজ্যে বিনিয়োগ আনার জন্য মুখ্যমন্ত্রী যা যা করেছেন তার তথ্য আমাকে দিয়ে সাহায্য করার অনুরোধ জানান। বিভিন্ন কমিশন পাণ্ডেকে জিজ্ঞাসাবাদ করেছে এবং ভূয়ো সংঘর্ষের মামলায় সিবিআই তাঁকে অভিযুক্ত করেছে। এহসান জাফরির স্ত্রী সুপ্রিম কোর্টে অভিযোগ জানিয়েছেন তাঁর স্বামী ও অন্যান্য মুসলিমদের রক্ষা করার ব্যাপারে পাণ্ডের নিক্রিয়তার জন্য। কিন্তু কোনো কিছুকেই পাণ্ডা দেননি পাণ্ডে। সম্পূর্ণ নিরুদ্বিগ্নভাবে তিনি আমাকে বলেছিলেন যে কেউই তাঁকে ছুঁতে পারবেনা।

পান্ডের সঙ্গে আমার কথোপকথন যখন শেষের দিকে, সেই সময় আমার উৎকর্ষার রোগ খুব বেড়ে ওঠে। কিছুদিনের জন্য এই শহরের বাইরে যেতে চাইছিলাম। দাক্তার সময় গুজরাতের ডিজি চক্রবর্তীর সাক্ষাৎকার নেওয়ার পরিকল্পনা করায় চিন্তাটা বাস্তবায়িত হল, কারণ চক্রবর্তী মুম্বইতে থাকতেন। মুম্বইয়ের খার এলাকার বাসিন্দা ছিলেন চক্রবর্তী! পানি আমার সঙ্গে মুম্বই যেতে চাইছিল। মাইক আবার দিমি গেছে, আমার একজন সহকারী দরকার, তাই পরের বিমানেই মুম্বই চলে গেলাম আমি আর পানি। সঙ্গে একটা শাড়ি নিয়েছে পানি, গুর অফিসের এক সহকর্মী শাড়িটা দিয়েছিল ওকে। আসলে আমার এক অত্যন্ত ঘনিষ্ঠ বন্ধুর বিয়ে আছে এবং সেই বিয়ের উৎসবে পানিকে নিমন্ত্রণ করেছি আমি, সেই জন্যই শাড়িটা সঙ্গে নিয়েছে ও। কাজ মিটে গেলে ভারতীয় সংস্কৃতির কিছু নমুনা দেখানোর প্রতিশ্রুতি দিয়েছিলাম পানিকে।

## নবম পরিচ্ছেদ চক্রবর্তী

অশোক নারায়ণকে চক্রবর্তীর নামে আমার জন্য একছত্র সুপারিশ লিখে দিতে বলেছিলাম আমি। সংবাদমাধ্যম ও গুজরাতের কর্মকর্তাদের মধ্যে নিজের সহকর্মীদের থেকে দূরে কিছুটা নিভূতে বাস করছিলেন তিনি। সংবাদমাধ্যম, আন্তর্জাতিক প্রেস ও বিভিন্ন কমিশন তাঁর ওপর ঝাঁপিয়ে পড়েছিল, কারণ গুজরাতের দাঙ্গার সময় তিনি ছিলেন ডিরেক্টর জেনারেল অফ পুলিশ। মুম্বইয়ে খারের অভিজাত এলাকায় স্ত্রী ও দুই কন্যাকে নিয়ে মোটামুটি শান্তিতে বসবাস করছিলেন তিনি।

চক্রবর্তীর সঙ্গে দেখা করতে যাওয়ার সময় পানিকে বাড়িতে রেখে গিয়েছিলাম। আমার বাড়ির লোকেরা আমাকে মৈথিলীর বদলে নিম্মি বলে ডাকায় একটু খতিয়ে গিয়েছিল পানি। ওকে বলি এটা আমার ডাকনাম। কিন্তু পানি যখনই আমাকে মৈথিলী বলে উল্লেখ করত, আমার মা খুব বিরক্ত হতেন। একদিন রান্নাঘরে গিয়ে আমার আর পানির জন্য প্রাতরাশ বানানোর চেষ্টা করছি, এমন সময় রাগত সুরে মা বলে উঠলেন, ‘অফিসে যে-সব অভিনয়-টভিনয় করিস, সে-সব বাড়িতে নিয়ে আসিস কেন? এটা একটা বাড়ি, কোনো থিয়েটার নয়।’ মা খুবই রেগে গিয়েছিলেন। নাম পালটানো নিয়ে তাঁর মাথাব্যথা ছিল না, আসলে আমি যে বিপদের মুখে দাঁড়িয়ে কাজ করছি সেটাই তাঁকে আতঙ্কিত করে তুলেছিল। আমার জন্য ভয়ানক হয়ে উঠেছিলেন মা। একদিন দেখলাম নিজের ঘরে মা কাঁদছেন। আমার একটা কুর্তা মুঠোয় ধরে আছেন। ‘ওরা যখন খুশি তোকে মেরে ফেলতে পারে, সোনু। আমি স্বপ্নে দেখি একটা ট্রাক তোকে চাপা দিচ্ছে কিংবা ওই যে নিরালা বাড়িতে থাকিস সেখানকার সাপটা তোকে ছোবল মারছে।’ হেসে উঠে মাকে জড়িয়ে ধরে বললাম আমার কোনো বিপদ হবে না। মা ফোঁপাতে লাগলেন।

একটা এসি বাসে করে বাম্পায় গেলাম, সেখান থেকে অটো ধরে খার। এখানেই একটা নাম-করা স্কুলের পাশে থাকেন চক্রবর্তী। একই বাড়িতে একজন ডাক্তারও



থাকেন, যাঁর জন্য স্থানীয় লোকেদের কাছে বিখ্যাত হয়ে গেছে বাড়িটা। চক্রবর্তী নিজেই আমাকে বাড়ির ভিতরে নিয়ে গিয়ে তাঁর সুন্দরী স্ত্রীর সঙ্গে পরিচয় করিয়ে দিলেন। তাঁর স্ত্রী এক রাজপরিবারের মেয়ে। বসার ঘরে আলো খুব কম দেখে দৃষ্টিভ্রান্ত পড়লাম। এত কম আলোয় ছবি উঠবে কী করে? টিউবলাইটগুলো যদি জ্বলে দিতে বলি, তার জন্য কী অজুহাত দেব?

আমার আমেরিকার জীবন সম্বন্ধে জানতে চাইলেন চক্রবর্তী। তাঁর স্ত্রী বললেন তাঁদের মেয়ে আমেরিকায় আছে, সে একজন উঠতি অভিনেত্রী। তাঁর অভিনেত্রী মেয়ের সঙ্গে আমাকে যোগাযোগ রাখতে বললেন, তাঁর ধারণা আমরা দু'জন ভালো বন্ধু হতে পারব। আমি মিসেস চক্রবর্তীর সঙ্গে গল্প করার সময় তাঁদের অন্য মেয়েটি বাড়ি ফিরল। এই ছোটো মেয়েটি একটা নামী বিমান সংস্থায় স্টুয়ার্ডেসের কাজ করে। বিমানযাত্রার সময় বিখ্যাত লোকেরা কেমন অমার্জিত আচরণ করে, তা নিয়ে গল্প করল সে। এক মাসে মোট তিনবার চক্রবর্তীর সঙ্গে দেখা করেছিলাম। প্রথমবারের দেখাটা ছিল খুব অল্প সময়ের। কচ্ছে আমার গুটিং, সেখানকার মৃৎশিল্পীদের সঙ্গে দেখা করা, গুজরাতে বিখ্যাত উস্তরায়ণ উৎসব দেখা—কেবলমাত্র এইসব নিয়েই কথা বলেছিলাম। মিসেস চক্রবর্তীকে বললাম অশোক নারায়ণের বাড়িতে একদিন লাঞ্চে অশোক নারায়ণের স্ত্রী এবং মিসেস চক্রবর্তীর বান্ধবী কী চমৎকার তন্দুরি পনির খাইয়েছিলেন আমাকে। কিছুক্ষণের মধ্যেই খুব স্বচ্ছন্দ হয়ে পড়লেন মিসেস চক্রবর্তী, তাঁর শাড়ির সংগ্রহ এবং পারিবারিক ছবির অ্যালবাম দেখালেন আমাকে।

কথা দিয়ে এলাম পরের সপ্তাহে আবার আসব। গেলামও। এবার মিসেস চক্রবর্তীর জন্য এক বাস্ক প্যাড়া নিয়ে গিয়েছিলাম। উনি আমাকে কফির সঙ্গে নানারকম স্ন্যাকস খেতে দিলেন। কিন্তু চক্রবর্তী খুব কম কথার মানুষ। নিজের একটা জগৎ গড়ে নিয়েছেন তিনি, যে-জগতে অল্প কিছু অতিথি আর বন্ধুরাই শুধু আসেন, বেশিরভাগই তাঁর পেশাদার জীবনের পরিচিত ব্যক্তি। তাঁর স্ত্রী বলছিলেন যে-ক'বার তাঁরা আমেদাবাদে গেছেন, মনে হয়েছে এ কোথায় এসে পড়লেন। তাঁর স্বামী এত ন্যায়পরায়ণ মানুষ হওয়া সত্ত্বেও তাঁর সঙ্গে বহিরাগতের মতো ব্যবহার করত অন্যরা।

তাঁর কথা-কইতে অতি-ইচ্ছুক স্ত্রীর সঙ্গে বকবক করার সময়েও আমি জানতাম কীভাবে চক্রবর্তীর মৌনতা ভঙ্গ করা যাবে। কথার ফাঁকে ফাঁকে গুঁজে দিতাম গুজরাতে যাঁদের সঙ্গে আমার দেখা হয়েছে সেইসব অফিসারদের নাম, যে-সব গুজব শুনেছি সেগুলোও শুনিয়ে দিতাম। সবটাই করতাম চূড়ান্ত অঙ্গতা আর বিশ্বাসের ভান করে। তাতেই বরফ গললো।

চক্রবর্তীর সঙ্গে আমার কথোপকথন লিপিবদ্ধ করার আগে, ২০০২ সালে গুজরাতের সাম্প্রদায়িক দাঙ্গা নিয়ন্ত্রণ করতে না-পারার জন্য মূলতঃ সংবাদমাধ্যম তাঁকে অযোগ্য ডিজি হিসেবে চিহ্নিত করার পর গুজরাতভিত্তিক বিভিন্ন সংবাদপত্রে প্রকাশিত কিছু খবর জানিয়ে রাখা দরকার। আমি যখন তাঁর সঙ্গে দেখা করি সেই সময় নাগাদই তাঁকে নিয়ে কিছু খবর প্রকাশিত হচ্ছিল। এইসব খবর প্রকাশিত হওয়ার কারণ হল—২০০২ সালের ২৭ ফেব্রুয়ারি নরেন্দ্র মোদীর ডাকা মিটিংয়ে সঞ্জীব ভাট উপস্থিত ছিলেন বলে নানান সংবাদপত্রে যে-খবর বেরিয়েছিল, চক্রবর্তী তা অস্বীকার করেছিলেন। তবে একজন কনস্টেবল-সহ অধিকাংশ সাক্ষীই পরে সঞ্জীব ভাটের বক্তব্য সমর্থন করে বলেন যে তিনি তাঁদের সত্য গোপন করতে বাধ্য করেছিলেন। সঞ্জীব ভাটের বক্তব্যের অবশ্য বিশেষ গুরুত্ব ছিল না। তবে ওই একই বছরে সিট-এর তদন্তকারী অফিসার এ.কে. মালহোত্রা সুস্পষ্টভাবে জানান যে সেই মিটিংয়ে আটজন উপস্থিত ছিলেন: মুখ্যমন্ত্রী মোদি, অস্থায়ী চিফ সেক্রেটারি চন্দ্রকান্ত ভার্মা, অ্যাডিশনাল চিফ সেক্রেটারি (হোম) অশোক নারায়ণ, ডিজিপি কে. চক্রবর্তী, আমেদাবাদের পুলিশ কমিশনার পি.সি. পাণ্ডে, সেক্রেটারি (হোম) কে. নিত্যানন্দম, মুখ্যমন্ত্রীর প্রিন্সিপাল সেক্রেটারি পি.কে. মিশ্র এবং মুখ্যমন্ত্রীর সেক্রেটারি অনিল মুকিম।

গুজরাত দাঙ্গা এবং নরেন্দ্র মোদি ও অমিত শাহের অধীনস্থ গুজরাত সংক্রান্ত তদন্তের ক্ষেত্রে চক্রবর্তী একজন সবথেকে গুরুত্বপূর্ণ ব্যক্তি, এবং কেবলমাত্র ২০০২ সালের দাঙ্গার সময়েই নয়, অন্যান্য বিভিন্ন অপরাধের তদন্তের ক্ষেত্রেও তিনি অত্যন্ত গুরুত্বপূর্ণ। ২০০২ সালের মার্চ মাসে *টাইমস অফ ইন্ডিয়া*-র একটি প্রতিবেদনে বলা হয়, পুলিশ দপ্তরে বিভিন্ন বদলির ব্যাপারে গুজরাত সরকারের প্রতি তোপ দেগেছেন ডিজিপি চক্রবর্তী।”

আমি যখন দ্বিতীয়বার চক্রবর্তীর বাড়িতে যাই, তখন আমার গোপন ক্যামেরার সামনে প্রথম মুখ খোলেন তিনি। শোনা যাচ্ছিল তিনি তাঁর অফিসারদের পক্ষে দাঁড়িয়েছিলেন, কিন্তু কোনো বক্তব্যেরই প্রমাণ পাওয়া যাচ্ছিল না। আসলে সংবাদমাধ্যম এবং নিজের সহকর্মীদের কাছে কিছু বলতে অস্বীকার করেছিলেন তিনি।

অন্যান্য কর্মকর্তাদের সঙ্গে কী কথাবার্তা হয়েছে আমার তা বলতে শুরু করার পর অবশেষে মুখ খোলেন চক্রবর্তী, কারণ সম্ভবত তিনি বুঝতে পেরেছিলেন, আমি ইতিমধ্যেই অফ-দ্য-রেকর্ড কথাবার্তায় অনেক কিছু জেনে ফেলেছি। শেষ পর্যন্ত গুজরাত দাঙ্গা প্রসঙ্গে তাঁকে কথা বলাতে সক্ষম হলাম।

‘এর থেকে খারাপ আর কিছু হতে পারে’ না। মোদা ব্যাপারটা হল—দাঙ্গা হওয়ার কোনো যুক্তিসম্মত ভিত্তিই ছিল না। গোধরায় ট্রেনে আগুন লাগানোর

পরই দাঙ্গা শুরু হল। ভিএইচপি-র যে-সব লোকেরা অযোধ্যায় গিয়েছিল, তারাই যে ওই কামরায় ছিল তাতে কোনো সন্দেহ নেই। পুরো ট্রেনটাই ওদের লোকজনে ভর্তি ছিল। কাজেই ওখানে যা ঘটল তারপর দাঙ্গা বেধে গেল। (আমি) বলতে চাইছি, সাধারণত কোথাও দাঙ্গা বাধলে তার একটা কারণ থাকে এবং সেই কারণটা বেশিরভাগ সময়েই স্থানীয় কারণ হয়ে থাকে। এখানে এমন একটা কারণ ছিল যা গোটা হিন্দু সমাজকেই যেন বিপন্ন করে তুলেছিল।

‘দাঙ্গায় কারা যোগ দেয়? গরিব লোকেরা... এখানে সব বড়োলোকেরা রাস্তায় নেমে পড়েছিল। অনেকে ফোন করে বলত, ‘স্যর, শপার্স স্টপ মের্মে মাসিডিজ মের্মে লোগ আ কর লুট রহে হ্যায়।’

‘সুদূর অতীতকাল থেকেই ইতিহাস হিন্দুদের শিখিয়েছে যে গজনি আর বাবর ভারত আক্রমণ করেন, সোমনাথে লুণ্ঠরাজ্য চালান। ফলে এটা এখানকার হিন্দুদের মজ্জায় মিশে গেছে। আর ভারতে তো ১৯৬৫ সাল থেকেই দাঙ্গা হয়ে আসছে। আগেও হাজার হাজার মানুষ মারা গেছে।’

প্র: আমার ধারণা উনি (মোদি) যে আরএসএসের লোক ছিলেন এবং দাঙ্গার সময় আরএসএস আর ভিএইচপি-কে সমর্থন করেছিলেন, এটাই বোধহয় ওঁর বিরুদ্ধে চলে গেছে—তাই না?

উ: এই বাধ্যবাধকতাটা অবশ্যজ্ঞাবী ছিল। যে-মানুষটি আরএসএস ক্যাডার হিসেবেই বেড়ে উঠেছিল, তাঁকে তো তাদের দাবির কাছে নতি স্বীকার করতেই হবে।

প্র: আমিও শুনেছি দাঙ্গার সময় আরএসএসের কাছে নতি স্বীকার করেছিলেন উনি।

উ: ওঁর অবস্থায় দাঁড়িয়ে অন্য কিছু করতে পারতেনও না উনি, বিশেষত যে-সংগঠন ওঁকে গড়ে তুলেছে তারাই যেখানে জড়িত। আর কেউ যদি ক্ষমতালোভী মন্ত্রী হয়, তাহলে তার প্রক্ষেপে কথাটা আরও বেশি করে সত্যি হয়ে ওঠে।

প্র: উনি কি খুবই ক্ষমতালোভী?

উ: হ্যাঁ।

তেহেলকাকে পুরো সম্মান জানিয়েই কথাটা বলছি।

প্র: সেটাকী?

উ: ওটা একটা পত্রিকা, তরুণ তেজপাল ওটা বার করেন। আপনি নিশ্চয়ই পত্রিকাটার নাম শুনে থাকবেন।

চক্রবর্তীর সঙ্গে আমার কথোপকথন লিপিবদ্ধ করার আগে, ২০০২ সালে গুজরাতের সাম্প্রদায়িক দাঙ্গা নিয়ন্ত্রণ করতে না-পারার জন্য মূলত্বোক্তের সংবাদমাধ্যম তাঁকে অযোগ্য ডিজি হিসেবে চিহ্নিত করার পর গুজরাতভিত্তিক বিভিন্ন সংবাদপত্রে প্রকাশিত কিছু খবর জানিয়ে রাখা দরকার। আমি যখন তাঁর সঙ্গে দেখা করি সেই সময় নাগাদই তাঁকে নিয়ে কিছু খবর প্রকাশিত হচ্ছিল। এইসব খবর প্রকাশিত হওয়ার কারণ হল—২০০২ সালের ২৭ ফেব্রুয়ারি নরেন্দ্র মোদির ডাকা মিটিংয়ে সঞ্জীব ভাট উপস্থিত ছিলেন বলে নানান সংবাদপত্রে যে-খবর বেরিয়েছিল, চক্রবর্তী তা অস্বীকার করেছিলেন। তবে একজন কনস্টেবল-সহ অধিকাংশ সাক্ষীই পরে সঞ্জীব ভাটের বক্তব্য সমর্থন করে বলেন যে তিনি তাঁদের সত্য গোপন করতে বাধ্য করেছিলেন। সঞ্জীব ভাটের বক্তব্যের অবশ্য বিশেষ গুরুত্ব ছিল না। তবে ওই একই বছরে সিট-এর তদন্তকারী অফিসার এ.কে. মালহোত্রা সুস্পষ্টভাবে জানান যে সেই মিটিংয়ে আটজন উপস্থিত ছিলেন: মুখ্যমন্ত্রী মোদি, অস্থায়ী চিফ সেক্রেটারি চন্দ্রকান্ত ভার্মা, অ্যাডিশনাল চিফ সেক্রেটারি (হোম) অশোক নারায়ণ, ডিজিপি কে. চক্রবর্তী, আমেদাবাদের পুলিশ কমিশনার পি.সি. পাণ্ডে, সেক্রেটারি (হোম) কে. নিত্যানন্দম, মুখ্যমন্ত্রীর প্রিন্সিপাল সেক্রেটারি পি.কে. মিশ্র এবং মুখ্যমন্ত্রীর সেক্রেটারি অনিল মুকিম।

গুজরাত দাঙ্গা এবং নরেন্দ্র মোদি ও অমিত শাহের অধীনস্থ গুজরাত সংক্রান্ত তদন্তের ক্ষেত্রে চক্রবর্তী একজন সবথেকে গুরুত্বপূর্ণ ব্যক্তি, এবং কেবলমাত্র ২০০২ সালের দাঙ্গার সময়েই নয়, অন্যান্য বিভিন্ন অপরাধের তদন্তের ক্ষেত্রেও তিনি অত্যন্ত গুরুত্বপূর্ণ। ২০০২ সালের মার্চ মাসে *টাইমস অফ ইন্ডিয়া*-র একটি প্রতিবেদনে বলা হয়, পুলিশ দপ্তরে বিভিন্ন বদলির ব্যাপারে গুজরাত সরকারের প্রতি তোপ দেগেছেন ডিজিপি চক্রবর্তী।”

আমি যখন দ্বিতীয়বার চক্রবর্তীর বাড়িতে যাই, তখন আমার গোপন ক্যামেরার সামনে প্রথম মুখ খোলেন তিনি। শোনা যাচ্ছিল তিনি তাঁর অফিসারদের পক্ষে দাঁড়িয়েছিলেন, কিন্তু কোনো বক্তব্যেরই প্রমাণ পাওয়া যাচ্ছিল না। আসলে সংবাদমাধ্যম এবং নিজের সহকর্মীদের কাছে কিছু বলতে অস্বীকার করেছিলেন তিনি।

অন্যান্য কর্মকর্তাদের সঙ্গে কী কথাবার্তা হয়েছে আমার তা বলতে শুরু করার পর অবশেষে মুখ খোলেন চক্রবর্তী, কারণ সম্ভবত তিনি বুঝতে পেরেছিলেন, আমি ইতিমধ্যেই অফ-দ্য-রেকর্ড কথাবার্তায় অনেক কিছু জেনে ফেলেছি। শেষ পর্যন্ত গুজরাত দাঙ্গা প্রসঙ্গে তাঁকে কথা বলাতে সক্ষম হলাম।

‘এর থেকে খারাপ আর কিছু হতে পারে’ না। মোদা ব্যাপারটা হল—দাঙ্গা হওয়ার কোনো যুক্তিসম্মত ভিত্তিই ছিল না। গোধরায় ট্রেনে আগুন লাগানোর

পরই দাঙ্গা শুরু হল। ভিএইচপি-র যে-সব লোকেরা অযোধ্যায় গিয়েছিল, তারাই যে ওই কামরায় ছিল তাতে কোনো সন্দেহ নেই। পুরো ট্রেনটাই ওদের লোকজনে ভর্তি ছিল। কাজেই ওখানে যা ঘটল তারপর দাঙ্গা বেধে গেল। (আমি) বলতে চাইছি, সাধারণত কোথাও দাঙ্গা বাধলে তার একটা কারণ থাকে এবং সেই কারণটা বেশিরভাগ সময়েই স্থানীয় কারণ হয়ে থাকে। এখানে এমন একটা কারণ ছিল যা গোটা হিন্দু সমাজকেই যেন বিপন্ন করে তুলেছিল।

‘দাঙ্গায় কারা যোগ দেয়? গরিব লোকেরা... এখানে সব বড়োলোকেরা রাস্তায় নেমে পড়েছিল। অনেকে ফোন করে বলত, ‘স্যর, শপার্স স্টপ মের্মাসিডিজ মের্মে লোগ আ কর লুট রহে হ্যায়।’

‘সুদূর অতীতকাল থেকেই ইতিহাস হিন্দুদের শিখিয়েছে যে গজনি আর বাবর ভারত আক্রমণ করেন, সোমনাথে লুণ্ঠরাজ্য চালান। ফলে এটা এখানকার হিন্দুদের মজ্জায় মিশে গেছে। আর ভারতে তো ১৯৬৫ সাল থেকেই দাঙ্গা হয়ে আসছে। আগেও হাজার হাজার মানুষ মারা গেছে।’

প্র: আমার ধারণা উনি (মোদি) যে আরএসএসের লোক ছিলেন এবং দাঙ্গার সময় আরএসএস আর ভিএইচপি-কে সমর্থন করেছিলেন, এটাই বোধহয় ওঁর বিরুদ্ধে চলে গেছে—তাই না?

উ: এই বাধ্যবাধকতাটা অবশ্যম্ভাবী ছিল। যে-মানুষটি আরএসএস ক্যাডার হিসেবেই বেড়ে উঠেছিল, তাঁকে তো তাদের দাবির কাছে নতি স্বীকার করতেই হবে।

প্র: আমিও শুনেছি দাঙ্গার সময় আরএসএসের কাছে নতি স্বীকার করেছিলেন উনি।

উ: ওঁর অবস্থায় দাঁড়িয়ে অন্য কিছু করতে পারতেনও না উনি, বিশেষত যে-সংগঠন ওঁকে গড়ে তুলেছে তারাই যেখানে জড়িত। আর কেউ যদি ক্ষমতালোভী মন্ত্রী হয়, তাহলে তার পক্ষে কথাটা আরও বেশি করে সত্যি হয়ে ওঠে।

প্র: উনি কি খুবই ক্ষমতালোভী?

উ: হ্যাঁ।

তেহেলকাকে পুরো সম্মান জানিয়েই কথাটা বলছি।

প্র: সেটাকী?

উ: ওটা একটা পত্রিকা, তরুণ তেজপাল ওটা বার করেন। আপনি নিশ্চয়ই পত্রিকাটার নাম শুনে থাকবেন।

ওই পত্রিকায় বলা হয়েছে দাঙ্গার সময়কার সব অফিসারকেই পুরস্কৃত করা হয়েছে। ব্যক্তিগত কথা বাদ দিলেও বলা যায়—আমি কী পেলাম? সে ঠিক আছে, কিন্তু সবাইকে একই মানদণ্ডে মাপা যায় না, (সেটা) একটা কুসংস্কার।

প্র: যে-সব লোক আপনার সঙ্গে কাজ করেছে তারা অনেকেই দেখল নিজেরা বিতর্কে জড়িয়ে পড়েছি, সেই জন্যই কি আপনিও তোপের মুখে পড়লেন?

উ: কিন্তু সে-রকম হলে তো এ ব্যাপারে তেমন কিছু করাই চলে না।

প্র: কিন্তু আপনি যে-ধরনের মানুষ, তাতে গুজরাতের ডিজিপি হিসেবে টিকে থাকা নিশ্চয়ই খুব কঠিন ছিল?

উ: আমার মনোভাব ছিল—আমার ক্ষমতায় যতটুকু কুলোয় সবটুকু করব। যতজন মুসলিমকে সাহায্য করা সম্ভব, আমি করেছি। বহু মানুষ প্রাণে বেঁচে গিয়েছিল। শুধু এহসান জাফরিকে বাঁচানো গেল না বলে...

প্র: এহসান জাফরি কে?

উ: উনি একজন প্রাক্তন মুসলিম সাংসদ ছিলেন। ওঁকে বাঁচানো যায়নি। উদ্ভাস জনতা ওঁকে খুন করে, ওঁর বাড়ি জ্বালিয়ে দেয়। পুরো মহানগরী জুড়ে আক্রমণ চালানো হয়েছিল। পুলিশ সময়মতো পৌছোতে পারেনি।

প্র: আপনি ডিজি ছিলেন বলেই কি তোপের মুখে পড়লেন?

উ: দেখুন, আমার অধীনে বহু লোক কাজ করত... পুরো একটা সুরবিন্যাস আছে। আমেদাবাদের কমিশনার, তাঁর আইজি, তারপর তাঁর জুনিয়র। আমি কমিশনারকে নির্দেশ দিয়েছিলাম, ব্যাপারটা দেখতে বলেছিলাম ওঁকে। কমিশনার জানালেন তিনি তাঁর অফিসারদের বলেছেন, কিন্তু তাঁরা বাস্তবতার আগেই উনি (এহসান জাফরি) খুন হয়ে যান, যা ক্ষতি হওয়ার হয়ে যায়। নানাবতী বিচারবিভাগীয় তদন্ত কমিশন (ব্যাপারটা) দেখছে। সুপ্রিম কোর্টও বিষয়টা বিচারের জন্য নিয়েছে।

প্র: আমিও ঠিক সেটাই বলছি। অন্যদের অপরাধের জন্য আপনি ভুগছেন আর ওরা এখন রাজ্যের কাছ থেকে পুরস্কার পাচ্ছে?

উ: এটাই তো হওয়ার ছিল।

সেইজন্যই তো বলছি মিডিয়া পক্ষপাতিত্ব করেছে, ওরা কখনোই ঘটনার দুটো দিকের কথা জানতে চায়নি।

প্র: দাঙ্গার সময় আপনি যে-অবস্থান নিয়েছিলেন, তার জন্য আপনি কখনোই ওদের প্রিয়পাত্র ছিলেন না?

উ: আমার তো তা-ই মনে হয়। আমি কখনো ও-রকম হইনি। যা করেছি তা-ই বলতে চেয়েছি সবসময়। সেটা অধীন আওয়াজ ছিল না।

প্র: দাঙ্গার সময়েও কি আপনি নিজের অসন্তোষ প্রকাশ করেছিলেন?

উ: হ্যাঁ। কয়েকটা বিষয় নিয়ে প্রশ্ন তুলেছিলাম, কিন্তু আমাদের এর-ওর-তার হাজারো স্তরবিন্যাস পেরিয়ে কিছু করা মুশকিল।

প্র: সরাসরি মুখ্যমন্ত্রীর সঙ্গে যোগাযোগ করার উপায় আপনার ছিল না?

উ: দেখুন, একটা ব্যাপার আছে। সরকারকে হুকুম দেওয়া যায় না। কাজের একটা পদ্ধতি আছে, একটা ব্যবস্থা আছে। একটা সময়ের পর আর তেমন কিছু করার থাকে না। আপনি কিছু বিষয় সরকারের নজরে আনলেন, সরকার কিছুই করল না। তারপর আপনি আর কী করতে পারেন?

প্র: আপনি যা যা বললেন তা বিচার করে দেখা হল না বলে আপনি কি হতাশ হয়ে পড়েছিলেন?

উ: তা হয়েছিলাম, তবে এটা তো এই ব্যবস্থার অঙ্গ।”

প্র: কিন্তু এ নিয়ে তো আপনার কিছু লেখা কিংবা বলা উচিত ছিল। দাঙ্গার সময়ে ঠিক কী ঘটেছিল।

উ: আমার মেয়েরা বলেছিল...

প্র: দাঙ্গার বিষয়ে গঠিত তদন্ত কমিশনগুলোর ব্যাপারটা কী?

উ: একটা ছিল ব্যানার্জি কমিটির রিপোর্ট। তাতে বলা হয় একটা চক্রান্ত হয়েছিল, কিন্তু তার সঙ্গে বিচারবিভাগীয় প্রক্রিয়ার কোনো সম্পর্ক ছিল না বলে ওটার কোনো গুরুত্ব নেই, কারণ কোনো সাক্ষীকেই জেরা করা হয়নি। তারপর ছিল সুপ্রিম কোর্ট নিযুক্ত সিট, যার কাজ ছিল ব্যক্তিগত ঘটনাগুলোর তদন্ত করা। তারপর রাজ্য সরকার কর্তৃক গঠিত নানাবর্তী কমিশন।

প্র: সকলেই আপনাকে জেরা করেছিল?

উ: হ্যাঁ।

প্র: এগুলোর মধ্যে কোনটা বেশি কার্যকরী ছিল?

উ: ওদের পক্ষে নানাবর্তীই” (কমিশন) বেশি কার্যকরী। নিশ্চয়ই বুঝতে পারছেন আমি কী বলতে চাইছি।

প্র: মানে সরকারের পক্ষে?

উ: ঠিক ধরেছেন। ওদের লোকেরা, প্রসিকিউশন, আসামি পক্ষের মুসলিম আইনজীবীরা। মিডিয়ার কাছে আমি কিছু বলব না। যা বলার উপযুক্ত কমিশনের কাছেই বলব।

প্র: এবং সুপ্রিম কোর্ট নিযুক্ত কমিশনকে নিরপেক্ষ হতে হবে?

উ: আসলে এহসান জাফরির বিধবা স্ত্রীই অভিযোগ জানিয়েছিলেন।

প্র: আপনাদের গৃহমন্ত্রীও তো গ্রেপ্তার হয়েছিলেন? আপনি কি ওঁর অধীনে কাজ করেছেন?

উ: করেছি। ওঁর সঙ্গে আমার সম্পর্ক ছিল আদায়-কাঁচকলায়।

প্র: দাঙ্গার সময়ে?

উ: না, দাঙ্গার পরে। অক্ষরধামের ঘটনার পর উনি আসেন।

প্র: কোনো দুর্নীতিপরায়ণ লোকের (অধীনে) কাজ করতে আপনি রাজি ছিলেন না?

উ: শুধু দুর্নীতিই নয়, মানসিকতাও একটা বড়ো ব্যাপার। উনি গ্রেপ্তার হলেন। (ফোনের) কল রেকর্ড থেকে ওঁর বিরুদ্ধে প্রমাণ পাওয়া গিয়েছিল।

প্র: ওঁর অধীনে কাজ করার সময় আপনি কোন পদে ছিলেন?

উ: ডিজি।

প্র: আপনি রেহাই পেয়ে গেলেন?

উ: না না, উনি আমাকে প্রচুর জ্বালিয়েছেন।

প্র: দাঙ্গার সময় আপনি কি এক জায়গায় আটকে থাকার আতঙ্কে ভুগতেন? আপনি কি লড়াই করেছিলেন?

উ: হ্যাঁ, লড়েছি। ভেতর থেকে লড়ার জন্যও অন্য ধরনের কিছু দরকার হয়। হয় হিন্দুতদার হতে হয়, নয়তো মানুষের আর সংবাদমাধ্যমের কাছে যেতে হয়। টাইমস অফ ইন্ডিয়া বলেছিল, মি. চক্রবর্তীর বিবেক বলে কিছু থাকলে তিনি পদত্যাগ করতেন। কেন আমি পদত্যাগ করব?

আমি কি অপরাধী? আমি কি দাঙ্গাবাজদের প্রশ্রয় দিয়েছি? বরং আমি সর্বশক্তি দিয়ে লোকেদের বাঁচাতে চেষ্টা করেছি। আমি আরও ভেবেছিলাম আমার জায়গায় যিনি আসবেন তিনি হয়তো ওদের সাহায্য করতে পারেন।\*

প্র: আপনি না থাকলে তেমনটা হতেও পারত?

উ: হ্যাঁ।

প্র: বন্ধুডাকা না হলে কি সুবিধে হত?

উ: অবশ্যই হত। ডিএইচপি বনধ ডেকেছিল।

প্র: ওরাই তো সবকিছুর কেন্দ্র ছিল।

উ: ডিএইচপি হচ্ছে শাসকদল বিজেপি-র একটা শাখা।

প্র: উনি কি কিছু না-করার নির্দেশ দিয়েছিলেন?



উ: ওরা আমাকে কোনো বেআইনি নির্দেশ দিত না। উনি নিশ্চয়ই নিজের মৃত্যু পরোয়ানায় সই করতেন না।

প্র: নির্দেশ তো প্রচ্ছন্নভাবেও দেওয়া যায়?

উ: সেটা আলাদা করে একজনকে মুখোমুখি দিতে হয়, ২০ জনের সামনে সেটা দেওয়া যায় না, যাদের মধ্যে ৫ জন হয়তো আপনার বিরুদ্ধে।”

প্র: তাহলে যে-বইটা আপনি লিখতে চাইছেন সেটা বেরোলে কি আমলাতন্ত্র আর পুলিশ বাহিনীর মধ্যে তুলকালাম লেগে যাবে?

উ: আমি কারুর নাম না করে শুধু ঘটনার কথা উল্লেখ করে গেলে তেমনটা হবে না।’

প্র: ওইসব ঘটনার পর থেকে আপনি কি কিছুটা একঘরে হয়ে পড়েছেন?

উ: অশোক নারায়ণ নামে আমার একজন বন্ধু আছে, তার সঙ্গে আমার মতে মেলে। চিফ সেক্রেটারি সুব্বারাও-ও আমার বন্ধু, তবে পুরোপুরি নয়, কেননা ও যা করেছে তার সঙ্গে আমি একমত নই।

প্র: আচ্ছা, ওই ভাটের ব্যাপারটা কী, যার কথা সেদিন বলছিলেন? যে-ওয়েবসাইটের কথা আপনি বলছিলেন, তাতে ওঁর সাক্ষ্য আছে? সত্যি?

উ: উনি এসপি স্তরের অফিসার ছিলেন, সেই অর্থে কথাটা সত্যি নয়। ইন্টেলিজেন্স বিভাগের এসপি। মি. রাইগার ছিলেন অ্যাডিশনাল ডিজি, সেই গুরুত্বপূর্ণ দিনে তিনি অনুপস্থিত ছিলেন। সম্ভবত সেইজন্যই উনি মনে করেছিলেন ওঁর যাওয়া উচিত। কিন্তু মিটিংটা ছিল বিভিন্ন বিভাগের প্রধানদের নিয়ে, কাজেই উনি এর অংশীদার ছিলেন না। আমি সত্যি কথা বলছি কিনা সেটা অশোক নারায়ণকে জিজ্ঞেস করলেই জানতে পারবেন।

প্র: দাফনালয় আপনার কয়েকজন বন্ধুর সঙ্গে দেখা হয়েছে আমার। কয়েকজন অফিসার, পিসি, পিপি..

উ: হ্যাঁ, ওরা সবাই ওখানেই থাকে। কুলদীপ শর্মাও ওখানে থাকে।

প্র: ও হ্যাঁ, পি.সি. পাণ্ডে আমাকে ওঁর সঙ্গে দেখা করতে বলেছিলেন। উনি তো এখন শিপ অ্যান্ড উল বিভাগে আছেন।

উ: কুলদীপ চমৎকার ছেলে। ও সরকারের সমালোচনা করেছে বলে ওকে সরিয়ে দিয়েছে। আগে ও এমন হাবভাব দেখাত যেন কার্যত ওই মুখ্যমন্ত্রী। এটুকু ছাড়া ও খুব ভালো অফিসার। আজ ওরই ডিজি হওয়ার কথা, কিন্তু (ওদের) বিরুদ্ধে কথা বলেছে বলে ওকে সরিয়ে দেওয়া হয়েছে। ওরা

আদালতে গেল না। সরকার এত বুদ্ধিমান যে ওকে একটা সাইড পোস্টিং দিয়ে দিল। ওই মোদি অত্যন্ত বুদ্ধিমান লোক।”

প্র: আচ্ছা, ওই সুব্বারাওকে কেউ পছন্দ করে না কেন? নারায়ণের স্ত্রী বলছিলেন উনি নাকি সরকারের ঢাক বাজিয়ে বেড়ান।

উ: উনি হচ্ছেন চিফ সেক্রেটারি। ওঁকে ওরা পুরস্কার দিয়েছে, কাজেই ভালো ভালো কথা বলতে উনি বাধ্য।

প্র: তার মানে দাঙ্গার সময় সরকারের খুবই ঘনিষ্ঠ ছিলেন সুব্বারাও?

উ: হ্যাঁ হ্যাঁ, একদম, বসের খুবই ঘনিষ্ঠ ছিলেন।

চক্রবর্তী এখানে গুজরাতের চিফ সেক্রেটারি সুব্বারাও-এর কথা বলেছেন। যতজনের সঙ্গে আমি দেখা করেছি তাঁরা প্রত্যেকেই বলেছেন গুজরাতের দাঙ্গার সময় সুব্বারাও ছিলেন মুখ্যমন্ত্রীর নিজের লোক।

একটি সংবাদপত্রের প্রতিবেদনে লেখা হয়েছিল যে সুব্বারাও হচ্ছেন ‘প্রাক্তন চিফ সেক্রেটারি যিনি ২০০৩ সালে অবসর নেন, তাঁকে গুজরাত এনার্জি রেগুলেটরি কমিশন (জিইআরসি)-এর চেয়ারম্যানের পদে বসিয়ে পুরস্কৃত করা হয়। এই পদে সাধারণত গুজরাতের অবসরপ্রাপ্ত বিচারপতিদেরই বসানো হয়ে থাকে। বিশ্লেষকদের ধারণা কেন এই পুরস্কার তিনি পেয়েছেন তা তাঁরা জানেন।’

প্র: আচ্ছা, যারা সরকারের পক্ষে দাঁড়িয়েছিলেন তাঁদের মধ্যে আপনার নামও তো ছিল?

উ: হ্যাঁ, ওই পত্রিকায় (তেহেলকা) বলা হয়েছিল আমি নাকি নানান সুযোগসুবিধে পেয়েছি। কী পুরস্কার পেয়েছি আমি? অন্য সবাই পেয়েছে— চিফ সেক্রেটারি, হোম সেক্রেটারি, পুলিশ কমিশনার।

আসলে কেউ বস্তুনিষ্ঠ হতে চেষ্টা করলে এমনটা হতে পারে না।

প্র: কিন্তু ওই সঞ্জীব ভাট, উনিও তো আপনার নাম বলেছেন?

উ: হ্যাঁ, শ্রীকুমারের সঙ্গেও আপনার দেখা করা উচিত। আপনি কি আমার অফিসে মন্ত্রীর আসার কথা বলেছেন? ওই মন্ত্রী খুব অল্পক্ষণ আমার অফিসে ছিলেন, তাঁর নাম আই.কে. জাদেজা, আমার ওপর প্রচণ্ড রেগে ছিলেন। উনি বললেন, আপকো ফুরসত নেহি হ্যায় মেরে সাথ বাত করনে কা। আমি চাইছিলাম না উনি আমার ঘরে থাকুন। তাই আমার লোককে বললাম ওঁকে অন্য ঘরে বসাতে। আমি আমার কন্ট্রোলের কাজ নিয়ে ব্যস্ত ছিলাম। ওই সঞ্জীব নিশ্চয়ই তখনই মন্ত্রীকে অন্য ঘরে দেখেছিলেন।

কাজেই ওঁর হস্তক্ষেপের কোনো প্রশ্নই ছিল না।

প্র: কিন্তু ভাট ওখানে থেকে থাকলেও আজ আর কেউই সে কথা বলবে না।  
কে-ই বা ঝামেলায় জড়াতে চায়?

উ: দেখুন, এটাই যদি পরম সত্য হয়, তাহলে আমি শুধু এইটুকু বলতে পারি যে সরকার একটা বিচারবিভাগীয় কমিশন নিযুক্ত করেছিল এবং সেটা মার্চ মাসে বিধানসভায় ঘোষণা করা হয়েছিল। তারপর দাঙ্গা শান্ত হয়ে এল আর এই লোকগুলো বলতে লাগল তাদের কাছে সব তথ্য আছে। তাই যদি থাকে, তাহলে তারা (কিছু) না করছে না কেন? কিছুদিনের মধ্যেই তো একটা হলফনামা পেশ করতে পারত তারা। ওই শ্রীকুমার সেটা করেছিলেন। গোটা পাঁচেক হলফনামা পেশ করেছিলেন উনি।

প্র: কিন্তু তেহেলকা-র এই প্রবন্ধে বলা হয়েছে যে এই মানুষটি সত্যটা বলতে পারেন।

উ: আমি ওঁকে জিজ্ঞেস করেছিলাম। কারণ মে মাসে মি. রাইগার বদলি হয়ে গেলেন। দাঙ্গা তখনও চলছে। এই শ্রীকুমারকে তখন ইন্টেলিজেন্স বিভাগের ডিজি হিসেবে নিয়োগ করা হয়। আমি ওঁকে একটা হলফনামা পেশ করতে বলি। উনি পেশ করেন। নিজের দায়িত্বেই করেছিলেন, আমার বা অন্যদের ব্যাপারে একটা কথাও ছিল না। মাস দুয়েক পরে উনি আর একটা হলফনামা পেশ করেন, তাতে উনি জানান মি. চক্রবর্তী হ্যান বলেছেন, ত্যান বলেছেন। তখন আমি একটা উত্তর দিয়ে বলি, মি. শ্রীকুমার কেন হলফনামা পেশ করেননি। উনি যদি এতই রামচন্দ্র কি আউলাদ হন তাহলে তো তখনই কাজটা করা উচিত ছিল ওঁর। আসলে ওঁকে টপকে অন্যকে প্রমোশন দেওয়া হয়েছিল বলেই এ-সব বলেছেন উনি। তারপর আমি মুম্বইতে চলে আসি।

এই কথাগুলো কখনো কোথাও বলবেন না। উনি রোজ আমায় ফোন করে বলতেন—স্যর, অনুগ্রহ করে একবার গুজরাতে আসবেন, আমি সরকারের বিরুদ্ধে ক্যাট (CAT)-এ একটা কেস করতে চাই। ওঁকে প্রমোশন দেওয়া হয়নি বলে কেস করবেন। আমি বলতাম আমার পক্ষে যাওয়া সম্ভব নয়, কারণ আমি মুম্বইতে আছি। অনেক সময় ওরা (ওঁর বাড়ির লোকেরা) ফোন ধরত। উনি বলতেন—স্যর, ক্যাট-এর সামনে আপনি শুধু বলবেন যে শ্রীকুমার সত্যি কথা বলছে। তো আমি বললাম—এ কথা আমি কী করে বলব? ২০০২ আর ২০০৫ সাল কোথায় গেল? আজ এ-সব কথা বলেছেন কেন? তাই আমাকে অভিযুক্ত করে

আমার বিরুদ্ধে তিনটে হলফনামা লেখেন উনি। ঘরে বসে ডায়েরি লেখেন, কোনো সরকারি কেস ডায়েরি না।

ওই ভাটও ওঁর জাতওয়ালা।

সবকিছু যখন ঠিকঠাক ছিল, তখন এইসব লোকেরাই সরকারের পক্ষে ছিল।

প্র: আচ্ছা, জাদেজার মিটিংটাই কি বিতর্কিত মিটিং?

উ: না, সেটা ছিল মুখ্যমন্ত্রীর মিটিং।

প্র: সেই মিটিংয়ে ভাট উপস্থিত ছিলেন?

উ: না। আগেই বলেছি, রাইগার মিটিংয়ে অনুপস্থিত ছিলেন। তখন ভাট নিজেই ঠিক করেন তিনি মিটিংয়ে থাকবেন।

কিন্তু অশোক নারায়ণের মনে হয় যেহেতু মিটিংটা শুধুই প্রধানদের নিয়ে, অতএব সেখানে ভাটকে থাকতে দেওয়া যায় না। যদি ঘোলা জলে মাছ ধরতে চাও, তাহলে গিয়ে নিজের মুখটা দেখাও।

তবে স্বর্ণকান্ত ভার্মার কিন্তু মিটিংয়ে আসার ন্যায় অধিকার ছিল।

প্র: তার মানে প্রত্যেকেই কোনো-না-কোনো বিতর্কে জড়িত—হয় এনকাউন্টারে, নয়তো দাঙ্গায়।

উ: হ্যাঁ। এমনকী খোদ গৃহমন্ত্রী পর্যন্ত গ্রেপ্তার হয়ে গেলেন।

প্র: সব অফিসাররাই কি ওঁকে অপছন্দ করেন?

উ: হ্যাঁ হ্যাঁ, সবাই ওঁকে ঘৃণা করে।

প্র: তাহলে ওঁর মতো লোক গৃহমন্ত্রী হলেন কী করে?

উ: রাজনৈতিক যোগাযোগের সূত্রে। অমিত শাহের সঙ্গে আমার সম্পর্ক ছিল একেবারে আদায়-কাঁচকলায়। এসিবি-তে থাকার সময় ওঁর বিরুদ্ধে একটা কেস করেছিলেন কুলদীপ।

প্র: আপনার সঙ্গে শাহ কী করেছিলেন?

উ: আমি কখনো কোনো কাগজে সই করতাম না।

প্র: আপনারা সকলে অভিযোগ জানাননি কেন?

উ: ওঁর রাজনৈতিক জোর ছিল খুব বেশি। যতদিন ওরা লিখিত নির্দেশ দিত। একমাত্র ভালো ব্যাপার হল, সব চিঠিতে উনি নিজে সই করতেন, এমনকী পিএ-কেও করতে দিতেন না। প্রথমে উনি ভাবতেন ইনকো বদলনা হয়, ইনকো চেঞ্জ করা হয়, কিন্তু পরে নিজেই সব নির্দেশে সই করতেন। এমন সব নির্দেশে সই করতেন যে-কাজগুলো জুনিয়র কর্মীদের করার কথা—দেশের ইতিহাসে এমন কাণ্ড এর আগে ঘটেনি।

প্র: কেমন নির্দেশ?

উ: বিভিন্ন কর্মকর্তাকে বদলি করার নির্দেশ। ইয়ে মেরা আদমি হ্যায়, উসকো ইহা রাখো। তো আমি ওঁকে বলতাম—স্যর, গভর্নমেন্ট অর্ডার দেগা তো ম্যায় করেগা। অমনি পরের দিনই অর্ডার এসে যেত। এভাবেই শাহের ক্রোধের হাত থেকে বেঁচে গিয়েছিলেন অশোক নারায়ণ।

প্র: আর এই মন্ত্রী মায়া কোদনানি?

উ: হ্যাঁ, উনি নারোডা মামলায় জড়িত ছিলেন। ব্যাপারটা এখন সুপ্রিম কোর্টের হাতে।

প্র: কিন্তু ওঁকে দেখলে তো নিপাট ভালোমানুষ বলেই মনে হয়। উনি কি সত্যিই জড়িত ছিলেন?

উ: হ্যাঁ, ছিলেন। আরএসএসের লোক। বাইরে থেকে দেখে সবাইকে চেনা যায় না।

চক্রবর্তী একজন পরস্পরবিরোধী ব্যক্তিত্ব। নিজের লোকেদের সম্বন্ধে অনেক তিক্ত সত্য জমে আছে তাঁর মনে। যেমন তিনি মনে করেন ন্যায়বিচারের জন্য অনেক দেরিতে (শ্রীকুমারের মতো) মুখ খুলেছেন তাঁরা। সত্যিই হয়তো শ্রীকুমার একটু বেশি দেরিতে মুখ খুলেছেন এবং সঞ্জীব ভাটের বক্তব্যের উপযুক্ত ওজন বা বাস্তব প্রমাণ নেই, কিন্তু তার জন্য কি রাজ্যের ডিজি হিসেবে চক্রবর্তী যাবতীয় দায়িত্ব থেকে রেহাই পেয়ে যাবেন? আসলে কোনো ডিজি কিংবা পুলিশের অন্য যে-কোনো কর্তাব্যক্তির পক্ষে সরকারের উচ্চপদস্থ ও ক্ষমতাশালী লোকেদের সঙ্গে টক্কর দেওয়া খুবই কঠিন। এক্ষেত্রে তাঁদের সামনে ছিলেন অমিত শাহ, যাঁর সম্বন্ধে সিংঘল, রাইগার, অশোক নারায়ণ, প্রিয়দর্শী এবং চক্রবর্তী-সহ সকলেই বলেছেন যে তিনি আইনশৃঙ্খলার কোনো ধার ধারতেন না এবং কার্যকর্তাদের বিভিন্ন বেআইনি নির্দেশ দিতেন। কিন্তু চুপ করে থেকে চক্রবর্তী কি সাম্প্রদায়িক দাঙ্গার অপরাধীদের বিচারের পথ প্রশস্ত করছিলেন?

## দশম পরিচ্ছেদ মামা কোদনানি এবং অন্যরা

### মামা কোদনানি

আমেদাবাদে জীবনটাকে দিব্যি উপভোগ করতে শুরু করেছিলাম। অথবা, অজয়ের ভাষায়, একজন খাঁটি আমদাবাদি হয়ে উঠেছিলাম। রাত একটার সময় আমেদাবাদের 'আপার ক্রাস্ট' (একটা বিখ্যাত বেকারি) থেকে কীভাবে আপেলের সিঁথে জোগাড় করতে হয়, তা শিখে গিয়েছিলাম। হস্টেলের মেয়েদের সঙ্গে রাত দুটোর সময় ডিম খাওয়ার জন্য বাইরে বেরোতাম। দুর্গাপূজোর প্যাণ্ডেলে আর ন দিন ধরে চলা গরবা-য় নেচে নেচে পানির আর আমার পা লাল হয়ে যেত।

লাঞ্চ খাওয়ার একটা জায়গা আবিষ্কার করেছিলাম আমরা। সেখানে দারুণ কাথিরাবাড় ঘাটিয়া আর লাল লঙ্কা দিয়ে সাজানো লাঞ্ছের নানান চমৎকার পদ পাওয়া যেত। একবার তিন দিনের জন্য নেহরু ফাউন্ডেশনের ঘর ছেড়ে দিতে হয় আমাকে, তখন ছাত্রী হিসেবে এনআইডির হস্টেলে জায়গা পেয়ে যাই। অন্য একজন ছাত্রীর সঙ্গে এক ঘরে থাকতাম, সে সারা রাত জেগে একেবারে ভোর পর্যন্ত প্রেমিকের সঙ্গে ফোনে কথা বলত। গোটা ছাত্রজীবনে হস্টেলে থাকার খুব ইচ্ছে ছিল আমার, জীবনের সেই দিকটা যেন উপভোগ করছিলাম আমেদাবাদ।

তবে সবই খুশির খবর ছিল না। মাইকের চলে যাওয়ার সময় এসে পড়ল। 'পাকওয়ান'-এ গেলাম আমরা। বিদায়ী নৈশভোজ হিসেবে ওর প্রিয় থালি নেওয়া হল। ওর ল্যাপটপে আমেদাবাদের অসাধারণ কিছু ছবি ছিল। এতদিনে বেশ ভালো হিন্দি বলাও শিখে নিয়েছিল ও। সারা রাত গল্প করে যে যার ঘরে ফিরলাম। সকাল দশটায় দিল্লি যাওয়ার বিমান ধরল মাইক। পরের দিন সকালে আমার ঘরের দরজার নীচে একটা ছবি আর একটা ময়ূরের পালক দেখতে পেলাম। ছবিটা ডগবান শ্রীকৃষ্ণের, তার পিছনে মাইক হিন্দিতে লিখেছে: প্যারি মৈথিলী, আপনা খেয়াল রাখনা। আমার বন্ধু, আমার সাক্ষনা, আমার অপরাধের সঙ্গী চলে গেছে আমাকে

ছেড়ে। কথা বলার মতো এমন আর কেউ নেই যে রানা আইয়ুবকে চেনে। শেষ কাজটুকুর জন্য ২০১১ সালে একদিনের জন্য আমেদাবাদে আসবে মাইক।

২০১৩ সালে কিছু নথিপত্র পাওয়ার জন্য আবার আমেদাবাদ যেতে হয়। মায়া কোদনানি তখন জেলে। আমার স্টিং অপারেশন শেষ, সেটা কবে দিনের আলো দেখবে তার জন্য অপেক্ষা করছি এবং তেহেলকা-য় কাজ করে চলেছি। নথিপত্রগুলোর জন্য যে-অফিসারের সঙ্গে দেখা করলাম তিনি বললে মায়াবেনের সঙ্গে জেলে দেখা করেছেন তিনি। আরও বললেন, জেলে মায়াবেনকে গুশোর কিছু বইপত্র পাঠানোর কথা ভাবছেন। শুনে চমকে উঠলাম। তিনি বললেন, ‘উনি খুব কাঁদছিলেন, ওঁকে ছাড়িয়ে আনতে বলছিলেন। প্রায় অপ্রকৃতিস্থ হয়ে পড়েছেন। আধ্যাত্মিকতা হয়তো ওঁকে সাহায্য করতে পারে।’

স্টিং অপারেশন চালানোর সময় একদিন বিকালে যখন মায়াবেনের বাড়িতে লাঞ্চ খেতে যাই, উনি আমাকে আমরা খেতে দিয়েছিলেন। আমার মরশুম তখন শেষ। আমার চাটনি বানিয়ে নিজের ছেলের জন্য রেখে দিয়েছিলেন তিনি—খুব শিগগিরই আমেরিকা থেকে তাঁর ছেলের আসার কথা ছিল। আমাকে জড়িয়ে ধরে উনি বলেছিলেন, ‘তুমি খাও, তাহলে মনে হবে আমার ছেলেই খাচ্ছে। তুমি আমার মেয়ের মতো, মৈথিলী।’

সেদিন বিকালে ওঁর কাছে গীতাসার ব্যাখ্যা করেছিলাম, বলেছিলাম এটা আমার সংস্কৃত-শিক্ষক বাবার কাছে শেখা। যে-মেয়ে বিদেশে থেকেছে সে যে এখানকার বাসিন্দাদের থেকেও ধর্ম সম্বন্ধে বেশি জানে, তা দেখে খুব খুশি হয়েছিলেন তিনি। ‘বুঝলে মৈথিলী, আমরা আমাদের সংস্কৃতি পুরো হারিয়ে ফেলেছি। ওই মুসলিমগুলোর কথা ভাবো। ওদের বাচ্চাগুলো পর্যন্ত একেবারে কট্টর।’ ঘাড় নেড়ে সম্মতি জানালাম। লাঞ্চে মাত্র দু’রকম নিরামিষ পদ ছিল—পাঁপড় আর পুরি। মায়াবেন নিজেই রান্না করে পরিবেশন করেছিলেন।

সেদিন সন্ধ্যায় আমরা কথা বলা শুরু করি। মুসলিমদের যে উনি ঘৃণা করতেন তাতে কোনো সন্দেহ নেই, কিন্তু কথাবার্তার সময় মোদির প্রতি ওঁর ঘৃণাটা আরও স্পষ্টভাবে ফুটে উঠেছিল। নিজের অপছন্দের লোকেদের শেষ করার জন্য ওঁর এবং গোরধন জাদাফিয়ার বিরুদ্ধে মামলাগুলোকে যে নিজের সুবিধেমতো ব্যবহার করেছেন মোদি, সেটা বুঝিয়ে দিতে কোনো কার্পণ্য করেননি মায়াবেন।

‘এই নতুন প্রজন্ম, এদের কিছু নেই, কোনো আদর্শ নেই, (চোখের সামনে) কিছু ঘটতে দেখলেও এরা রাস্তায় নামবে না।’

‘আমাদের ধর্মে কী শেখানো হয় ভাবো—একটা পিঁপড়েকেও আঘাত কোরো না। একেবারে ছোটোবেলা থেকেই আমাদের বাচ্চাদের এ-সব শেখানো হয়। আর ওইসব লোকেদের ছোটোবেলা থেকে শেখানো হয় খুন করো, খুন করলে তবেই বোঝা যাবে যে তুমি একজন মুসলিম। ইয়ে লোগ ক্যা শিখাতে হ্যায় কি আপ এক আদমি কো ভি মুসলমান বানাও তো আপনো জন্মতি পরি মিলেগা। মাদ্রাসাগুলোয় এইসবই শেখানো হয়। আরে নিজের ছেলেমেয়েকে অন্তত এটুকু তো শেখাও যে তোমরা ভারতীয়। পাকিস্তান জিতলে তোমরা বাজি ফাটাবে, এটা কিছুতেই মেনে নেওয়া যায় না।

প্র: আভি ইন লোগোঁ কো ২০০২ কে বাদ কম নেহি ছয়া?

উ: হ্যাঁ, আভি খোড়া কম ছয়া ছ্যায়।

প্র: আচ্ছা, আপনি কি প্রায় আট ঘণ্টা আদালতে থাকেন?

উ: আর কী করব? আমার প্র্যাকটিস কমে যাচ্ছে। কিন্তু আদালতে না গিয়েও উপায় নেই, কারণ আরও ৮০ জন আছে। নইলে তিস্তার মতো লোকেরা চ্যাচামেচি জুড়ে দেবে।

প্র: আচ্ছা, একটা কথা বলুন। নরেন্দ্র মোদির চারপাশে প্রচুর মোসাহেব আছে, না? মানে সব ভালো কাজের কৃতিত্বই ওঁকে দেওয়া হয়, তাই না?

উ: ব্যাপারটা এখন ঠিক আছে, ভবিষ্যতে এর ফল খারাপ হবে।

প্র: আপনি কি ওঁর কাছে মানুষ?

উ: কাছের মানুষ ছিলাম।

প্র: গুজরাতিদের জন্য আপনি যা করেছেন, তার জন্য গুজরাতিরা নিশ্চয়ই আপনাকে ভুলতে পারবেনা।

উ: ওরা আমাকে কখনও ভুলবেনা। ওরা আমার পাশে আছে।

প্র: ওই অমিত শাহের ব্যাপারটার পর মোদি কী করছেন?

উ: আমি গ্রেপ্তার হওয়া আর জামিন পাওয়ার পর ওঁর সঙ্গে আর কথা হয়নি আমার। (ওই ঘটনার পর) সম্ভবত দু'জায়গায় দু'বার ওঁর সঙ্গে দেখা হয়েছিল আমার।

প্র: আপনাকে দেখলে ওঁর প্রতিক্রিয়া কেমন হয়?

উ: কোনো প্রতিক্রিয়াই দেখান না, কোনো কথাও বলেন না। অবশ্য উনি বললেও আমি উত্তর দিতাম না। তবে সেটা আমার সমস্যা, আমিই সমাধান করব। ঈশ্বর আমাকে সাহায্য করবেন। অন্য কারুর থেকে সাহায্য চাইতে যাব কেন?



আমি জানি আমি নির্দোষ, ঈশ্বর আমাকে সাহায্য করবেন। আমি ওখানে ছিলামই না, মৈথিলী। ওখান থেকে ২০ কিলোমিটার দূরে ছিলাম। সোলায় ছিলাম আমি। বিধানসভায় গেলাম, সাড়ে আটটা থেকে বিধানসভার কাজ শুরু হল। আমি ওখানে গিয়েছিলাম। নিজের বাড়ি থেকে বেরিয়ে আনন্দীবেনের অফিসে যাই। আমরা দু'জনে ওখানে গিয়েছিলাম। ওখানে গল্প করছিলাম।

প্র: তার মানে আনন্দীবেনকেও কি জিজ্ঞাসাবাদ করা হয়েছে?

উ: আমি জানি না। ওখান থেকে আমি হাসপিটালে যাই, কারণ সমস্ত মৃতদেহগুলো সোলা সিভিল হাসপিটালে রাখা ছিল। আমার নার্সের বাবা গোধরার ঘটনায় নিহত হন, তাঁর মৃতদেহ শনাক্ত করার জন্য ওখানে যেতে হয় আমাকে। অমিত শাহ আর আমি সিভিল হাসপিটালে যাই। সেখানে হিন্দুরা পর্যন্ত আমার ওপর অত্যাচার চালায়—প্রচণ্ড খেপে ছিল ওরা। আমার আর অমিত শাহের বিরুদ্ধে ওরা চিৎকার করছিল। পিআই তাঁর নিজের গাড়ির দিকে নিয়ে যান আমাকে, গাড়িতে করে আমাকে (বার করে) আনেন।

প্র: অভিযোগটাকী?

উ: ওরা নানান সাক্ষীকে দিয়ে প্রমাণ করতে চাইছে যে আমি দাঙ্গায় উসকানি দিয়েছি, আমিই জনতাকে নেতৃত্ব দিয়েছি। আমি আমার হাসপিটালে চলে এসেছিলাম . . . একজন মহিলার বাচ্চা হওয়ার সময় হাজির থাকতে হয়েছিল। বেলা তিনটের সময় হাসপিটালে যাই আমি। ওরা বলছে আমার মোবাইল তখন এই এলাকাতেই ছিল। অর্থাৎ আমি ওখানে উপস্থিত ছিলাম।

প্র: গোরধন জাদাফিয়া তো গৃহমন্ত্রী ছিলেন। ওঁকেও কি একই কারণে সরিয়ে দেওয়া হয়?

উ: না। মুখ্যমন্ত্রীর সুনজরে ছিলেন না বলেই সরানো হয় ওঁকে।

প্র: তার মানে অমিত শাহের ক্ষেত্রে মুখ্যমন্ত্রী যেভাবে সাক্ষীদের ব্যবহার করেছিলেন, গোরধনভাইকে বাঁচানোর জন্য তেমনটা করেননি?

উ: না (হাসি)।

প্র: অর্থাৎ দাঙ্গার ছুতোয় গোরধন জাদাফিয়াকেও ঝেড়ে ফেললেন উনি?

উ: একদম তাই।

প্র: তার মানে যাঁদের উনি পছন্দ করতেন না, তাঁদের ঝেড়ে ফেলার একটা ভালো উপায় হয়ে উঠেছিল এটা?

উ: হ্যাঁ।

প্র: এই অমিত শাহের ব্যাপারটা কী?

উ: উনি হচ্ছেন ওঁর লোক, ওঁর খুবই ঘনিষ্ঠ।

প্র: আমি ভাবতাম আনন্দীবেন হচ্ছেন ওঁর লোক।

উ: আনন্দীবেন হচ্ছেন ডান হাত আর উনি বাঁ হাত। অমিত শাহকে বাইরে আনার জন্য সবরকম চেষ্টা করেন উনি। আদবানি ওঁর সঙ্গে দেখা করতে আসেন। সুষমা স্বরাজ ওঁর বাড়িতে গিয়েছিলেন।

প্র: কিন্তু আপনি গ্রেপ্তার হওয়ার পর এ-সব কিছুই করা হয়নি?

উ: কী আর করা যাবে। ঈশ্বর আছেন।

দেখেশুনে মনে হচ্ছে ওঁকেই প্রধানমন্ত্রী হিসেবে তুলে ধরা হবে। আউর উসকো টক্কর দেনেওয়ালা ভি কোই নেহি হয়। আনন্দীবেনকে মুখ্যমন্ত্রী বানিয়ে দেবেন উনি।

প্র: ইয়ে সব লোগ কিতনা বোলতে হয় উনকে পিছে। ইয়ে আপকে এনকাউন্টার কপ্‌স্‌ভি ইয়েহি বোলতে হয় কি ইউজ অ্যান্ড প্রো কিয়া?

উ: হাঁ, বানজারা বহুত আচ্ছা থা। দেখো, এনকাউন্টার্স তো কিয়া ইন লোগো নে, লেকিন জো সাহি বজা হয়, এনকাউন্টারগুলো কেন ঘটেছে ইয়ে কিঁউ নেহি সামনে আ রহা। জৈসে কি সোরাবুদ্দিন কো মারা টেরিস্ট বোলকে, উসকি ওয়াইফ কো কিঁউ মারা, উয়ো তো টেরিস্ট নেহি থি না। ওই কওসর বাই। লোকটা খারাপ ছিল, তাকে এনকাউন্টারে মারতে পারো, তার বউকে মারলে কেন?

প্র: হরেন পাণ্ডিয়া আর গোরধন জাদাফিয়া দোনো কো নিকাল দিয়া না?

উ: গোরধনভাই তো ঠিক থে, হরেন পাণ্ডিয়া খুব কাজের লোক ছিলেন।

প্র: লেকিন গোরধন কো ভি তো রায়টস মেঁ ইউজ করকে ফ্যেক দিয়া ইসনে?

উ: ঠিক তাই।

সারা গুজরাত জুড়েই দাঙ্গা হল, কিন্তু ওরা শুধু নারোডার বিধায়কের পিছনেই লেগে পড়ল, মানে আমার পিছনে।

প্র: আপনাকে বলির পাঁঠা বানাও?

উ: হ্যাঁ।

প্র: মোদিকে জিজ্ঞাসাবাদ করার ব্যাপারটা কী দাঁড়াল?

উ: উনি সিট-এর সামনে হাজির হয়েছিলেন, কিন্তু ওঁকে রেহাই দেওয়া হয়।

প্র: কিন্তু যে-যুক্তিতে আপনাকে প্রেপ্তার করা হল, সেই একই যুক্তিতে তো ওঁকেও প্রেপ্তার করা উচিত ছিল?

উ: হাহা... (ঘাড় নাড়লেন)।

প্র: আগামীকাল আমি ওঁর সঙ্গে দেখা করব, আপনাদের মোদির সঙ্গে।

উ: মোদির সঙ্গে দেখা হলে জিজ্ঞেস করো উনি এত বিতর্কিত কেন?

প্র: তাই?

উ: উনি সবকিছুকেই নিজের অনুকূলে ঘুরিয়ে দেন।

প্র: এইসব লোকেরা কি জেলে আপনার সঙ্গে দেখা করতে আসতেন?

উ: না, একজনও নয়।

প্র: তার মানে আবার যে-কোনো দিন আপনাকে জেলে যেতে হতে পারে?

উ: হ্যাঁ, যে-কোনো দিন, যে-কোনো দিন। বিচারের রায়টা বেরোনের অপেক্ষা শুধু।

প্র: আমি মোদিকে জিজ্ঞেস করতে যাব কেন? উনি তো এখন (আমার সব প্রশ্নই) এড়িয়ে যাবেন?

উ: ওঁর সঙ্গে দেখা হলে একটু ঘুরিয়ে প্রশ্ন করো। প্রথমে ওঁর প্রশংসা করবে, তারপর জানতে চেয়ো...

প্র: আপনার ব্যাপারে?

উ: ঘুরিয়ে প্রশ্ন করো, জানতে চেয়ো কেন তাঁর কিছু মন্ত্রী জড়িত ছিলেন?

পি.সি. পাণ্ডেকে জিজ্ঞেস করো। উনি সব জানেন, সত্যিটা জানেন। ওঁকে জিজ্ঞেস করো, উনি আমেদাবাদের কমিশনার ছিলেন।

প্র: তাহলে উনি সত্যিটা বলছেন না কেন?

উ: তা বলতে পারব না।

প্র: এখন আমি বুঝতে পারছি কেন ওঁর মুখটা গভীর হয়ে গিয়েছিল (মায়া কোদনানি সম্পর্কে প্রশ্ন করার পর)।

উ: এখন আর উনি আমার সম্বন্ধে কিছু বলতে যাবেন কেন?

প্র: মোদি সম্বন্ধে কী বলবেন?

উ: ওঁর প্রশংসা করো, ওঁর কাজকর্মের ধারার প্রশংসা করো, তাহলেই উনি মুখ খুলবেন। কী উত্তর দেবেন সবাই জানে, বাঁধাধরা বুলি, 'আমি বিবেকানন্দকে ভালোবাসি, সর্দার বদ্রভট্টাই প্যাটেলকে ভালোবাসি।' ওঁকে আমার কথা জিজ্ঞেস করলে বলবেন, 'আচ্ছা হ্যাম ক্যা করে, সিট

কাজ করছিল, ফোন কলের রেকর্ড ছিল', কিংবা মিষ্টি সুরে ছোট করে বলবেন, 'ওটা বিচারাধীন বিষয়।'

প্র: কিন্তু এই সবকটা পয়েন্ট তো ওঁর ক্ষেত্রেও প্রযোজ্য?

উ: হাহা... কথাটা ওঁকেই বোলো।

প্র: ও হ্যাঁ, জয়ন্তী রবির সঙ্গে দেখা করার কথা ছিল আমার। গোধরার ঘটনার সময় উনিও ছিলেন নাকি?

উ: হ্যাঁ, জয়ন্তী রবি, গোধরার কালেক্টর ছিলেন, অফিসার ইন চার্জ। আনন্দীবেনকে কোনো দাঙ্গা করতে না-দেওয়ার জন্য তখন ওঁকে তোপের মুখে পড়তে হয়েছিল। তখন উনি সরকারের সুনজরে ছিলেন না। এখন উনি আবার ফিরে এসেছেন। পুরোটা জানি না। ওঁর সঙ্গে দেখা হলে যেন বোলো না যে তুমি আমাকে চেনো কিংবা আমার সঙ্গে দেখা করেছ। বললে সেটা উনি ঠিক মনে রেখে দেবেন।

আরএসএসের কাছে মায়া কোদনানি যে অভিযোগ জানিয়ে বলেছিলেন তাঁর সাজা হল অথচ মোদিকে ছেড়ে দিল সিট—তাতে কোনো সন্দেহ নেই। অমিত শাহকে যে মোদির ঘনিষ্ঠ বলে মনে করতেন মায়া কোদনানি, সেই সঙ্গেই মনে করতেন অমিত শাহকে বাঁচানোর জন্য সবকিছু করতে পারেন মোদি—এ ব্যাপারেও কোনো অস্বচ্ছতা নেই। আমার সঙ্গে কথা বলার সময়, আগে বহুবার যে-কথাটা শুনেছিলাম উনিও সেটাই বলেছিলেন—অফিসারদের ব্যবহার করা হয়েছিল এবং সময়মতো ছুঁড়ে ফেলা দেওয়া হয়েছিল।

## গীতা জোহরি

সেদিন ভোরে পানিকে ঘুম থেকে ডেকে তুললাম। ওকে আমার দরকার। পানির বয়স বড়োজোর ১৮, গ্রিনল্যান্ডের একটা কনফেকশনারির শেফ হিসেবে কাজ করত। দারুণ-দারুণ পোশাক পরে। ফাউন্ডেশনে যে-কোনো পার্টির ও-ই হচ্ছে মধ্যমণি। আমি 'শীলা কি জওয়ানি' বাজালেই মুখটা উজ্জ্বল হয়ে ওঠে, তৎক্ষণাৎ নাচতে শুরু করে। একবার আমরা আমেদাবাদ যাওয়ার সময় মুম্বই বিমানবন্দরেও একই কাণ্ড করেছিল। আমার মাথায় একটা পরিকল্পনা ছিল, কিন্তু বুঝে উঠতে পারছিলাম না পানি আমাকে সাহায্য করতে পারবে কিনা। সারাদিন ধরে যে সাম্প্রতিকতম জ্যাজ গানটা শুনে চলেছে, সেটা ছাড়া এই মুহূর্তে আর কিছুতেই কোনো উৎসাহ নেই ওর।

ওকে বললাম বাইরে বেরিয়ে একটু ধূমপান করে আসা যাক। তারপর জানতে চাইলাম একটা গোটা দিনের জন্য রাজকোট যেতে ও রাজি কিনা। বললাম আমার একটা মিটিং আছে, ঘণ্টাখানেক সময় লাগবে, ওর সাহায্য চাই। বেশ উত্তেজিত সুরে ও বলল, ‘বাসে যাওয়া হবে?’ বললাম—হ্যাঁ, যেতে ছ’ঘণ্টা লাগবে, একটা হোটেলে থাকব। অন্য একটা কারণেও পানির সাহায্য দরকার ছিল আমার। আমেদাবাদে কোনোভাবে থাকার জায়গা জুটিয়ে নিয়েছি, কিন্তু রাজকোটে উপযুক্ত প্রমাণপত্র লাগবে এবং সেক্ষেত্রে পানি খুবই সাহায্য করতে পারবে।

পরের দিন সকালে রাজকোট যাওয়ার বাস ধরলাম আমরা। সঙ্গে ক্যামেরা নিয়েছি, পিঠের ব্যাগটা চিপস, ল্যাপটপ, গান আর চকোলেটে ভর্তি। জল-টল খাওয়ার জন্য বাস দাঁড়াতে পানি সোজা সিগারেটের দোকানে গিয়ে হাজির হল। বাসটা পুরুষে ঠাসা, অধিকাংশই ব্যবসায়ী, অতএব পানি সিগারেট ধরাতে সবার নজর গিয়ে পড়ল ওর দিকে। সারাক্ষণ ওর হাতটা ধরে রেখেছিলাম, যেন অবাক্তিত নজরের হাত থেকে রক্ষা করতে চাইছি ওকে। আমেদাবাদে না ফেরা পর্যন্ত পানির সব দায়িত্ব আমার। অদ্ভুত একটা আত্মীয়তার বন্ধন অনুভব করছিলাম ওর সঙ্গে। যেন আমার ছোটো বোন—যে-বোন আমার কোনো দিনই ছিল না।

হোটেলে পৌঁছে পানির পাসপোর্ট দেখাতেই কেন্দ্রা ফতে। আমার নাম মৈথিলী হিসেবেই লেখা হল। ঘরে ঢুকেই উত্তেজনা চিৎকার করে উঠল পানি। বাথরুমে একটা বাথটাব আছে, কাচের জানলা দিয়ে গোটা শহরটা দেখা যাচ্ছে। পানি রোমাঞ্চিত, আমি নার্ভাস। সেই সময়ের একজন সবথেকে বিতর্কিত অফিসার গীতা জোহরি আমাকে একটা অ্যাপয়েন্টমেন্ট দিয়েছেন। ওঁকে বলেছিলাম একজন সফল নারী হিসেবে ওঁর কথা তুলে ধরতে চাই। একটা ভূয়ো চিত্রনাট্যও পাঠিয়েছিলাম।

আমরা জোহরির কাছে যেতে উনি আমাদের ঘরে নিয়ে গেলেন, বললেন খুব উত্তেজিত হয়ে আমাদের জন্য অপেক্ষা করছিলেন। ওঁকে রাজকোটের কমিশনার করে দেওয়া হয়েছিল, ফলে ওঁর বাড়ি খুঁজে পেতে কোনো অসুবিধে হয়নি আমাদের। কয়েক মিনিটের মধ্যেই পানির সঙ্গে দিব্যি জমে গেল ওঁর। হাত-পা নেড়ে আমাদের বাসযাত্রার বর্ণনা দিচ্ছিল পানি। তারপর জোহরি বললেন আট বছর আমেরিকায় থাকার ফলে আমি নাকি পুরো বিদেশি হয়ে গেছি। ‘আপনি একেবারে বিদেশি উচ্চারণে কথা বলেন।’ নিজের মেয়ের কথা বললেন। সে বিদেশে থাকে। তার বন্ধুরা হামেশাই রাজকোটে এসে ওঁদের সঙ্গে থাকে। পরের বার এলে পানিকে তাঁর বাড়িতে থাকতে বললেন। পানি এককথায় রাজি হয়ে গেল। আমি ঘাড় নাড়লাম। এখন তর্কবিতর্কের সময় নয়। পানিকে পরে বুঝিয়ে বললেই চলবে।

প্রথমে ওঁর সাহসিকতা সম্বন্ধে নানান ঘটনার কথা বললাম, তারপর বিস্মিত সুরে জানালাম যে একটা রিপোর্টে ওঁর সম্বন্ধে কিছু খারাপ কথা আছে। ‘ওঃ, ওই সোরাবুদ্দিনের এনকাউন্টারের ঘটনাটা। এ ব্যাপারে আপনার তো তেমন কিছু জানা নেই। ওই হত্যার ঘটনায় গুজরাতের সব অফিসারদেরই জেরার মুখে পড়তে হয়েছে।’

চোখ বড়ো করে বললাম—হ্যাঁ, যতজন অফিসারের সঙ্গে দেখা করেছি, সকলেই এই ঘটনাটার কথা বলেছেন। একটা ‘গুন্ডা’ যেন গোটা রাজ্যের প্রতিনিধি হয়ে উঠেছে—কথাটা বলতে গিয়ে হেসে ফেললেন তিনি। তাঁর জুনিয়র ডি.এল. সোলাঙ্কির বক্তব্য অনুযায়ী, এই সেই গীতা জোহরি, যিনি ভূয়ো সংঘর্ষে সোরাবুদ্দিনকে হত্যার করার যে-স্টেটাস রিপোর্ট সুপ্রিম কোর্টে পাঠানোর কথা ছিল তা বদলে দিতে বলেছিলেন। অমিত শাহের বাড়িতে অনুষ্ঠিত একটা মিটিংয়ে ওই রিপোর্টের নানান বিষয় পালটে দিতে বলা হয়েছিল তাঁকে। সিবিআই-এর হাতে তদন্তের ভার তুলে দেওয়ার সময় তদন্তকে ভুল পথে চালিত করার জন্য গীতা জোহরিকে কঠোর তিরস্কার করেছিল সুপ্রিম কোর্ট।

এখন গীতা জোহরি সম্বন্ধে কিছু তথ্য পাঠকদের জানিয়ে রাখা দরকার।

১৯৮২-র ব্যাচের গীতা জোহরি হচ্ছেন গুজরাতের প্রথম আইপিএস অফিসার। ১৯৯০ থেকে তাঁর কর্মজীবনে বহু উত্থান-পতন ঘটেছে। ১৯৯২ সালের সেপ্টেম্বর মাসে দরিয়াপুর পোপাটিওয়াড়ে মাফিয়া ডন আবদুল লতিফের ডেরায় হানা দিয়ে তার বন্দুকবাজ শরিফ খানকে পাকড়াও করে বিখ্যাত হয়ে ওঠেন জোহরি। লতিফ অবশ্য পালিয়ে যেতে পেরেছিল।

২০০৬ সালে সিআইডি (ক্রাইম)-এ থাকার সময় ভূয়ো সংঘর্ষে সোরাবুদ্দিন শেখ ও তার স্ত্রী কওসর বাইকে হত্যার তদন্তের নেতৃত্বে ছিলেন তিনি—সুপ্রিম কোর্টে সোরাবুদ্দিনের ভাই রুবাবুদ্দিনের জমা দেওয়া পিটিশনের ভিত্তিতেই এই তদন্ত করা হয়। তাঁর বিস্তৃত ও কঠোর তদন্তের ফলে প্রমাণিত হয় ওটা আসলে ভূয়ো সংঘর্ষ ছিল। তদন্তে জানা যায় বেশ কয়েকজন পুলিশ অফিসার জড়িত ছিলেন এই ঘটনায়। তাঁর জোগাড় করা সাক্ষ্যপ্রমাণের ভিত্তিতে ১৩ জন পুলিশ অফিসার গ্রেপ্তার হন, যাদের মধ্যে বিতর্কিত ডিআইজি ডি.জি. বানজারা, এসপি রাজকুমার এবং দীনেশ এমএন-ও ছিলেন। এঁদের গ্রেপ্তার করেন ডিআইজি পুলিশ রজনীশ রাই, যিনি এই তদন্তের দায়িত্বে ছিলেন।

কিছুদিনের মধ্যেই রজনীশ রাইকে তদন্ত থেকে সরিয়ে দিয়ে গীতা জোহরিকে তাঁর জায়গায় বসানো হয়। যাওয়ার আগে তিনজন অভিযুক্তের টেলিফোন রেকর্ড সম্বলিত সিডিগুলো নিজের উর্ধ্বতনদের হাতে তুলে দিয়ে যান রজনীশ রাই। নিজের উর্ধ্বতনদের কাছে চরম পরীক্ষা দিতে হয় জোহরিকে এবং তাঁকে সর্বোচ্চ

আদালতের কাছে সরাসরি রিপোর্ট দিতে বলা হয়। দায়রা আদালতে এই মামলার যে-চার্জশিট তিনি পেশ করেন তা কঠোরভাবে সমালোচিত হয়। জোহরি যেভাবে এই মামলা চালিয়েছেন তাতে নানান ত্রুটি খুঁজে পেয়ে মামলাটি সিবিআই-এর হাতে তুলে দেওয়ার নির্দেশ দেয় সুপ্রিম কোর্ট।

ভূয়ো সংঘর্ষের মামলায় সবথেকে গুরুত্বপূর্ণ ব্যক্তি ছিলেন জোহরি। আগে একটি লেখায় আমি বলেছিলাম, ‘এক আদর্শ জগতে এবং আদর্শ পরিস্থিতিতে, যে-সব মহিলা সরকারি চাকরিতে যোগ দিতে চান তাঁদের কাছে দৃষ্টান্ত হয়ে উঠতে পারতেন গীতা জোহরি। কিন্তু এটা কোনো আদর্শ জগৎও নয় এবং ভাগ্যও গীতা জোহরিকে সাহায্য করেনি।’

ওঁকে দেখে মনে হচ্ছিল বেশ চাপে আছেন, তাই সবকিছু ঠিক আছে কিনা জানতে চেয়েই কথোপকথন পর্ব শুরু করলাম।

উ: গত মাস দুয়েক খুব কঠিন অবস্থার মধ্য দিয়ে যাচ্ছি... পরিস্থিতি খুব খারাপ।

প্র: আপনি কি আগে থেকেই আঁচ করেছিলেন যে বিতর্ক শুরু হতে চলেছে?

উ: অনেক সময় আগে থেকে বোঝা যায় না। আমিও বুঝিনি, আগে থেকে আঁচ করার কোনো কারণও ছিল না। বিশেষত কেউ যখন ভালো কাজ করে, তখন সে আশা করে না কেউ তার কাজে কোনো ভুল খুঁজে পাবে। কিন্তু নানান কারণে অনেক সময় সব গুণগোল হয়ে যায়, অনেক সময় রাজনৈতিক কারণেও হয়।

প্র: আপনার ব্যাপারটা কি বেশিটাই রাজনৈতিক কারণে ঘটেছে?

উ: হ্যাঁ, বেশিটাই রাজনৈতিক কারণে। নানা ধরনের সরকার—রাজ্যে একরকম, কেন্দ্রে অন্যরকম।

প্র: আপনার সম্বন্ধে অনেক কিছু পড়েছি। আপনি নাকি পার্লামেন্টকে প্রায় অচল করে দিয়েছিলেন?

উ: হাহা। হ্যাঁ, ওই সোরাবুদ্দিনের ঘটনাটায়। খবরের কাগজে কিছু জঘন্য রিপোর্ট বেরিয়েছিল। কাগজের রিপোর্টে খুব খারাপ-খারাপ কথা লেখা হয়েছিল আমার ব্যাপারে।

প্র: তার মানে আপনি বলতে চাইছেন সিবিআই কখনোই আপনাকে গ্রেপ্তার করতে চায়নি?

উ: না, সিবিআই কখনোই বলেনি যে আমাকে ওরা গ্রেপ্তার করতে চায়। আমি তখন লন্ডনে ছিলাম, ট্রেনিং নিচ্ছিলাম আর এইসব কথা কানে আসছিল। ফিরে আসার পর খবরের কাগজের রিপোর্টগুলো দেখলাম। আরে বাবা,

যদি কোনো প্রমাণ থাকে তো হাজির করো। সেটাই আমি বলেছিলাম ওদের। এ-সব কথা কিন্তু অফ দ্য রেকর্ড বলছি, ঠিক আছে?

মূলত গৃহমন্ত্রী ব্যাপারেই ওরা প্রশ্ন করেছিল আমাকে। গৃহমন্ত্রীর সঙ্গে আমার কখনো সামনাসামনি দেখা হয়নি। সিবিআই যখন আমাকে প্রশ্ন করল, বললাম অমিত শাহের সঙ্গে কখনো সামনাসামনি দেখা হয়নি আমার। কেউ, কোনো রাজনীতিবিদ আমার সঙ্গে কথা বলেন না, কারণ আমাকে ওঁরা ভয় পান। গত দু'বছরে কেউ আমাকে ফোন করেননি।

প্র: ওই একই গৃহমন্ত্রীর কথা বলছেন?

উ: হ্যাঁ, গৃহমন্ত্রী অমিত শাহ। শুনলে অদ্ভুত লাগবে, কিন্তু আমি কখনো ওঁর সঙ্গে কথা বলতে চাইনি। আসলে ওরা আমাকে স্বেচ্ছা ভয় দেখাচ্ছিল।

আমার স্বামী আমাকে প্রচুর সাহায্য করেছেন। সমস্ত অবস্থায় দৃঢ়ভাবে আমার পাশে থেকেছেন, প্রতিটা দরখাস্ত লিখতে সাহায্য করেছেন। উনি একজন ফরেস্ট অফিসার, গান্ধীনগরে থাকেন।

প্র: সকলেই এই এনকাউন্টারটা নিয়ে নানান কথা বলাবলি করছে . . . সোরাবুদ্দিনের এনকাউন্টারের ঘটনাটা। খুব ইন্টারেস্টিং ঘটনা।

উ: ওর থেকেও ওর স্ত্রী কওসর বাই-এর ঘটনাটা বেশি গুরুত্বপূর্ণ। বয়স্কা মহিলা, দুটো বাচ্চা ছিল, দু'জনেই তখন অল্পবয়সি। মহিলার বয়স তখন ৩৫ কি ৪০ হবে। আগে অন্য কারও সঙ্গে বিয়ে হয়েছিল ওর। ইন্দোরে বোনের কাছে থাকতে গিয়েছিল। ওর বোন ওখানে বিউটি সালোঁ চালাত। ওখানেই এই সোরাবুদ্দিনের প্রেমে পড়ে ও। ওরা বিয়ে করে, আগের স্বামীর থেকে ডিভোর্স নেয় ও।

সোরাবুদ্দিন ক্রিমিনাল ছিল, তোলাবাজি করত।

প্র: একজন ক্রিমিনালের জন্য গোটা রাজ্য জুড়ে আলোড়ন শুরু হয়ে গেল?

উ: হ্যাঁ, ও ক্রিমিনাল ছিল। সোরাবুদ্দিনকে এনকাউন্টারে মারতে চেয়েছিল ওরা, কিন্তু কাজটা করল একেবারে বোকার মতো। লোক ভর্তি একটা বাস থেকে ধরা হয় ওকে। এটা করা উচিত নয়। এ-সব কাজ গোপনে করতে হয়, এত খোলাখুলি করতে নেই। এই জন্যেই ওরা ফাঁসে গেল।

প্র: তারপর ওই মহিলাকেও এনকাউন্টারে মেরে দেওয়া হল?

উ: মহিলা সোরাবুদ্দিনকে ছাড়তে চায়নি, ও বুঝেছিল সোরাবুদ্দিনকে এনকাউন্টার করে মেরে দেবে ওরা। সোরাবুদ্দিনকে হত্যা করার পর ওরা বুঝতে পারে কওসর বাই সব ফাঁস করে দেবে, তখন ওকেও মেরে দেয়



ওরা। তাই সোরাবুদ্দিনকে এনকাউন্টারের নামে মেরে দেওয়াটা মূল প্রশ্ন ছিল না, মূল প্রশ্ন ছিল কওসর বাই-এর খুন হওয়াটা।

সোরাবুদ্দিন সম্ভবত মানুষ হিসেবে খারাপ ছিল না। কওসর বাই-এর বাড়ির লোকেরা ব্যাপারটা বুঝতে পেরে সুপ্রিম কোর্টে যায়।

সেই সময় সিআইডি ক্রাইমে ছিলাম আমি। সুপ্রিম কোর্ট ঠিক করল ব্যাপারটা আমাদের কাছে পাঠাবে। সম্ভবত আমি একজন মহিলা এবং অন্য একজন মহিলা নিখোঁজ বলেই কেসটা আমার কাছে পাঠানো হয়। তখন আমি ওকে খুঁজতে শুরু করি।

তখনই আসল ব্যাপারটা শুরু হল। ব্যাপারটা বেশি করে রাজনৈতিক বিষয়ে পরিণত হল। কওসর বাই আর সোরাবুদ্দিনের কথা ভুলে গেল সবাই।

প্র: গৃহমন্ত্রী এর সঙ্গে জড়িয়ে পড়লেন কেন?

উ: কারণ সকলেই বলছিল কাজটা বেআইনিভাবে করা হয়েছে, অন্যায়ভাবে খুন করা হয়েছে। সোরাবুদ্দিন খুন হয়ে গেল, কওসর বাই খুন হয়ে গেল, তারপর তদন্ত শুরু হতেই সবকিছু বেরিয়ে পড়ল। বোঝা গেল (কাজটা) নিশ্চয়ই গৃহমন্ত্রীর নির্দেশেই করা হয়েছিল। তবে কোনো প্রত্যক্ষ প্রমাণ ছিল না। ১৩ জন পুলিশ অফিসারকে গ্রেপ্তার করি আমি। সংখ্যাটা নেহাত কম নয়। এটা ছিল স্রোতের বিরুদ্ধে যাওয়া, রাজ্যের বিরুদ্ধে যাওয়া। খুব কঠিন কাজ।

প্র: নিজের লোকদের বিরুদ্ধে যেতে হল আপনাকে?

উ: হ্যাঁ।

প্র: কিন্তু সরকার আপনার ওর এত চাপ সৃষ্টি করল?

উ: হ্যাঁ, প্রত্যেকে করেছিল, আমার সহকর্মীরা পর্যন্ত। এ-সব হচ্ছে নিজেদের মধ্যকার দ্বন্দ্ব, কিন্তু শেষ পর্যন্ত—না, সোরাবুদ্দিনের কাজকর্ম আমি সমর্থন করি না, কিন্তু তার জন্য উপযুক্ত উপায় আছে, আইনি পদ্ধতিতে কাজ করতে হবে, অন্তত কাগজে-কলমে এমনভাবে রাখতে হবে যাতে আপাতভাবে কাজটাকে আইনসম্মত বলেই মনে হয়।

প্র: আপনার পক্ষে সেটা নিশ্চয়ই খুব কঠিন সময় ছিল?

উ: তা ছিল। অন্তত সোরাবুদ্দিনের ঘটনায় অফিসারদের গ্রেপ্তার করতে আমি খুব একটা স্বস্তি অনুভব করিনি। তবে কওসর বাই-এর ব্যাপারে আমার কোনো অস্বস্তি ছিল না।

প্র: গৃহমন্ত্রীকে তখন গ্রেপ্তার করা হয়নি?

উ: না, ওঁকে আমি গ্রেপ্তার করিনি, কেননা নিজের লোকেদের গ্রেপ্তার করতে হলে অকাট্য প্রমাণ চাই।

প্র: কিন্তু সিবিআই তো ওঁকে গ্রেপ্তার করেছিল?

উ: সিবিআই শুধুমাত্র গৃহমন্ত্রী আর অন্য একজন অফিসারকে গ্রেপ্তার করেছিল। আমি গ্রেপ্তার করেছিলাম ১৩ জনকে। ওরা অন্য কাউকে গ্রেপ্তারও করেনি অথবা অন্য কোনো অভিযোগ যোগও করেনি। দুর্বল আইনি প্রমাণের ভিত্তিতে গৃহমন্ত্রীকে গ্রেপ্তার করেছিল ওরা। আমি সেটা করিনি।

অনেকে বলেন ভূয়ো সংঘর্ষের মামলায় প্রথমদিকে চমৎকার কাজ করেছিলেন জোহরি, পরে তাঁর স্বামীর সঙ্গে যুক্ত কিছু দুর্নীতির ঘটনা কাজে লাগিয়ে তাঁকে ব্ল্যাকমেল করা হয়।<sup>১০</sup> সিবিআই-এর কাছে দাখিল করা একটা নোটে বলা হয়, নিজের স্বামী আইএফএস অফিসার অনিলের জন্যই তদন্ত প্রক্রিয়াকে ধোঁয়াটে করে দেন তিনি এবং এই মামলা থেকে অমিত শাহকে বাঁচিয়ে দেন। কিন্তু যে পুলিশ অফিসার একটা অটোয় চড়ে কুখ্যাত গ্যাংস্টারের ডেরায় হানা দিতে পারেন, তাঁকে ব্ল্যাকমেল করে থামিয়ে দেওয়া যাবে—এটা যেন ঠিক মেনে নেওয়া যায় না। নিজের ওপর চাপ আসছে জানিয়ে গীতা জোহরি সিবিআইকে লিখে জানানোর পর অমিত শাহকে বাঁচানোর জন্য যে সম্মিলিত প্রচেষ্টা হয়, এটুকু থেকেই অনেক কিছু বোঝা যায়। ঘটনাচক্রে, সিবিআই গীতা জোহরিকে আবার জিজ্ঞাসাবাদ করার কয়েকদিন আগে রাজ্যসভার তৎকালীন বিরোধী নেতা অরুণ জেটলি ২০১৩ সালের ২৭ সেপ্টেম্বর তৎকালীন প্রধানমন্ত্রী মনমোহন সিংয়ের উদ্দেশ্যে একটি দীর্ঘ পত্র লেখেন।<sup>১১</sup> সেই চিঠির নিম্নোক্ত অংশটুকু অত্যন্ত উল্লেখযোগ্য।

ক্রমহাসমান জনপ্রিয়তার সামনে দাঁড়িয়ে কংগ্রেসের নীতি বুঝতে কোনো অসুবিধা হয় না। রাজনীতিগতভাবে বিজেপি এবং নরেন্দ্র মোদির বিরুদ্ধে লড়ার সাধ্য কংগ্রেসের নেই। তাদের পরাজয় আসন্ন। বিভিন্ন তদন্তকারী সংস্থার অপব্যবহার করে তারা এখনও পর্যন্ত গুজরাতের মুখ্যমন্ত্রী নরেন্দ্র মোদি, তৎকালীন গৃহমন্ত্রী এবং গুজরাতের আইন, পরিবহন ও সংসদীয় বিষয়ক মন্ত্রী এবং ভারতীয় জনতা পার্টির সাধারণ সম্পাদক শ্রী অমিত শাহ এবং বিজেপি-র অন্যান্য গুরুত্বপূর্ণ নেতাদের নানান মিথ্যা মামলায় জড়ানোর বিভিন্ন পদ্ধতি অবলম্বন করেছে।

ডি.জি. বানজারা, যিনি সোরাবুদ্দিন ও তুলসী প্রজাপতিকে ভূয়ো সংঘর্ষে হত্যা করার দায়ে সাত বছরের জন্য জেলে যান এবং পরে ভূয়ো সংঘর্ষে ইশরাত জাহানকে হত্যার ঘটনাতেও অভিযুক্ত হন, তিনি বিশ্বাসঘাতকতার অভিযোগে

অমিত শাহকে অভিযুক্ত করে একটি চিঠি<sup>১১</sup> লেখার ঠিক দু'সপ্তাহ পরে অরুণ জেটলির এই চিঠিটি প্রকাশিত হয়। বানজারা লিখেছিলেন, সমস্ত পুলিশকর্তাকে জেলে পচে মরতে পাঠিয়ে বিচারব্যবস্থাকে প্রভাবিত করে নিজেকে মুক্ত করে নেন অমিত শাহ। এই চিঠিতে গিরিশ সিংঘলের মতো অফিসারদের মনোভাব বিবৃত করেন বানজারা—মোদি-শাহ জুটি লোকেদের ব্যবহার করো এবং ছুঁড়ে ফ্যালো নীতি অনুযায়ী চলেন বলে অভিযোগ করেছিলেন সিংঘল। তিনি লিখেছেন:

একটা সময় আমি অনুভব করি এই সরকারের যে কেবলমাত্র আমাদের রক্ষা করার ব্যাপারে কোনো আগ্রহ নেই তা-ই নয়, বরং তারা আমাকে এবং আমার অফিসারদের জেলে পাঠানোর জন্য গোপনে সবরকম চেষ্টা করছে, যাতে একদিকে সিবিআই-এর হাত থেকে নিজেকে বাঁচাতে পারে এবং অন্যদিকে রাজনৈতিক ফায়দা তুলতে পারে। সকলেই জানেন যে গত ১২ বছর ধরে গুজরাতের আকাশে এনকাউন্টার মামলাগুলির ঔজ্জ্বল্য অক্ষুণ্ণ রেখে বিপুল রাজনৈতিক ফায়দা লুটেছে এই সরকার, অন্যদিকে জেলখানায় বন্দি পুলিশ অফিসারদের ভবিতব্য সম্বন্ধে প্রায় কিছুই না বলে উদাসীন হয়ে থেকেছে।

সুপ্রিম কোর্টের প্রতি সম্পূর্ণ শ্রদ্ধা রেখেই একটা কথা বলতে চাই। আমি আন্তরিকভাবে বিশ্বাস করি শ্রী অমিতভাই শাহের আইনি ও রাজনৈতিক চক্রান্ত, চালবাজি ও কৌশলের স্বরূপ উন্মোচনের স্বার্থে সোরাবুদ্দিন ভুয়ো সংঘর্ষ মামলা এবং তারপর তুলসীরাম প্রজাপতি ভুয়ো সংঘর্ষ মামলা গুজরাত থেকে সরিয়ে নেওয়া উচিত নয়। আমি দ্ব্যর্থহীন ভাষায় বলতে চাই যে শ্রী অমিতভাই শাহের জঘন্য কৌশলের সাহায্যে এই সরকার কেবলমাত্র নিজেরই স্বার্থরক্ষা করে চলেছে, যাতে করে ভেসে থাকতে ও সমস্ত দিক থেকে ফুলেফেঁপে উঠতে পারে, অন্যদিকে পুলিশ অফিসারদের বিপজ্জনক অবস্থায় ছুঁড়ে ফেলছে যাতে করে ডুবে গিয়ে অস্বাভাবিক মৃত্যু হয় তাদের। একমাত্র গুজরাতের মাননীয় মুখ্যমন্ত্রী শ্রী নরেন্দ্রভাই মোদির প্রতি সর্বোচ্চ বিশ্বাস ও শ্রদ্ধার দরুনই এত দীর্ঘদিন চূপ করে ছিলাম আমি, যাকে আমি ঈশ্বরের মতো ভক্তি করি।

কিন্তু দুঃখের সঙ্গে জানাচ্ছি যে শ্রী অমিতভাই শাহের অশুভ প্রভাবের ফলে আমার ঈশ্বর এক্ষেত্রে সময়োপযোগী পদক্ষেপ করতে পারেননি—শ্রী অমিতভাই শাহ তাঁর চোখ ও কান দখল করে নিয়েছেন এবং বিগত ১২ বছর ধরে ছাগলকে কুকুরে ও কুকুরকে ছাগলে পরিণত করে তাঁকে ভুল পথে চালিত করে চলেছেন। রাজ্য প্রশাসনের উপর তাঁর অশুভ দখলদারি এতই মজবুত যে কার্যত তিনিই বেনামে গুজরাত সরকারকে চালাচ্ছেন বলা যায়।

চিঠিটা খবরের কাগজের হেডলাইন হয়ে যায়, কেননা একসময় যে-মানুষটি নরেন্দ্র মোদি ও অমিত শাহের অত্যন্ত ঘনিষ্ঠ ছিলেন তিনিই এখন তাঁদের বিরুদ্ধে চক্রান্তের অভিযোগ আনছেন এবং ভবিষ্যতে আরও কিছু ফাঁস করার ইঙ্গিত দিচ্ছেন। কয়েকদিনের মধ্যে আর একজন আত্মগোপনকারী পুলিশকর্তা প্রাক্তন ডিজি পি.পি. পাণ্ডে—যিনি ইশরাত জাহানের ঘটনায় অভিযুক্ত ছিলেন—প্রকাশ্যে আসেন এবং সংবাদমাধ্যমের কাছে এ সম্বন্ধে কথা বলার প্রতিশ্রুতি দেন।

কেন্দ্রে বিজেপি ক্ষমতায় আসার কয়েক মাসের মধ্যেই ডি.জি. বানজারা জামিন পেয়ে যান এবং গুজরাতে তাঁকে বীরের অভ্যর্থনা জানানো হয়। সোরাবুদ্দিনের ঘটনায় দু'জন প্রধান অভিযুক্ত অফিসার রাজকুমার পাণ্ডিয়ান ও অভয় চুদাসামা প্রেপ্তার হয়েছিলেন, কিন্তু এখন তাঁরা জামিন পেয়ে গেছেন এবং গুজরাত পুলিশ তাঁদের আগের পদে পুনর্বহাল করেছে। এই বছরের গোড়ার দিকে গীতা জোহরির বিরুদ্ধে যাবতীয় অভিযোগ তুলে নেয় সিবিআই, তাঁকে গুজরাত পুলিশের ডিজিপি-র পদে প্রমোশন দেওয়া হয়েছে। গুজরাতে সমস্ত মামলার ন্যায়চক্র যেন উলটোদিকে ঘুরতে শুরু করেছে।

### হরেন পাণ্ডিয়া

মুম্বইতে তেহেলকা-র হয়ে রিপোর্টিং করার সময় মুম্বইয়ের এনকাউন্টার-বিশেষজ্ঞ পুলিশকর্তা দয়া নায়কের সঙ্গে বেশ কয়েকবার দেখা হয় আমার। দয়া একটা বিশেষ চরিত্র। শেষবার যখন তাঁর সঙ্গে যোগাযোগ করি তখন আমার সঙ্গে কথা বলতে অস্বীকার করেন তিনি, কেননা গুজরাতে ভূয়ো সংঘর্ষে সাদিক জামালকে হত্যা করার সঙ্গে তাঁর যুক্ত থাকার কথা উল্লেখ করেছিলাম আমি। তাঁকে ও প্রদীপ শর্মাকে দীর্ঘ সময় ধরে জেরা করে সিবিআই এবং দু'জনকেই সাসপেন্ড করা হয়। এঁদের দু'জনের ঘটনা নিয়ে 'অব তক ছপ্পন' নামে একটা ছবিও বানিয়েছিলেন চিত্রপরিচালক রামগোপাল ভার্মা। বেআইনি কাজের দায়ে ধরা পড়ার আগে পর্যন্ত প্রচুর প্রশংসা পেতেন তাঁরা, বিভিন্ন সামাজিক অনুষ্ঠানে সম্মান জানানো হত তাঁদের।

সংবাদমাধ্যমে প্রচুর বন্ধু ছিল দয়ার, বা বলা যায় রীতিমতো মিডিয়াঘনিষ্ঠ ছিলেন তিনি। লোখান্ডওয়ালা মার্কেটের কোস্টা ক্যাফে বা ক্যাফে কফি ডে-তে নিয়মিত যেতেন, তাঁর জিমের বন্ধুরা এসে সেখানে দেখা করতেন তাঁর সঙ্গে। সবসময় কোমরে রিভলভার গোঁজা থাকত, সেটা দেখাতে ভালোবাসতেন দয়া। ২০০৮ সালে আমার সহকর্মী ও আমি যখন মহারাষ্ট্রের সম্ভ্রাসবাদবিরোধী কঠোর

আইন এমসিওসিএ-র অপব্যবহার নিয়ে কাজ করছিলেন, তখন মাকেমাসে দয়ার সঙ্গে দেখা হত আমার। এইরকম একবারের দেখার সময় দয়া যা বলেছিলেন তা আমি আজও ভুলিনি। তিনি বলেছিলেন—দেশের বৃহত্তম রাজনৈতিক হত্যাকাণ্ড ঘটেছে গুজরাতে, মোদির চরম প্রতিদ্বন্দ্বী হরেন পাণ্ডিয়ার হত্যাকাণ্ড। জানতে চেয়েছিলেন, তাঁর কাছে কোনো প্রমাণ আছে কিনা। তিনি বলেছিলেন, ‘আপনি সাংবাদিক, তদন্ত করাটা আপনার কাজ।’ কথাবার্তা সেখানেই শেষ হয়।

বাড়ি ফেরার পর হরেন পাণ্ডিয়ার হত্যা সম্বন্ধে প্রায় সব লেখা পড়ে দেখার চেষ্টা করি। তথাকথিত মুসলিমদের হাতে পাণ্ডিয়া নিহত হওয়ার পর থেকেই নানান সন্দেহ মাথাচাড়া দেয়। কিন্তু পাণ্ডিয়ার বাবা বিট্ঠল পাণ্ডিয়া তাঁর মৃত্যুর আগে পর্যন্ত বলে গেছেন, গুজরাতে নিজের রাজনৈতিক প্রতিদ্বন্দ্বীদের হাতেই নিহত হয়েছেন তাঁর পুত্র। হরেন পাণ্ডিয়ার স্ত্রী জাগ্রতি পাণ্ডিয়া গুজরাতের নির্বাচনে প্রতিদ্বন্দ্বিতা করেন। তিনিও বলেছিলেন পাণ্ডিয়ার হত্যাকাণ্ডের সঙ্গে মুখ্যমন্ত্রী এবং অমিত শাহ যুক্ত ছিলেন।” কিন্তু তাঁর এই অভিযোগকে পরিবারের শোকার্ত সদস্যদের ক্রোধের প্রকাশ হিসেবেই ধরে নেওয়া হয়।

এ ব্যাপারে একটা লেখার কথা আমার স্পষ্ট মনে আছে। ঘটনাচক্রে সেটাও একটা অন্তর্ভুক্তমূলক প্রতিবেদন, লিখেছিলেন বরিষ্ঠ সাংবাদিক সংকর্ষণ ঠাকুর। সংকর্ষণের বুদ্ধিদীপ্ত লেখা থেকে কিছু অংশ এখানে উদ্ধৃত করছি:

একমাত্র প্রত্যক্ষদর্শী সাক্ষী ইয়াদরাম বলেছেন, চোখের সামনে যা ঘটে গেল তা দেখে তিনি এতই হতবুদ্ধি হয়ে পড়েছিলেন যে প্রায় এক ঘণ্টা সেখান থেকে নড়তেই পারেননি। যখন চলতে পারলেন, তখন খবরটা পুলিশকে না জানিয়ে তাঁর শেঠকে জানান। শেঠ একজন স্থানীয় ব্যবসায়ী, নাম স্নেহাল আদেনওয়ালা। আদেনওয়ালাও পুলিশে খবর দেননি, যদিও তিনি জানতেন ল্য গার্ডেনের পার্কিং লটে মারুতি ৮০০ গাড়িতে পড়ে থাকা মৃতদেহটি হরেন পাণ্ডিয়ার। পাণ্ডিয়ার সহযোগী প্রকাশ শাহকে ফোন করে তাঁকেই খবরটা জানান তিনি। শাহ-ও পুলিশে খবর দেননি। তিনি ফোন করেন পাণ্ডিয়ার সেক্রেটারি নীলেশ ভাটকে, যিনি পাণ্ডিয়ার বাড়িতেই ছিলেন এবং বসের ফিরতে এত দেরি হচ্ছে কেন ভেবে দুশ্চিন্তা করছিলেন। খবর পেয়ে ল্য গার্ডেনে ছুটে যান ভাট, গাড়িটা খুঁজে বার করে দেখেন তাঁর বসকে বেশ কয়েকবার গুলি করা হয়েছে। তখন দশটা বেজে গেছে। দু’ঘণ্টারও বেশি সময় ধরে শহরের কেন্দ্রস্থলে একটা গাড়িতে মৃত অবস্থায় পড়ে আছেন গুজরাতের ভূতপূর্ব গৃহমন্ত্রী।

ইতিমধ্যে কন্ট্রোল রুম থেকে এলিসব্রিজ থানায় আর একটা ফোন আসে—ল্য গার্ডেনে কী হচ্ছে খবর নিন, শোনা যাচ্ছে ওখানে একটা ঝামেলা হয়েছে।

ওয়াই.এ. শেখ নামে একজন এসআই রওনা হন। ল্য গার্ডেনের দিকে যাওয়ার সময় কন্ট্রোল রুম থেকে আর একটা ফোন পান তিনি—ল্য গার্ডেনে নয়, পরিমল গার্ডেনে যান। গাড়ি ঘুরিয়ে নেন শেখ। ১০টা ৫০ মিনিটে আবার একটা ফোন আসে তাঁর কাছে, এবার আবার ল্য গার্ডেনে যেতে বলা হয়। ১০টা ৫৪ মিনিটে সেখানে পৌঁছোন তিনি, অর্থাৎ পাভিয়া গুলিবিদ্ধ হওয়ার প্রায় তিন ঘণ্টা পরে। সেখানে পৌঁছে কী দেখলেন তিনি? শেখের সহকর্মী এসআই নায়েক তাঁর আগেই ল্য গার্ডেনে যাওয়ার জন্য রওনা হয়েছিলেন, কিন্তু তখনও ঘটনাস্থলে পৌঁছোননি তিনি। সেদিন সকালে স্থানীয় পুলিশকে কে নির্দেশ দিচ্ছিলেন? মাত্র দশ মিনিট দূরত্বের একটা জায়গায় পৌঁছোতে এত দেরি হল কেন? সেইদিনই বিকালে ডিএস হসপিটালে ময়নাতদন্ত করা হয়। তা থেকে জানা যায়—মোট সাতটা গুলির ক্ষত আছে, চালানো হয়েছিল পাঁচটা গুলি। এগুলির মধ্যে পাঁচটা ক্ষত ০.৮ সেন্টিমিটার ব্যাসের, দুটো ০.৫ সেন্টিমিটার ব্যাসের। তলগত প্রসারণ ও প্রতিরোধের কারণে একই আঘেয়ান্ত্র থেকে বিভিন্ন মাপের ক্ষত সৃষ্টি হওয়া বৈজ্ঞানিকভাবে অসম্ভব নয়। পাঁচটা গুলি থেকে সাতটা ক্ষত সৃষ্টি হওয়াও সম্ভব, কেননা শরীরের অঙ্গগুলির মধ্যে দিয়ে গুলি চলাচল করতে পারে। কিন্তু যে-সব বিশেষজ্ঞ মৃতদেহ পরীক্ষা করেছেন তাঁদের মতে এক্ষেত্রে এমনটা হওয়া একান্তই অসম্ভব। অন্য কথায় বললে, দুটি গুলির কোনো সন্ধান পাওয়া যায়নি।

ময়নাতদন্তের রিপোর্টে ৫ নম্বর ক্ষত সৃষ্টিকারী যে-গুলিটির কথা বলা হয়েছে সেটি পাভিয়ার শরীরের নীচের দিকে অণুকোষ দিয়ে ঢুকে উপরে বুক পর্যন্ত চলে যায়, তাঁর তলপেটের চামড়া ছিঁড়ে যায়। একজন মানুষ গাড়িতে বসে আছেন, এবং মারুতি ৮০০-র মতো ছোটো একটা গাড়িতে পাভিয়ার মতো ছ'ফুটেরও বেশি লম্বা সবলদেহী একজন মানুষ, তাঁকে কি অণুকোষ দিয়ে গুলিবিদ্ধ করা সম্ভব? যে-কোনো লোকের অণুকোষে গুলি লাগলে, যেমনটা পাভিয়ার লেগেছিল, প্রভূত রক্তপাত হবে। অণুকোষ হচ্ছে রক্তবাহী জালিকার একটা জটিল জাল, যা শরীরের উত্তাপ নিয়ন্ত্রণ করে। পাভিয়ার কি রক্তপাত হয়েছিল? হ্যাঁ, হয়েছিল। গাড়িতে কোনো চিহ্ন পাওয়া গেছে? না। পাভিয়াকে অণুকোষে, ঘাড়ে, বুকে দু'বার, বাহ্যতে একবার গুলি করা হয়েছিল।

গাড়িটা রক্তে ভেসে যাওয়া উচিত ছিল, অন্ততপক্ষে তাঁর সিটটা রক্তে ভেসে যাওয়া তো একান্তই উচিত ছিল। কিন্তু ফরেনসিক রিপোর্টে গাড়িতে কোনো রক্তের দাগ পাওয়া যায়নি, একমাত্র সামনের প্যাসেঞ্জার সিটে এবং চাবির চেনে কিছুটা রক্তের দাগ ছিল (সেন্ট্রাল ফরেনসিক সায়েন্সেস ল্যাবরেটরি রিপোর্ট নাম্বার সিএফএসএল-২০০৩/এফ-০২৩২)।

পাভিয়ার গাড়ির ভিতরে কন্সক্লের গুলির কোনো অবশিষ্টাংশ পড়ে থাকার কথাও লেখা নেই ফরেনসিক রেকর্ডে (মোবাইল ফরেনসিক সায়েন্সেস ল্যাবরেটরি, ওজরাত স্টেট-এর রিপোর্ট)। আপাতভাবে মনে হচ্ছে, তিনি গাড়িতে বসে থাকার সময় অন্তত পাঁচটি গুলি করা হয় তাঁকে। তার পরও কোনো গুলির কোনো অবশিষ্টাংশ পড়ে রইল না?

হরেন পাভিয়াকে কি আদৌ তাঁর গাড়ির মধ্যে গুলি করা হয়েছিল? নাকি অন্য কোথাও তাঁকে হত্যা করে পরে দেহটা এনে গাড়িতে রেখে দেওয়া হয়েছিল? এর উত্তর খুঁজে পাওয়ার মতো কিছু সূত্র ছিল, কিন্তু সেগুলো উধাও হয়ে গেছে অথবা সেগুলো পাওয়ার আর কোনো উপায় নেই।

ল্য গার্ডেনে গাড়ি থেকে পাভিয়ার দেহ বার করার সময় তাঁর পায়ে জুতো ছিল। কিন্তু যখন তাঁকে ময়নাতদন্তের জন্য নিয়ে যাওয়া হয় তখন আর তাঁর পায়ে জুতো ছিল না, জুতোর কথা রেকর্ডে লেখাও নেই। সেদিক সকালে পাভিয়া কোথায় গিয়েছিলেন তা জানার খুব গুরুত্বপূর্ণ সূত্র থাকতে পারত জুতোর।

গাড়ি থেকে পাভিয়ার সেলফোনটি উদ্ধার করে পুলিশ—স্যামসানের ধূসর রঙের একটা ফ্লিপটপ সেলফোন। হয় পুলিশ সেই সেলফোনটি আদৌ পরীক্ষা করে দেখেনি, অথবা পাভিয়ার ফোনের সেদিনের যাবতীয় কল রেকর্ডের কথা চেপে যাচ্ছে। কল রেকর্ড থেকে জানা যেতে পারত পাভিয়া কাদের ফোন করেছিলেন অথবা তাঁকে কারা ফোন করেছিল। সত্য উন্মোচনের ক্ষেত্রে এই কল রেকর্ডও একটা গুরুত্বপূর্ণ সূত্র হয়ে উঠতে পারত। কিন্তু না, কোনো রেকর্ড রাখা হয়নি। পাভিয়ার সার্ভিস প্রোভাইডার হাচ-এর কাছে কল রেকর্ড চাওয়া হলে তারা ২০০৩ সালের জানুয়ারি ও ফেব্রুয়ারি মাসের রেকর্ড পেশ করে। কিন্তু ২০০৩ সালের মার্চ মাসের রেকর্ডের ব্যাপারে এক বিচিত্র অজুহাত দেয় তারা—ওগুলো বড্ড পুরোনো। কিন্তু জানুয়ারি আর ফেব্রুয়ারি মাস তো মার্চের আগেই আসে, তাই না।

এই মামলার অন্যতম অভিযুক্ত মুফতি সুফিয়ানের বিচিত্র ঘটনার সঙ্গে কি এইসব সূত্র হারিয়ে যাওয়ার কোনো সম্বন্ধ আছে? সুফিয়ান একজন

তরুণ মৌলবি, আমেদাবাদের লাল মসজিদে উসকানিমূলক বক্তৃতা দিয়ে দ্রুত বিখ্যাত হয়ে উঠেছিলেন। ২০০২ সালের হিংসাত্মক ঘটনাবলির পর তিনি আরও উগ্র হয়ে ওঠেন, প্রার্থনা-পরবর্তী আলোচনায় পালটা সাম্প্রদায়িক আগুন জ্বালানোর ব্যাপারে ইচ্ছন জোগাতে থাকেন। এটাও সবার জানা যে আমেদাবাদের অপরাধ-জগতের সঙ্গে তাঁর যোগাযোগ ছিল, মাদকদ্রব্যের চোরাচালানই যে-জগতের মূল কাজ। শোনা যায় পাভিয়ারকে হত্যা করার জন্য আসগর আলির সঙ্গে যোগাযোগের ব্যাপারে একটা ভূমিকা ছিল সুফিয়ানের। হত্যার এক সপ্তাহের মধ্যেই, যখন নাকি তাঁর উপর নজর রাখা হচ্ছিল, দেশ ছেড়ে পালিয়ে যান তিনি। কোথায় গেলেন? কেউ জানে না। বাংলাদেশ, পাকিস্তান, আফগানিস্তান, ইয়েমেন—কেউই সঠিক জানে না। সিবিআই তাদের ওয়েবসাইটে সুফিয়ানকে দূর্বৃত্ত হিসেবে চিহ্নিত করে এবং ইন্টারপোলকে দিয়ে তাঁর নামে রেড-কর্নার নোটিশ জারি করায়। কাগজেবলমে সুফিয়ান ছিলেন একজন ওয়াশেড ব্যক্তি, পাভিয়ারকে হত্যার চক্রান্তে অভিযুক্ত। তা সত্ত্বেও সুফিয়ানের রহস্যময় অন্তর্ধানের বছরখানেকের মধ্যে তাঁর স্ত্রী ও সন্তানরাও উধাও হয়ে যায়। জনৈক বরিষ্ঠ পুলিশ অফিসার বলেছেন, ‘ওদের ওপর কড়া নজর রাখা উচিত ছিল। সুফিয়ানের খোঁজ পাওয়ার ব্যাপারে ওরাই ছিল আমাদের শেষ সূত্র।’ তথাপি উধাও হয়ে গেল তারা। এটা কীভাবে সম্ভব হতে পারে? কেউ কি তাদের পালাতে সাহায্য করেছিল? সুফিয়ান কি অনেক অস্বস্তিকর গোপন তথ্য জেনে ফেলেছিল? বিশেষ কোনো লেনদেন হয়েছিল কি?

স্টিং অপারেশন শুরু করার অল্প কিছুদিন আগে, ২০১০ সালে জাগ্রতি পাভিয়ার সঙ্গে প্রথমবার দেখা হয় আমার। তখনও সোরাবুদ্দিনের এনকাউন্টারের ঘটনার তদন্ত করছি আমি। তার আগে তাঁর স্বামীর মৃত্যুর পর টিভিতে নিরপেক্ষ তদন্তের দাবি জানাতে দেখেছি তাঁকে, মনে হয়েছে ভদ্রমহিলা খুব মনোবলসম্পন্ন। আমেদাবাদের এক উচ্চ-মধ্যবিত্ত এলাকায় দুই ছেলে আর নিজের বাবার সঙ্গে থাকতেন। জাগ্রতিবেন বা জাগ্রতির (পরে তাঁকে নাম ধরেই ডাকতাম আমি) মধ্যে খুব সাহসী একটা ব্যাপার ছিল। আজ আমি তাঁকে একজন প্রিয় বন্ধু বলতে পারি, স্বামীর হত্যাকারীদের খুঁজে বার করার জন্য যাঁ সাহসী লড়াই নিঃসন্দেহে অভিনন্দনযোগ্য। আরএসএসের, লালকৃষ্ণ আদবানি ও আরও অনেক বিজেপি নেতার খুবই প্রিয়জন ছিলেন হরেন পাভিয়া, সেইসঙ্গে গুজরাতের অনেক পুলিশ অফিসারেরও প্রিয় ছিলেন তিনি। গুজরাত দাঙ্গায় তাঁর ভূমিকা নিয়ে বিতর্ক থাকলেও, অনেকে মনে করেন মুসলিম সম্প্রদায়ের অনেকের কাছেও প্রিয় ছিলেন তিনি।



জাগ্রতির মধ্যে মুসলিমদের সম্বন্ধে একটু তিক্ততা ছিল, কারণ একজন মুসলিমই তাঁর স্বামীকে হত্যা করেছে বলে অভিযোগ উঠেছিল। আমার সৌভাগ্য যে রানা নামটাকে হিন্দু নাম বলে ধরে নিয়েছিলেন তিনি। ডুলটা শুধরে দিতে বেশ অস্বস্তি হচ্ছিল। ঠিক করলাম পরে আমার কোনো কলামে পদবীটা দেখলে তিনি নিজেই বুঝতে পারবেন আমি কোন ধর্মের মানুষ। স্বামীর হত্যাকারীদের সম্বন্ধে বলতে গেলেই মুসলিমদের সম্বন্ধে ‘ওইসব লোকেরা’ বলতেন তিনি, মাঝেমাঝে মুসলিমদের ‘হিংস্র লোকজন’ও বলতেন। কিন্তু জাগ্রতিবেনের সঙ্গে প্রথম পরিচয়ের সময় থেকেই দেখেছিলাম তাঁর দৃঢ় বিশ্বাস কোনো ক্ষমতাশালী লোক মুসলিম ছেলেদের ‘ব্যবহার করেছে’ এবং এই ব্যাপারটা রীতিমতো খতিয়ে দিয়েছিল আমাকে। আট বছর আগে স্বামীকে হারিয়েছেন ভদ্রমহিলা। তাঁর ছোটো ছেলের বাবার শেষকৃত্যের স্মৃতিটুকুও প্রায় মনে নেই। তা সত্ত্বেও ছেলেদের ভালোভাবে বড়ো করে তোলার পাশাপাশি ন্যায়বিচারের লড়াই ছেড়ে সরে আসেননি তিনি, সেই সঙ্গেই খেয়াল রেখেছেন তাঁর সন্তানদের ওপরে এর কোনো প্রতিকূল প্রভাব যেন না পড়ে। তাঁর ছোটো ছেলেটি রাজ্যান্তরের খেলোয়াড়, বড়ো ছেলে একটা প্রাইভেট ফার্মে চাকরি করে। দু’জনেই দৃঢ়ভাবে মায়ের পাশে দাঁড়িয়েছে। তাদের বাবার মৃত্যুর পিছনে যে বৃহত্তর কোনো চক্রান্ত আছে—মায়ের এই বিশ্বাস সম্বন্ধে কোনো সন্দেহ নেই তাদের মনে। ফোন কলের রেকর্ড দেখে স্বামীর মৃত্যু সম্বন্ধে সঙ্গত কারণেই প্রশ্ন তুলেছিলেন তিনি। ফোন কলের এই রেকর্ডগুলি তিনি আমাকে দেন, সেইসঙ্গে দেন মুফতি সুফিয়ান ও তাঁর পরিবার সম্বন্ধে বিভিন্ন তথ্য—সুফিয়ানের বাড়ির লোকদের সঙ্গে দেখা করার চেষ্টা করেছিলেন তিনি।”

সংকর্ষণ ঠাকুরের বিস্তৃত রিপোর্টও (যার কথা আগেই বলা হয়েছে এবং কিছু অংশ উদ্ধৃতও করা হয়েছে) আমাকে দিয়েছিলেন তিনি। অমিত শাহ জেলে যাওয়ার এবং পাণ্ডিয়ার হত্যা সম্বন্ধে অনেক জরুরি তথ্য যে তুলসী প্রজাপতি (যিনিও ভূয়ো সংঘর্ষে নিহত হন) জানতেন তা প্রকাশ্যে আসার ঠিক পরেই তাঁর সঙ্গে দেখা করি আমি। স্টিং অপারেশন শেষ করে দিম্মিতে ফিরে আসার কয়েক মাস পরে পাণ্ডিয়ার হত্যা সম্বন্ধে একটা নিবন্ধ লিখি আমি। সেই লেখায় কিছু গুরুত্বপূর্ণ প্রশ্ন তুলেছিলাম:

সুফিয়ানের বাবা চুদাসামার প্রশংসার করলেন কেন, যিনি তখন আমেদাবাদের ক্রাইম ব্রাঞ্চে ছিলেন? সুফিয়ানের বাবার কথা সত্যি বলে ধরে নিলে প্রশ্ন ওঠে—চুদাসামা কেন প্রতিশ্রুতি দিয়েছিলেন যে তাঁদের পরিবারের কোনো ক্ষতি হবে না? প্রাথমিক তদন্তের রিপোর্ট সিবিআই-এর হাতে তুলে দিয়েছে ক্রাইম ব্রাঞ্চ। সিবিআই বলছে এটা

একটা বিশেষ মামলা। এখানে যুক্তিসঙ্গতভাবেই প্রশ্ন তোলা যায়: এই ঘটনার তদন্তকারী টিম সুফিয়ানকে খুঁজে বার করার জন্য কোনো চিঠি পাঠায়নি কেন?

দ্বিতীয়ত, সিবিআই-এর তদন্তকারী অফিসার জানিয়েছেন পাণ্ডিয়ার ২০০৩ সালের মার্চ মাসের কল রেকর্ড পাওয়া যায়নি, যদিও তার আগের দু'মাসের কল রেকর্ড পাওয়া গেছে। এইসব রিপোর্টের একটি কপি তেহেলকার কাছে আছে। তাতে দেখা যাচ্ছে, আমেদাবাদের জনৈক মহিলা সাংবাদিক ৪০ বার ফোন করেছিলেন তাঁকে। আশ্চর্য বিষয় হল, সিবিআই অথবা পুলিশ, কেউই তাঁকে এ ব্যাপারে প্রশ্ন করেনি।

তৃতীয়ত, প্রধান সাক্ষী অনিল ইয়াদরাম, যিনি ল্য গার্ডেনের কাছে একটি খাবারের দোকান চালান এবং এই হত্যাকাণ্ডের প্রত্যক্ষদর্শী বলে জানা গেছে, তিনি পরস্পরবিরোধী বিবৃতি দিয়েছেন। পুলিশকে তিনি বলেছেন একেবারে হতভম্ব হয়ে পড়ার দরুন তিনি কিছু করে উঠতে পারেননি, তবে এক ঘণ্টা পরে তাঁর দোকানের মালিককে ফোন করেন, সেই মালিক আবার ফোন করে পাণ্ডিয়ার সহকারীকে খবর দেন, কিন্তু পুলিশকে কিছু জানান না। তেহেলকা যখন ইয়াদরামের সঙ্গে দেখা করে, তখন তিনদিন তিনরকম কথা বলেন তিনি। প্রথম দিন বলেন, আলি একটা বাইকে চেপে এসেছিল; দ্বিতীয় দিন বলেন, আলিকে গাড়ির দিকে হেঁটে আসতে দেখেছিলেন তিনি; তৃতীয় দিন বলেন, সব ঘটনা ঠিকঠাক মনে নেই তাঁর।

চতুর্থত, ফরেনসিক রিপোর্ট থেকে জানা যাচ্ছে পাণ্ডিয়ার কুর্তায় ছ'টা ছিদ্র ছিল, কিন্তু তাঁর শরীর থেকে মাত্র পাঁচটা গুলি পাওয়া গেছে। তিনি যদি স্টিয়ারিং হুইলের পিছনে বসা অবস্থায় থেকে থাকেন এবং ডানদিকের কিছুটা খোলা জানলা দিয়ে গুলি চালানো হয়ে থাকে, তাহলে তাঁর অগুতোষে কোনো ক্ষত হওয়ার কথা নয়। বিবাদী পক্ষ বলেছেন এবং বিচারপতি মেনে নিয়েছেন যে তিনি কাত হয়ে প্যাসেঞ্জার সিটে পড়ে গিয়েছিলেন, কিন্তু তেমনটা হওয়া সম্ভবপর বলে মনে হয় না।

এবং পঞ্চমত, পুলিশ কন্ট্রোল লগবুকে লেখা এফআইআর যথেষ্ট বিশ্বাস্তিকর অথবা দেয়িতে লেখা।

এই সমস্ত ফাঁকফোকর থাকা এবং সাক্ষীরা ক্রমাগত বয়ান বদলানোর ফলে, দুঃখজনক হলেও খুব স্বাভাবিকভাবেই এই মামলার ১২ জন অভিযুক্তকে গত মাসে রেহাই দিয়েছে হাইকোর্ট এবং আলি যে পাণ্ডিয়াকে গুলি করেছিল তার কোনো প্রমাণ নেই বলে রায় দিয়েছে।

পরে জাফ্রতিবেনের সঙ্গে অনেকবার দেখা হয়েছে। আমরা গাড়িতে করে বেড়াতে যেতাম, কিংবা বাইরে ডিনার খেতে যেতাম। তিনি একজন বিশ্বস্ত মানুষকে পেয়েছিলেন যার কাছে সব কথা বলা যায়, আর আমি একজন বন্ধু পেয়েছিলাম যিনি আমাকে সত্য উদ্ঘাটনের শক্তি জোগাতেন। একবার তাঁর স্বামীর হত্যা মামলায় দাখিল করা চার্জশিটটা নেওয়ার জন্য তাঁর সঙ্গে দেখা করি। সেটা ছিল রমজান মাস, আমি উপবাস করে থাকছিলাম। তাঁর বাড়িতে ঢোকামাত্রই আমার দিকে নিম্নুপানি এগিয়ে দিলেন তিনি। বললাম আমি খেতে পারব না। উনি তখন আমাকে চা খেতে বললেন। বললাম, ‘না জাফ্রতিবেন, রমজান হায় না, মেরা রোজা হায়। কুছ খা পি নেহি সকতি।’ রীতিমতো বিস্মিত হয়ে কোনোমতে তিনি বললেন, ‘আপ মহামেডান হো? মুখে পতা নেহি থা।’ আমার সামনে আমার ধর্মের লোকেদের সম্বন্ধে বছবার অস্বীতিকর কথা বলেছেন ভেবে বেশ লজ্জিত মনে হল ওঁকে। ওঁকে আশ্বস্ত করে বললাম, ‘কোই বাত নহি, আপকি জাগাহ ম্যায় হোতি তু মুখসে ভি ভুল হো সকতি থি। আপকে সাথ জো ছয়া হ্যায় উয়ো কোই মাফ নেহি কর সকতা।’

চার্জশিট আর কল রেকর্ডগুলো দেখতে লাগলাম আমি। পাশে বসে ধৈর্যসহকারে আমার সব প্রশ্নের উত্তর দিয়ে চললেন তিনি।

তিনি বললেন ২০০২ সালে গুজরাত গণহত্যার ব্যাপারে ভি.আর. কৃষ্ণ আইয়ার-এর নেতৃত্বে নাগরিক অনুসন্ধান শুরু হওয়ার আগেই তাঁর স্বামীকে পদচ্যুত করা হয়। কার্জটা খুব গোপনে করা হয়েছিল, কিন্তু তাঁর ধারণা মোদিই এটা করিয়েছিলেন। তাঁর মতে, হরেনের সঙ্গে নানান ব্যাপারে মর্যাদার লড়াই ছিল মোদির, সেইজন্যই বিজেপি-র শীর্ষ নেতৃত্বকে অগ্রাহ্য করে তাঁর স্বামীকে এলিসব্রিজ আসনটি ছেড়ে দিতে বাধ্য করেন তিনি। জাফ্রতিবেন বলেছিলেন—নরেন্দ্র মোদির পক্ষে একটা রাজনৈতিক কাঁটা হয়ে উঠেছিলেন পাণ্ডিয়া, কারণ সর্বদাই আরএসএসের সুনজরে ছিলেন তিনি এবং আরএসএস তাঁকে সমর্থনও করত।

যখন বেরিয়ে আসতে যাচ্ছি, তিনি জানতে চাইলেন আমেদাবাদে কোথায় থাকছি আমি। সেইদিনই সঙ্গে সাড়ে ছটা নাগাদ, ইফতারের ৩০ মিনিট মতো আগে, আমাকে ফোন করলেন তিনি। আমার হোটেলের বাইরে তিনি অপেক্ষা করছেন, কোথাও খাওয়াতে নিয়ে গিয়ে আমার উপবাস ভঙ্গ করাতে চান।

সেই দিন থেকে আমার নিরাপত্তার ব্যাপারে অত্যন্ত সচেতন হয়ে ওঠেন জাফ্রতিবেন। বলতেন, এই রাজ্যকে আমি চিনি। আমার স্বামীর মৃত্যুর ব্যাপারে

সত্য উন্মোচনের জন্য এত খাটছেন আপনি। আপনাকে রক্ষা করা আমার কর্তব্য, বিশেষত আপনার পদবীর জন্য।

হরেন পাণ্ডিয়ার হত্যা তদন্তে বহু আধিকারিক যুক্ত ছিলেন। হত্যার কয়েকদিন পরেই এবং নিয়ম অনুযায়ী গুজরাত পুলিশ এফআইআর লেখা ও স্বাক্ষর করার পরেই মামলাটা হাতে নেয় সিবিআই। এফআইআরটা পড়ে দেখলাম। তদন্তকারী অফিসার একজন ইন্সপেক্টর, নাম ওয়াই.এ. শেখ (আগে উদ্ধৃত সংবাদপত্রের প্রতিবেদনেও তাঁর নামের উল্লেখ ছিল)।

ঘটনাচক্রে শেখ ছিলেন ভি.এল. সোলাঙ্কির (গীতা জোহরির প্রসঙ্গে তাঁর কথা আগেই উল্লেখ করা হয়েছে) বন্ধু। শেখ কারও সঙ্গে দেখা করতেন না, সংবাদমাধ্যমের লোকেদের তো সম্পূর্ণ এড়িয়ে চলতেন। তখনও আমার স্টিং অপারেশন শুরু করিনি, অমিত শাহের প্রেপ্তারির পর আমেদাবাদে থেকে বিষয়টা নিয়ে পড়াশোনা করার চেষ্টা করছি। ভি.এল. সোলাঙ্কির সঙ্গে দু'বার দেখা করেছিলাম আমি, আমার সম্বন্ধে যথেষ্ট খোঁজখবর নেওয়ার পর আমাকে বাড়িতে ডেকেছিলেন তিনি। তাঁর বাড়ির বাইরে কনস্টেবল ভর্তি একটা পুলিশ জিপ দাঁড়িয়ে ছিল। আসলে গীতা জোহরির বিরুদ্ধে বিবৃতি দেওয়ার পর তাঁর বাড়িতে নিরাপত্তার ব্যবস্থা করা হয়েছিল।

সিবিআই-এর কাছে যা যা বলেছিলেন, আমার কাছেও ঠিক সেই কথাগুলোই বললেন সোলাঙ্কি। বেরিয়ে আসার আগে কথাচ্ছলে সোলাঙ্কিকে জিজ্ঞেস করলাম, শেখ নামে কোনো অফিসারকে তিনি চেনেন কিনা। তীক্ষ্ণ সুরে তিনি বললেন, 'তার সঙ্গে দেখা করতে চান কেন? তার সম্বন্ধে জানতেই বা চাইছেন কেন?' হালকা সুরে বললাম, 'একটা কেসের ব্যাপারে ওঁর সঙ্গে একটু কথা বলতে পারলে ভালো হত।' একটু হেসে আমাকে দরজার কাছে এগিয়ে দিতে এসে তিনি বললেন, 'রহেনে দো বেন, উয়ো নেহি মিলেগি আপসে, আউর আপ ইয়ে সব মেঁ মত পড়ো।'

পাণ্ডিয়ার ব্যাপারে নিজে এফআইআর দাখিল করেছিলেন বলে নিজের সহকর্মীদের এবং রাজ্য প্রশাসন সম্বন্ধে ভয়ে ভয়ে থাকতেন শেখ। মামলাটা সিবিআই-এর হাতে যাওয়ার আগে পর্যন্ত এই ঘটনার তদন্তের সঙ্গে তিনিই জড়িত ছিলেন—এ মামলায় অনেক কিছু চেপে দেওয়া হচ্ছে বলে পাণ্ডিয়ার বাবা অভিযোগ করার পরই সিবিআই-কে তদন্তের ভার দেওয়া হয়।

গুজরাতের একজন আইনজীবীর সঙ্গে ভালো পরিচয় ছিল শেখের, পরামর্শ নেওয়ার জন্য প্রায়ই তাঁর কাছে যেতেন শেখ। সেই আইনজীবীকে অনুরোধ করলাম শেখের সঙ্গে দেখা করিয়ে দেওয়ার জন্য। দরকার হলে ধর্মের দিকটাও ব্যবহার

করতে বললাম। অর্থাৎ আমি একজন মুসলিম এবং তাঁর মতো সে-সব অঙ্গিসার বর্তমান প্রশাসনের অধীনে হাঙ্গামা করছেন তাঁদের প্রতি সন্তানুভূতিসম্পন্ন।

সেই সময় মুসলিম-অধ্যুষিত শানপুর এলাকায় 'অ্যাথাসাডের তোটেলে' থাকছিলাম আমি। প্রতিদিন সকাল-সন্ধ্যা কাছের মসজিদের 'আজান' শ্রবণে রমজানের সময় সেহরি ও ইফতার পেতে সুবিধে হত। 'অ্যাথাসাডের' মালিক ছিলেন একজন সিকি ব্যবসায়ী। 'অ্যাথাসাডের' ঠিক উলটাটোদিকে একটা রেস্টুরেন্ট ছিল, তার মালিক ছিলেন একজন মুসলিম। রোজা ভাঙার পর চা 'আর এটা-সেটা খেতে রেস্টুরেন্টে ভিড় করত ওই এলাকার মুসলিমরা।

এখানেই আমার সঙ্গে প্রথম দেখা করতে রাজি হলেন শেখ। নিজের পরিচয় দিলাম। বললাম আমিই সেই সাংবাদিক যে সোরাবুদ্দিন আর ফুলসী প্রজাপতির মামলায় প্রমাণ জুগিয়েছিল এবং যার ফলে জেলে যেতে হয়েছে অনিষ্ঠ শাহকে। উনি বললেন, পরিচয় দেওয়ার কোনো প্রয়োজন নেই, কেননা তামান ওজরাঠই রানা আইয়ুব নামে একজন লোকের কথা জানে। হেসে ফেললাম।

খুব আশঙ্কার মধ্যে ছিলেন শেখ। বললাম আমি একজন দর্নপ্রাপ মুসলিম, ধর্মের সব রীতিনীতি মেনে চলি, দাঙ্গায় নিহতদের জন্য গভীরভাবে নর্মাহত আমি। নম্র সুরে উনি বললেন, 'আপ তেহেলকাওয়ালে হো, ডর লাগতা হ্যায় আপ লোগৌ সে বাত করনা, পতা নেহি ক্যা রেকর্ড কর লোগে।'

আমার ডায়েরি আর ব্যাগ পরীক্ষা করে নিতে বললাম ওঁকে। লাজুক ভঙ্গিতে হেসে উঠলেন তিনি। বললাম আবার ওঁর সঙ্গে দেখা করব, কিন্তু পরের সপ্তাহে একবারও ওঁর সঙ্গে যোগাযোগ করলাম না।

বুদ্ধিটা কাজে লাগল। তার পরের সপ্তাহে আবার শেখের সঙ্গে দেখা করলাম। ওঁর বিশ্বাসটা ভেঙে দিতে চাইছিলাম। ব্যাপারটা আমাকে কুরে-কুরে খাচ্ছিল, অপরাধবোধে শেষ হয়ে যাচ্ছিল। উনি জানেন আমি কে। আমি হচ্ছি সাংবাদিক রানা আইয়ুব, যে সব তথ্য গোপন রাখবে। কিন্তু শেখ এমন একজন মানুষ যিনি সন্তবত সত্যটা জানেন। পাণ্ডিয়ার হত্যার পর ১০ বছর কেটে গেছে, মামলার নিষ্পত্তি হওয়ার আর কোনো আশা নেই। ভাবলাম স্পাই ক্যামেরা নিয়ে গিয়ে ওঁর কথাবার্তা রেকর্ড করে নেব, তবে সাধারণ পন্থায় কিছুই না পেলে তবেই করব সেটা। শেখের সঙ্গে দেখা হওয়ার পর যে-কোনো একটা প্রমাণ খুঁজে পাওয়ার আশ্রয় চেষ্টা করেছি, এমনকী মুফতি সুফিয়ানের বাড়িতেও গেছি, কিন্তু তারা শুধু পুলিশদের প্রশংসাই করেছে। বোঝা যায় আগে থেকেই তাদের সবকিছু শিখিয়ে রাখা হয়েছিল।

পরের বার দেখা হতে খোলা মনেই কথা বলেছিলেন শেখ।

উ: শুনুন, প্রথমেই আপনাকে একটা কথা জানিয়ে রাখি। আইবি-র লোকেরা আপনাকে ফলো করেছে। আইবি-র সর্বোচ্চ কর্তারাই করেছে।

প্র: রাজ্য আইবি না কেন্দ্রীয় আইবি?

উ: রাজ্য আইবি। উনি আমাকে বললেন যে আপনি আমার সঙ্গে দেখা করছেন। ওরা জানতে পেরেছে আপনি আমার সঙ্গে দেখা করছেন, তাই আমাকে সতর্ক থাকতে বলল। এটাই ওদের কাজ . . . তাই আপনাকে বলছি, একটু সতর্ক থাকবেন।

প্র: কিন্তু ওরা আমার বিরুদ্ধে যাবে কেন?

উ: ওই হরেন পাণ্ডিয়ার ব্যাপারটা একটা আশ্চর্য্যগিরির মতো। একবার সত্যিটা সামনে এলেই মোদিকে ঘরে ঢুকে যেতে হবে। না, ঘরে নয়, জেলে যেতে হবে। জেলখানায় থাকতে হবে। দেখুন না, হরেন পাণ্ডিয়ার ঘটনার ব্যাপারে আজম খানের বিবৃতি বিচার করে দেখার জন্য জাফতি পাণ্ডিয়া আবেদন জানানোর দু'দিন পরেই উদয়পুরে গুলি চালানো হল আজম খানের ওপর। উনি বেঁচে গেছেন। তারপর গুঁকে শাসানো হয়েছে আর রাজনৈতিক চাপ সৃষ্টি করা হয়েছে গুঁর ওপর।

প্র: আমি কিন্তু ব্যাপারটা ঠিক বুঝতে পারছি না। আমার কথা আইবি কী করে জানল?

উ: ম্যাডাম, ওরা জানতে পেরেছে, কারণ ওরা মি. মোদির হয়ে কাজ করে। ওই সাক্ষী অনিল ইয়াদরামের স্টিং অপারেশন করছেন না কেন?

প্র: করে কী হবে? কী বলার থাকতে পারে গুঁর?

উ: আরে, ও আসল ব্যাপারটা বলবে—কে প্রথম গুঁর সঙ্গে কথা বলে, ও কী কী জানে এবং ওকে কী বলতে বলা হয়েছিল। চুদাসামাও এই ঘটনার সঙ্গে জড়িত ছিলেন। অনেক ক্রিমিনালের সঙ্গেই রীতিমতো দহরম-মহরম আছে গুঁর। চুদাসামা আর অন্য অফিসাররা বারোত-এর মতো ইন্সপেক্টরদের সাহায্য নিয়ে এ-সব কাজ করে। বারোত একজন ইন্সপেক্টর, নীচুতলার কর্মী। সমস্ত লেখালেখির কাজ ওই করে থাকে।

প্র: সাক্ষী অনিল ইয়াদরাম মিথ্যা বয়ান দিলেন কেন?

উ: ম্যাডাম, ওকে হেফাজতে নিয়ে সব শিখিয়ে-পড়িয়ে দিয়েছিল ওরা। খুনের আগে আসগর আলি ওদের হেফাজতে ছিল, তাই ওকে সব শিখিয়ে-পড়িয়ে দেওয়া হয়।

মি. পাভিয়া খুন হওয়ার পর আসগর আলিকেই অপরাধী হিসেবে খাড়া করতে চাইছিল ওরা, তার জন্য একজন সাক্ষী দরকার ছিল।

প্র: আসগরকে ওদের হেফাজতে রাখতে হল কেন?

উ: মোটো কোনো মুসলিম তাঁবেদারের ওপর চাপাতে চাইছিল ওরা। আসগরকে বেআইনিভাবে হেফাজতে রাখা হয়। পরে নিজের পক্ষে আর কী বলবে সে?

ডাছাড়া আসগর আলির স্বীকারোক্তির কোনো প্রয়োজন ছিল না। ওদের দরকার ছিল প্রমাণ।

প্র: তার মানে আপনি কি বলতে চাইছেন যে তরুণ বারোত, চুদাসামা আর বানজারা এই ঘটনার জড়িত ছিলেন?

উ: হ্যাঁ।

কানহাইয়া শুধু বলেছিল যে সে একটা গাড়িতে করে যাচ্ছিল এবং ইরেন পাভিয়াকে একটা গাড়ির মধ্যে পড়ে থাকতে দেখেছিল।

গুজরাত পুলিশের বানানো গল্প মেনে নিয়েছিলেন সিবিআই অফিসার গুপ্তা। সিবিআই থেকে পদত্যাগ করেন গুপ্তা, এখন উনি সুপ্রিম কোর্টের একজন আইনজীবী। রিলায়েন্সের বেতন প্রাপকদের তালিকায় ওঁর নাম আছে। ওঁকে জিজ্ঞেস করুন কেন উনি সিবিআই থেকে পদত্যাগ করলেন। উনি সুপ্রিম কোর্টে বসেন। ওঁর সঙ্গে দেখা করুন।

প্র: তার মানে সিবিআই তদন্ত চালায়নি?

উ: ওরা স্বেচ্ছা জোড়াতালি দিয়েছে। গুজরাতের পুলিশ অফিসাররা যা বলেছিল, সেগুলোই আউড়ে গেছে।

প্র: এটা কি রাজনৈতিক হত্যা ছিল?

উ: সকলে জড়িত ছিল। আদবানির নির্দেশে মামলাটা সিবিআই-এর হাতে দেওয়া হয়, কারণ উনি ছিলেন নরেন্দ্র মোদির উপদেষ্টা। তাই ওঁকে বাঁচানোর জন্য, মানে, স্থানীয় পুলিশের বক্তব্য লোকে বিশ্বাস করত না, কিন্তু সিবিআই-এর বক্তব্য সবাই মেনে নেবে।

বৃক্টি অনেক পরে পালিয়েছিল।

প্র: কার ভূমিকা প্রধান ছিল? বারোতের না বানজারার?

উ: তিনজনেরই।

বারোত অন্য কোথাও ছিল, চুদাসামাকে ডেপুটেশনে আনা হয়েছিল। চুদাসামাকে ধরেছিল ওরা। উনি সরকারের হয়ে কাজ করেন। এই



এনকাউন্টারের সঙ্গে পোরবন্দরের একটা সম্পর্ক আছে। এ মামলার কোনো পরিণতি নেই। আসগর আলি আর সাক্ষীকে স্রেফ খাড়া করেছিল ওরা। ক্রাইম ব্রাঞ্চ তদন্ত করেছিল এবং সে তদন্তে কেউ বিশ্বাস করেনি, এমনকী বিট্ঠল পাণ্ডিয়াও নন।

প্র: সিবিআই ব্যাপারটা ঘুরিয়ে দিল কেন?

উ: এই মামলায় মোদিকে বাঁচিয়ে দিয়েছিল সিবিআই।

সবাই জানেন, কিছু কথার কোনো ব্যাখ্যার প্রয়োজন হয় না। যে-মানুষটি হরেন পাণ্ডিয়াকে গুলি করেছিলেন বলে অভিযোগ, সেই আসগর আলি হায়দ্রাবাদের একটা জেলে আছেন। অন্যদের গ্রেপ্তার করা হয়েছিল অন্ধ্রপ্রদেশ থেকে, তুলসী প্রজাপতি এবং সোরাবুদ্দিন হত্যায় জড়িতদের সঙ্গেও তাদের যোগাযোগ ছিল। তাহলে হরেন পাণ্ডিয়াকে হত্যা করেছিল কে? শেষ কি জনশ্রুতির ভিত্তিতে কথা বলেছিলেন? প্রশ্ন হল—কেন তা করবেন তিনি? তিনিই ছিলেন তদন্তকারী অফিসার, প্রাসঙ্গিক নথিপত্রে তিনিই স্বাক্ষর করেছিলেন। প্রাথমিক তদন্ত তিনিই করেন, তাঁর পর দায়িত্ব নেন অভয় চূদাসামা, পরে চূদাসামাকে গ্রেপ্তার করে সিবিআই।

কেন হত্যা করা হল সোরাবুদ্দিন এবং প্রজাপতিকে? হত্যার উদ্দেশ্য এখনও পর্যন্ত খুব স্পষ্ট নয়। সিবিআই-এর চার্জশিটে যে-মুক্তি সুফিয়ানকে হরেন পাণ্ডিয়া হত্যার মূল চক্রী হিসেবে চিহ্নিত করা হয়েছে, সে এত সহজে দেশ ছেড়ে প্রতিবেশী দেশে পালাল কী করে? কেন সুফিয়ানের পরিবার অভয় চূদাসামার প্রতি এত কৃতজ্ঞ, ভূয়ো সংঘর্ষে নিরাপরাধ ব্যক্তিদের হত্যা করার জন্য যাঁর নামে চার্জশিট দেওয়া হয়েছে?

যে-সব গৃহমন্ত্রী গুজরাতের মানুষের সবথেকে বেশি ভালোবাসা পেয়েছেন, হরেন পাণ্ডিয়া তাঁদেরই একজন। শোনা যায় গুজরাত দাঙ্গার ব্যাপারে একটা নাগরিক বিচারসভার সামনে উপস্থিত হওয়ার ইচ্ছা প্রকাশ করেছিলেন তিনি। তাঁর এই ইচ্ছার মধ্যেই কি লুকিয়ে আছে প্রকৃত সত্যটা? অবিচার ও পরস্পরবিরোধী সাক্ষ্যপ্রমাণের গোলকধাঁধার জট ছাড়ানোর সময় কিন্তু এসে গেছে।



## একাদশ পরিচ্ছেদ

### উন্মোচন

অন্তর্ভুক্তের কাজ শেষ করে মুম্বইয়ে ফেরার ঠিক পরেই পি.সি. পাণ্ডে ফোন করে জানানতে চান, ফিল্ম সম্বন্ধে গবেষণার কাজ শেষ করে ফেলেছি কিনা। আমাকে মুখ্যমন্ত্রীর সঙ্গে দেখা করতে বলেন তিনি। শুনে প্রায় লাফিয়ে উঠলাম। সিনিয়রদের কাছে একটা মেল পাঠালাম। সোমা আর তরুণ তৎক্ষণাৎ জানালেন—এগিয়ে যাও। আমাকে সাহায্য করার জন্য শেষবারের মতো মাইককে আমেদাবাদে পাঠানোর ব্যবস্থাও করলেন ওঁরা। মাইকের মা-বাবা ওর সঙ্গে দেখা করার জন্য দিম্মিতে এসেছিলেন। একদিনের জন্য আমেদাবাদে যেতে হবে বলে তাঁদের বুঝিয়ে-সুঝিয়ে চলে আসে ও।

মাইককে বুঝিয়ে বলে দিলাম যে মুখ্যমন্ত্রীর বাড়ির দরজায় তন্নতন্ন করে তন্নাশি করা হবে আমাদের, আর আমাদের ওখানে যেতে হবে যাতে পি.সি. পাণ্ডের মনে কোনো সন্দেহ দেখা না দেয়। রেকর্ড করার জন্য আমার ক্যামেরা লাগানো ঘড়িটা পরে নিলাম। সেদিনের জন্য স্থানীয় একটা টুরিস্ট কার ভাড়া করলাম। তখন আর আমি ফাউন্ডেশনে থাকতাম না বলে এসজি হাইওয়ের সেই নির্জন বাংলোটোর চাবি একদিনের জন্য চেয়ে নিয়েছিলাম। নির্ধারিত সময়ের এক ঘণ্টা আগে মোদির গান্ধীনগরের বাড়িতে পৌঁছে গেলাম মাইক আর আমি। ড্রাইভারকে কাছেই গাড়িটা পার্ক করতে বলে ভাবতে লাগলাম ঘড়িটা যেন তাড়াতাড়ি চলে। আমি বেশ নার্ভাস, মাইক মিটিমিটি হাসছে। আমার মনে হচ্ছিল নিরাপত্তা তন্নাশি আর মেটাল বেরিয়ারে আমার ঘড়িটা ধরা পড়লেই সব শেষ। আধ ঘণ্টা পরে মুখ্যমন্ত্রীর বাসভবনে ঢুকলাম আমরা। তন্নাশিতে কিছুই ধরা পড়ল না। স্বস্তিতে শ্বাস নিলাম।

মোদির ওএসডি সঞ্জয় ভাবসার আমাদের সঙ্গে দেখা করলেন। অবশেষে মুখ্যমন্ত্রীর ঘরে নিয়ে যাওয়া হল আমাদের। আমাদের অভ্যর্থনা জানানোর জন্য উঠে দাঁড়ালেন তিনি। মাইক বলল আমেদাবাদের অনেক অটোয় তাঁর পোস্টার দেখেছে সে এবং তাঁর জনপ্রিয়তা দেখে অবাক হয়ে গেছে। টেবিলের ওপর বারাক

ওবামা সংক্রান্ত দুটো বই পড়ে ছিল। আমি তৎক্ষণাৎ জিজ্ঞেস করলাম, 'তাহলে আপনিই কি পরবর্তী প্রধানমন্ত্রী হবেন, স্যার?' লজ্জায় একটু রাঙিয়ে উঠে বারাক ওবামা সম্বন্ধে বলতে শুরু করলেন তিনি, যিনি তাঁর অনুপ্রেরণা। স্বামী বিবেকানন্দের গুণাবলির কথাও বললেন। ৩০ মিনিট কথাবার্তা চলার পর ভাবসারকে ঘরে ডেকে মুখ্যমন্ত্রী বললেন তাঁর সম্বন্ধে যা যা লেখা বেরিয়েছে সেগুলো আমাদের দেখাতে। ভাবসার আমাদের তাঁর কেবিনে নিয়ে গেলেন। তাঁর টেবিলে *তেহেলকা* এবং *দ্য হিন্দু*-তে মুখ্যমন্ত্রীর সম্বন্ধে প্রকাশিত লেখাপত্রের প্রিন্টআউট রাখা ছিল। আমি সেগুলো সম্বন্ধে জানতে চাওয়ায় ভাবসার বললেন, মুখ্যমন্ত্রীর অনেক শত্রু আছে। মনে হল মাইক যেন খুক খুক করে হেসে উঠল। পরে মুখ্যমন্ত্রীর লেখা নানান বইপত্র দেখানো হল আমাদের। ভারতে এবং পৃথিবীর অন্যান্য জায়গায় তাঁর বক্তৃতার রেকর্ডও শুনতে হল বসে বসে।

ভাবসার আমাকে ওইসব বই আর রেকর্ড এক কপি করে নিতে বললেন, কারণ তাতে আমার ছবির কাজে সুবিধে হবে। বললাম পরের বার এসে নিয়ে যাব। দু'জনে ফিরে এলাম। মাইক ব্যাগপত্রর গুছিয়ে নিল—দিল্লি যাওয়ার বিমান ধরতে হবে ওকে। মাইককে আলিঙ্গন করলাম, তারপর ওর বিমানবন্দরে যাওয়ার জন্য একটা ট্যাক্সি ডেকে দিলাম। কয়েক মিনিট পর মাইক ফোন করে জানাল, বিমানবন্দরে পৌঁছে দেখেছে পকেটে একটাও টাকা নেই। ট্যাক্সিচালক শুধু যে ওর ভাড়া নেয়নি তা-ই নয়, উলটে ওর পথখরচের জন্য দুশোটা টাকাও দিয়েছে। মাইক বলল, ঠিক এই স্মৃতিটাই গুজরাত থেকে নিয়ে যেতে চেয়েছিল ও। আমি সর্বান্তঃকরণে ওর কথা সমর্থন করলাম। মাইকের সঙ্গে সেই আমার শেষ দেখা। নিশ্চিত জানি, ও যেখানেই থাকুক, নিজের দিদি, নিজের সহযোদ্ধা মৈথিলীকে ওর মনে পড়বেই।

সোমাকে ফোন করে সব জানালাম। সোমা জানতে চাইল মুখ্যমন্ত্রীকে আমি দাসা সম্বন্ধে প্রশ্ন করেছিলাম কিনা। একটু কঠিন সুরে বললাম, 'না সোমা, প্রথম দেখাতেই এ-প্রশ্ন করা আমার পক্ষে সম্ভব ছিল না।'

সন্দের সময় সোমা ফোন করে বলল, 'রানা, দিল্লিতে ফিরে এসো।' আপত্তি করে কিছু বলতে যাচ্ছিলাম, ও বলল আমি গেলে সব বুঝিয়ে বলবে।

পরের দিন সকালে দিল্লি পৌঁছে সোজা *তেহেলকা*-র অফিসে গেলাম। মোদির কথাবার্তার রেকর্ডিংয়ের ফুটেজ আমার ল্যাপটপে ট্রান্সফার করে নিয়েছিলাম। তরুণ নিজের কেবিনে ছিলেন। সোমা আমার কাছে এল। ফুটেজটা ওদের দেখালাম। ওবামা সংক্রান্ত বইগুলো দেখে হেসে ফেলল ওরা।

জিঙ্কস করলাম, ‘আমাকে ফিরে আসতে বলা হল কেন? ওঁর অফিস থেকে কয়েক দিনের মধ্যেই ডেকে পাঠাবে আমাকে, আবার ওঁর সঙ্গে দেখা করার কথা আছে আমার।’

তরুণ বললেন, ‘দেখুন রানা, বঙ্গার লক্ষ্মণের ওপর তেহেলকা সিং অপারেশন চালানোর পর আমাদের অফিস বন্ধ করে দিয়েছিল ওরা। মোদি এখন সবথেকে বেশি ক্ষমতাসালী ব্যক্তি হতে চলেছেন, প্রধানমন্ত্রী হবেন উনি। ওঁর গায়ে হাত দিলে আমরা শেষ হয়ে যাব।’

আমি একমত হতে পারলাম না। গোটা সিং অপারেশনটাই কি একটা বিশাল ঝুঁকি ছিল না? কিন্তু আমার প্রতিটি প্রশ্নের উত্তরে শুধু স্পষ্ট ‘না’-ই শুনতে হল।

সেদিনই সন্দের সময় সঞ্জয় ভাবসার আমাকে ফোন করলেন। ফোনটাকে বেজে চলতে দিলাম। তিনবার ফোন করে আমাকে না পেয়ে একটা মেসেজ পাঠিয়ে তিনি জানালেন, পরের রবিবার আমার সঙ্গে দেখা করতে চেয়েছেন মুখ্যমন্ত্রী। কাছের একটা পাবলিক বুথে গিয়ে ভাবসারকে ফোন করে জানালাম আমি এখন দিল্লিতে আছি, একজন আত্মীয় মারা গেছেন বলে আমাকে এখন এই শহরেই থাকতে হবে। তবে কথা দিলাম এক সপ্তাহের মধ্যেই ফিরে যাব। দু’দিন পর আমার ফোন থেকে ইউনির সিম কার্ডটা খুলে, ভেঙে ডাস্টবিনে ফেলে দিলাম। ফোনটাও ভেঙে ফেলে দিলাম ডাস্টবিনে। সেদিন থেকে চিরদিনের মতো হারিয়ে গেল মৈথিলী। সম্পাদকদের ফোন করে জানালাম, এই অন্তর্ভুক্ত প্রকাশিত হবে না।

সেই থেকে চুপ করেই ছিলাম।

আজ পর্যন্ত।

## পাদটীকা

- ১। গুজরাতের আমেদাবাদ শহরের কাছে একদল পুলিশ ২০০৪ সালের ১৫ জুন তারিখে তিনজন সঙ্গী-সহ গুলি করে মারে ১৯ বছর বয়সী ইশরাত জাহানকে। সেইসময় আমেদাবাদ পুলিশ বলেছিল এরা হচ্ছে পাকিস্তানভিত্তিক সন্ত্রাসবাদী সংগঠন লশকর-ই-তাইবার সদস্য, গুজরাতের মুখ্যমন্ত্রী নরেন্দ্র মোদিকে হত্যার চক্রান্তে জড়িত ছিল। অন্য তিনজন নিহতের নাম জিশান জোহর, আমজাদ আলি এবং জাভেদ শেখ।
- ২। <http://www.tehelka.com/2011/12/dead-man-talking/>
- ৩। <http://www.tehelka.com/2010/07/breakthrough-expose-so-why-is-narendra-modi-protecting-amit-shah/>
- ৪। <http://www.tehelka.com/2013/07/tehelka-expose-validated-cbi-says-ishrat-jahan-encounter-fake/>
- ৫। <http://www.outlookindia.com/newswire/story/ishrat-jahan-encounter-fake-cbi-chargesheet/802685>
- ৬। <http://timesofindia.indiatimes.com/india/DG-Vanzaras-letter-to-chief-secretary-Gujarat-government/articleshow/47201125.cms>
- ৭। [http://cbi.nic.in/newsarticles/pressclips/aug\\_2013/PC\\_20130802\\_4.pdf](http://cbi.nic.in/newsarticles/pressclips/aug_2013/PC_20130802_4.pdf)
- ৮। রিপোর্ট প্রকাশিত হওয়ার পর মানসি সোনিকে যথেষ্ট ভুগতে হয়। বাড়ির লোকেরা তাঁকে আমেরিকায় ফিরে যাওয়ার জন্য চাপ দিতে থাকেন। এ থেকেই বোঝা যায়, আমার আশঙ্কা অমূলক ছিল না। এ-সংক্রান্ত ফুটেজটি প্রকাশ না-করার সিদ্ধান্ত নিই আমি।
- ৯। <http://www.tehelka.com/2011/04/gujarat-ex-intelligence-chief-blames-modi-for-gujarat-riots/>
- ১০। [http://timesofindia.indiatimes.com/defaultinterstitial\\_as.cms](http://timesofindia.indiatimes.com/defaultinterstitial_as.cms)
- ১১। <http://blogs.timesofindia.indiatimes.com/masala-noodles/is-parveen-togadia-getting-back-at-narendra-modi-through-hardik-patel/>
- ১২। <http://www.youtube.com/watch?v=fOHfmQY8aOw>
- ১৩। <http://indianexpress.com/article/india/india-others/gujarat-ips-officer-rahul-sharma-who-took-on-govt-to-retire/>
- ১৪। পূর্বোক্ত।
- ১৫। <http://www.tehelka.com/2011/02/senior-ips-officer-sanjeev-bhatt-arrested-in-ahmedabad/?singlepage=1>
- ১৬। [http://epaper.timesofindia.com/Default/Layout/Includes/MIRRONEW/ArtWin.asp?](http://epaper.timesofindia.com/Default/Layout/Includes/MIRRONEW/ArtWin.asp?From=Archive&Source=Page&Skin=MIRRONEW&Basettref=)

PMIR%2F2010%2F07%2F27&ViewMode=HTML&PageLabel=9&EntityId=Ar00900&AppName=1.

- ১৭। <http://timesofindia.indiatimes.com/city/ahmedabad/Gujarat-DGP-fires-a-salvo-at-govt-over-police-transfers/articleshow/4994912.cms>
- ১৮। এই স্বীকৃতিটি অত্যন্ত গুরুত্বপূর্ণ, কেননা নানাবতী কমিশনে সাক্ষ্য দিতে গিয়ে রাজ্য সরকারের কৃমিকা সম্বন্ধে স্বীকৃতিশীলতা দেখা দিয়েছিল চক্রবর্তীর এবং বিভিন্ন সময়ে দ্ব্যর্থনূলক বিবৃতি দিয়েছিলেন তিনি।
- ১৯। চক্রবর্তী বলছেন নানাবতী কমিশন সরকারের পক্ষে বেশি কার্যকরী ছিল, অর্থাৎ তিনি বলতে চাইছেন যে বিচারপতি নানাবতীর নেতৃত্বে গঠিত কমিশন যেসমি সরকারের পক্ষপাতী ছিল।
- ২০। এখানে চক্রবর্তী বলতে চেয়েছেন—অন্য একজন অফিসার ডিজি হিসেবে সেবা দেকেন, যিনি দাসার সময়ে মুসলিমদের ওপর হামলা চালানোর কাজে সরকারকে প্ররোচন দিয়ে চলবেন, এমন কোনো আশঙ্কা থেকে তিনি পদত্যাগ করেননি।
- ২১। এখানে ২৭ ফেব্রুয়ারির সেই মিটিংয়ের কথা বলা হচ্ছে যেখানে যেসমি নাকি মুসলিমদের হত্যা করার জন্য অফিসারদের নির্দেশ দিয়েছিলেন বলে শোনা যায়। সিং অপারেশন চালাতে গিয়ে নানা জনের বক্তব্য শুনে আমার মনে হয়েছে—এ ধরনের কোনো নির্দেশ যেসমি দেননি। তবে চক্রবর্তী এবং অশোক নারায়ণ দু'জনেই বলেছেন যে রাজ্যের বিভিন্ন অধিকারিককে আলাদা আলাদা ভাবে নির্দেশ দেওয়া হয়েছিল। পি.সি.পান্ডেও প্রায় একই কথা বলেছেন। তিনি বলেছেন—ও-র কম স্পর্শকাতর পরিস্থিতিতে এবং দেশের ইতিহাসে মূলবোতের সংবাদমাধ্যমে সর্বপ্রথম কোনো দাসার ঘটনা সরাসরি দেখানো হচ্ছে এমন অবস্থায় এত বড়ো কুঁকি নেওয়ার মতো বোকামি কোনো মুখ্যমন্ত্রীই করতে পারেন না।
- ২২। চক্রবর্তী এখানে কুলদীপ শর্মার কথা বলেছেন বীর ওজরাভের ডিজি হওয়ার কথা ছিল, কিন্তু ওজরাভ সরকার তাঁর বিরুদ্ধে তুচ্ছ ২০ বছরের পুরোনো একটা এনকন্ট্রারের মামলা নতুনভাবে দায়ের করে। শোনা যায় সমবার সংক্রান্ত একটা কলেজারির ঘটনায় শর্মা ওজরাভের গৃহমন্ত্রী অমিত শাহকে চ্যালেঞ্জ করেছিলেন বলেই তাঁর বিরুদ্ধে এই ব্যবস্থা নেওয়া হয়। কুলদীপ ও প্রদীপ শর্মা দু'জনের বিরুদ্ধে অমিত শাহের ক্রুদ্ধ হওয়ার আর একটা কারণ হল—এরা দু'জনই নাকি একটা সুপারগেট কলেজারির কথা ফাঁস করে দিয়েছিলেন, যেখানে একজন মহিলার সম্বন্ধে অবৈধভাবে বোজখবর নেওয়ার জন্য জি.এস. সিংহলকে দেওয়া অমিত শাহের নির্দেশ রেকর্ড হয়ে গিয়েছিল। রেকর্ডেড কথাবার্তার অমিত শাহ বলেছিলেন কাজটা 'সাহেব'-এর নির্দেশেই করতে হবে—এখানে সাহেব বলতে সম্ভবত নরেন্দ্র মোদির কথাই বলেছিলেন তিনি।
- ২৩। <http://www.tehelka.com/2010/09/geeta-johri-was-known-to-be-a-fearless-officer-so-what-accounts-for-her-flip-flops/?singlepage=1>
- ২৪। <http://www.dnaindia.com/india/report-arun-jaitley-writes-to-pm-on-congress-dirty-war-against-narendra-modi-1896969>
- ২৫। <http://www.ndtv.com/cheat-sheet/jailed-cop-dg.vanzara-attacks-amit-shah-gujarat-government-fake-encounters-533486>
- ২৬। <http://indiatoday.intoday.in/story/jagruiti-haren-pandya-s-wife-to-contest-gujarat-poles-keshubhai-patel-gujarat-parivartan-party/1/235242.html>
- ২৭। এই হত্যার পিছনে মূল চক্রী ছিলেন মুফতি সুফিয়ান। স্থানীয় মৌলবি ছিলেন তিনি। পাতিয়া খুন হওয়ার পর স্বচ্ছন্দে ওজরাভ ছেড়ে পালান তিনি। লক্ষ্মীর বিবরণ হল, আমেদাবাদে পুলিশের সদরদপ্তরের একেবারে পাশে বাস করা সত্ত্বেও, পাতিয়া নিহত হওয়ার এক সপ্তাহের মধ্যেই পালাতে সক্ষম হন তিনি।

জীবন বাজি রেখে দীর্ঘ আট মাস ধরে এক অন্তর্ভুক্তের পথে যাত্রা করেছিলেন সাংবাদিক রাণা আহিযুব। তারই ফসল এই গুজরাত ফাইলস। অন্তর্ভুক্তের বিষয়বস্তু ছিল গুজরাত দাঙ্গা, ভূয়ো সংঘর্ষে নিরীহ মানুষদের হত্যা করা এবং গুজরাতের গৃহমন্ত্রী হরেন পাণ্ডিয়ার হত্যার রহস্য। প্রতি মুহূর্তে মৃত্যুর কিনারা ধরে চলতে চলতে অসংখ্য চমকপ্রদ তথ্য তুলে এনেছেন লেখিকা।

২০০১-১০ সালের মধ্যে যে-সব আমলা ও পুলিশকর্তা গুজরাতের সর্বোচ্চ পদে ছিলেন, ছদ্ম পরিচয়ে গোপনে তাঁদের সাক্ষাৎকার নিয়েছেন রাণা। তাঁর অনুসন্ধান দেখিয়ে দিয়েছে কীভাবে মানবতার বিরুদ্ধে অপারধে জড়িত থেকেছে গুজরাত রাজ্য প্রশাসন আর তার কার্যকর্তারা। আমরা জানতে পারি নরেন্দ্র মোদি এবং অমিত শাহের গুজরাত থেকে দিল্লির মসনদ অভিমুখী যাত্রাপথকে কীভাবে মসৃণ করে তুলেছিল এইসব ঘটনা। তদন্ত কমিশনের সামনে যে-সব কার্যকর্তার স্মৃতিভ্রংশতা দেখা দিয়েছিল, তাঁদেরই বয়ানে উন্মোচিত হয়েছে এক নির্মম ও ভয়াবহ সত্য।

এ-বইয়ের প্রাসঙ্গিকতা নিয়ে কোনো প্রশ্নের অবকাশ নেই। আজকের রাষ্ট্রপোষিত অসহিষ্ণুতার প্রেক্ষিতে বইটি আরও বেশি প্রাসঙ্গিক হয়ে উঠেছে।